

遺山先生文集

二



遺山先生文集卷第二十一

碑銘表誌碣

御史張君墓表



東平幕府從事張昉持文士李周卿所撰先御史君行事之狀請於僕言先御史在興定元光間於州縣為良民吏於臺閣為材大夫朝譽鵠然吾子所知喪亂之後挈家還鄉社春秋雖高而神明未衰乃一意與世絕素然以閉戶讀書為業者餘十五年凡向之所以為良民吏材大夫者未嘗一語及之沈默退讓齊魯大夫士翕然稱道之亦吾子所不知者棄養以來三見霜露而不肖孤以斗食之後汨沒簿領間不得灑掃墳墓列樹碑表使先子名德懿範聞焉而不彰誠懼一旦先狗馬填溝壑其何以瞑目乎今屬筆於子幸為論次之以俟百世之下僕嘗謂聖人澤後世深矣今屢苟有間田豐鎬之間男女異路孔子述文王六七百歲故言衣冠禮樂則莫齊魯為盛宜矣百年以來東平劉莘老斯立宣叔之相孫文元賈公昌朝之家世勝陽張丞相永錫日照清獻張公父子東阿壽國張公肖國侯公叅政高公奉高丞旨堯公黃山內翰趙

公磁陽內翰關公敦庵著艾海內取以為法其餘經明行脩由晦道商公醇德王先生而下何可一二數至於人代變革才智勇皆廢守道之士懷先王之舊俗區區不能自巳者往往有之如御史君者皆是也古有之魯無君子者斯焉取斯其澤及後世之謂乎謹按中奉大夫故治書侍御史守申州刺史張君諱汝明字子玉世家汶上曾大父靖大父考皆潛德弗耀父恕用君貴贈中議大夫母程氏清河郡太君君三歲喪父程母故衣冠家而有賢行力課君學君亦能自樹立如成人弱冠擢大安元年經義進士第釋褐將仕郎調潁州泰和縣主簿崇慶元年換懷州武陟簿丁內艱服除貞祐四年由鹿邑簿入為尚書省掾正大元年終更擢同知嵩州軍州事盜入軍資庫而無迹可尋官繫主者獄凡十餘人不往訊掠皆自誣服君時以檄出及還繫者稱屈君諦審知其寃即縱遣之不數月諸賊卒以賊敗郡人以為神明三年八月辟許州長葛令未幾政成農司以稱職聞及罷縣父老上贖禮一無所受乃相率立祠以致去思之心馬六年二月召為太常博士權監察御史不半歲

遷戶部員外郎七年八月授治書侍御史八年七月遷禮部員外郎兼脩起居注俄陞歸德治中兼提舉河防學校常平漕司事不赴天興元年遷領萬州刺史二年二月改授申州以庚戌七月二十有二日進疾春秋七十有六終於東平遵化坊私第之正寢娶魏氏封清河縣君子男三人長即昉也今爲東平萬戶府經歷官追領同知單州防禦使事次擘次煦皆早卒男孫二人女孫一人尚幼孤子某以庚戌年八月之三日奉君之柩柩於汶上由村里某原之先塋禮也君資稟厚重與人敦信義平君恂恂似不能言及當官而行剛介有守論議純正人不能奪仕宦三十年家無餘資其他尚多可稱弗著者不爲窮達易節者銘曰

汶之洋洋思聖有堂禮樂衣冠此爲之鄉維御史君尤魯士之良沉潛而剛者艾而敦厖可以爲公卿大臣訓于四方昔往矣秉筆帝旁鵠然粹溫如珪如璋今來斯微服屨衡門棲遲詠歌虞唐謂其逢也耶茫乎及夜舟之藏其不逢也耶泰焉如晚節之昌抱明月而長終懷舊俗而不忘在君爲樂天而識者涕滂林深而蘭芳

風雨如晦而鷄鳴有常世無良史久矣孰爲發幽潛之光

御史程君墓表

君諱震宇威卿先世居雒陽元魏遷兩河豪右實雲中三州遂爲東勝人曾大父獲慶大父總質直尚氣節鄉人有訟多就決之至于婚嫁喪葬不能給者亦借力焉父德元自少日用俠聞嘗與群從分財多所推讓州里稱之復用君貴封太中大夫雷內翰淵述世德之舊俗矣太中子八人長曰鼎孝弟仁謙閨門肅睦有古君子之風以六赴廷試賜第調濮州司候次曰雷由武弁起身官懷遠大將軍君其第三子也資嚴毅雖所親不敢以非禮犯之幼日夢人呼爲御史故每以諫輔自期章宗明昌二年經童出身補將仕佐郎奉和中年及注授臨洮府司獄忻州司候判官以廉幹爲西京摺討司奏辟提控沿邊營城糧草擢王剛勝詞賦進士一科換樞師王簿宣宗幸汴梁入爲尚書省今史時相知其可用不半歲特授南京警巡副使秩滿例爲廣益倉監支納官與定初辟舉法行用薦者除陳留令將之官白府尹言縣務不治今

自任其責丞簿佐史輩無預焉幸無擾之使令得盡力尹諾之既到官事無大小率自負荷次官率行而已時秋大旱冬十月乃雨歸德行樞密院發民牛運糧徐邳君為使者言吾麥乘雨將入種牛役興則無來歲計矣使者不能寬十日程耶民事果集雖乏軍興吾不辭也使者怒而去君力畢農種糧運亦如期而辦行院仍奏君要譽小民不以軍食為急朝廷不罪也既受代大司農奏課為天下第一御史臺察能吏亦為奏首且言可允臺諫京東總帥府奏僻經歷官不許乃拜監察御史君蒞職慨然有埋輪之志即劾奏平章政事荆王以陛下之子任天下之重不能上贊君父同濟艱難願乃專恃權勢滅棄典禮開納貨賂妄進退官吏從史奴隸侵漁細民名為和布其實奪取諸所不法不可一二數陛下不能正家而正天下難矣書奏宣諭御史臺程某敢言如此佗御史不當如是耶且有旨切責荆王出內府銀使償物直敕司馬杖大奴尤不法者數人於是權貴皆為斂手東方頻歲飢饉盜賊蠶起特旨以君攝治書侍御史兼戶部員外郎運京師糧八万石賑徐邳君經畫饒

道十里一置驛羅弓刀以防寇效具斧斤以完器用備晉藥以起病疾勸助藉以通留滯輦運相仍如出枉席之上飢民踵來凡所以為貧為糴為賑贍付度肥瘠無一失其當州民請於京東帥府願留我程御史以福殘民帥府奏君行為部官詔再往徐宿邳荆王積不平宴遣諸奴誘姦民徐璋造飛語訟君於臺諸相不為奏而王獨奏之宣宗頗直君欲勿問王執奏再三乃從之哀宗時在春官遺晉藥官王子玉諭旨推問官程御史為縣治行第一監察天稱職有罪無罪勿為留難已而璋伏誣告君當還臺在律官人與部民對訟無罪猶解職王風大理寺御史言天下事在所皆部民竟用是罷官君泰然自處都無已仕之愠聚書誦讀蓋將終身焉天不假年以正大元年三月二十有一日春秋四十有四終於京師嘉善里之私第積官大中大夫夫人史氏封安定郡君先君三年殁于一人思溫舉進士以某年月日舉君之柩柩於金昌府芝田縣某里太中君之新塋禮也嗚呼生才實難盡其才重為難使君得時行道坐於廟堂分別賢否其功烈可量也哉方行万里而車折其軸有才

無命古人所共嘆雖然地遠而位卑身微而言輕  
乃以一御史犯疆王之怒卒使權貴落膽縉紳增氣雖  
不過而去伸眉高談亦可以無愧天下矣尚何恨耶乃為銘  
曰曲士賣直見射而慄鄙夫媼媼與兔同波犯父  
子之至難執絞許而上刺橫潰我障剛薄我阿  
鍊心成補天之石奮筆為却日之戈古有之和  
臣不忠忠臣不和彼容容者之所得矣後福之  
能多有山維嵩有水維河程君之名永世不磨

平叔墓銘

河間許古道真以直諫見稱德陵朝正大初詣闕  
拜章言八座率非其材省寺小臣有可任宰相者  
不大升黜之則無以致中興章奏詔道真赴都堂  
問孰可為相道真以尚書省令史商衡對當是時  
上新即大位經略四方思所以弘濟艱難者為甚  
力道真已得請君伊川即命驛召之落致仕復右  
司諫天下想望風采道真亦慷慨願以人所不敢  
言者為天子言之及論天下事乃首以公為可相  
則公之材為可知矣公字平叔商氏系出陳繼遷  
鄆七世祖南華府君諱懷飲官于曹遂占籍馬曾  
祖諱岡以武弁入官宋末奏補從事換忠勇校尉

祖諱駒兩廷試教授鄉里考諱錫用公貴及封朝  
請大夫妣王氏濮陽縣太君公朝請君之長子也  
初從鄉先生李昉方平學貧無以為資方平愛其  
才每矜恤之使得卒業年二十五登崇慶二年詞  
賦進士第釋褐洛郊簿以廉能換郟縣尋辟威戎  
今時歲飢民無所於糶公白之行臺得開倉賑貸  
頗以全活者甚衆縣民為之立祠再辟原武令以  
例罷入為尚書省令史歷報草邊關知管差除三  
考再滿授戶部主事兩月擢監察御史又充右  
司都事於是朝廷知公蓋將大用矣改同知河平  
軍節度使事不赴奏克樞密院經歷官進領昌武  
軍同知節度使事丞相華公領陝西行臺奏公偕  
行充左右司員外郎密院表留有旨行臺地重急  
於用人可從丞相奏自是臺事一決於公矣明年  
召還行臺再上奏留之又明年丁內艱乃得還時  
正大八年也十月起服中充秦藍總帥府經歷官  
正月河潼失守召主帥入援二月九日軍至陝將  
由間道之商州十一日抵蘆氏山與北軍遇相拒  
天靈中士卒飢不能戰是夜遂潰潰公為北軍所得  
欲降之令去巾不從將害公有止之者曰此忠孝

人也姑留之其夜公解佩刀自刎時年四十七積官至少中大夫濮陽縣伯食邑七百戶賜紫金魚袋初娶鄧氏再娶鄭氏並封濮陽縣君子男二人長曰挺次曰隴安女一人適泗州司候安邑劉懋公事長上以禮接下以誠與人交有終始家居亦未嘗有愠容性嗜學藏書數千卷古今金石遺文人所不能致者往往有之南渡以來士大夫以據世之學自名高者闕略而無統紀下者或屑屑於簿書未蓋之間公資雅重遇事不碌碌人所不能措手率優爲之苟可以利物則死生禍福不復計平君以大事自任而人亦以大任期之至今評者以公用遠其長使之卒然就一死爲世所惜也孤子挺等以某年月日奉公木冠葬於某原好問導公知爲專敢述梗槩而爲之銘以寄招魂之詞詞曰唐虞之世麟鳳游出非其時聖爲憂黃琮禮天帝所休毀之積中孰汝洩肉茂異君上派坐之廟堂衆職脩天路阻長往莫由維兄有角不我投人以死諱我則求木冠李衛汗楊瘞氣息奄奄藏鬼幽禽息鳥視天爲囚枯龜千年一蟄游昇君完節乃所酬不然報施神其尤河濟之水

無千秋若孫君子公且俛豆蓬奔走物繫羞魂兮歸君安此丘北陰莽墟不可留

希顏墓銘

南渡以來天下稱宏傑之士三人曰高廷玉獻臣李純甫之純雷淵希顏獻臣雅以奇節自負名士喜從之游有木冠龍門之目衛紹王時公卿大臣多言獻臣可任大事者紹王方重吏員輕進士至謂高廷玉人材非不佳恨其出身不正耳大安末自左右司郎官出爲河南府治中卒以高材爲尹所忌瘦死雒陽獄中之純以薊州軍事判官上書論天下事道陵奇之詔兼准上軍仍驛遣之泰和中朝廷無事士大夫以宴飲爲常之純於朋會中或堅坐深念咄咄嗟嗜若有旦夕憂者或問之故之純曰中原以一部族待朔方兵然竟不知其牙帳所在吾見華人爲所魚肉去矣聞者訕笑之曰四方承平餘五六十年百歲無狗吠之警塗不以時自娛樂乃妖言耶未幾北方兵動之純從軍還知大事也去無復仕進意蕩然一放於酒未嘗一日不飲亦未嘗一飲不醉談笑此世若不足玩者貞祐未嘗召爲右司都事已而擯不用希顏正大初

拜監察御史時主上新即大位宵衣旰食思所以弘濟艱難者爲甚力希顏以爲天子富於春秋有能致之資乃拜章言五事大略謂精神爲可養初心爲可保人君以進賢退不肖爲職不宜妄費曰力以親有司之事上嘉納馬廩寅之冬朔方兵突入倒迴谷勢甚張平章芮公銳擊之突騎退走填壁谿谷閉不可勝筭乘勢席卷則當有謝玄淝水之勝諸將相異同欲釋勿追奏至廷議亦以爲勿追便希顏上書以破朝臣孤注之論謂機不可失小勝不足保天所予不得不取引援深切灼然易見而主兵者沮之策爲不行後京兆鳳翔報北兵狼狽而西馬多不暇入衛數日後知無追兵乃聚而攻鳳翔朝廷始悔之至今以一日縱敵爲當國者之恨凡此三人者行輩相及交甚歡氣質亦略相同而希顏以名義自檢彊行而必致之則與二子爲絕異也蓋自述朝士大夫始知有經濟之學一時有重名者非不多而獨以獻臣爲稱首獻臣之後士論在之純純之後在希顏希顏死後有人物渺然之嘆三人者皆無所遇合獨於希顏尤嗟惜之云希顏別字季默渾源人考諱思大定末仕

爲同知北京路轉運使事希顏其暮子也崇慶二年中黃裳擢進士乙科釋褐涇州錄事不赴換東平府錄事以勞績送領東阿縣令調徐州觀察判官召爲荆王府文學兼記室參軍轉應奉翰林文字同知制誥兼國史院編脩官考滿再任俄拜監察御史以公事免用宰相侯羊卿薦除太學博士還應奉終于翰林脩撰累官太中大夫娶侯氏子男二人公孫八歲宜翁四歲女二人長嫁進士陳某其幼在室初希顏在東平東平河湖重兵廢也驕將悍卒倚外寇爲重自行臺以下皆務爲摩拊之希顏莅官所以自律者甚嚴出入軍中儼然不爲屈故頗有喧嘩者不數月間巷間家有希顏畫像雖大將亦不敢以新建書生遇之嘗爲戶部高尚書唐卿所辟權遂平縣事時年少氣銳擊豪右發奸伏一縣畏之稱爲神明及以御史起行河南得賊吏尤不法者榜掠之有至四五百者道出遂平百姓相傳雷御史至豪猾望風遁去禁下一兵與權責有連脫役適田間時以藥毒殺民家馬牛而以小直脅取之希顏捕得數以前後罪立杖殺之老幼聚觀万口稱快馬爲不得行然亦坐是



失官希顏三歲喪父七歲養於諸兄年十四五貧無以爲資乃以胄子入國學便能自樹立如成人不二十游公卿間太學諸人莫敢與之齒渡河後學益博文益奇名益重爲人軀輪椎傭髻張口哆頰溼冊眼如望羊遇不平則疾惡之氣見於頰間或鬻蔭大罵不休雖痛自摧折待亦不能變也食蕪三四人飲至數斗不亂杯酒淋漓談詠間作辭氣縱橫如戰國游士歌詠慷慨如關中豪傑料事成敗如宿將能得小人報抹窟穴如古能吏其操心危慮患深則又似夫所謂孤臣孽子者平生慕孔融田疇陳元龍之爲人而人亦以古人期之故雖其文章號一代不數人而在希顏仍爲餘事耳希顏年四十六以八年辛卯八月二十有三日暴卒後二日葬戴樓門外三王寺之西若干步好問與太原王仲澤哭之因謂仲澤言星殞有占山石崩有占水斷流有占斯人已矣瞻烏爰止不知於誰之屋耳其十月北兵由漢中道襲荆襄京師戒嚴銘曰

維季熙父起營平弱齡飛鶩振厥声備具文武任公卿百出其一世已驚紫髯八尺傾漢廷前

有趙張取自名目中之敵無逆情太息流涕請進兵撈聽不及馳迅震一日可復齊百城天網四面開鯢鯨砥柱不採洪濤傾望君佐王正邦經或當暑言番日星一憤不起誰使令如秦而帝室勿生不然亦當蹈東溟元精燭烟賦子形溢焉寧與一物并千年紫氣鬱上征知有龍劍留泉膏何以驗之石有銘

大司農丞康君墓表

君諱錫字伯祿姓康氏世爲寧晉人大父諱成嘗與昆弟分財他田宅定無所問止取南中生口十餘人縱爲民而已以故家獨貧考諱溢少爲里胥資純篤縣令者倚之以納賄及令爲御史所劾溢自念言直則令被罪終世不齒渠官長而我以事證之何以立於世乃自縊而死令竟以無跡可尋獲免伯祿現孤養於外祖田氏田見伯祿骨骸異他兒謂當有望使之應童子舉飲食以起躬自調護備極勞苦得解赴都一日暮行菱葦中懼爲同行者所遺至負之而起及長師柏鄉王翰周輔束脩不能備周輔與諸生共贖給之中崇慶二年進士第釋褐樸陽簿警是判官辟彭原今入爲尚書省掾

考滿遷開封府判官俄拜監察御史言宰相侯肇師安石非相材提點廷侍為宗室安之聲勢煥煥公門請托不可使又在禁廷朝議備之選授右司都事遷京南路大司農丞破上蔡諸縣群不逞把持之黨彈種人以賍汚尤狼藉者五六輩宰相有不說者云康錫不欲吾種人在仕路耶因以飛語中之出為河中府治中充行尚書六部郎中城陷投水死時年四十八伯祿孝於母友於其弟有恩義於朋友從仕則死心奉公以為民古所謂公家之利知無不為者唯伯祿為然同年生如雷御史希顏莫都司京父宋內翰飛卿之等名士數十人世以比唐曰龍虎榜至論公輔大器尚以伯祿為稱首云歲戊申秋九月予過寧晉伯祿之從弟銳招魂葬伯祿於唐城鄉東南五里之先塋以其第三子阿千為之後伯祿先娶蘭州游氏再娶魯山張氏皆封京兆縣君一子彭原張出岐於京師之

兵銘曰

仕以義行死與義俱義存義亡葬何計乎江魚寧晉之壘維君之君眷焉顧之泣涕漣如豈無蛟蜃之波以投界乎詭夫百歲而下有

歷九開為上訴者其有說歟

再元吉墓誌銘

元吉諱天驥姓聶氏代之五臺人元吉其字也父諱明自先世權於財而以陰德聞里中用元吉貴封太中大夫元吉其長子也弱冠登進士第釋褐汝陰簿轉睢州司候廉舉封丘令人為尚書省選閱糧草房令史考滿授吏部主事權監察御史夏人請和使者玄市於會同館外戚有身自貿易于其間者元吉以大官近利失朝廷體且取輕外夷彈之遂忤太后旨除同知汝州防禦使事未赴為陝西行臺所辟仍用舊書遙領金安軍節度副使兼行尚書省都事不半歲人為右司員外郎例授京兆府治中衛州行尚書六部事慶陽圍急朝議以宿州總帥柱棟之奏充經歷官圍解從別將守邠將欲棄州而東元吉陳說利害力止之不從將坐是被繫辭連元吉降授京兆治中尋有訟其冤者即召為開封府簽事旬月還右司員外郎丁太夫人憂未百日而奪哀復職車駕東遷公在留中賊殺二相兵及元吉臥創二十許日醫言可治公誓之以死死之二日權厝某所娶王氏子男二人

默默少不能俟天之定也

遺山先生文集卷第二十一

長黃童次玄童文三人長嫁進士張伯豪孝友有父  
風夫歿歸在室元吉既葬之明日女不勝哀慕絕  
脛而死時亂已極凌奪悉報無復人紀女獨以大  
義自免士大夫賢之有為泣下者其二尚幼初元  
吉以衛紹王崇慶二年登科時雷希顏淵來飛卿  
九嘉商平叔衛張正卿天綱冀京父禹錫康伯祿  
錫皆在選中朝野以為得人而元吉起田畝能以  
雅道自將踐歷臺閣若素宦然諸人多以為不及  
也予與元吉同鄉里年相若仕相及然元吉重選  
予資下急元吉耿耿自信未嘗以言下人予則矯  
枉過直率屈已以拘物道不同不相為謀故雖與  
之同鄉里年相若仕相及而交未嘗合也今元吉  
已矣予惜其有志於世世亦望馬而卒之無所就  
也乃為之銘以哀之辭曰

歲牆之死匪曰正命義存義亡何適非正天

奪予來力獨奚競多壽辱隨瞑目為竟善乎

子程子之言曰今世之士其無幸歟展布其

四體未有以為容也而得拱楷萌意於方寸

未有毫末也而觸機棄吾於吾元吉誠愛其

得所以死而死誠亦悲夫抱一粟之操泯泯

道山先生文集卷第二十二

碑銘表誌碣

太中大夫劉公墓碑

公諱汝翼字舜卿姓劉氏世為淄州鄒平人曾大父諱昇政和末擢進士第釋褐陸平主簿特西山剽賊千餘人據險為柵旁人多被劫掠朝廷責州將擒捕之州將謀于官屬諸人惟怯不敢應公毅然曰兵力單弱恐不能勝賊獨當以氣攝之耳乃常服詣賊柵自通姓名且言所以來辭情慷慨群盜慙服相與宴飲明日與其首把臂俱下而無亡鏹之費詔遷白馬令以賞其功大父諱仲不樂仕進以財雄鄉里周急繼困為多父諱時昌太定初律學出身歷孟州軍事判官終於左三部檢法用法詳慎多所平反後用公貴累贈太中大夫公其第四子也幼穎悟日誦數百言師事鄉先生單雄飛張元造初治書改授易卒業於詩山東諸儒間聲名籍甚貞祐四年經義第一人擢第特授儒林郎賜緋衣銀魚調兗州錄事未赴丁母彭城郡太君邵氏憂服除借注盧氏主簿入為尚書省掾終更遷同知嵩州軍州事兼揚翟縣令縣戶籍餘三

萬豪猾所聚令丞以不自檢為所把持莫有得事代者公下車差次貧富一一籍記之一夫之彼斗粟之欲均賦而平及之大豪以苞苴私見欲相誣染公發其奸并以所賄者曉于衆至於宗室大家聲勢熾熾人莫敢與之抗一為平民所訴必深治而痛繩之黜賊楮二養巧者為子羅富民聞駭有勸解者即逡巡而退乃於隱處以大楮繫兒臂背腫青隨以藥殺之明日就富家索命公知其奸計械楮送獄楮咆哮不即承公召耐司宿賊與楮同禁以計規之數日言意相得乃肯吐露事既白竟償丐者命一縣稱為神明考滿換洛陽令陽翟父老百餘人詣都堂請留不聽縣中為立生祠以致去思之心焉洛陽政成召為戶部主事正大八年超同知汝州防禦使事留為戶部員外郎官太中大夫輕車都尉彭城郡開國伯食邑七百戶賜紫全魚紫河南受兵中令君聞公名以 朝旨理索北歸僑居鎮陽辟萬戶史侯幕府行部郎中歲矣子辟尚書省叅佐癸卯 朝命擢授行六部侍郎庶訪使者佩金符公春秋已高力求引退往來燕齊之間以壬子冬遘疾春秋六十有六終於燕京

開陽坊私第之正寢實十一月之六日也娶袁氏  
封彭城郡君子男五人長曰衍奏差清滄鹽司都  
提舉次曰衍真定河間路都提舉次曰衡清鹽司  
提舉次曰復次曰元諸子皆傳家學女二人一適  
進士謝芝一適士族張簡男孫四人尚幼女孫七  
人二及笄者適士族徐幼在室諸孤等以年月日  
奉公之柩歸葬於邳平梁鄒鄉鎮東原之先塋  
禮也公幼有至性生六歲太中公下世藁葬燕城  
南僧舍既冠聞知族視所在特往迎之大夫入鐘  
愛于公不歆使之遠去膝下公因東平鄉賦徑至  
燕城歲月既久立瓏苑泣哀慕訪求十數日乃獲  
刻覓為識官覓宛然扶護東還州里嘉嘆公之立  
志已見于此矣百年以來御題魁選以趙內翰承  
元賦周德莫若文王起出倫等有司目為金字品  
及公經義第一詩傳三題絕去科舉蹊徑以古文  
取之亦當在優等故繼有金字之褒連宰二大縣  
以經術飾吏事雖擊仗強梗人不能欺至于仁心  
為質亦要其終而後見也南渡以來士子潛心文  
律視師弟子之傳為重從公講學者如羅鼎巨賈  
夜揚李浩輩往往甲一擢第其有功後進蓋如此

某早以詩文授知于公千慮一得極口稱道諸孤  
以碑銘為請輒為銘詩以表公墓而不敢一言私  
焉其銘曰

風雅三百正而葩何以蔽之思無邪詎訓瑣細  
春官科益政弗達奚取多公昔治詩始萌芽真  
積力久無復加石磨玉珠絕類殿內義信厚外  
柔嘉百里之命令所荷銅墨卑品責望奢是時  
軍聲振三河星火餽饑供荷戈筋疲力涸方薦  
蹙獨以砥柱當頽波翁歸記籍列等差守以安  
靜無敢譁瘵疫剛瘴公禁訶流離顛頓公拊摩  
三月報政民氣和昔也殿屎今矣歌望公長劍  
冠艷我百未一試老澗阿不龍不蛇賢人差人  
言公材如命何公家嘉樹蔭以華會與毛鄭俱  
名家墓碑有銘豈浮夸劉宗泐川其未涇

中順大夫鎮南君節度副使張君墓碑

癸巳之兵既破河南景賢微服返鄉里予每過寧  
晉景賢必以杯酒相勞苦予問君閑居何以自娛  
景賢為言吾平生嗜讀書喪亂以來典籍散落獨  
有通鑑及柯山書解日得專志如此隨駕隨讀頗  
若有所得異時泅沒科舉鞅掌簿書殆於學業無

尚書省令史考滿權黃河漕運副使提舉丁外艱  
服除辟涇川令前政有籍惡子姓名揚之通衢者  
景賢到官遂命撤去使渠輩知自新之路遂終更  
果無一犯者有司以稱職聞壬辰二月遷南京左  
警巡院副使屬歲飢縣官作糜粥以食餓者曰費  
菽米數斛斛景賢區處有法鼠雀無敢耗人受實  
惠多所全活六月以涇川課取陞一階改開封令  
九月復以左警巡院副使借注之大槩景賢為人  
有幹局而以學術濟之為政不務表操人久而信  
故所去見思其年積前後勞進領鎮南軍節度副  
使兼蔡州管内觀察副使官中順大夫上騎都尉  
清河郡開國伯食邑七百戶以丁未九月之七日  
春秋六十有七遘疾終於家越四日葬於縣西北  
唐城鄉內王里之先塋禮也配清河郡君王氏同  
縣康士成之女後景賢七年卒子男一人即世英  
也女二人長適平晉進士李銑次適安肅進士陳  
惟良男孫四人女孫二人皆幼銘曰

近民慈祥其馭吏也辭以莊悃幅無華愈又不  
忘晚節而昌幅中故鄉神理昭然飲食壽康聖  
謨洋洋詠歌虞唐殆天錫之以為善之樂歸老

今權河東北路轉運司戶籍判官帥府檢察君嚴  
於自俸滴水不交卻民兵來耕稼既廢軍食為重  
一府倚辦於君君悉力經畫取於民者均而給於  
軍者無所枉內外翕然以公平贊之府經歷官輸  
米入倉數不盈斛而倉官以盈斛受之君發其奸  
杖經歷八十德升賞君之直以上尊餉之又明年  
馮門破兵勢駭駭而南鄉曲以太原不可保趣君  
弟獻臣就謀去就君為獻臣言城不保必矣我臣  
子也尚欲逃死乎獻臣歎挈君妻子以出君又不  
可曰吾守官於此而不以妻子自隨是懷二也吾  
弟性吾死於此矣乃與之泣別於北門之外是歲  
城陷沒於兵實興定二年九月六日也得壽三十  
有七官奉直大夫娶武氏子男一人鐵和女一人  
方幼獻臣既通貴佩金符以年月日奉公衣冠葬  
於五村里西原之先塋禮也好問辱從君游獻臣  
以墓表見屬尚憶在汴梁結夏課時君日酣飲於  
世事略不介懷予亦笑其迂緩及入官其風力乃  
如此始恨交游半生知君不盡耳乃為述其故且  
系以招魂之辭其辭曰

若有人兮洵且都城復于隍兮徇以軀焉魂依

考其素途亞陽下招考宜可乎天厚子考內美  
俱縮劍墨考握瑾瑜虞脂膏考不自馮樞節苦  
考甘糲蔬護念所牧考劇髮膚鉅治強梗考惠  
俾孤宜貴而壽考與德符其執乘之考又孰除  
蒙山之丘考辭扮榆復子之鄉里考返厥初攬  
蓬之言考直厚誣舍我祖禰考將焉如汾沮如  
考參之墟楔偷群走考雄牙須俱腐草木考孰  
別區硯考歸來考安汝居

奉直趙君墓碣銘

予嘗愛予同年進士通許趙君仕不近名隱不遠  
俗藹然有古人之風故嘗求其淵源得汴人之賢  
者四人焉曰王礪逸賓王世賞彦功游摠宗之學  
易高先生仲震正之明昌中故相馬吉甫判開封  
逸賓彦功宗之俱以德行才能薦於朝逸賓鹿邑  
簿就請致仕彦功以親老調鞏州教官宗之議不  
受三人者趣嚮不同而時人皆以高士目之高出  
於世家而能以清介自守死心於六藝之學隱居  
嵩山二十年人望之以為神仙蓋逸賓則君之所  
師尊而高則其交久而敬者也惟汴梁聖賢所宅  
典章法度之所在流風善政之所從出興廢舉孝

養士太學薰醞誣浸作成人物之日久矣雖其細  
民溺於宣政侈靡之習而不能返至於學士大夫  
通經學古安貧樂道懷先王之澤而不為風俗之  
所奪移者故未絕也語有之魯無君子者斯焉取  
斯殆君之謂歟君諱端卿字正之其先浙入遠祖  
某以南販留東京因而家焉嘗仕漢鐵騎營指揮  
使與宋宣祖有里巷之舊及太祖取柴氏有旨訪  
求隱君不為出故終宋之世為民家其居通許以  
教讀為業者君之曾大父諱弼者也大父諱昱父  
諱渥居通許者四世矣君幼孤養於叔父澤資簡  
重簿於世味以曰父教以科舉之業而於經學有  
所得雖有聲塲壘間非其好也興定五年春省試  
魁多士遂登乙科釋褐散事即守解州安邑丞即  
閉戶讀書無復仕進意教誨子弟以孝弟忠信為  
根本身自表率使知踐履之實不徒事章句而已  
辟舉法行當路有知君之賢欲以一縣相屈者君  
為書以絕之正大初脩宣宗實錄揚禮部之美趙  
內翰周臣連章奏君為編脩官召至史館力辭而  
去執政聞君名有欲求見之者君深自閑匿不使  
見也天興壬辰避亂京居車駕東狩崔立劫殺宰

相都人聞變求死無所君方與正之對食顏色不以變投筋而起嘆曰知有今日久矣尚何言哉其七月二十八日以病終於寓舍春秋五十有四用軍恩積官至奉直大夫夫人同縣李氏子男二人長曰晉次曰益文一人適許州倉副使穆鑑男孫一人六九尚幼晉等以某年月日舉君之柩歸葬於縣東原之先塋禮也自利祿之學盛且百年間有以經術自揀者私欲既勝強為揀治之往往齟齬而不相入君天資既高且恬於進取其學也優柔饜飮久與俱化眉宇津津然望之知其為善人君子力省而功倍蓋有不可誣者晉來速益用所以知君者著于篇而不敢一言私焉銘曰

壽如其克渙如其融六經之春見服與容被合也人我天之通求人而得之何計幸逢還堵蕭然薇蕚不供商歌之聲天地滿中萬物並流至君而止司南聖涂發軔伊始黃裳元吉無庸清柴華髮元龜望君百年君遊不留道將就傳松栢之立石表其前是雅子趙子之墓過者式焉

史邦直墓表

邦直諱元姓史氏世為武陟人某年遷河內乃占

籍焉曾祖良祖萬父選三世在野毋常氏出土族知邦直可以起家力課之學邦直亦能自樹立徙鄉先生王國光游不數年學業大進遂擢興定五年詞賦一科釋褐武陟簿懷孟被兵已久邦直安集有方鄉人賴之秩滿以材選管句三白渠入為尚書省令史宰相李公適之聞其名問以三白渠利害邦直以書對細字稱三十畝推寬源委无公私所以為弊者無不備按而用之強有力者持無所容奸遁之大稱異之遷管句黃河漕運未幾河南破右丞仲德行臺徐州檄邦直守禦注按彭城令尋轉充觀察判官危急存亡之際多所連白仲德甚倚重之喪亂後聞東歸歲戊戌十二月二十有六日春秋五十有七以疾終於州之私第邦直為人軀幹雄偉望之如羽人劍容而厥事詳雅倉猝無失詳事毋孝待故舊有終始身歿之日識者多嗟惜之初喪某氏再娶遼東高氏某官之女邦直無子以姪為之後以某年月日葬於河內王封里之東南原初邦直沒之七日而懷州亂老幼奔潰城為之空高夫人暮夜挈家人避於州西南五十里之別墅事定而歸家蕩然無一物蝗旱連



歲道殫相望人謂從此無史氏矣夫人攻苦食淡存拊愚幼人門應接不減邦直生平比營大葬凡舉十餘喪安厝如禮生死受獲雖健男子有不能辦者邦直可無恨矣邦直予同年進士又交分殊歎其孤請為墓碣銘乃論次之其銘曰

能者人不能者天得配而賢獨為始終之全我銘詔之以慰下泉

### 御史孫公墓表

正大中內帑被盜所失皆慈聖宮珠具上怒甚公特為監察御史被詔按其事而無迹可尋法官讞疑欲棄守者市公執奏饒之會赦得原汴民李氏女有姿色已許嫁矣首相白微之姪恃勢奪婚且欲以為妾夫家訴於官官畏徇不為理逮訴於公公為奏聞詔還己許八年親享太廟郊國夫人溫敦氏過廟門而不饗蓋公劾奏以為失臣妾禮上不忍加姨母罪勃有司杖御者百仍罰俸以愧之舊制承天門非犒軍不登一日上無故登焉公奏人主不可示民不信上即日為公犒軍庚寅辛卯以來雖軍出屢勝而亡徵已具危急存亡之際大夫士以自保為幸或高蹈遠引脫屣世務或酣歌

縱酒苟延歲月公獨正色立朝耿耿自信言事數十條藹然有承平之風詩所謂風雨如晦鷄鳴不已者唯公有焉公諱德秀字伯華其先涇州長武人大父奉遺靖康之亂流寓大原之文水因家焉父祖資稟淳直樂於為善時與羽人禪客游尤喜賙卹貧乏或養之終其身且葬祭之用公貴贈朝列大夫有子五人公其長也幼穎悟有學性及長游太學有聲場屋間至寧元年以三赴廷試試補御史叔興定六年中開封府解試魁莖掾考成并尚書省掾數月以母樂安縣太君成氏春秋高乞歸侍俄辟權國史院編脩官元光初以選充豐備倉監支納官正大元年擢詞賦進士第授奉直大夫三年辟京兆雲陽令行省以長安劇邑而令非其人用便宜以公易之雲陽之人相率請留詞旨懇切宰相不能奪還公雲陽六年擢行省左右司員外郎七年拜監察御史終更授太府監丞逸領同知鎮南軍節度使事士辰之變微服出汴京客居大名鬱鬱不樂竟以成疾以明年冬十有二月朔春秋五十終於寓居權葬其所娶妻氏吉州梓伯升之女弟封樂安郡君子男三人長順次觀次

身皆習儒業女二人長適蔡酒吉州馮內翰子殿  
之子乎次適進士太原王楫孫男五人崇仁崇義  
崇禮崇智崇信皆習儒業女孫五人尚幼公美須  
眉客服甚都家居整肅遇物以誠臨官事官有法  
絲髮不欠拘其憂國愛君出於天性惜其遭罹李  
末抱利器而無所試見於行事者止此而已孝子  
爭以王內翰百一所譚家得來乞銘僕於公為鄉  
人敢用所以知公者為之銘以致懷賢之思其銘

和臣不忠忠臣不和碑石有銘百世不磨公起  
太原儒素為家以執言而觀卜其柔嘉佛然開  
義而起勇莫我如創罷我扶剛殫我詞不量寸  
鐵之微訴九閭而磔妖墓白筆風生朝著無諱  
宗周不綱蕩而頽波亦有不二心之臣哀喪亂  
之私多幸大福之可再憤却曰而麾戈念君平  
生慨然長嗟委蛇委蛇身冠冠我蓬蒿一丘墓  
此潤阿天之齋商久矣公其如命何公其如命  
何

遺山先生文集卷第二十二

遺山先生文集卷第二十三

碑銘表誌碣

故河南路課稅所長官兼燕訪使楊公  
神道之碑

君諱爽字煥然姓楊氏乾之奉天人唐鄴國公之  
二十世孫也譜系之詳見君自叙載之先大夫墓  
銘茲得而畧之曾大父楸大父超道父振是為蕭  
軒翁及上二世皆在野登程嘗夢東南日光射其  
身旁一神人以筆授之已而君生蕭軒以為文明  
之象就為制名君甫勝衣嘗信口唱歌有紫陽關  
之語扣之不能答也未冠夢游紫陽關景趣甚異  
後因以自號年十一丁內艱哀毀如成人日晡食  
誦孝經為課人以天至釋焉又五年州倅宗室永  
元謂翁曰若老矣守佐重以素賸相煩聞若有佳  
兒姑欲試之即撤君為倉與書特調度方放君掌  
出納朱墨詳整訖歲終無圭撮之誤倅愛之謂他  
日當有望勸之官學師鄉先生吳榮叔指授未幾  
迺出倫輩賦業成即有聲場屋間不三十三赴庭  
試與定辛巳以遺誤下第同舍盧長卿李欽若欽  
用昆李惜君連蹇勤試補臺掾臺掾要津仕子慕

美而不能得者君荅書曰先夫人每以作祿為諱僕無所似肖不能顯親揚名敢昭下泉之憂乎正大初朝廷一新敝政求所以改弦更張者君慨然草萬言策詣闕將上之所親謂其指陳時病辭旨剴切皆人所不敢言保為當國者所沮忠信獲罪君何得焉君知直道不容浩然有歸志即日出國門而兩教授鄉里者五年歲己丑乾州請為講議安撫司辟經歷官京兆行尚書省以便宜署君雁州經歷皆辭不就再以叅乾恒二州軍事親舊為言世議迫隘不宜高蹇自便始一應之庚寅京師春試授館左丞張公信甫之門張公嘗謂人曰諸孫得君主善老夫沾丐抑多矣癸巳汴梁陷微服北渡羈孤流落人所不能堪君處之自若也寇氏帥趙侯壽之延致君待之師交間會門生朱極自京師肇書至君得聚而讀之東平嚴公喜接寒素士子有不遠千里來見者嚴公久聞君名數以行藏為問而君終不一語或問之故曰不招而往禮歟且業已主趙侯矣將無以我為二三乎戊戌天朝開舉選特詔宣德課稅使劉公用之試諸道進士君試東平兩中賦論第一劉公因委君考試

雲無憾從監試官北上謁領中書者耶律公一見大蒙賞異力奏薦之

宣授河南路徵收課稅所長官兼燕訪使

陛辭之日言於中令公曰僕不敏誤蒙不次之用以書生而理財賦已非所長又河南兵荒之後遺黎無幾烹解之喻正在今日急而擾之糜爛必矣願公假以歲月使得拊摩創罷以為

朝廷愛養基本萬一之助中令甚善之君初莅政招致名勝如蒲陰楊正卿武功張君義華陰王元禮下邳薛微之澠池翟致忠太原劉繼先之等日與商略條畫約束一以簡易為事接行境內親問監務月課如干難易若何有循習舊例以增額為言者君訶之曰剝下閭上若歌我為之耶即減元額四之一公私便之官長所臨率有餽餉君一切拒絕亦有被刑責沒財物于官者不論月政成官民以為前乎此蓋未有漕司惠吾屬之如是也在官十年乃請老子燕之行臺以猶子元楨襲職壬子九月王府驛召入闕尋被數叅議京兆宣撫司事累上書乃得請閒居鄉郡築堂曰歸來為佚老之所雖在病卧猶召子弟秀民與之酒諭之曰

吾御密通豐饒民俗敦朴兇聲皆當孝弟力田以  
廉慎自保毋習珥筆之陋以玷傷風化及病革處  
置後事明了如平時救家人吾且死勿以二家齋  
醢貽識者笑遂引觴大噉望東南注香命門生員  
擇執筆留詩三章恬然而逝春秋七十實乙卯歲  
九月之一日也後五十七日葬於郡東南十里小  
劉里先塋之次夫人陳氏劉氏附焉禮也君三要  
吳氏子男四人保烜萬駒嵩山嶽山皆早夭駒即  
者在孕有異風骨不凡齟齬知讀書八九歲聞君  
講授即通大義尋為人講說十二以羸疾至于不  
幸君喪之盡然有童鳥之感女四人長嫁那人張  
篋次筆陰王亨二幼者在室初泰和大安間入仕  
者惟舉選為貴科榮路所在人爭走之程文之外  
翰墨雜體悉指為無用之技尤諱作詩謂其害賦  
律尤甚至於經為通儒文為名家不過翰苑六七  
公而已君投學之後其自望者不碌碌舉業晚成  
乃以餘力作為詩文下筆即有可觀嘗撰扶風福  
嚴院碑宋內翰飛卿時宰高陵見之奇其才期君  
以遠大與之書曰吾子資稟如此宜有以自愛得  
于彼而失于此非僕所敢知也君復之曰辱公持

違之遇敢不以古道自期飛卿喜曰若如君言吾  
知韓歐之門世不乏人矣與定末閑中地震乾守  
呂君子成編禱祠廟請為祝文凡二十有四首按  
筆立成文不加點在鄆下日中秋燕集一寓士忌  
君名諷諸生作詩請君屬和君被酒謂客曰歌觀  
詩者舉酒歌和以次唱韻意氣閑逸筆不停綴長  
韻短章終夕成三十九首長安中日為郭邠即席  
倡和詩傳之性嗜讀書博覽強記務為無所不聞  
真積力久猶恐不及寒暑飢渴不以累其業也中  
歲之後目力差疲猶能燈下閱蠅頭細字夜分不  
罷作文剗剗蘆爛創為裁製以蹈襲剽竊為恥其  
持論亦然觀刪集韓文及所著書為可見矣禮部  
開問趙公平章政事蕭回侯公內翰馮公屏山李  
公皆折行位與相問遺御史劉公光輔編脩張公  
子中諸人與之年相若而敬君加等河朔士夫舊  
熟君名想聞風未又被三接文衡有在所過求見  
者應接不暇其為世所重如此暮年遷秦中秦中  
百年以來號稱多士較其聲聞赫奕聳動一世益  
未有出其右者前世關西夫子之目今以歸君矣  
有還山集一百二十卷繫言十卷紀正大以來朝

政疏近鑑者三十卷正統六十卷其自叙曰正統之說所以禍天下後世者凡以不出於孔孟之前故也且夫湯武之應天順人後世莫可企及猶曰予有慙德武未盡善後世僻王乃復賴前哲鑒以正統之傳非私言乎今立八例曰得曰傳曰襄曰復曰與曰陷曰絕曰歸始皇十年貶絕陷者何懲任相之失也太宗傳之而曰得者何志奪宗之惡也責景帝者何短過喪也責明帝者何啓異端也與明宗者何有君人之言也與周世宗者何世宗而在禮樂可興也如是八例其說累數十萬言以謂不如是則是非不白治亂不分勸戒不明雖綿歷百千萬世正統之為正統昭昭矣此書往往人間見之有誦難者則曰吾書具在豈復以口舌為辨後世有賞音者君不治生產不取非義仕宦十年而家無十金之業然其周困急郵孤遺扶病疾助莖恭習以為常力雖不贍借強勉為之與人言每以名教為言有片善則委曲獎藉惟恐其名之不著或有小過失必以苦語勸止之怨怒不計也評者謂君志立而學富器博而用遠使之官奉掌歷臺諫掌辭命治賓客必有大過人者白首見招

日暮途遠有才無命可為酸鼻丙辰冬十月予聞居西山之鹿泉負生自奉天東來持京兆宣撫使商拱孟卿所撰行狀以墓碑為請且道君臨終一念不相置留語殷重以誤述為殫惟不腆之文曷足為君重竊念風俗之壞久矣氷雪返眾往往四千里為其師為不朽計門弟子風誼如生者幾人此已不可辭况於平生之言乃勉為論次之而系以銘其銘曰

有文者蟻於昧者龜是為關西夫子揚居之碑碩瞻佳城法焉涕洟學道之難成使人傷悲君擅名場深養孤罷迄乎駢儼而變古雅快蒼蛟之雲飛謂君不逢歟奮回斃而灑池一命而佩金紫何若若考纍纍歟質于唐世父衰微河潤九里蔚松擢芳增輝謂君為違歟徒以文窮而自嬉斬伐俗學力涸筋疲世無玄聖父矣望伯起其族幾白首太玄坐為悠悠者之所譏繫正統之無適從職予奪之非宜君排諸儒斥備執與詭隨彼月旦之有評且最是而今非豈有一定罪功之名而縶終世之成虧我黜我升我招我麾不主故常不負辜豈自我作古莫竊取為

自非慨然任當仁之重能不懼於西河之見疑  
維鼎之為器也雖小而重屹神寶而弗移孰謂  
漢唐甚盛之際亦不免於窮運之攸歸我車司  
南爾輒背馳傳者嗟誰異時有如君家子雲者  
出邈千載乎求知

劉景玄墓銘

景玄年十六七許時其先人朝請君官四方景玄  
留學陵川已能自樹立如成人老師宿學多稱道  
之而朝請君獨未知也及罷官歸行視景玄所舍  
見其架上書散亂無部帙意不擇因問讀書有後  
先汝寧亂讀耶漫取一書試之則隨問隨答無所  
忘失朝請君始大驚拊其背曰及吾未老當見汝  
聳壘昂霄時耳乃名之昂霄字景玄別字李秀秦  
和中予初識景玄於太原人有為予言是家讀廣  
記半月而初無所遺忘者予未之許也杯酒間戲  
取市人曰曆緯雖未盡者約過目則讀之已而果  
然大率景玄之學無所不聞六經百氏外世譜官  
制地理與兵家所以成敗者為最詳作為文章淵  
綿致密視之若平易而態度曠生自有奇趣他人  
極力追之有不能到者為人細瘦似不能勝衣好

橫策危坐掉頭吟諷幅巾奮袖談辭如雲人有發  
其端者微難開示初不置慮窮探源委解折絡脉  
漫者知所以統室者知所以通旁貫徑出不可窺  
測要之不出天下之至理四座聳聽不得語故  
評者以為承安泰和以來王湯臣論人物李之純  
玄談說為獨步景玄則兼衆人之所擲愈叩而愈  
無窮詩與文則或有之其辨博則不知去古談士  
為近遠餘者不論也其與人交也不立崖岸洞見  
心腑世間機械皆不知有之河東渠仲經潭源雷  
希顏王官麻信之皆海內名士交久而無間言人  
以此多之至其善惡太明黑白太分則亦坐是而  
窮也初舉進士不中以廢捕官調監慶陽軍器庫  
非其好也諸公期以明年薦試辭科而景元病不  
起矣正大乙酉夏予自京師來哭其墓太夫人謂  
好聞言吾兒有當世志今鬱鬱以死矣子與之游  
最為知己當為作銘無使埋沒也好問泣且拜曰  
銘吾兄者莫好問為宜乃作銘景玄陵川人自言  
系出楚元王交祖諱溥不仕朝請君諱俞第進士  
官至管勾承發司太夫人上黨宋氏封彭城縣君  
妻永寧李氏子男一人名庸女一人尚幼以元光

一年六月十三日春秋三十有八終于永寧之寓  
居權墳郭西南一里所廩將以某年月日舉二世  
之柩歸塋陵川之先塋銘曰

源心而文洩人天和聲光一流有物禁訶君起  
太行學自為家元精當中散為雲華有發其談  
瀉江傾河坦其正途不涉誕夸有喙三尺有書  
五車葉不得特一本作施萬古長嗟望君天門奉  
璋我我蓮蒿一丘窘此湘阿天如天如命也柰  
何

文儒武君墓銘

銘曰真積力久積久而博其所立也卓百家浩浩  
朱害其說之約故雖涉於紅女之纂組其破而圍  
鄭而朴者固自若也博士三年誨誘循循子弟秀  
民自我作新授之萬金良劑以澣浣激滌易形而  
鍊神朱墨進為文儒鈞距化而真純庚桑豐羽山  
之年鄒律發寒鄉之春是之謂神而明之存乎其  
人教育之廢又矣安得敦龐耆艾仁信篤誠如先  
生者以復三代兩度風士先享之秦乎河東人元  
某銘

郝先生墓銘

泰和初先人調官中都某甫成童學舉業先人思  
所以引而致之者謀諸親舊問皆曰漢澤風士完  
厚人質直而尚義在宋有國時後造輩出見於黃  
魯直季父羈行縣之詩風俗既成益久益盛迄今  
帶經而鉏者四野相望雖閭巷細民亦能道古今  
曉文理為子求師莫此州為宜於是先人乃就陵  
川令之選時鄉先生郝君方聚子弟秀民教授縣  
庠先生習於禮義之俗出於賢父兄教養之舊且  
嘗以太學生游公卿間閱人既多處事亦審故其  
容止可觀而詰言皆可傳州里老成宿德多自以  
為不及也某既從之學先生嘗教之曰學者貴其  
有受學之器器者何慈與孝也今汝有志矢器如  
之何又曰今人學詞賦以速售為功六經百氏分  
裂補綴外或篇題句讀之不知幸而得之且不免  
為庸人死一敗塗地者乎又曰讀書不為文藝選  
官不為利養唯知義者能之今世仕宦多用貪墨  
敗官皆若於飢凍不能自堅者耳丈夫子處世不  
能飢寒雖一小事亦不可立况名節乎汝試以吾  
言求之先生工於詩警命某屬和或言令之子欲  
就舉詩非所急得無捷費曰力乎先生曰君自不

知所以教之作詩正欲渠不為舉子耳蓋先生惠後學者類如此不特於其然也先人既罷官某留事先生又二年然後歸先生歿於成事其子思溫歸葬鄉里以書抵某言吾子性年赴予成事曾以墓銘為請今年事矣願有以慰不肖孤之心某謝不敢當六七年之間思溫之請益堅辛丑之秋又屬其外兄牛元梯來致辭曰先子生無一命之壽歿無十金之產實志下泉有識與僕業得如吾子者且不能一言半辭以見於後世其命之矣某再拜曰僕有罪乃叙而銘之先生諱天挺字晉卿先世有自太原遷上黨者宋末又遷陵川遂為陵川人曾祖諱元祖諱璋考諱昇以選擇為縣功曹至先生之伯父東軒先生始官學尉為聞人先生少日舉進士預春官氏薦書便能出諸公之右多疾早襄馱於名場遂不就選貞祐之兵避於河南往來淇衛之間為人有崖岸取取自信寧落薄而死終不傍貴人之門故時無料理者以某年月日遘疾春秋五十有七終於寓舍論終浩歌自得若不以生死為意者其平生自處為可見矣前娶同縣張氏繼室高平司氏子男一人即思溫也女一

人嫁進士侯公佐男孫三人曰經曰恒曰彝經最知名女孫一人弟天提從弟天祐猶子思忠皆有聲場屋間銘曰

篤於其貨誠於其思行可以士矩政可以吏師奉璋我我其誰曰我私界銘基而奪之時操利器而莫施穹巷抱書在涅而不緇曳屣商謳長與世辭寧以一寒暑往來之變樂細人而怨咨良僕舍光平價不貨棄擲泥塗識者涕洟執物之尸孰命之司吾欲問之有如先生者而至於斯有如先生者而止於斯

曹徽君墓表

歲丙午秋九月日曹徽君子玉以疾終於襄陰之寓舍春秋七十有四嗚呼哀哉世豈復有教龐著艾之士如君者乎始子在京師登君卿先生禮部開閣公之門公每論人物及君姓名必極口稱道謂今人少見其比其後見君於方城介於太原王右司仲澤乃定交焉君長予十七歲予以凡事之壬辰之兵君流寓弘州癸卯冬予自新興將之燕中乃枉道過之死生契濶始一見顏色握手而語恍如隔世不覺流涕之覆面也又五年予間居鄉



里與君相望六百里而近耳妾人有傳予下世者君聞之寢食俱廢至問之卜筮及就日者王希道推予祿命以自開釋已而知其妾也又為之喜見顏間君未幾聞君九月之訃予為位而哭且為文以表之孤子汝弼徒步至雲州求予銘先人之墓不及見而去君之孫孝待於鎮州者又三數月矣追念平生之言乃泣而銘之君諱珪姓曹氏子玉其字也世為磁州潞陽人曾大父圓大父莘父濬皆潛德弗耀君生數月而孤養於祖母史氏少長教之讀書學性穎悟有成人之量及就舉選即有聲場屋間以兩赴廷試後籍大學時輩翕然推重之君資稟厚重接物誠實世俗機械舉不知有之居方城二十年教授為業僅有中人之產長子國器力於幹蠱故君得優將自便賓客過門厚相接納為具豐潔不類寒士家不獨公卿達官愛敬之至於軍府悍卒閭巷細民望君褒衣儲腹言笑和雅亦皆訥訥焉嘗再娶未幾婦卒其父哀悼成疾君往候之問之所親云公初不病痛女嫁未幾而徒捐奩具耳君盡其所得者直百金并兩女使悉歸之方城人有倉猝避吏留一篋而去者君勸家

人毋敢竊視事定其人獲來發篋驗之貯金滿中而封識宛然如手未嘗觸者君之廉類如此正大末京南大司農楊公叔玉丞廉公伯祿薦君及猗氏薛曼卿武陟宋予之武清張仲升汴梁高振之大名王大用等六人文章德行乞加官使以厲風俗事聞徵聘有期會兵動而罷里中郭提控者夜亂中聚老幼數十守一若自保人有誣郭庸聚為亂者州將捕繫之將至不測時立州治大梁山君就為申理之郭以無罪而君幾為道梗不得還避兵之民無所逃死君擇貧病之尤者留養之賴以全活者甚眾群不逞乘亂欲以兵相加父老有曉之者云而曾慶暴如此獨不愧曾先生父子耶君曩陰又十年依尚書寺中丞仲臣為之起廟學以師席奉君州人化君之德文風為之一變君既老自號蠶蠶老人有卷澗集三卷藏於家君凡六娶曰陳氏徐氏張氏陳氏顧氏前君卒曰姑氏今無恙子男二人曰國器字大用陳出也端悉而信有君之風不幸沒於京師之兵士論惜之汝弼顧出孫一人即孝也曾孫二人幼未名女孫一人尚幼

銘曰

仁信而篤誠寬博而和平以儒行槩之衆善具  
并何負於人而下能百齡豈無百齡孰愈君之  
名城郭十年貞石有銘曰是維子曹子之墓尚  
可以為鄉人之榮

遺山先生文集卷第二十三

遺山先生文集卷第二十四

碑銘表誌碣

真定府學教授常君墓銘

元光癸未予過鄆城見麻徵君知幾問所與周旋  
者知幾以鎮人常仲明中山趙君玉對及仲明來  
館客因得接杯酒之醴然未款也北渡後來鎮陽  
仲明在焉予首以知幾存沒訪之仲明言辛卯秋  
遣報已急以內鄉深固可以避兵且有吾子在吾  
三人議南下知幾卜之不吉乃止不行及被兵知  
幾病困中尚以前日猶豫不行為恨也予初謂知  
幾少許可而獨予仲明有端人之取固已慕嚮之  
及知幾將遷內鄉託於予者為甚辱仲明之先世  
又出于代鴈門用是交遂款如是六七年歲辛亥  
九月晦自太原東來過仲明之門而仲明之下世  
十許日矣孤子德雅知予敬其先人涕泗以墓銘  
為請予復之曰此吾之志也奚以請為乃作銘并  
論次之君諱用晦姓常氏仲明其字也上世家呼  
縣大木張家里而墓於象福鄉之石鼓原者不知  
其機昭穆矣見於元祐中進士趙子良所撰墓銘  
云常氏世豪於財以孝弟力田見稱宋初世有諱

素者娶皇甫氏生子慶慶娶康氏生子玘玘娶種氏生子五人長曰俊次曰善俊材幹宏博殖產益豐取予之際已薄而厚於人家邊塞朔塞群從率以武藝相尚有提虎常氏之目娶王氏生四子二子起家善以瞻勇推澤爲鄉兵指揮使俊之長子曰宗亮慷慨多氣節中武舉官脩武即郟延路第四將仕至知文水縣事宗考以騎射應募官保義即河東路第四部將文水即君之曾祖也金朝初避漢陽質子之後族屬散居有從建炎南度而貴官者有留居東門廬利者有折居拓仁坊廬者文水居遷河朔寓居平山遠占籍焉生九子其一爲比丘餘八子娶兩族先後無間言時人爲之語曰三劉五李和義無比是則文水之家政可見矣君之祖諱大安初東來時適卒於黎城父諱振孝悌忠信不學而能好交結文士自以不習儒業爲愧一意課二子學君之弟鼎字仲華蔚城童能爲文鄉長者以備器期之未冠而卒故君強學自立以成父志自以日有聲場屋聞遊渠之後交文士益殷賦業外七書亦能研究國醫宛丘張子和推明岐黃之學爲說累數十萬言求知幾爲之潤文君

頗能探微旨親識間有謁鑿者助爲發藥多所全濟病家賴焉資稟淳實言行有法遭值亂離知時命不偶安貧守分不爲風俗所移旅食僅足而繼困之義無廢年德俱茂而早故之心愈篤評者謂先世之義依閭門之翊睦傳至于君故家遺俗有自來矣真定幕府以君承平學舍舊人文行熱備任師賓之位辟本路府學教授在職數年士論歸之不幸遭疾臨終二三日執筆紀先世事迹盡示來裔飲酒談笑與家人談怡然而逝春秋七十有四實辛亥之九月十九日也夫人劉氏前君二十年卒繼室李氏子德彰德府宣課使男孫小字舉孫尚幼德以某年月舉君之柩柩於漳河西岸班家里之先塋禮也銘亡

### 善人白公墓表

歲辛亥冬十有二月河曲白某持爲門李某所撰先大夫行事之狀請於某曰先大夫棄諸孤之養內翰王君從之實表其墓禮部閑閑趙公爲之書并以善人白公墓表兼其額某時惜止六扶未及贈官之制故王君弗克載遭難板蕩闕手筆亦復失之某惟先大夫積德累行躬不受杜子男之

爵僅見於告弟之書而使之旌紀疇家隨世磨滅  
孤奉義方之訓不肖孤死不瞑矣敢以通家之舊  
屬筆於吾子幸為論次之謹按公諱某字全道姓  
白氏其家於河曲者不知其幾昭穆失曾大父諱  
重信大父諱玉父諱仲溫皆潛德弗耀公生十二  
歲而孤孤既孝氏弱無所依舅氏僧法澄為經紀其  
家拊育訓導恩義備至及長乃能自樹立營度生  
理日就豐厚其後澄歿公不忘外氏之故喪祭之  
禮有加又為建遺塋於白氏丘壘之側一以附外  
祖氏一以塋澄初僧舅既奉浮圖惑其家世不傳  
為孝氏置後意甚專初不以異姓為嫌已而事不  
果行公承舅氏之意挈此子養於家以昆弟待之  
大定初通檢因附屬籍舅已亡又歷三推之父弟  
為妾人所教運求異財公欣然以羨田宅之半分  
之人謂同胞而至別籍往往起訟白公乃無緣毫  
顧籍意是難能也太原趙遵規從其子文卿在官  
下尤相歡吳云古人以陰德見稱如白全道非但  
陰德乃顯德也司戶王伯常嘗都督部民之不率  
者云汝獨不能效白君以禮治身以義教子耶其  
為名流所重如此崇慶壬申避地太谷不幸遭疾

春秋六十有九終於寓舍實八月十九日也越七  
日諸孤護喪歸柩於河曲王家里西原之先塋禮  
也初娶王氏再娶李氏皆前公卒子男五人長曰  
考升留心典籍而不就舉選次曰貴廣覽強記尤  
精於左氏至於禪學道書岐黃之說無不精詣弱  
冠中泰和三年詞賦進士第歷懷寧主簿汲山令  
逮業未究而成殂謝士論惜之次曰華貞祐三年  
進士歷省掾入翰林仕至樞密院判官右司郎中  
次曰僧寶坐以詩筆見推文士間有集行於世次  
曰麟蚤卒女四人長通州吏目楊桂次適大族張  
訪次適進士賈鐸次未嫁而卒考升女揚女張王  
出也男孫五人曰嗣隆以蔭監漿澤酒曰忱曰恒  
皆習進士曰常山曰中山皆尚幼女孫二人皆適  
士族曾孫三人中和泰和安和女一人尚幼公資  
稟聰悟而謹厚自持略通經史精究曆算中年耽  
嗜佛書皆所成誦為人敦信義舉施予一言所諾  
千金不易家人化之皆以賢行稱焉正大中累贈  
中大夫輕車都尉南陽郡伯兩夫人南陽郡太君  
維火山自太平興國中升為軍雖有學竣而肄業  
者無幾宣和末僅有上舍宋生歷大定明昌官學

之盛然後公之二子擢巍科取義仕邦人築亭以  
衆鄉名之屏山李君之純爲作記辭與事稱相爲  
不朽故公雖躬不受社所以起其家與善化一鄉  
者其利豈有既耶銘曰

齒以德尊師以道存習俗以教遷惟仁人君子  
之所居若時雨然羽山之顏疵厲爲蠲魏心發  
之考方學業復於葉玄禮所以祠鄉長者而傳  
書先賢在昔女屯河曲雄邊爰及公家乃誦乃  
紋身爲義方奉之周旋兩息踰踰起爲儒先爰  
被蒙臺大伏在泉根而鼓之有光屬天仲也銅  
章惠浹岐岍叔也奉璋入侍禁垣謫兮芝蘭之  
庭烟兮珠玉之荆州里趨風媚學驟驟至於餘  
波所及且孝弟而力田古有之種德欲深望歲  
百年有相之道理無空指祿匪我榮殆以爲黨  
墜亡窮之傳樂石有銘表公之卅異時配縣社  
之食尚有攷焉

### 南峯先生墓表

先生諱豫字考先姓呂氏懷州脩武人祖道父瑛  
皆力田爲業先生自成童知讀書既冠游學東州  
以易爲專門經明行脩高出倫輩醇德先生王廣

道持器重焉一時名士如秀峯折安上濟陽王善  
長安陽苗景藩館陶段彥昌冠氏孫希賢田子登  
從之學者甚衆故家近太行五峯山因以爲號示  
不忘本也有易說若干卷傳于時宗室棧與鎮大  
名聞先生之名延致門下以師禮禮之初要館陶  
汲氏繼空清平丁氏先生往來兩縣之間爲人廉  
介沈默爲里人所尊貞祐之兵謂所親言吾年八  
十有四天數當盡癸酉唯有坐待歸盡而已是冬  
在所殘破吾民老幼相與逃亡先生喟然嘆曰癸  
酉之期至矣明日有乘白馬衣皂衣挾弓矢馳逐  
於杜原桑林之下者吾死此人乎矣詰旦果有邏  
騎到物色悉如所言先生欣然就戮實十二月之  
二十三日也兵退孤子天民收塋於館陶大張里  
之東原壬子之冬距先生之歿四十年矣天民與  
好問有通家之好以墓表見爲余亦懼先生之潛  
德將隨世而磨滅也乃爲之銘天民嘗任冠氏主  
簿孫二人長曰長慶次曰公孫其銘曰

被髮銜刀禍孰與還彈琴視景命何可延誠使  
之禽息爲視而終自首固已無貴於期頤之年  
老聃玄虛莊周氏之自然死以爲真兀以爲全

寧薪火之可續直土授之自捐若夫鴻毛權重  
輕所宜熊掌足從違之先有巖壙之疾趨有白  
刃之徑前唯其知命而安於命此深於易者之  
所以賢

臨海弋公序表

公諱潤字天澤姓弋氏系出臨海占籍汝州之梁  
縣者不知其幾昭穆矣大父整生二子長曰洪次  
曰海洪娶張氏二子曰祐曰福海娶酒氏公其所  
生子也弋氏自先世不異財公登孫能自樹立如  
成人事從兄祐殊恭遜祐嘗以事客內鄉者二十  
年比還公殖產倍於舊祐歸求分居公謂祐言家  
所有皆父兄所積潤但謹守謹無損耗耳兄幸歸  
請悉主之潤得供指使是矣祐悔悟曰吾弟忠敬  
如此我乃為諛口所間慚恨無所及尚欲言分異  
耶乃更相交愛官以公家貴雄一鄉且瞻勇過人  
遷之督捕盜賊所至以怒心為質盜亦不敢犯由  
是名聲籍甚縣豪傑多畏服之鄉之惡火以犯法  
為常每以理訓諭之遂有勸善者真祐丙子潼關  
破汝洛被兵居民保險多以私怨相劫殺官不能  
制公杖策往來山間為之開諭辭情懇到闕者感

悅各平分而退多所全活公出大家舉措不得碌  
振贖貧之婚嫁孤幼有古豪士之風手力絕人而  
資稟謙退有相犯者未始與之拔喜為人解怨嫌  
鄉隣訟訟往往不於官而於公長吏亦時以委之  
嘗曰縣外有弋某橫逆無從生矣其為人所倚信  
如此中年喜儒學折節下士以實盡多文士結夏  
課者多故久居之以便諸子之學士子不能自給  
者為之經理日事使得卒業同郡張翥雄飛資穎  
悟日誦萬言公得之童卯中妻以甥且招致其家  
遷登進士第及將准官獲殷重教督為卒為良民  
吏河陽人至畫像事之士辰河南破公孳家避於  
西山山柵破公家亦被驅逐一卒見公緇人中請  
於主帥云此吾鄉善士其縱遣之帥遣公舉家去  
是夜所停悉院之里杜為空公家獨全親舊嘆曰  
為善之報見之今日矣明年春鄉郡游騎遍滿公  
自度不能受辱乃自投水中得年若干實某年月  
日也娶田氏子男三人長毅英師事程內翰天益  
未冠為鄉府所薦拜赴簾試文學行義高出時輩  
兵間以功授本州防禦副使次世英亦業進士信  
厚如其兄次庭英七歲應童子舉年十八義俠有

父風州被圍率壯士三十輩潰圍而出與千騎遇  
且行且鬪從旦至暮有被數十創而戰不棄者騎  
兵解去遠近莫不歎伏北渡後歿於某所女一人  
適張氏仁讓有女士之目孫二人惟敬惟友皆習  
儒業駿英等以其年月日奉公衣冠塋於同德里  
西南原之先塋歿英子交游中取可保任者以墓  
表為請義不可辭乃為論次之而系以銘其辭曰  
汝水兮洋洋山木兮蒼蒼有墓其旁是惟弋公  
衣冠之藏子孫亘億歲時蒸嘗魂兮來歸安此  
故鄉于嗟公兮百夫之防惟其勇而進於學所  
以為自勝之彊沈潛可以屈獲頑直諒可以扶  
善良禁訶瘴剛莫我敢當傲巡周廬而辱在抱  
閔為王前驅而棄之戎行孰俟伯之不如僅斗  
食之見償惟祿不計庸兮知賦分之靡常頽波  
天來一柱獨障彼囚虜之自甘此慨然而國殤  
志士不忘在溝壑寧以假息而為長使奪志而  
皆可在立懦其何望自古皆有死惟義亡與仁  
者為不亡銘其表之尚以發幽潛之光

遽然子墓碣銘

泰和以來天下以能書稱者禮部閑閑趙公學者

多微之而但得其形似而南度後始有遽然子已  
遽然子筆勢飛動得公不傳之妙故一時學公者  
皆不及而公亦有咄咄逼人之難宗室胙國公文  
米風流照映一時而遽然子乃得以布衣從之遊  
與之商畧法書名畫筆畫之論獨得於任南  
麓王黃華之檢君若真贋則望而知之胙公亦以  
真賞稱焉予官京師始用二公意支之而未款也  
亂後予客冠氏遽然子亦未東州每見之必連日  
克夕而不忍去也大槩遽然子火日出閭里問其  
晚音律善談笑得之宣政故家遺俗者為多及長  
賦於游蕩乃更折節取古人書讀之久而學書學  
畫學詩學論文立志既堅力到便能有所得為人  
彊記默識不遺微隱唐以來名家者之詩文往往  
成誦如目前考論文藝解枿絡結殆若夙昔在文  
字間者盡入能品詩學江西派至於黃石廟等作  
今代秉筆者或亦未可輕議東京大內陸德太一  
故宮接觀臺沼門戶道路華木水石悉能歷數之  
聽之者晚然如覩到其處至於宋名賢所居第宅  
坊曲與其家行輩群從孫息姪姪排比前後雖生  
長隣里者不加詳也嘗往長清一禪寺中與僧談

僧言五公傳授圖大不易作遽然子笑曰易與耳  
因索筆作圖坐中他日以舊本證之不毫未差也  
予君東州父將還太原行有日遽然子聞之誦予  
詩文恨相見之晚而相從之不得久也為之泣數  
行下丁酉冬復來東州而遽然子下世以數月矣  
其婿商挺益卿為予言予已北歸遽然子為之飲  
食不羨者數日家人輩問言元子得歸在渠為可  
喜事而公為之捐貲食何也遽然子曰是豈兒輩  
所能知也哉他日孟卿示予遽然子故書凡予所  
談往往記之紙墨間予詩文則間亦記之也因竊  
為慨歎遽然子平生交不苟合人與之言一不相  
入揆揆運去不返顧其所以愛我者乃如此予愚  
謀不足比數何以得遽然子如此哉天下愛予者  
三人李汾長源辛愿敬之李猷甫欽用是三人者  
皆有天下重名然長源獲死西山嶽中敬之則被  
掠而比為非類所困折死於山陽缺用從死淮西  
時年未四十也予常以三人者之後當無有收葬  
人之所棄曲相焚借如渠輩者晚節末路乃復有  
一遽然子思歎與之隣屋相往來杯酒相樂就渠  
所談如東京故事者悉記錄之曾不五六年而又

君有物奪之而去者豈予賦分單薄善於招殃致  
凶所與遊者皆為所延及邪不然何奪吾遽然子  
之遽也遽然子諱滋字齊甫姓趙氏本出馮翊其  
大父天會貞元間來為汴梁戶籍判官卒官下妻  
子不能歸遂為汴人父諱青字漢卿遽然子三男  
長某次某兵亂中所失小子尚幼二女次即孟卿  
所娶者遽然子春秋五十有九以病終權塋於東  
平沂州門之外若干安庚子歲除日予實銘之其  
銘曰

積之之深守之之堅傳人之所不傳謙人之所  
獨專自拔泥塗如蛻而僊文以表之慰彼下泉  
碩雖愛我豈以一言而敢私焉

蘇彥遠墓銘

彥遠諱車姓蘇氏世為真定人彥遠其字也高祖  
中大夫通判成都府子贊以文蔭補官中遭大亂  
不能歸贊金國初由掾按至朝散大夫祖仲文胡  
內翰礪勝登科終於朝奉大夫潞州黎城令父世  
偁以蔭補官宣武將軍宿州靈璧主簿彥遠靈璧  
君之長子也初以父任為河北西路轉運司押遊  
監平輿陽步店商酒再監曲陽之龍泉俱以課最



聞陞真定酒使司監羨及百分貞祐二年八月朔  
當滿替明日府官吏以兵至棄城而考遠守職如  
故事定以羨餘進四階城守三階循資一階授歸  
德下邑主簿未赴丁太夫人王氏憂服除新制行  
當拜歷諸司授蔡州稅務使羨及二分有奇擢衛  
州獲嘉縣令召為南京廣貯倉監支納除蔡州觀  
察判官留為豐行東庫副使官鎮國上將軍北渡  
之後開居州里以壬子年二月晦日春秋六十有  
四終於家後三日塋於元氏縣趙同里之先塋先  
娶馬氏前卒再娶鄴氏子一人名慶藍田尉官宣  
武將軍年三十二歿於王氏弟信武將軍陳州項  
城主簿卒猶子四人德謙德普德恒德復考遠資  
稟仁厚自幼重惜物命有不忍之愛及登仕版喜  
於結納周急繼困不為明日計力或未足亦強勉  
為之故人人得其懽心至於富世名士嘗與考遠  
周旋者亦皆稱道之予識之汴梁汴梁破見於夏  
津於鎮陽凡二十年每歎其安貧自樂不肯一傍  
特貴之門雖士夫之守死善道者不能過而或者  
乃以任子槩之可乎蓋予於是鄉得兩人焉曰常  
先生仲明而考遠其一也仲明之沒予既表其墓

矣若考遠者可獨使之隨世磨滅與乃作銘投其  
弟彥和使刻之銘曰

其應物也圓其立節也堅有來千金散而浮煙  
雖游適日廣而所得皆賢幅巾來歸一室磐懸  
州里督郵漠然少年頽不屑於謝仁祖之米寧  
就陶生而乞憐貧夫狗財夸士死權河朔諸豪  
角逐相先萬物竝流而金石止信賢否之天淵  
趙郡之蘇族世蟬螭南渡崩奔混為齊編蓋君  
以宗起而名氏待君而傳我為銘詩表君之汗  
百世而下有攷於鄉人之傳信者尚有警言焉

### 盧太醫墓誌銘

盧尚藥諱昶世家霸州文安今為大名人以方伎  
有名河朔政和二年補太醫奉御被旨校正和劑  
局方剛補治法累遷尚藥局使自幼傳家學課誦  
勤讀老不知倦岐黃雷扁而下其書數百家其說  
累數百萬言闡衍浩博纖悉碎雜無不通究而於  
孫氏千金尤致力焉故其診治之驗頗能倡之春  
秋雖高神觀精明望之知為有道之士年壽八十  
有七自剋死期留頌坐逝著醫鏡五十篇傷寒片  
玉集三卷今其書故在方伎之外復達治心養性

之妙如云人生天地中一動一息皆合陰陽自然之數即非漠然無聞涉者所為善惡宜有神明照察之又曰人為陽善人自報之人為陰善鬼神報之人為陽惡人自治之人為陰惡鬼神治之又曰養氣莫若息心養身莫若戒慎又曰冥心一觀勝負俱捐此雖前賢所已道至於表而出之既已治已又以及人非仁者之用心乎其康寧壽考五福俱備非偶然也祖與予有姻戚之舊因其子孫歸葬書以貽之歆其鄉人知此家出予門久而予亦知其人之深也銘曰

岐黃聖學炳如日星苟非其人道不虛行惟尚藥公有得內經探病之源起死而生為醫作鏡底裏洞明道風既扇取重漢庭陽報沓來壽考康寧儵然坐逝歸神太清大河安流扶衛厥靈扁鵲湯陰實魏大名遙進華胄復起魏京古今世業前後家聲遺書具在永為世程

張遵古墓碣銘

南宮張伯全將以其年月日舉其先人之墓殯柩於縣西南張平里之先塋伯全雅從予游因以碣銘為請曰維張氏上世自太原來居南宮以醫為

業者八世矣先人資稟仁恕切於利生貧家來謁率欣然為診治或資之糜粥之費不特不責報謝而已州里醫流無慮百輩先人之學號為該洽恂恂退讓不自衒鬻文士過門接其餘論以自裨益故時譽獨著先人歿於太安庚午不肖孤總二十許耳遭罹兵亂轉徙南北僅有歸顧之望今當勉卒大事勒銘墓道誠得吾子論次使不隨世磨滅瞋目不恨矣伯全柱在郟城洎麻徵君知幾張尚醫子和推明河間劉守真之學所以通其塞而救其偏者用力為甚博嘗謂人言不肖於世業不敢不勉至於以醫為治生之具則死不敢也子謂伯全斯言可以攷見其先人平生矣乃為之銘伯全之先人諱師文字遵古年六十終於家其銘曰

茫茫之原纍纍之阡行人而歸何千萬年有子而博執不欲揚其先今君獨然備德則人而死而不亡則天吾是以知其人之賢

張君墓誌銘

洺水張澄仲經狀其先人博平君行事謂好問言澄不天生四歲先君捐館舍愚幼藐然不克當天事至有旌紀寒冢之歎二十年之間蒙賴先德得

俎豆於士夫之末念歆追誌墓充以俟百世誠得  
吾子辱以銘賜之不肖孤死不朽矣好問不敏然  
以不腆之文得幸於仲經側聞先大夫之字有年  
矣其可辭哉乃述而銘之按張氏本出於遼東烏  
若族國朝併烏若遷之陸安以世官統之至公之  
考黃縣府君諱某字某正陸間官泔水遂為泔水  
人公即黃縣之仲子也諱某字子厚資穎悟略通  
經史工書翰醫學亦過人黃縣初令樂城召趙萬  
德新授館德新名士仕亦達公與九嫂味道從之  
學德新愛公有十里駒之目年十七黃縣下世太  
夫人吳氏出介林衣冠家治家嚴肅人莫敢犯知  
公有成人之量即以家事付之公內事母兄外睦  
宗族鄉人稱焉凡有新衣必先其兄之子貧財不  
以入其室御童僕有忌信不忘笞罵而人人敬畏  
之味道娶婦不諧日致惡語嘗歆飽之公辭釋百  
至味道為感動乃歎曰負此軀易而違吾賢弟難  
嫂用是得不棄大夫疾痲公感暑不解帶藥必  
嘗而後進及君喪以孝聞明昌初歲艱以飢死者  
十室而五公日設糜粥以贈旁近病者親詣護之  
賴以全活者甚衆及公沒人多為感泣 以承安

四年八月某日春秋三十有五終於泔州之寓  
城安呂氏從夫夫人之壘妻東鹿劉氏同知睢州  
軍州事德溫之女子男三人長曰文次曰慶皆早  
卒仲經其季也女二人長適成安溫氏次適雲中  
谷氏公嘗用黃縣產仕為監博平酒稅然非其好  
也嘗謂士之有立於世必藉國家教育父兄淵源  
師友講習三者備然後可杜牧之論唐舜以來下  
迫列國之賢大夫皆出於公侯之世傳記所載有  
不可誣者承安泰和間文治燭然教興士生於其  
時蒙被其父兄之業由子弟之學而為名卿材大  
夫者嘗十分天下寒士之九要不必盡為公卿大  
夫而公卿大夫之具故在也古有之力田不如逢  
年任官不如遇合又曰拙繫其逢不繫巧愚如公  
者皆是也今仲經學精而行脩聲光爛然高出時  
輩陸安張氏遂為海內文章家推究源委公可以  
無恨矣銘曰

發絮脩體柔嘉內美克福不遐衰哀蒼天孰使  
然耶天耶人耶其父母耶從容以思其得之耶  
苗其芽蘗其華其實孔多父播而子獲穰穰滿  
家故曰其源濫觴其流江河淵兮其未涯不有

以浚之其未奈何然則古所謂不於其躬必於其子孫者尚信然耶尚信然耶

遺山先生文集卷第二十四

遺山先生文集卷第二十五

碑銘表誌碼

族祖虞士墓誌

公諱濂新字仲義弱冠就科舉一不中即力田為業年五十有七終于家距今天子開興壬辰四十年矣初病革沐浴具衣冠子楮郭生者就諸婦取一物將奉公公惡其非禮也而切責之其平生自處為可見乎為人寡言言則微雜詖諧所居韓巖五杜聚落千餘家里中人日有聚話者公時詣焉山夫谷民性既鄙朴語又無根帶每及一事則厲氣叫吼攘臂紛競移時不罷公不能忍必為解之已而曰人言田舍翁不通曉果然其人慙而去日又慙者多公至則稍又引去至無一人留語者嘆曰鄉人惡我耶我不復出矣乃教其子之規之矩凡家之服食器用必取諸左右而足吾寧假人不能假於人也自是人罕見其面婦班氏事公如事長養問公今日欲何所食鼓腹良久曰此復欲何食乎此腹且欲某食午欲某食哺欲某食家人如言而辦如是三十餘年乃終世衰道喪是非好惡無有當其實其處是非好惡之間者又不能以



理自固聞譽而喜聞謗而恕爲一人所軒輊者多矣况一鄉之人乎故嘗論公不合於一鄉將不合於一邑不合於一邑將不合於一州不合於一州又將不合於天下四方不合於天下四方其耿耿自信者當猶一鄉也群衆不能易其介一物不能屈其志生而知所以養歿而知所以順古之持立獨行輕世肆志隱居放言之君子如是而止矣沒而不書族黨之過乃追爲之銘嗚呼此先君子之志吾敏之兄欲成之而不及者也銘曰

志必於同同則詭隨且欲異焉是謂自欺理有固然蕩如通達先之以司南無容背馳人取而已違百從而一遠匪直里閭世所罵讟吾寧汨濁流之泥吾寧醜鋪餘之醜吾寧反閑樂我所知來不爲所招去不爲所麾不屈之高無貴可幾孰能自信於毀譽失真之後如是之不疑

承奉河南元公墓銘

公諱升字德清少不羈喜從事鞍馬間欲復以武并取官及長乃更謹飭舉措不碌又明昌泰和入仕路非有梯級不得進公間居鄉里爵又不得志然日課家人力田治生厚自奉養祿食者不及也

貞祐丙子自秀容避亂河南客居崧山時公已衰無復仕宦意親舊競勸之乃始以兄隴城府見養奏補得係承奉班明年當調官而以疾終於登封寺莊之寓居春秋五十有五曾祖詛宋忻州神虎軍將領祖春不仕考滋善柔服丞夫人同郡史氏無子以從孫好諱之子搏奉其後權厝金店東北一里所道路阻絕未卜歸葬遂爲南遷第一祖矣

銘曰

豪俠則鄉上之舊幹局則父兄之傳武可以材選能可以吏遷一命不濡而老於編齊之間鎖

辭幽石以慰下泉

敏之兄墓銘

兄字敏之諱好古性穎悟讀書能強記務爲無所不闕年二十就科舉時東若已歿太夫人年在毒懼望其立門戶爲甚切及再試不中意殊不自得又娶婦不諧日致惡語遂以猶介得疾嘗作望月詩有莫倦夜深仍坐待密雲或有暫開時之句或言詩境不開廓非佳語也曰吾得年不能三十境趣能開廓乎未幾沒於貞祐二年三月北兵屠城之禍年二十九矣嗚呼悲哉銘曰

賈傳南州鵬鳥告凶買臣歌謳危死溝中馮衍  
幽憂桀婦是逢子雲自投乃脫歆豐莫難生才  
百蛇一龍有物妬之隨以禍攻穹巷抱書被靈  
弗充天門九虎十上莫通長慟之途萬轍一窮  
斯前人所不免碩獨歎亢吾宗耶

贊皇郡太君墓銘

夫人姓梁氏廣寧人曾大父忬遼秘書監弟接某  
朝宰相其後秘書之孫某大定中戶部尚書相國  
之孫彬明昌中濟南尹故梁氏世爲閭山甲族大  
父慶璋定遠大將軍相州酒使父鍾宣武將軍歆  
城尉夫人在父母家已知讀書作字有楷法年十  
有七嫁爲河中李侯諱某之夫人李侯自王父龍  
虎以來占籍河中以貴雄鄉里侯資稟豪邁好賓  
客復嗜讀書不切切於家功簿書會計至於鱗鱗  
米鹽無不經夫人之手夫人天性孝友嫻睦族屬  
內外無間言侯於諸弟妹皆審於擇配夫人彌縫  
贊助咸得其稱侯之孝弟芽實娶龍山劉致君之  
女於夫人爲姨妹議牲內幣時次子獻誠生始暮  
月暑涂二十里不以跋涉爲辭振貧乏撫孤幼僮  
僕之無依怙者聚之一室躬自存養有父母之愛

侯官蘇門大奴弋信妻執僑券訥有司云是陝右  
饑民爲侯家強娶法當爲良敝謂宜辨其妾夫人  
曰奴而良之義事也奚以辨爲聽其去者餘二十  
輩侯有姬侍某先有子矣以嘗失意於侯侯不顧  
省夫人以爲言侯亦莫之從也夫人知侯意不可  
回竟爲入粟縣官度爲女官并割上田衣食之畫  
哭之後益以教子爲事其後獻卿中泰和三年進  
士第獻誠獻庸同以興定五年登科鄉人榮之獻  
卿釋褐華陰簿夫人在官下每以廉慎愛民爲戒  
南征之役朝廷脩馬政并牧之馬似涉羸瘵官有  
被真決者獻卿方攝縣務殊爲憂夫人言馬遠至  
難運肥立法雖嚴可身任之使一縣之民少蘇不  
亦可乎夫人之兄思忠在中山得風痺不良於行  
且諸子皆幼弱顧謂獻卿言若能爲舅氏覓一官  
得近河中使吾事老兄一日可無憾獻卿如所教  
爲求河東高公酒正因迎事之逮其下世送終拊  
孤禮無遠者獻卿佐坊州幕官嘗與周官騎踰夫  
人戒之曰從仕之暇宜讀書養性戰馬閒乘危蹈  
險非書生之事正使能之且爲識者笑况必不能  
耶其慈恕有禮類如此不幸遘疾以貞祐元年八

月二十有八日享年五十有一終於坊州之官舍諸孤街恤喪事以某年月日柩葬於某原之先塋禮也夫人三子獻卿其長今為正議大夫宣差規措解監司充鹽部郎中行部事以故事請於朝贈夫人贊皇郡太君獻誠汝州郟城令獻甫京兆長安令南京右警巡使鎮南軍節度副使尚書戶部員外郎女二人長適夫人之從姪梁璣次適經義省元興平令趙宇正大辛卯冬獻卿持夫人行事之狀涕泗百拜謂某言先夫人弃諸孤之養亦已父矣獻卿承乏天官民曹日暇不給孤奉慈訓尚有旌紀寂寥之恨惟先夫人為淑女為良婦為賢母者當世士君子皆耳目所接見諸孤雖無所以肖安敢自例流俗附先夫人於碑誌之末乎獻卿昆季及從弟獻能得幸吾子者有年吾母猶君之母也銘其可辭某再拜言先夫人之德之教無愧古人顧非不腆之文所能誣述然得屬辭比事以相茲役昭我管彤自託不腐通家子姪與其榮焉其敢不策厲驚鉞以少慰凱風寒泉之思乎乃為

銘曰

主饋有儀作室有基赫驥問塗司南通達鼎於

華朕動與禮遠在生長見聞者而非所望寧聞壺之可敬嗟維夫人女宗婦師匪直宗師母儀百之油燈煌又誦書琅又兒不敢嬉母也在考維龍虎公北方之疆武庫再傳化而文房鬱堦處之桂樹乃異質而齊芳版輿委蛇于祿孫館上壽期願夫人則宜事親之日兮不可追去何速兮來何遲躑躅昊天而靡及泣風雨其安歸防墓旁有碑勒銘詩芳告無期有親如是而不得終百年之養信人子之同悲

南陽縣太君墓誌銘

夫人姓李氏世家平定父琮來末來火山遂為隕州人母邢生四子一女以夫人天性孝友特鍾愛焉年二十嫁為贈朝列大夫同郡白君諱某之妻夫人事姑孝拊前夫人于如所生姑老且病飲食醫藥必躬親之而後進及持喪哀毀過禮鄉人稱焉性嚴重不妄喜怒白氏大家也夫人處之不侈不陋服食居處皆有法度可觀以大安辛未三月丙辰春秋五十有六終於私第之正寢子男四人長曰貴擢泰和三年進士第官至岐山令次曰華擢貞祐三年進士第今為樞密院判官次曰瑩并

家為佛子有詩筆聞于時次日麟女二人長嫁進士同郡賈鐸賁瑩麟及次女皆早卒男孫二人曰沐陽鐵山女孫一人尚幼初華既冠從兄賁官事輩流中號楚楚者鄉先生謂當就科舉不可以家事役之朝列君以為然謀之夫人夫人曰彥升以長子持門戶勞苦為甚貴舉進士瑩與麟皆幼可代彥升者獨華耳今又使之從學是逸者常逸而勞者常勞矣執議者再三語雖不從識者謂夫人有鳩鳩均一之義焉夫人自幼事西方香火之具未嘗去其手病且革沐浴易衣趣男女誦佛名怡然而逝生平待中表有恩尤矜恤貧者其歿也哭者皆為之盡哀諸孤以是月戊午奉夫人之喪殯於河曲王家里之西原明年朝列君歿乃合葬焉文舉既舉機務而贈夫人南陽縣太君因請其銘其墓某自齟齬識文舉於太原與之游為弟昆之友今三十年矣知夫人之德與文舉念其親者為詳且久乃為之銘曰

極不於豈惟祿之時三釜迨親萬石不貲母氏幼榮無報可施樹淨而風霜露涕而悠悠蒼天孰命之尸舍船弄孫彼何人斯嗟唯夫人女宗

婦師德宜而家物不腐疵玉樹塔庭且蘭且芝一善不可能我則百之見於管彤未世有辭重之以五福之養神則我私列銘墓石尚以慰凱風寒泉之思

聶孝女墓銘

五莖聶天驥元吉為尚書左右司員外郎壬辰之冬車駕東狩元吉留汴梁明年正月二十有三日崔立舉兵反殺二相省中元吉被兵創甚女日夜悲泣謁醫者療之百方至封其股雜他肉以進而元吉竟不可採時京城圍久食且盡閭巷間有嫁妻以易一飽者重以喋血之慶剽奪陵暴無復人紀女資孝弟讀書知義理思以大義自完葬其父之明日乃絕脰而死士大夫賢之有為泣下者女字舜英年二十二嘗嫁為進士張伯豪妻伯豪死歸父母家嗚呼壬辰之亂極矣中國之大百年之父其亡也死而可書者權叅知政事翰林學士承旨子政右丞大用御史大夫仲寧戶部尚書仲平大理德輝點檢阿撒郎中道遠省講議仁卿奉御忙哥宰相子伯祥宿直將軍長樂妻明秀叅知政事伯陽之夫人與孝女十數人而已且有婦人焉



夫一脈存不可謂之絕一目張不可謂之亂一夫有立志不可謂之士崩痛乎風俗之移人也孝女合葬張氏墓在某所銘曰

發政之姊哭徇其季子祀有傳猶弄之世嗟惟孝女之死自遂死而有知及父於隧以子則孝以婦則義以斷則勇以守則智於今之人麟鳳之瑞莫靳者名天曰義器不於士夫一女之界銘以表之并志予媿

孝女阿秀墓銘

孝女阿秀奉直大夫尚書省令史秀容元好問第三女也興定乙卯生於登封年十三予為南陽令其母張病歿孝女日夜哭泣哀痛之聲人不忍聞明年得疾於汴梁病已急哭且不止或以為言親一也母亡而父存汝不幸而死為棄父矣曰女從母為順寧從母死耳竟以聞與主辰三月朔死死之二日權厝報恩寺殿堦之東南十五步銘曰

夫乳而啼襁褓之常知所以悲非乳可忘木病本根技葉乃傷愛生於心血出肺腸母在與在母亡與亡孝女之哀千載涕滂白水南東維母之藏羈魂搖搖望女大梁會以汝歸以慰所望

遺山先生文集卷第二十五

道山先生文集卷第二十六

碑銘表誌碼

東平行臺嚴公神道碑

歲庚辰秋七月東平嚴公籍彰德大名磁沁恩博滑濬等州戶三十萬歸於有司竊嘗考於前世興王之迹蓋帝王之興天將舉全所覆者而昇之時則有魁偉宏傑之士為之倡大義建大事一六合之同異定群心之去就猶之天造草昧龍見而躍雲雷合勢為之先後然後騰百川而雨天下者易為力臣主之感遇天人之參會無不然者初貞祐南渡豪傑乘亂而起四方之人無所歸命公據上流之便握勁鋒之選威望之著隱若敵國人心所以為楚為漢者皆倚之以為重至是晚然知天命所在莫敢有異志 國家亦藉之以成包舉之勢故自開創以來功定天下之半而聲馳四海之表者惟公一人而已非夫使之倡大義建大事以應興王之迹其能若是乎公諱某字武叔其先傳之博平人後遷長清遂占籍焉曾大父啓大父棋父珪皆以農為業妣同里楊氏生二子長彬字才叔次即公公幼警悟略知讀書及長志節豪宕若以

生產為不足治者為人美儀觀喜文結好施予落魄里社間不自顧籍屢以事被繫俠少輩愛慕之多為之出死力以故得脫去癸酉之秋 國兵破中夏已而北歸東平行臺調民為兵以公為衆所伏署百夫長明年春泰安人張汝揖據靈岩遣別將攻長清公破走之以功授長清尉東阿平陰長清三縣提控捕盜官戊寅六月攝長清令八月宋人取益都乘勝而西行臺檄公備糧為守禦計公出督租比還而長清陷尋以兵復之有譖于行臺者謂公與宋有謀行臺疑公以兵圍之公挈老幼壁青崖固依益都主將以避臺兵之鋒宋因以公為濟南治中分兵四出所至無不下於是太行之東告公所節度矣庚辰三月河南軍攻彰德守將單仲力不支數求公救公為請於主將主將退留不行公獨以兵赴之比至而仲被擒公知來不足恃者謁先太師於軍門擊所部以獻太師時以王爵統諸道兵承制封拜乃授公金紫光祿大夫行尚書省事其年進攻曹濮單三州皆下之偏將李信留鎮青崖嘗有罪懼誅乘公出征叛降于宋公兄及夫人杜氏皆遇害明年公以太師兵復青

崖擒信誅之進攻東平守將何立剛弃城而奔公始入居之又明年軍上黨宋將彭義斌說青崖鬼海叛公公之家人復被略去義斌軍西下郡縣多為所脅乙酉四月遂圍東平公聞遣人會大將李里海軍軍久不至城中食且盡乃與義斌連和義斌亦欲藉公取河朔而後圖之請以兄事公時麾下衆尚數千義斌不之奪而青崖所掠則留不遣也其七月義斌下真定道西山與李里海等軍相望分公以帳下兵陽助而陰伺之公知勢已迫即連趣李里海軍而與之合戰始交宋兵崩潰乃擒義斌不旬月先所失部分盡復之是冬郡王戴孫取彰德明年取濮東平又明年太師攻益都凡公之功所在皆為諸道之冠庚寅四月朝于牛心之帳殿天子賜之坐宴享終日 上歡甚錫公金虎符寵以不名又數數目公顧謂侍臣言若嚴公者真福人矣又四年朝于和林城授東平路行軍萬戶偏裨賜金符者八人初公之所統有全魏有十分齊之三魯之九及是畫境之制行公之地於魏則別大名又別為彰德齊與魯則復以德充濟單歸于我丁酉九月 詔書命公毋出征伐當是時

公以百城長東諸侯者十五年矣始於披荆棘行豺虎散衣糲食暴露風日擊溝壑轉徙之民而置之衽席之上以勸耕稼以豐委積公帑所積盡於交聘燕享於祀賓客之奉而未嘗私貯之辟置俊良汰逐貪墨願指所及竭廢奉命不三四年由武城而南新泰而西行於野則知其為樂歲出于塗則知其為善俗觀于政則知其為太平官府而公之心力亦已盡矣上亦雅知公不便鞍馬念其功而憫其勞視之猶家人父子欲使之坐享康寧壽考之福故 聖意優卹如此公病風痺久人有勸迎良醫者笑曰人豈不死耶得無疾痛以沒足矣以庚子四月己亥春秋五十有九薨于私第之正寢是夕大星殞于縣界人以為公歿之應五月壬申舉公之柩葬於鵠里之新塋禮也公既攝兵柄顯生殺時年已長經涉世故久乃更折節自厲間亦延致儒士道古今成敗至前人良法義意所以仁民愛物者輒欣欣慕之故雖起行伍間嚴厲不可犯至於仁心為質者亦要其終而後見也彰德既下又破水柵郡王怒其反復驅老幼數萬欲屠之公解之曰此國家舊民吾兵力不能及為所脅

從果何罪耶王從公言釋不誅結破濮州復有水  
 柵之議公為言百姓未嘗敵我豈可與兵人併戮  
 之不若留之粟種以給芻秣漢人免者又數萬其  
 後於曹於定陶於楚立於上黨蓋未有不然而大  
 共田武林出襄鄧公時在徐邳間以為河南破屠  
 戮必多我當載金繒往贖之且約束諸將毋敢妄  
 殺有所鹵獲必使之骨肉完保靈壁一縣當廢者  
 五萬人公所以救之者百方兵人既素服公言重  
 為資弊所誘故皆全濟中有求還鄉里者悉縱遣  
 之是冬大飢生口之北渡者多餓死又藏亡法嚴  
 有犯者保杜皆從坐之逃亡累景無所於託僵尸  
 為之蔽野公命作糜粥盛置道旁人得恣食之所  
 活又不知幾何人矣初公之部曲有亡歸益都者  
 數十人益都破皆獲之人以為必殺而公一切不  
 問王義深義斌之別將聞義斌敗將奔河南凡公  
 族屬之在東平者皆為所害河南破公獲義深妻  
 子厚為媵卹之且護送還鄉里終不以舊事為嫌  
 其能人之所難能者又如此東州既為樂土四外  
 之人託公以為命者相踵也公為之合散亡業單  
 貧舉喪葬助婚嫁多求而不靳屢至而不厭肉骨

之賜如翼之惠日積而月累之蓋有不可勝書者  
 矣故聞訃之日遠近悲悼境內之人野哭巷祭旬  
 月不能罷古之所謂愛如父母敬如神明者於公  
 見之子男七八人長忠貞金紫光祿大夫前公卒次  
 忠濟襲公職次忠嗣忠範忠傑忠裕忠祐姪一人  
 忠輔女七人孫一人忠貞之子胡既葬之三月孤  
 子忠濟等狀公之行以神道碑為請敢以智愚之  
 所共知者論次之而系之以銘銘曰

岱宗巖巖

清濟洋洋

屹彼嚴公

尹茲東方

維大國齊

維魯所荒

大安衰微

元元遘凶

鋤穰棘於

迭為長雄

遺黎惘然

搗垣斯窮

公乘其時

奮從兵戎

心為蒼龜

往迓大同

挾右太行

以入玉封

人瞻者鳥

我龍之從

儼景同翻

欝為雷風

乾端坤倪

一廓屯蒙

奔走先後

莫予敢侮

莫予敢侮

惟公之武

乃錫金虎

民汝予撫

民惟天民

惟公受之

有內之講

職公揀之

大布我衣

大帛我冠

斜傾我扶 鐘漏我完 爾有瘡罷

我違我安 金革之威 肅于凜秋

化而陽春 倅槁和柔 祥風愉愉

叶氣油油 河潤之溥 暨於他州

民拜公賜 有憂斯構 祝公壽考

為國元老 如山如河 受福則遐

齊政方報 魯婦已鑿 布宣王靈

繫公是賴 愛養基本 繫公是戴

巨室喬木 式瞻誰在 相彼邦民

古無遺愛 有開必先 惟公之功

寵以不名 公名之崇 巍巍堂堂

哀榮始終 誰其配之 錢氏孝忠

萃平之原 龜石穹窿 勳我銘詩

以對景鍾

東平行董嚴公祠堂碑銘 有序

山東重地所在天下莫與爲比杜牧以爲王者不  
得之則不可以王伯者不得之則不可以伯古之  
山東今河朔燕趙魏是以就三鎮較之魏常制燕  
趙之生死而懸河南之重輕故又重馬方  
天共南下海宇震蕩雷霆迅擊無不糜滅燕城既

開朔南分裂贖烏受止不知于誰之屋公擁上流  
握勁鋒審大命之去就一群疑之同異乃以庚辰  
春籍所統彰德大名磁沽恩博滑澤等州戶三十  
萬獻之太師之行董形勢既強基本斯固

國家所以無傳檄之勞亡錄之費而成包舉六合  
之功者公之力無多昔淮陰襲歷下軍蓋有齊地  
高祖因之以成帝業耿弇攻祝阿實融合五郡兵  
光武因之以集大統以公方之尚無愧焉好問容  
公幕下久故能知公所以得民者蓋公資稟沉毅  
威望素著且嚴於軍律少所寬貸見者流汗奪氣

莫敢仰視中歲之後乃能以仁民愛物爲懷郡王  
兵破相下之水柵縱破曹濮怒其翻覆莫可保全  
歛盡坑之公百方營救得請而後已兵出荆襄公  
自邳徐赴之謂所親言河南受兵殺戮必多當載  
金帛以贖之靈壁降民方假息待命公魏主兵者

下迫卒伍亦霑膏潤一縣老幼皆被更生之賜且  
縱遣之計前後所活無慮十數萬人生口北渡無  
從得食糜粥所救者尚不論也靈境之後創罷之  
人新去湯火獨恃公爲司命公爲之開田野完保  
聚所至延見父老訓飭子弟教以農里之言而勉

之孝弟之本懇切至到如家人父子初不以侯牧  
 自若官使善良汰逐貪墨貸逋賦以寬流亡假間  
 田以業單貧節淨費以豐委積抑游末以厚風俗  
 至於非難解紛周急繼困收恤孤嫠飲助葺祭穀  
 粟易於水火冰霜化而純樗人出強勉我則樂為  
 故堯謝之日境內之人號泣相弔自謂一日不可  
 復活非策慮幅億洞見物情權剛柔之中持操縱  
 之術始以重典立威終以仁心為質者能如是乎  
 壬子孟冬公之嗣子某走書弊及好問於鎮陽書  
 謂好問言先公功著興王之初名出勲臣之右虎  
 符龍節長魏齊魯五十城者踰二十年官有善政  
 政有遺愛敬者比之神明報之歆其長久某猥嗣  
 世爵太懼弗克奉揚先德輒與衆佐部曲士庶耆  
 壽同力一志作為新廟以致杓祠烝嘗之敬宜有  
 文辭昭示永久惟吾子患顧之好問以為祠祭之  
 之為大事尚矣以勞以功三代不易之道若繡布  
 之五杜甄子然宋登之配食後世亦有以義起之  
 者蜀人祭忠武侯於道陌而博土拜章玉珪通貴  
 不營私廟而法官勅奏禮固不可以變古而亦貴  
 於公人之情况乎時則綿範未遠人則蒸蒿將見

如公之廟貌獨不可以義起乎祀典廢於一時公  
 議存乎千載異時有獲表忠觀故事言於朝者尚  
 有效焉好問既述公之事又系之以詩使歌以祀  
 公其詩曰

天造革昧福有幾 風雲感會神與期  
 乾龍用九方奮飛 潛蛟豈得留汙池  
 王伯之柄魏所持 金城千里山四維  
 公籍盈數數有畸 燕趙廓廓無藩籬  
 六合遂入天戈麾 猶之歷下開漢基  
 楚破竹耳將安歸 天官英功絕等夷  
 介三大藩畫郊圻 大帛之冠大布衣  
 煌煌德星出廬危 扶傷合散傾復支  
 民恃保障輕蘭絲 年穀屢豐物不疵  
 諸侯代興公維師 誰謂華高可齊而  
 武公司徒屈於斯 眉壽保魯止於斯  
 昔歌且舞今涕泗 人疇依乎遽奪之  
 甘棠之蔭公之祠 麗牲有碑碑有詩  
 戰功曰多民政慈 尸而祀之寧我私  
 公福我兮無已時 子孫報民其世思

順天萬戶張公勲德第二碑

歲辛亥冬行軍千戶賈侯輔持順天路軍民萬戶張公勲德碑見示謂僕言此內翰濟南王君從之之辭也蓋自板蕩以來我公爲吾州披荆棘立城市完保聚闢田野復官府舉典制摧伏強梗拊存單弱使暴骸之場重爲樂園其有德於州之人爲甚厚如輔不敏亦得稟授成算自竭微效猥先蒙佐紆佩金紫圖所以報謝者不忘食息頃而迄無萬分之補姑取境內士庶耆壽備樛曲之意就公所以成顯顯焉在人耳目者著之金石以昭示永久王君棉公之功而有取於吾屬之誠且一故樂爲道之凡我公率族屬保壁障由西山之東流竭以功令定興至節度雄州從經略使苗公道潤及賈瑀賊殺道潤公殺瑀復讎散其餘黨戍寅之秋策名天朝以功加榮祿大夫帥河北東西路以實書錫命自千戶陞萬戶佩金虎符順天別爲一道者亦既載之矣惟是碑之立將二十年而公之勲伐積累日盛而皆王君不之見者區區之意大爲憐然考之古人初令一邑進而守一州始將十人終至於統百萬數若惠政若戰多其見之褒述者不一而足故有大書特書屢書之語朝論以爲

義談史臣資其實錄珪爵旂常鼎鐘竹帛於是乎張本有如我公炳河山之靈會 龍興之運開拓疆宇爲國虎臣治民莅官威惠並舉而英聲茂實百不宣一其餘褒讚之義得無未盡乎今屬筆於子幸以第二碑實之僕以不腆之文不足以俎豆於於王君之後辭不敢當而賈侯請益堅度不可以終辭乃勉爲次第之初公之下東流軍滿城也滿城小而缺且無禦備帳下幾數百人恒山公武仙會鎮定深冀步卒一萬騎五百來攻公以老幼婦女乘城率壯士出戰敵不能勝然未退也後數日公策其老且急遣人假爲輜重聲言救兵至自西山曳柴揚塵鼓譟其後仙軍果驚潰公追擊之遺尸數十里是歲六月軍布川帥牛顛結高陽公張甫河間公叡哥等軍數萬來攻公登城拒戰爲流矢所中敵大呼曰射中張某矣公不爲動關門出戰甫叡哥皆敗走由是邠陽曲陽鼓城諸將帥降者二十餘城易州守盧應御下下急吏卒每欲爲變畏公不敢發公北覲次于宣德群不逞乃環應第攻之應挺身而逸妻子皆爲所虜復大掠于州遂據西山之馬頭皆公聞之即弃輜重而南問

之路人得賊要害白六門堂者遣部曲任德等潛  
執守者而反據之故賊不之覺公先約德軍曰我  
若下舉火爾即發聲乃率卒至若下數賊以叛逆  
且諭之曰能以慮應家屬來降者當貸爾命不然  
無遺類矣賊且笑且罵曰慮應妻子非白金三千  
兩不可得乃欲降我乎公怒呼之曰吾問爾三不  
從則攻爾矣問之者三竟不應乃舉火攻之德等  
如約轉石擊砦中賊大驚以為從天而下窘無所  
逃束手就縛公歸應妻子諸賊悉齮殺之綠山反  
側鹿兒和和美女擔車堵墻百峰東西五峯苑家  
西水姑姑塌紅花谷閃堂水谷白虹白家野狸諸  
砦望風降附及武仙以兵來犯公與之戰一月凡  
十七勝每勝必斬馘千餘級於是公之威名震河  
朔矣丁亥之春以滿城隘狹移軍順天順天焚毀  
之後為空城者十五年矣公置行幕荒穢中日以  
營建為事繼得計議官毛居節共為經度民居官  
府截然一新遂引鷄距一畝二泉穴城而入為亭  
榭為池堊方山陽則無蒸鬱之酷比歷下則無旱  
濕之患此州遂為燕南一大都會無復塞垣之舊  
矣京城之役守者屢出接戰我軍不能前一日公

被重鎧躍馬橫戈而出大呼謂諸帥言公輩平時  
陵轡同列以驍果自名乃今蓄縮不進虧喪聲實  
氣岸果安在能從我即同入陣不然爾後當專事  
我勿復故態為也諸帥無應者公即馳入陣中呼  
聲所及無不披靡出入數四而氣益壯歸德之役  
城中兵夜斫營並堤而進其鋒甚銳北面守者不  
戰而走多溺水死西北一軍俄亦奔潰公命軍士  
繫舟南岸示無還意因諭之曰我輩得舟亦不得  
濟濟亦不能免惟有決死而已殺心乃定命一卒  
執幟立堤上諸軍隱堤自敵待敵下舟即力卷之  
敵果不敢下公命軍士先渡將校次之公殿其後  
竟不失一卒而還汝南之役宋入聽節制我欲決  
柴潭城中兵陣於南門外決死戰宋兵瞻望不進  
公率步卒二十餘涉水入陣左右盪決莫有當其  
鋒者諸軍壯之徐州之役攻久不下宋人出戰大  
帥大赤令曰田四帥先入不能則張公繼之又  
能則我當往既而田不克入公率死士五十人逆  
擊之戰于分水樓下敵退走公追及于門俘獲數  
人明日急攻西南隅城既隳缺敵以重扉覆之攻  
者不能上公募死士乘城擁一卒起推置扉之上



弑隨陷論功第一邳州之役諸軍築壘環其外城中危迫潰圍而出望見公旗幟即犯別帥軍公率兵救之敵不能出又犯別一軍公復救之敵竟敗而諸軍亦賴之以全棗陽之役公奪得城軍壘二又奪外城據之城中人皆南門出諸軍爲木柵禦之公繞出其後敵大潰衆十餘萬多溺濠水餘軍西走復爲史侯所襲而公橫壘之

皇太子壯其勇而惜其材傳呼止之而公戰愈力迨宋兵盡乃已鄂州之役城陷州人奪西門出走前即漢水公乘勝擁之溺水者如山崗然曹武之役公將度九里關或言關路險惡宋必設伏不若候大軍與之借進公曰出其不意可以得志若止而不進爲彼所先建瓴之下吾得其便乎乃率二十騎直前果得闕宋兵覺由西山之間翼而下我軍方休息不虞敵至士皆輕衣無鎧仗斧爲所圍皆倉皇失措公單騎馳突潰圍而出宋軍不敢迫遂屯曹武北之長封嶺結陣而居戰守不易緣山保聚皆攻下之連破潁江諸二十餘所秋八月攻洪山與宋大軍遇自旦至暮宋軍潰斬統制官十三人脫走者纔一人耳光州之役大帥令公取敵

壘以公喜深入戒勿親往而公輒親往壘既下明日而城降黃州之役道出三山寨寨高險不可上公率衆攻戰方交公引數卒潛視要害處即引還夜四鼓起黎明至寨下會天大霧咫尺不相辨公曰此天也即取昨所視路發石伐木構戈而先之敵殊死鬪公奮擊之賊虜數萬自相踐踈墜崖谷而死者不勝計遂攻黃州州之西有大湖曰張大與江通流公攻下之得戰艦萬艘選什之一順流而下循江接戰十日乃至城下營於西北隅有乘小舟來覘公策之曰此必欲伺吾隙來攻耳乃分軍爲三一竝江路爲偵伺一伏赤壁下公自將一軍陣而待是夜宋果水陸並進公遮擊之宋軍不得前會我軍合並攻之不戰而潰往往溺水死生獲者尚數百人州東門禦備甚堅矢石如雨諸軍爲之少卻大帥命公取之公被重鎧卒死士三十餘輩奮戈而入守者爲之奪氣宋人請和乃班師還及淮水南岸有保聚曰張家若軍民十萬餘諸帥議立砲攻之公曰不必爾獨率一軍攻之顧盼之頃守卒崩潰諸將懾伏皆自謂不及也滁州之役公至自北觀從二百人而南時廬四肘昭安豐

濠州之間皆宋重兵所宿斥候旁午屯戍相望有以四千騎欲退者或勸公無行公不之顧且戰且前一日獨騎入一保數值敵兵二千餘人環射之矢著體如蝟公馳突回旋每射輒中敵不能近良久從兵至合擊之敵人殲焉遂會餘之兵時大帥以城久不拔議解圍公前請曰某起身細微猥蒙寵遇擢任非大顧何功以堪之况新被異恩圖報無所知大軍在此故轉戰來會誠不能奮力於諾君之後遽爾北歸將不與初心相違肯乎請身率士卒以決一戰雖死不恨也帥義而從之公馳入圍中激石中其鼻大帥謂公不能戰合軍繼之公累劍躍馬而出帥止之不顧率銳卒先登城遂拔自大河放而南杞為中澤東連淮海浩瀰無際國朝方有事南鄙彼爭利舟楫閑殆無寧歲朝議以杞為流不以大將鎮守之則一蒿所航河不能廣矣公以甲辰歲被

條耕稼俱廢我軍為困糧之計初不以餽餼自資比軍還間關千里道殫狼籍公一軍先事為備故獨無饑色許鄭之間亦有儲蓄雖他帥軍亦被贍給焉君興以來賈人出子錢致求贏餘歲有倍捐之積如羊出羔今年而二明年而四又明年而八至十年則累而千調度之來急於星火必假貸以輸之債家執券日夕取償至於賣田業鬻妻子有不能給者公哀而憐之與真定史侯論列上前乞債家取贏一本息而止

聖度寬明隨賜開允德音四布海寓欣幸初移刺衆哥張甫牛顯皆嘗與公為敵既及其妻子流離無所於託公求得之皆厚為存卹顯長子國祥以材具署為郡守次黑子為大官所俘公賂以金繒僅乃得歸仍歲有白金之輸自餘完復離散婚嫁孤幼周急繼困扶病助喪者日月不絕蓋不可以十百計也人徒知公席百勝之功以取顯面之貴威望崇重見者起立拜揖或周章失次而不知寇欲略平之後日與文儒攷論今古見仁民愛物之事輒欣然慕之恩拊吏民恒若不及雖笞罰之細亦未嘗妄加所謂仁心為質要其終而後見者也

僕老經生耳何足以知兵以公之故嘗妄論之天地一氣也萬物一體也同仁一視宜莫三代聖人者若也今見之於書則曰天吏逸德火災崑崗又曰前徒倒戈血流漂杵信斯言也謂不戰而屈人之兵也而可乎三代以來將兵者何啻千萬人孰不歆不鼓不成列不禽二毛曠然爲仁義之舉然而百姓按堵獨稱忠武侯市不易肆獨稱李良器其餘豈皆樂戰嗜殺執凶器而履危道得已而不已乎抑所遭之時有同有不同也僕既件右公之事且系之以詩使并刻之其詩曰

朔方幽都燕曰北門土風厚完海山雄吞戰國荆高義烈言言鬱摧行歌風流猶存維清河公治車騎諸孫軀幹中人勇則孟賁大安失邦南渡崩奔公乘其時萬夫索纜 乾龍天飛霆裂厚坤有盤者螭儷景岡翻

天子倚公宣力四方虎節麟符以長戎行太行西東在所寇攘盜販黥髡自爲侯王妖狐夜號平民盡藏十里蕭條道殣相望翩翩一軍誅讎暴彊指以神鋒孰我敢當扇靈風之威詞禁不祥曾是冰天化而春陽 王旒嘽嘽頻歲江潰

於光於黃棘陽壽春公不以大帥自居而矢石必親出入行間勇氣益振每戰而輒得志古難其人公殿南藩淮海與隣中潭新 矗若長雲吳兇臙蔽暮夜潛軍有扼其吭去如驚鷲望見鼓旗謂公江神徐方既平荆楚既同觀於王庭三接日隆何以錫之珣戈彤弓何以命之侯國世封臣拜稽首

天子之功臣力方剛臣報未終教子若孫惟孝與忠布宣王靈地天無窮伐石西山刻詩頌公千年此碑當配景鍾

龍虎衛上將軍耶律公墓誌銘

公諱思忠字天祐以小字善才行遼太祖長子東丹王之八世孫曾大父內刺贈定遠大將軍大父聿魯隱德不仕考履章宗明昌初拜尚書右丞生三子公其仲也弱冠以宰相子引見補東上閣門祗候泰和四年終更調衛水令蘭州軍士判官入爲西山閣門簽事大安二年改太子典儀轉裁造署今扈從宣宗南渡以勞授儀鸞局使俄遷太府少監兼直西上閣門尚食局使貞祐三年出爲同知昌武軍節度使事改章化軍歷嵩裕息延四州

刺史同知鳳翔府事東京副留守同知歸德府事

北兵襲荆襄京師戒嚴詔公以都水監使充鎮撫

軍民都彈壓壬辰二月公之季弟今中書令楚才

奉 旨理索公北歸召見隆德殿公再拜乞留死

汴梁哀宗幸和議可成贈金幣固遣之君臣相視

泣下竟以某月十有七日自投於內東城濠中水

而歿時年六十有一上聞之震悼贈工部尚書龍

虎衛上將軍夫人郭氏先公卒于男一人曰鈞仕

為尚書省譯史女二人嫁士族男孫三人寧壽昌

壽德壽女孫一人皆尚幼公資雅重讀書知義理

遇事明敏雖老姦不能造其情從仕四十年未嘗

有答贖之玷其畏慎如此死之日朝賢多嗟惜之

孤子鈞以某年月日奉公之柩葬於義州弘政縣

東南鄉之先塋以好問於公有一日之雅百拜請

銘故略為次第之其銘曰

其賦材也博以通其植志也敬以恭安靜以養

民敏給以赴功斯足以為賢或生長見聞者之

所同至於憂國憂君存亡始終裴回故都而不

忍訣則藹然有古人之風

遺山先生文集卷第二十七

碑銘表誌碼

龍虎衛上將軍宋虎公神道碑

生而靜之謂性靜而應之謂材材與性出于天其初

則通而中有大不同者蓋性者材之體而材者性之

用體喻則璞也用喻則璞之雕也然性不害為不及

而材每患于有餘惟其不及故勉于成惟其有餘故

趨於壞人知惟鈍朴魯拙於變通艱於鑄鑿之為無

所取而不知聰悟敏給敢於負荷安於墮窳為大可

哀也古有之博學雖愚必明况賢者乎困而學之又

其次也况不至於困者乎以是論公則學之力為可

見矣公諱錫壽字堅夫姓宋氏世為上京人五世

祖宋不從武元下寧江王業漸隆論功第一一命銀

青榮祿大夫節度寧江開國之後一門世封猛安五

人謀克十七人尚縣主者三人子孫以世官故移戍

西北路挑山之陽因古籍撫州勳貴之盛國史家謀

評焉曾大父布苦德襲猛安積官鎮國上將軍妣完

顏氏金源郡夫人大父查刺明威將軍比部詳穩官

如温敦氏金源縣君考阿散懷遠大將軍霸州益津

氏進封太夫人公即益津府君之長子也初名雲壽道陵特旨改焉大定二十九年以人門選充親衛軍騎射馳捷時輩無能出其右初著籍即銜直點檢司泰和中元妃李氏兄弟貴寵方盛內外諂附大奴文童者以事陵轡平民市人聚觀無敢爲紋止者公見之唾掌大歎曰若人奴耳何敢耳耶直前擊之馬蹇亂下奴流血被面號訴於都點檢喜兒人爲公危之公泰然自若謂同列言點檢公宮闈之長果辦事當加重我或以一奴故而害正人豈久於富貴者我何懼爲喜兒召公入善言慰之曰外人見吾家鷹犬且知愛之君乃能辦此可謂不畏疆禦矣奴輩儻復恣橫無惜教督之公用是知名嘗聞一策論老生曰世謂親衛軍舉不能官其病安在生言公輩年二十許隸籍又二十年乃出官四十而學從政蓋已晚矣况衛士之職尊君之外無復餘事平日唯知威制疆脅積習既久豈復有平易近民者乎公復問然則如何而可生曰公試取律令讀之公退而讀律不二三年條例及注釋問無不知他日又問生我讀律知大綱矣竊謂刑法但能治罪惡之有迹者耳假有情不可耐而迹無可尋者何以治之生曰聖人作春秋不誅

其人身子能讀春秋則治心與跡兩俱不因矣公復從人授春秋泰和中行臺駙馬都尉揆南征詔給親衛軍二百五十人以從而公爲之長破羅山得經生曹鼎從之講授從是言論闕事又非吳下阿蒙矣嘗言吾初讀律繼而授春秋因之涉獵史傳粗見成敗比死者須一見天子不有所建明可乎復取劉顏輔弼名對陸宣公奏議成誦之其矧學堅志類如此八年軍選用行臺薦收充奉職宣諭良厚大安初奉詔使高麗立節清介不聽以館伎給使令玄市之利僅不廢故事而已御史上之即日授中官護衛尋遷之御前至寧初右承綱軍居庸詔公爲參謀數與綱議不合綱積不能平檄公從縉山高琪軍時

大朝兵已薄居庸游騎彥午道路阻絕公從僕僕二三輩夜出關無一卒與俱會高琪移軍合河公馳赴之比至而軍已潰單騎南還且戰且走僅入南山與都統興哥收潰卒四千騎二千拒險而陣軍中遣譯人好謂公言我無他求止欲得馬耳公報言渠欲得馬我欲得吾人之被掠耳果以吾人見歸焉非所惜也約既定相與結盟與馬十得者

幼千餘以歸以功加鎮國上將軍賜馬十疋真祐  
二年扈從南遷公憤懣欲有所言而無自發之行  
及新樂爲上言妃左車乘絲畫鮮明徒事外飾而  
適用之具或不足任重而致遠設有意外之變非  
臣子所敢言蓋積弊之極以致今日非獨此一事  
而已宣宗感悟詔公以便宜提控尚輦局七月以  
扈從勞授器物局副使一日内出鞠仗命料理之  
工部下開封市白牯取皮公以家所有鞠仗進且  
言車駕以都城食盡遠奔陵廟正陛下坐薪嘗膽  
之日柰何以球鞠細物動搖民間使屠宰耕牛以  
供不急之用仇敵在邇非所以示新政也上不憚  
擲仗籠中明日出公爲橋西都提控是歲臨秋公  
度遠近設候望河朔無警則聽河防民丁整歸省  
新糧以贍軍公私便之四年冬十一月潼關失守  
樞密院檄公守虎牢虎牢險峻谷遷變無險可扼倉  
卒中作大橋以拒而師橋甫成而敵至相去百舉  
武長兵已相接矣公橫槊橋上獨當之而師十六  
輦棄馬潛由澗中路偃倮而上欲出公軍士之後  
軍爲小却公策馬大呼後騎隨進聲勢甚張十六  
人者皆倉皇失措展轉澗底公下馬立視指麾後

騎乘高而下顧盼之頃梟六首而還汜水東數城  
西師雖不侵突而群不逞有因亂相剽竊者獨公  
所鎮軍民接堵如故諸縣祀河陰爲立生祠樞密  
院別帥軍二萬成虎牢此軍至自河朔剽掠成俗  
且主帥馭之無紀律變在旦夕民謂公可恃自陳  
苦急公言之帥帥言我軍皆盜賊彊梗之餘當以  
漸柔服急則生變欲將誰執公知帥不能軍縛暴  
橫尤甚者三人斬之以徇軍中肅然俄改武器署  
令五年除同知定國軍節度使事自夏陽抵潼關  
上下千里戍卒五萬公兼領之因上奏開輔被兵  
之後殘民疲於供給在所城壘之後乞以農隙爲  
之秦民頓馬與定二年改同知龍安軍節度使事  
三年改環州刺史夏人大舉入寇城中軍不能二千  
公以老幼婦女乘城度寇至木波地狹道險利用  
設伏自將步騎五百乘夜襲之寇果驚潰南走追  
斬千人奪老幼數千獲將領一人寇奔往西道公  
復邀擊之斬首數百獲牛羊萬餘慶陽總管子容  
以巡檢幕客再能有名馬二欲取之倚公同局之  
舊私遣掾屬趙以情告公公耻以求索見汚爲趙  
言彼部落族以馬爲死生凡馬且不可得况名馬

乎於是總管者怒且慙乃誣再能有叛計遣趙掾勒公捕送趙復得以此脅再能獻馬可免罪再能率所部千人州署前望闕泣拜曰我曹受恩百年何嘗有一人萌異志者幸太守申明之趙掾在我亦不為冤死鬼矣公欲兩解之總管愈怒馳奏再能有叛計剽史不奉府檄擁護罪人可并按之有詔京兆行臺窮治其事衆知政事把公延安帥完顏公保公無他詔勿問猶以州府不相能兩罷之平涼行臺奏公為馬步軍都總領公自以無罪橫被廢棄鬱鬱不自聊雖擢置亞帥非其好也居無幾何偕同官游崆峒遂有終焉之志不三數日遘疾疾遂革所親問後事公強起應之曰我武人不死疆場而死床篋獨是為介介爾此外何必言言終而逝享年五十有一實貞五年七月之十一日也元光改元冬十月諸孤扶護東還權殯汝陽積官龍虎衛上將軍金源郡侯先娶夫谷氏雲陽令阿合門之女前公卒再娶徒單氏秘書監歐里白之女後公十有八年而卒竝封金源郡夫人子男五人長伸道次仲貞撫陽監酒次仲坦閣卿令次彭孫冊孫俱蚤卒女二人皆適士族男女皆前夫人出也男孫二人祖安老安女孫一人尚幼公儼幹秀

儒資稟沉毅清儉公勤為人寡言笑不妄取即事親孝友愛諸季恩禮備至及弟兀析居公悉有以處之曰季弟通貴無俟分財其弟戰歿其孤當卹小弱弟早失怙恃尤可哀者孰多孰寡咸適其當公所取唯白玉帽環一雙而已曰此大門時物也在軍中餘十年與士卒同其苦至盛夏不操扇或問之故曰古名將類如此吾願學焉且身歷艱苦亦從儉入奢之義也或言軍士近年例無戰志殆不堪用耶公謂不然猶之鷹隼往往在田間悉能自取食人得而畜之豈遽忘搏擊耶婦人女子為氣所激尚能持刃而鬪况男子乎吾謂兵士無不可用亦猶鷹隼養之未至耳公既耽嗜書史故親授三子者學夜冬半猶課誦不已三子服教悉能自樹立有聞於時某歲仲坦舉公樞北歸卜葬於輝州蘇門比之某厚枉道過好問新興授公行事之狀涕泗百拜以神道碑銘為請仲坦從好問游有昆弟之義義不可辭乃為件右之惟公故大家生長燕雲間州閭貴將華靡相尚公家累鉅方僮僕千人惟帳軒車琴筑棊槊可取諸左右而足能被服儉素攻苦食淡不變老人大父國俗真

淳之舊此一難也帶刀宿衛從事獨賢而於耆宿更休之餘爲幼學壯行之計心樂性熟寢食不廢乃如寒苦一書生雖明昌右文海內嚮化家存籛金之謫士有橋門之盛至於以衛士而治儒術者唯公一人是又一難也流品既高朝譽既著高矯射隼足致要津公則剛近乎仁義形於色未信不虞於謗已而奉公寧至於失名踳躑一麾有識興嘆使之得時行道持衆美而效之君文武志膽用無不可徒以一言忤百不得久居中何泰和封殖之難而貞祐摧折之暴也彼以假儒衣冠生死利祿碌碌無補蘇而復上六經掃地沒世不復反以武弁待公自今觀之其賢不肖果何如也銘曰

北方維強間氣維維以宗起身而以名起宗金石獨止而瓦竝流脂膏共死而不自豐直前徑行之謂剛有犯無隱之謂忠匪惟公賢簡策之功丞相材官危戮鄧通北山諫書乃在箠公使公不學無術循當有古人之風大冠如箕鉅儒宗工徽迭周廡寔命不同乃如之人丐祿不計庸我銘

墓石齋孤憤子何窮

恒州刺史馬君神道碑

死生之際大矣可以死可以無死一失其當不以之傷勇則以之害仁然自召忽管仲折衷於聖人之手斯不必置論至於忠臣之於國義士之於知己均爲一死而中有大不相侔者蓋不可不辨也嘗謂意氣感激衆人之所同歿壽不二君子之所獨今夫傳記所載粹然就一死以取千載名者多矣及就其平素攷之果嘗以千載自望乎夫惟志士仁人知所以自守也不泊於義利之辨不乖於去就之理端本既立確乎不技靜以養勇剛以作彊其視橫逆之來曾塵舟飄瓦之不若控搏之變如寒暑旦暮之有常心爲權衡自量輕重知有太山之義而不知有鴻毛之生結纓之禮不至死取於海隅之伏劍瘞身之志既篤不屑於督亢之獻國孰先孰後必有能次第之者語有之君子死而食之間遠仁造次必於是顛沛必於是信斯言也匹夫爲諒自經於溝瀆其可與求仁而得仁者一槩論乎君諱慶祥字瑞寧姓馬氏以小字習里吉



斯行出于花門貴種宣政之季與種人居臨洮之狄道蓋已莫知所從來矣金兵略地陝右盡室遷遼東因家焉太宗嘗出獵恍惚間見金人挾日而行心悸不定莫敢仰視因罷獵而還教以所見者物色訪求或言上所見殆佛陀變現而遼東無塔廟尊像不可得唯回鶻人梵唄之所有之因取畫像進之真與上所見者合上權喜讚嘆爲作福田以應之凡種入之在城獲者賞爲平民賜錢幣縱遣之君之祖諱迭木兒越哥父把驪馬也里默又遷靜州之天山天山占籍今四世矣此地近接邊堡玄市所在於殖產爲易君家勤儉自力耕墾畜牧所入遂爲富人君之父生三子其二早卒獨君資稟聰悟氣量宏博儕輩無出其右年未二十已能通六國語併與其字書識之泰和中試補尚書省譯史使者報聘麗夏君率在行中大安初衛紹王始通問大朝國信使副倚君徃復傳報皇帝賞君談吐辨捷欲留不遣君百計自辭竟獲復命其年乙里只持譯書多所徵索君白於有司諸所徵物皆畫二供進自以身在名取之目歷而不言乙里只見衛王自陳所以名取君者王召問

君面奏不願行之意辭情懇到王爲感動連賜之酒出內幣重幣并所酌金鍾賞之宣宗遷汴渠乙里只再至復斥名索君朝廷幸和事可成論以敦遣之旨君以死自誓行議遂寢於是君相以腹心倚君頻歲遷擢乃自常調中特恩授開封府判官進官昭武大將軍內城之役奏充應辦使城成以勞遷鳳翔府路都總管判官元光二年秋大兵有深入之耗行臺檄君與治中胥某分道清野去城不三四里猝爲游騎所馳君與其子三連俱爲所執兵人欲降君擁迫而行言語相徃復竟不屈而死得年四十有六實十一月之二十二日也三連以是夜亡還主帥惡於坐卧而不能揀也出騎兵千人與尸而歸三軍之士爲之慟哭官吏士庶旦夕臨者三日塋之尋具君死節驛奏之詔贈恒州刺史韓國上將軍立像褒忠廟歲時致祭且徵一子入侍皆異恩也君娶馬氏子男三人長即三連次鐸刺次福海女一人適楊氏君嚴於教子動有成法必使知遠大者三子亦能自樹立有君之風女第適安氏甥天合父汝後躬自教督踰於所生習諸國語洎字書授之爲它日起家之地其後馬

氏宅相果有成之者已酉秋九月晦三達涕泗再拜以君墓銘見請予謂南渡以來死節之士皆耳目所接見恒州之事固已飽聞而鑿道之矣蓋君平生時每謂所親言君父之恩大矣在狄道則捕為生口而全活之在遼東則衣食之衣食之矣又縱遣之在大興則開仕進之路而官使之官使之矣危急之際又以腹心倚之顧以盡此身以蒼萬分耳是則忠義奮發不謂之素定於胸中可乎是可銘也乃為論次之君尚多可稱弗著者所以與享於褒忠者銘曰

墓本柏松碑石蛟蛇君得所以歸而行路齋嗟莫備者方賦君則多沉潛而剛悃幅而無華會是象胥孰從漸摩主恩岱崧我乃負荷何以矢之之死靡它參手吾前不磷於磨寧以四方之彊借妻婦而娉媵河源九天放為頽坡砥柱中流終古不頽彼美人予何直去齋而即華匪我前知神理不遐漢貂七葉其必爾家

贈鎮南軍節度使良佐碑

天興元年六月乙亥尚書左丞臣踐上故禦侮中郎將陳和尚死節事且言臣以使事至朔方有為

臣言者中國百餘年唯養得一陳和尚耳乞褒贈如故事以勸天下事聞詔贈鎮南軍節度使尚書省擇文臣與相往來而知其生平者為褒忠廟碑宰相以東曹掾吏部主事臣某應詔臣嘗考於朋友之際漢李陵以力盡降匈奴武帝族其家隴西士大夫至以李氏為媿而司馬遷亦以陵故而下蠶室蓋天倫之重美有以相成惡有以相及所繫之大如此惟鎮南之事壯矣以聖朝承學之臣之多而猥用下臣櫟之古人所以為辱者臣與有榮焉謹百拜稽首而論次之按蕭王諸孫曰乞哥者於國姓為疎屬其上世以上京軍戍天德因而家焉泰和南征有功授同知階州軍州事及階州及為宋戰於嘉陵江之上死之是生鎮南鎮南諱彝字良佐以小字陳和尚行貞祐中年二十餘北兵破豐州執之而北時後凡安平都尉鼎亦以力戰沒入北中二人者名為群從而義均同父故鎮南之母留豐州而安平母事之鎮南居帳下歲餘託以省母乞南還北人以一卒監之至豐乃與安平殺監卒奪十餘馬奉大夫人而南北軍覺合騎追之得由他道以免既而失馬載大夫人以鹿角軍

而兄弟共挽之南渡河朝廷官之安平得以世爵為都統鎮南試護衛中選宮宗知其材未幾轉奉御安平行帥府事奏鎮南自隨詔以提控從軍安平敬賢下士有古賢將之風辟太原王渥仲澤為經歷官仲澤文章論議與雷淵李獻能相上下故鎮南得師交之天資高明雅好文史自居侍衛日已有秀才之目至是授孝經論語春秋左氏傳盡通其義軍中無事則窓下作牛毛細字如寒苦一書生仲澤愛其有可進之資示之新安朱氏小學書使知踐履之實識者知其非異下阿蒙矣三年安平罷帥職例為總領屯方城軍中有太和者與鎮防千戶葛宜翁聞訟訴于鎮南鎮南在其兄軍中一軍之事皆與知之非特於其部曲然葛之事不立即量答之葛素凶悍恥以理屈受杖竟鬻鬻以死留語其妻必報鎮南妻乃以侵官訟于朝且有挾私讎之愬積薪龍津橋之南約不得報則自焚朝廷乃繫鎮南方城獄國家百餘年累聖相承一以人命為重九殺人者之罪雖在宗室而與間巷細民無二律南渡以後郡縣吏以榜掠過差輒得罪去者相踵也議者疑鎮南狎於禁近之習倚

兵闖以為重不能如奉法之吏橫恣之犯容或有之使者承望風旨即當以大辟奏上久之不能決鎮南聚書獄中而讀之蓋亦以死自處矣安平病久而愈明年詔提兵而西因朝京師上怪其瘦問卿寧以方城獄未決故耶卿第行吾今赦之矣明日堂諫復有言後數月安平以物故聞始馳赦之有旨有司奏汝以私忿殺人私忿未必有至於非所得咎而疆之非故而何汝兄死矣失吾一名將今以汝兄故曲法赦汝計天下必有議我者他日汝奮發立功名國家有所賴人始當以我為非妄赦矣鎮南泣且拜悲動左右竟不得以一言為之謝乃以白衣領紫微軍都統再遷忠孝軍提控五年北兵犯大昌原勢甚張平章芮國公問誰可為前鋒者鎮南出應命先已沐浴易衣若將就木然者擐甲上馬不反顧是日以四百騎破勝兵八千乘勝逐北營帳悉遷而西三軍之士為之振奮思戰有必前之勇蓋用兵以來二十年始有此勝奏第一手詔褒諭一日名動天下忠孝一軍皆回紇乃滿羗渾部落及中原人被掠避罪而來歸者驚狼陵突號難制之甚鎮南御之有方俯首聽命

弭耳帖伏東而東西而西易若駢羊豕而逐狐兔  
所過州邑常例所給之外一毫不犯每戰則先登  
陷陣疾若風雨諸軍倚以爲重六年有衛州之勝  
八年有倒迴谷之勝始自弛刑不四五遷爲中郎  
將官世襲於是四方內外知方城之獄聖天子所  
以定國是結民心厲士氣以弘濟於艱難者至矣  
其當之也不以一人之私而廢萬世之法其貸之  
也不以匹夫之細而傷天下之功不然則生殺與  
奪廷尉平一言之頃而決何至歷十有八月之久  
耶陛下之所以御將鎮南之所以報國君臣之間  
可以無媿千右矣副樞密使蒲元無持重之略嘗  
一日夜馳二百里而趣小利諸將莫敢諫鎮南私  
爲同列言副樞以大將而爲剽劫之事今日得生  
口三百明日得牛羊一二千而士卒以喘死者不  
復計國家所積必爲是家破除盡去矣人以告蒲元  
蒲元一日置酒手勸諸將及鎮南蒲元曰汝嘗短長  
我又謂國家兵力當由我而盡至以比刑人時德  
全誠有之以不鎮南飲酒竟徐曰有之蒲元見其  
無懼容漫爲好語云有過當面論無後言也元年  
鈞州陷北軍下城即縱兵以防巷戰者鎮南避隱

履殺掠稍定即出而自言我金國大將欲見合按  
白事北兵以數騎夾之詣牙帳前問姓名曰我忠  
孝軍總領陳和尚大昌原之勝亦我衛州之勝亦  
我倒回谷之勝亦我死於亂軍則人將以我爲負  
國家今日明白死天下必有知我者矣北人欲降  
之斫其脛不爲屈脛折盡地大教語惡不可聞語  
口吻至兩耳噴血而呼死至不絕北人義之有以  
馬酒酌之者云好男子他日再生當令我得之時  
年四十一銘七

韓國上將軍京兆府推官康公神道碑

銘

維金朝入仕之路在近代爲最廣而出於任子者  
十之四國初監州懸酒稅亦以文資參之故任子  
多至大官其不達者猶得俎豆於大夫士之列大  
定以後雜用遺制罷文資之注酒使副者純用任  
子且增內廷供奉臺俸直之日凡歷監當久及課  
最者得他遷謂之出職如唐人入流之比是後權  
酷日增風俗隨壞六七十年之間遂有愚賢罔滯  
之嘆論者以爲此誠選曹泥法之弊至於廉恥道  
喪自同商販亦爲任子者有以奉之然且以國家

舊人觀之使人人有士君子之清慎自守不爲利惑有如吾輔國康公者其敢以今日任子法待之乎公諱某字德璋康氏世爲遼陽人曾租某遼澄州刺史祖斌天會中進士仕爲咸平路轉運副使考道安不慕榮利優游鄉里以讀書講道爲業臨終教諸子言九人在仕籍豈有憂飢凍者事當從正貨利不得閱諸心後用公貴累贈輔國上將軍京兆郡侯公即侯之長子也大定中以咸平君蔭歷郎鄂沂州酒官明昌五年積遷樂安盜使司管勾資廡介動以繩墨自檢佩服遺訓無敢失墜及莅是職至家所食亦就市買之蓋司所轄龜戶舊出分例錢以資司官管勾歷三周歲乃成考所得不下萬緡公皆讓之同官黃思忠不毫末取也諸管勾分辦歲課額外仍有積貯者謂之附餘管勾私用之有司視之以爲例而不禁也及公當受代悉籍所餘上之官使范文淵大爲驚異嘆曰康君奉公乃至此耶用課最當遷且本道提刑司薦公材可臨民七年得陞陳留令時早已入公下車而兩明年復旱民大艱食而無從販貸之公出俸粟爲之倡縣豪傑共贊之所得至三萬斛全活不可

勝計雖旁縣亦有受其賜者承安二年冬朝旨更定戶籍異時郡縣通檢名爲聚訟豪民猾吏囊橐爲姦若新增若舊乏徃徃不得其實徒長告訐而已公精敏有幹局縣人之肥瘠先已默識之差次高下一出其手籍旣定無一人有言不平者秩滿赴常調吏工部連辟爲曹甸河防都提舉都水使者言於朝馬蹄埽河從東北流害田爲多閉之則由徐州東南入海所經皆葭莖荒穢之地河壩駛田可利東明諸縣乃撥公董其役而河水湍駛土木不能勝水面高出堤上危欲奔潰已報都水而督之愈急公具香火禱河伯一昔水落丈餘特人以正直感通許之尋被發蔡司薦泰和三年遷河北東路轉運司力籍判官五年遷授襄陵令平陽縣十此爲難治公發姦擊彊尤更致力旬月之頃治效卓然明年秋在所蝗害稼已及縣境公率士庶齋沐致禱其日蝗徑過無留者復爲按察司所保八年授京兆府推官公仁心爲質加更事之義故決獄之際多所平反京兆大府公使庫例有所給官屬月酒常費之餘率賣之民間公獨以爲不可嘗謂所親言酒果有定額吾屬侵縣官而益私

藏非害公乎三白渠業戶每以爭水為訟或至殺人浚渠京兆檄募官行視募官奉故事往不加意公受檄為親至渠上求致訟之故果得石刻記渠以青石為之地蓋渠路歲久為泥滓填塞受水絕半分既不能給因闢起而爭之公率役夫浚渠以石地為限渠深常歲丈餘自是無致訟者俄致仕

愛林慮山水有終焉之志以貞祐二年五月之五日遘疾終于私第之正寢累官輔國上將軍護軍京兆郡侯食邑千戶食實封一百戶兩娶高氏俱封京兆郡侯夫人子男一人塘與定五年擢詞賦進士第官正奉大夫鈞州刺史權沁南軍節度使

薰懷州招撫使孫男二人天英世英孫女三人曾孫女一人俱尚幼瑋以癸卯十月十有二日奉公之柩葬於林慮縣三陽里東南原禮也既卒事以公事快未謂某言劉內翰極之誌先府君墓已納之壙中矣神道有碑碑當有銘敢質之以為請某於瑋為同年生義不得辭乃為之銘并叙其平生如此其銘曰

秩侯其腴山澤其壘身處脂膏不以自濡執法與游御史與居退食自公飲水飯蔬清白所遺

吾以觀發源之水初士不於材相彼潔汗百藝不足一節有餘趙張三王之治聲非不藹如使九微至焉而有所愧君子盜諸貪夫我愚曲士我迂我愚我迂不與義俱無碑有銘大書特書是維古廉吏之墓可勿表歟

奉國上將軍武廟署令耶律公墓誌銘

公諱辨才遼太祖長子東丹王之八世孫曾祖諱內刺贈定遠大將軍祖諱聿魯考諱履章宗明昌初拜尚書右丞謚文獻公生三子公其長也資個儻軀幹雄偉每以志節自負不甘落入後年十八以門資試護衛校射者餘七百人皆天下之選而公中第三俄以公事免泰和中從軍南征攻取三關以十一騎輕身入光州時宋已復三關復奪而出身被十三創以功授真州錄事判官轉曹州司候中夏受兵山東西路行臺檄公戍東平尋詣北軍議和事遂為所劫行及居庸關潛謀歸國奪老幼數萬入都城宣宗嘉其功授順天軍節度副使賞賜鉅萬扈從南渡奏充孟津提控與定中選授京兆府兵馬使辭難軍節度副使左降河中府判官復次同知睢州軍州事兼歸德府推官歷中京

兵馬副都指揮使召見問以軍政利害公慷慨爲之言將相多非其材遂忤權貴出爲許州兵馬鈐轄召授武廟署令壬辰正月公之季弟令中書令楚才奉命理索公昆季北歸二月朔諭旨於隆德殿公涕泣請留死汴京哀宗幸和事可成賜金幣固遣之公歸留寓真定以丁酉歲十一月十有一日春秋六十有七遘疾終夫人靖氏前公卒子男一人曰鑄男孫二人曰誌公奴謝家奴皆尚幼鑄以癸卯秋九月奉公之柩葬於義州弘政縣東南鄉之先塋鑄弱冠而有老成之風以嘗從予學來請銘故畧爲次第之其銘曰

以射則絕傳以戰則無當前虎視鷹揚而風義凜然材則人耦奇則天賁志一棺埋辭九淵千年而見白日尚有望於捷蓬之賢

遺山先生文集卷之二十七



遺山先生文集卷第二十八

碑銘表誌碣

大丞相劉氏先塋神道碑

天兵南下經畧中土歲甲戌秋師次燕西今行墓龍門公年甫十二隨其家人避兵德興之神房山既而盡室被俘公在一大首領麾下一日避役御營犒宴之人什伍爲偶公輒入座共食意態自如上舉目見之親問姓名及所以來者公跪自陳主帥不見卹無以自存願留止營中

上召主帥名索公得之隸中官帳下不三四年諸部譯語無不聞習稍得供奉上前公資稟聰悟異於常人進退應對無不曲中聖意未幾擢之奉御之列出入帷幄寒暑旦暮斯須不少離千載之會實始於此其年出使諸道所至以稱

旨聞車駕征契丹餘族是爲西遼歷古續兒國訛夷朶等城戰合只破之遂征遼丹之斜迷思于普花兒拒印度噴木連破其軍二十餘萬公皆在焉五六年之久艱難險阻備嘗之矣上試公已久熟其封量而閱其勞苦隨以西域工技戶四分二千之一立局燕京燕提舉燕京路徵收課稅漕

運鹽場及僧道司天等事山東十路山西五路工  
技所出軍立二總管公皆將之錫之玉印金虎符  
公上奏臣有舌在不煩符節意以爲 聖訓諄復  
孰不畏服臣口能宣布之因因讓金符於佐官宋  
元高逢辰別請銀章而歸是後立 行宮改新帳  
殿城和林起萬安之閣宮闈司局皆公發之

明聖繼統方國連紹勳舊大臣行尚書省事於漢  
境節制所及凡二十餘道分陝之命公實膺之以  
公前後而言蓋勝衣而入侍燕閑未冠而肅將使  
指帶刁宿衛從事獨賢周方徵巡靡國不到經涉  
萬里出入三朝仁信篤誠自結知遇至於成日門  
之婚媾辨諛夫之媒藥新宮落成則以有功遍諭  
中州撫治則以無過見知合侍御而爲家人父子  
之親由瓜牙而得股肱心膂之寄眷顧殷重賜賚  
稠疊開國舊臣莫與爲比古所謂攀龍鱗附鳳翼  
依日月之末光挹雲雨之餘潤者蓋不足道也公  
每以 國恩天大不勝臣子區區之情丙午冬詣  
闕拜章既以鄉郡所創大清真寺爲僧衆祝嚴之  
所矣恭惟河澗九里澤及三族姑姊群從仁卹嫻  
睦率從大慶得之而於揚名顯親尚或闕如人子

之心其何以自處乎乃命家老件右積累之舊命  
文士撰述銘諸麗牲之碑謹按劉氏世居宣德縣  
北鄉之青魯里孝第力田蓋有年矣魯父大父雲自  
遠日爲大家有子四人曰璋曰璣曰珣曰瓚珣之  
子四人顯仁字仲明祖仁字仲昌用仁字仲至休  
仁字仲康仲至府君即公之考也公家故大族又  
以貲推其鄉委積豐嘗畜牧蕃息北山之奚家閭  
西鄉之土厚皆有別業與世官榮祿家同里閭出  
入遊觀裘馬相尚輕財好施少不靳固來者多所  
全濟故州里以陰德稱焉府君娶同鄉李氏生三  
子長敦字德厚季効字德信皆無祿早世公其第  
二子也自大父以來不常厥居而其先塋止於青  
魯西北原而已竊嘗攷於陽報之說天造草昧利  
用達侯豪傑之士乘時奮興以取功名富貴者抑  
多矣虎或鼠化蛇非龍諱亦奚必以憑藉積累而  
爲言然質之古人袁氏之四世五公高密之重疾  
累得一得於平反楚王英之獄一得之統百萬之  
衆未嘗妄戮一人遠則傳記所傳近則耳目所接  
見若此者衆殆不可勝舉惟天愛民甚一物暴陵  
則天氣爲之舛錯故愛人者必有天報報施所不



又者特十百而一耳使憑藉積累一切以諛辭折之則神理或幾乎熄矣公家出燕遼之大姓庸魯高之世業華腴之奉贊爲素戾至於排難解紛周急繼困任俠尚氣與時貴並名源深流長聚見於此惟公資風土之厚炳川岳之靈威德沉潛策慮福億坐鎮兼薄舍納垢污獨見幾微之先審度剛柔之際人不能一我則百之若夫武臣宿將專制方隅交構既興怨嫌斯在公折之以正理示之以赤心智勇既殫重爲輯睦又若失意盃酒意氣妄加人以兵憂我惟誠性和氣甫爽而宿怨已平又若論列 御前皆天下大計辭情激烈 上爲動容一言興邦古無與讓至於賓禮故老崇尚儒雅古今治亂了然胸中慕高賢之歸休師道家之知止無心富貴而富貴如見逼畏遠權寵而權寵常自至年甫知命福祿方來其深畧遠圖忠良明智上以尊王中以庇民下以爲劉氏無窮上傳當大書特書屢書之不特一書而已也夫忠以報國孝以起家立身行道之義彰慎終追遠之德厚不有金石後裔何觀乃爲之銘公名某字德柔以小字某行八子某其長已龍世爵云其銘曰

有佳者城武寧其原是爲龍門劉氏之阡劉爲大家出用武國從公魯門孔武且碩孔武且碩唯幽燕之習魯是義俠而多潛德介介我公有見於幾年甫勝衣知大福所歸惟左右是奉而不遠關閭風雲出入範圍婉孌龍姿躍而天飛股肱心膂成臆而一穆陵無棟賜履而十命以南伯方國是式于蕃于宣汝明汝翼丘山其崇川谷其容望之巍然允矣鉅公紀有旃常勒有鼎鍾何以配之錢氏表忠衮冕觀義奮無所階世尋丕祚公有自來宗起起宗疇宗之德公汝其流謂必有關公侯之世其終必復家食舊德史遺往躅擬有平反將無妄戮神理不遐敢專其福岷山導江小川三十發源濫觴其必不然我作銘詩述劉京之先祝公眉壽而保魯爲忠孝無窮之傳

歸德府絳管范陽張公先德碑

范陽張公漢臣遣其衆佐陳珪李侁侯琮自曹南走書幣及子於頌天書謂予曰子良不敏爰自束髮以良家子隸軍籍轉戰南北將四十年馮藉先世積善之舊生還鄉國乃辛丑某月得用侯伯之服

之禮展省墳墓致之令甲諸仕及通貴廟與墓俱有碑應用螭首龜趺之制竊不自揆度思得文士之見信於人者譔述之以修光寵以昭前人以俟百世之下維吾子惠顧之曩予在大梁承之左曹之都司壬辰之園外援阻絕危急存亡朝不及夕或有言宿州節度宗室製僧奴之幕客張子良由問道貴奏牘至者都堂趨召問所以來公爲言國用安自連水來歸糾合義徒刑牲歃血誓爲勤王之舉以游騎旁午跣步千里無敢進奏者子良感激自奮獨與裨將張平夜行晝伏間闕百死乃今瞻拜京闕幸疾得歸報無失事機即日召對便座勞賜穀重凡奏牘所請眷倚用安者無不開允符節印綬衣帶弓矢書詔誥命九繫之左曹者予得與聞之朝議多公機警絕出占對詳盡雖素官無以過嘖嘖稱歎率以遠紫期之及公將使指還都人日望東師之至而用安天奪之魄心計蹉跌進退狼狽迄無所成公信義昭著獨爲特論所保任故繼有鷹揚騎都尉涂宿節鉞之命予亦備聞之公初北歸介於東明商君孟卿父子及崔君君佐壬君安仁兩君以此碑爲言蓋公頗知予而予

亦嘗望見眉宇於衆人之中顧交之日久矣誠得秉筆以相蒞役使孝子之情盡諸疾之禮備固所願也其敢以固陋辭維張氏族出范陽其家於縣東仇家里者不知其幾昭穆矣自公曾大父甲而下皆隱德不耀大父臣甫資稟高亮不親細務恤貧乏樂施予又謹於事佛日誦般若爲課重惜物命未嘗烹割行及庖湏間家人茹葷則睨而不顧壽八十有七怡然坐逝祖妣王氏李氏生子三人其季諱珪純質有父風明昌壬子之夏三水汎溢漂壞廬舍至於丘壠亦爲湮沒珪與長女李粟舡被百計訪求僅得祖考遺骸於泥淖之下其類於死者屢矣妣宋氏慈仁勤儉孝於舅姑生子二人長即公次曰子明子明仕爲鄆州洛郊主簿母有前識謂公材幹特達後當貴顯常戒之母妄殺以仁愛爲懷墓故在三水之陽懲創水禍改卜其陰乃在所居之西南原見於辛丑新阡者特二世耳初大安兵興公以材選爲軍中千夫長以功遷都統時耕稼既廢道瑾相望乃率涿州定興新城戶數千就食東平甲申秋樞密院徵公遷壽春克防城都提控州特復全反覆變詐動與公不相合公

謀舍去之未能也壬辰正月全胡州民出屯雞口州隨爲李敏所擄公素家屬募死士數十輩徑入敏營敏一夕三召公公辭情慷慨感動左右三欲害公而不能也夏全北行公與宿州帥魁石烈阿虎劫之遮老幼救萬靈壁之圍遂解全不勝惜會印徐軍來復警公復與宿帥衆偕奴斫全營於鄆縣全僅以身免至遺其金虎符而去未幾疽發背死于揚州公在兩淮初非本策重以地土卑薄風俗不相一感念先輩遂有鴻鵠高翔之志以戊戌冬擁麾下救萬衆自泗州北歸大帥以間隨拜顯制方面之命嘗謂全燕疆界廣闊風土完厚自秦滅六國而郡縣之迄唐中葉盧龍一軍雄視趙魏驚爲大鎮以棗栗之利車騎之盛言之則爲用武之國以太行恒山挾石碣石入於海言之則爲天地之藏海山沉雄逼貫斗極入稟其氣而生或客於其鄉或仕於其國率多魁儒敦履宏傑之士至於游談劍俠崛起閭巷間而掉臂於王公之門排難解紛遂以功名顯者往往而在蓋不至於人物渺然絕無而僅有也漢車騎將軍之子孫散居涿易間雖譜諜散亡無從考按其風聲習氣歌謠慷慨

慨風流猶存耳公策慮幅憶氣節處宕其走夏冠使大梁特製有所試已足以信眉高談無愧天下况乎致力方剛委任伊始側聞下車睢陽者以增築學舍爲事幕府省靜日得近見文儒攷論今古衣冠之整繫車騎之閑雅駸駸乎承平禮法之舊他日極其功至豈特長一道將軍而已耶故予既論次先德并以公出處附之欲人知張氏所以起其宗者蓋如此其銘曰

立木拓松文石龍蛇鬱彼新阡鄉國之華千騎來歸大纛高牙展墓而入州人驚嗟張世之先秉心柔嘉播而獲之猶上農之禾月計之則有餘理無僭差西周既東兵連兩河鉏耰棘矜奮而橫戈矯矯維公竝立不頹維軍律走從戰功曰多夏冠黥髡佩蕤莪食飽而颺誕爲盜考公斫其營壯士無譁慙憤亡幾特化而蟲沙有來同盟唇齒輔車詰闕拜章畏途褒表孰爲田疇而克負荷公之義聲金石不磨大邦維翰淮海無波公力方剛公壽亦遐相彼發源淵其未涯我卜行營之原當置萬家

臨淄縣令完顏公神道碑

公諱懷德字輔之以小字得孫行族完顏氏諱上京路司屬司武元文烈之從弟初徵封國於趙子斜不出降國而郡封於金源子阿魯熙宗朝平章政事子習捏驃駙尉上將軍義州節度副使即公之考也母曰金源郡夫人郭氏公其子也甫成童以宗子第五從承應走馬局俄遷內承奉班三歷監務用課最調密州倉使衛紹王至寧元年選注臨淄令公生長華腹而能以法度自檢初到官吏民畏公修整謂其中有不可測者及見其不欲酒不畏怒不事苛細不以榜掠立威不三數日上下歡然猶一堂之上矣貞祐二年受代有期而中夏被兵盜賊充斥五為支黨聚至數十萬攻下郡邑官軍不能制渠帥岸然以名號自居警撥地之酷睚眦種人期必殺而後已若營壘若散居若僑寓託宿弊不逞闢起而攻之尋蹤捕影不遺餘力不三二日屠戮淨盡無復噍類至於發掘墳墓蕩棄骸骨在所悉然獨臨淄之民感令君之仁視猶血屬百方藏匿有以令家父子甘就死地者人心既定確然不移其掩蔽愈更深固如是數月之久大帥駙馬都尉僕散公統兵而東乃詣軍自陳都

尉知公仁愛所感脫身於萬死不一生之地承制拜官公南歸之計已決再四退讓乃聽自便是後僑居亳州無復宦情以宣宗興定五年十二月之三日遭疾春秋六十終於私第之正寢越三日權厝某所夫人郭氏亦功臣藥師之女孫封號如其姑子男一人曰從政男孫三人阿海早卒曰守英曰守傑女孫一人嫁須城令信某早卒曾孫女二人尚幼天興壬辰河南破從政率老幼千人歸行臺特進公於東平給使帳前承事既久委之筦庫之任稍遷工匠副官今年閏月令相君度其付委未盡改本道課稅所副使未幾進副為長且授以提領之職提領求念先世積累之厚兵亂流離猥蒙特進公父子特達之遇思所以顯親揚名者唯金源陪塋大房平章出鎮錦州而薨於鎮葬此州之某山副節度壘弘政之弘山下臨淄邈在河外誠懼陵谷變遷墓失其處則遺孤投死無後矣乃遣長子阿海護輜車而比卜安厝之宅惟須城東金谷鄉之盧泉為吉定為新阡我先府君是為北遷之祖竊謂私門之事無此為大乃於省介祭某人以墓碑為請蓋提領君之子婿世昌予門弟子

也故予於君之平生頗知其崖畧君嘗以族屬授官而不樂仕宦宗室諸老怒其閑放自棄欲強致之京師君百計求免久乃得遂然亦以覃恩從進義校尉至昭勇大將軍矣麾下多世官恣縱不法良民或被侵愁者往往以氣使訶護之識者稱焉毫被兵而軍亂軍中有挾宿怨謀相圖者主者私以情告君得先事為備竟免於難迄今身領漕政守英官胡魯文孫適某人循流測源豈偶然哉銘曰殷士黼皐厥作裸特亦惟我周王德而不彊遠江狄流玉謀散亡獨金源有傳見於東方見於東方朱芾斯皇維先世所歸陪燕大房再遷而南貌如投荒喪亂弘多曠於丞嘗温存思歸瞻言涕滂輻車北轅金谷其藏鬱鬱佳城松檟有光惟彼臨淄銅墨之良梁肉疲羸統袴冰霜惠利所漸愛於桐鄉殆天以慈衛之俾壽而康何血肉之場而有萬夫之防侃侃嗣侯福艾奇厯對於前人祇懼弗忘八世相唐本仁柔之梁天道靡常福善其當我卜廬泉之原萬家其傍

甯縣令郭明府墓碑

公諱嶠字子崇族郭氏世家臨潢之長秦曾大父

英潛德弗耀大父願誠遠日進士擢第由左班殿直仕至侍御史生二子長曰元徽金朝詞賦甲科未仕而終次曰元弼換遼官克尚書省譯史遷儀鸞局副使遠占籍大興左警巡院興陵朝詔舉內外官三十年無過記者宰相以儀鸞姓名對且薦其清慎有幹局特旨進階五品授遼東路轉運副使生二子長曰岐大定十九年進士釋褐荊州軍事判官車駕東獵聽萬姓縱觀上親問荊州孰為好官父老合辭以軍事判官對問之佗所對如前上欲擢為朝官以避親換宛平令累遷監察御史戶部員外郎歷解深單三州刺史終於大名等路按察副使次則公也公早習舉業知詩文律度以父住試補尚書吏部掾屬終更調禹城南宮丞再調沂州防禦判官以廉能升蕪費縣令資稟孝友臨政仁信篤識不事表襮既父吏民安之權然有父母之愛使者復以廉幹聞貞祐之亂河朔郡邑在所陷沒費亦受兵公能以計自脫家四十口逃難解散無復歸顧之望兵退縣治復立不旬日農民護送公族屬皆獲完聚下迨狗馬無所棄失同官諸人均被殺掠有不遺噍類者識者謂公之仁

政驗於此矣公春秋已高無復宦情長子令未寧  
洛西山水佳勝衣冠之士多寓於此公與賈吏部  
損之趙邠州慶之劉文學元昂李澤州温甫劉內  
翰光甫名流陳壽卿薛曼卿中伯勝和獻之諸人  
徜徉泉石間日有詩酒之樂天興元年二月日年  
七十有六先洛陽陷一日以病終於寓舍官懷遠  
大將軍上騎都尉汾陽郡開國伯食邑七百戶娶  
高氏上林署令某之女封汾陽郡君子男四人適  
相繼伯氏按察副使房以廢仕為太原文鈔庫使  
廢陽曲令終於府治中嗣祖以祖廢試補刑部掾  
自同州錄事未寧中升陝縣令入為吏部主事負  
外郎京西大司農丞天興初授本路安撫使兼行  
大司農分治戶部事今為行尚書省左右司郎中  
與祖以公廢試補戶部掾今為燕京總府參佐顯  
祖未仕男孫九人曰蒙曰履曰泰曰謙曰豫曰隨  
曰臨曰觀曰賁女孫五人長適士族涿州王氏次  
適燕中王氏餘幼在室夫人前公三十年卒拊宛  
平魯郭里東原之先塋孤子等以壬寅三月日奉公  
衣冠合葬於汾陽郡君之墓禮也好問往在洛西  
辱公以篇什見賞且於二子有通家之好見屬墓

碑不敢以固陋辭因為論次而系以銘其辭曰

朽木天街碣石海墻唐風具存不為遷遷公生  
其間氣質渾然人門其華詩禮其傳可以登三  
老賢能之書而屈於吏銓有來銅章仁信藹然  
淪浹之深人合而天豈尚父交之日樞負不指  
孝子親而賢友于弟昆而賢孝友而施於政又  
其賢禮佛君子胡不百年我知岷江之濫觴三  
百維川大書豐碑識公之所是惟良民吏之墓  
過者式焉

廣威將軍郭君墓表

貞祐初中夏被兵二年之春兵北歸既破平陽取  
道大原分軍西六州時岢嵐無主將同知軍州事  
完顏昭武以城守計訪於君君為言城守固善然  
自北兵長驅而南無趙齊魏蕩蕩無完城公獨欲以  
掌許地抗掃境之兵強弱衆寡無乃不敵乎且守  
禦有具非倉猝所能辨就使可辨客軍皆有去心  
耻市人而使之戰果何恃乎兵家有戰有守不能  
戰不能守唯避其鋒耳今游騎已入境不早為  
計則悔無及矣昭武者從君言乘夜以軍夾老幼  
走西南龍門若北兵隨至汾石嵐管無不屠滅唯

岢嵐無所得而還宣撫司錄君功以便宜授岢嵐谷簿攝錄事至今鄉里皆以一州之命自君得之君諱瑀字子玉姓郭氏世爲岢嵐人唐以來忠武王之子孫散居汾晉間不見於譜系而得之承傳君蓋其苗裔也曾大父晏大父無父訓三世在野然自大父以來以賢雉鄉曲任俠尚氣樂於周急嘗日出緡錢一千以給丐者如是數十年故人以陰德歸之君弱冠以律學應選再上中議罷舉會明昌官制行乃用良家子明法理慎動止推擇爲吏歷任州縣久叙年勞授忠勇校尉自嵐谷簿調隰州知法改平陽知法河東南路行元師府檢法兼提領犒賞興定元年入爲尚書左三部檢法改萬州知法遂充行尚書六部主事累官廣威將軍汾陽縣關園子食邑五百戶以正大二年歲在乙酉正月元日春秋五十有八終於萬州之寓舍君天稟渾厚有晉人淳篤之風自持者甚廉而施予無少馱議獄餘二十年仁心爲質所以致忠愛者無不盡在隰州明劉狗兒者無罪積年之寃不數語而決閔郡爲之稱快寧化頭年荒歉時疫流行君躬自調護多獲全濟最後主部事危急之際調

度百出君區區錕鏑視民力爲緩急上官以吏能許之華公胥和之參政李公君美雅知公才及行臺平陽首被獎秩宣慰使李公仲修亦以恩門之舊時以書問及焉君伊川既久先以酒交於屏山李先生之純許司諫道真歸若此州與馬倅之良趙宰壽鄉日相追從徜徉山水間雲屏泛舟見於圖畫其爲名流所重如此身歿之日送壙之人傾動州里行路爲之悲愴則君之生平誠於接物不以貧賤爲輕重者於此見之夫人同郡李氏閭門整肅有婦師之目封汾陽縣君後公八年歿於襄陽子男有人長曰蛻用丞相高壽公薦試補隨朝掾馬克平陽孟州兩帥經歷官萬州刺史次曰仲或舉進士次曰擇善素家爲黃冠次曰仲文以君蔭補遙領西安軍節度副使次曰仲器亦用蔭依順承奉班早卒女一人曰妙選爲文官孫五人曰汝霖曰揀曰同寅曰叶恭曰和襄曾孫三人皆幼某等將以某年月日奉公之柩柩於郡北天澗南原之先塋歲甲辰冬予過洛西仲文方泛事鄴州之行幕介於教授吳子賢涕泗百拜以墓表爲請仲文溫淳有緼藉一府之事皆所倚辨擇善操履

能正傳於玄學道價重一時而竊嘆郭氏世業淳雅晉人少見其比推究源委知廣威君之後方興而未艾也乃為論次之而系以銘銘曰

敦方其純良有自勝之剛温方其慈祥無寡恩之傷橫流湯湯身為舟航拯溺於其鄉丹世而昌神理孔彰吾文表之尚以發其幽光

潞州錄事毛君墓表

君諱某字伯朋族毛氏世家臨清靖康之亂遷大名遂占籍焉曾大父瑜宋成忠即大父詢金朝初洎第評同登進士第仕為泗水令官至朝散大夫父大壯廣威將軍永年縣主簿內翰東明王公百一述先德恪矣永年三子君為之長自幼以孝稱友愛二弟遂及宗黨資稟剛毅廉介自守人不敢以非禮犯之明昌中以父任係承奉班歷監差考五皆以課最聞而未嘗以勺水自及泰和初起靈寶縣主簿令有故不事事君攝縣務者幾二年平賦理訟有愛利之實憲司以廉能舉之符受代丁太夫人李氏憂赴喪之日老幼號泣攀送數十里不絕其得民如此禫服向終復遭大故比塋斬焉

泰和甲日誦佛書為課迄于終制言動之間鮮不

如禮人以為難能大安初北鄙用兵選按昌平縣軍資庫使到官未幾而大敵至吏民狼狽逃死隨潰軍而南庫所貯金帛先備犒賞用者以鉅萬計姦人乘亂公為攘敘同官亦挾輕貨而邀僕隸因以為言君訶之曰官不能守既無所逃責矣尚敢以盜竊自陷遠天理累子孫乎貞祐元年調潞州錄事待次鄉里府尹知公有幹局檄監漕事赴都時游騎充斥道路阻絕篙工役夫日議逃避君安慰百至糧運竟達尹益以軍食付之乙亥冬敵再至大名受攻君方計餽餼而城已陷兵人脅君使俾怒其偃蹇不為屈欲兵之君盛氣憤激義不受辱大叫觸牆立致殞絕得年五十實十二月二十有二日也兵退塋之府城北三里所吳荏原之先塋積官廣威將軍勳騎都尉封榮陽縣男食邑三百戶夫人泳郡王氏泰和名臣大尹倫然之女孫封榮陽縣君畧通書傳事舅姑孝謹訓誘二女動有禮法中表以婦德母儀歸之稟命不融與君同日遇害子男四人君諱明威將軍臨淮簿居政忠顯校尉魏縣五星鎮酒官君仁修武校尉通許醕監喜喜早卒女二人長適十戶喬惟忠次適順天



路軍民萬戶張德剛男孫三人漸業進士漢澄皆尚幼初君欲就蔭補而第廣威將軍敬之年未及君待之數年竟與同解而任敬之仕宦連變累生課殿被拘君每加管護事過之後慮其不自安不復一語及之兵興以來良家子多從軍君昆弟未嘗別籍丁壯六七輩軍帖下敬之房一子被選其母以征人往往陷沒行坐涕泣君聞而憐之卒以已之子代行女弟嫁上谷畢氏將宦隔閩無歸省之便君問遺穀重不以遠道為嫌二女及笄州里名門競求婚對君俱不之許夫人問之故君曰吾女賢淑當媿貴官筦庫常族何足辱之卒之兩婿皆開國勳臣寶書龍節位望崇顯在當代侯伯之右庇蔭所及外含有光誠不負君所期矣居仁避亂南渡君數年始知二姪所在羸服累糧千里就訪及兵破河南張彥委君仁舉夫人族屬之留亦累者北歸令群從安君難米之上歲時燕樂復見大門之舊雖出候恩義而德義之力為多順天盛衣冠德義從先生長者授諸經章句駁駁乎性理之學君之世蓋未易量也曩予婦翁提舉君以宗盟之故泊君伯仲通譜牒恩文備至有骨肉之愛

奉公夫人之命德義以基表為請因為論次之君尚多可稱弗著著以孝為忠者其銘詩曰  
義如泰山力莫勝唯其舉之孝也能受親髮膚敬所承一許之國刃可陵我思古人得伯朋任重道遠毅以弘大河無梁豈樂馮以孝則勇信有徵千年華袞取美稱禽息鳥視莫足矜忠臣之門後必與天何言哉理則應

遺山先生文集卷第二十八



遺山先生文集卷第二十九

碑銘表誌碣

顯武將軍吳君阡表

君諱璋字器玉姓吳氏石晉末有官獻州從少帝北行者又自遼陽遷秦州其子孫遂為長春人六世祖巨嗣遼開府儀同三司同中書門下平章事陳國公五世祖吳咸雍十年劉霄榜登科仕未達而歿四世祖敬良潛德不耀子謙東頭供奉官贈安遠大將軍即君之曾祖也祖鐸閨門祇候金朝天會中左班殿直考德元貞元中監博縣烟火公事贈明威將軍妣傅氏濮陽縣太君君即明威之元子也生七歲而孤養於其姑樂亭齊氏稍長即能自樹立大定十年以廢補官歷遂城滿城四務酒官明昌四年調保州軍器庫使改太原大備倉副使泰和初以六品諸司差監歷城統課最迂濟南軍資庫副使轉鄧州草場副使會錄事缺員父老狀於州請君攝司事不期月政成郡人以吏能稱焉衛紹王即位用大安需息官顯武將軍騎都尉濮陽縣男食邑三百戶因為所親言吾儂以賞延人仕將四十年得不償勞寧不自知徒以先君

子蚤世不及通顯故強顏末秣耳今品及列爵當預追錫之典生平之志畢矣今不自止欲何求耶乃投牒請老武勝節度高侯雅知君勸止之曰選法養子五品例入一差隨有起擢君淹筦庫久能少忍之且當被百里之命何求去之快耶君不得已起調得監方城稅到官不數日以崇慶元年五月二十五日春秋六十有五終於官舍君資孝友姑氏歿哀過所生識者以為生長見聞宜有加於人者為人誠實樂易重然諾輕施予有以急難來歸者必極力營贍之以故家屢貧無不郵也少日酒不能亂中歲以止飲自誓賓客過門歡宴彌日不見惰容人尤以此多之身歿之日識與不識皆為之嗟惜名士赴吊者數十人其得人心又如此夫人某郡張氏閨門肅睦有內助之効封濮陽縣君後君二十年而歿子男二人長仲侃忠顯校尉吹仲傑鄧州教授孫七人曰綱曰維既冠而卒曰緝曰綰曰續曰級皆早卒繼僧未名仲傑符以某年月日奉公之柩歸附於大兵府宛平縣玉河鄉黃村里之先塋歲甲辰冬予過洛西仲傑涕泗百拜以墓碣銘為請仲傑學為通儒德為善人殆惟

其有之是以似之者乃為論次之并用子之所感為作銘其銘曰

我足天衢彼責守閩我器函牛彼求柱車論族膏腴平不能以自濡筦庫之須仕無他途選部一拘同滯賢愚然則前日之所謂任子者非敵法也與

### 忠武任君墓碣銘

前泌陽令任嘉言亨甫狀其考忠武君之行涕泗百拜謂某言先君子棄養十年惟是轉徙南北不得以時安厝今北還矣期以明年春勉卒大事墓當有碣碣當有銘敢以撰述為請某於亨甫有州里通家之旧不可以不敏辭乃為論次之并著子之所感焉按任氏世為汾陽人有諱才珙者登天會六年進士第由洪洞令入為尚書省令史皇統中坐吏部田侍郎劾之黨歿於貶所曰初為朝廷所倚用慨然以分別流品慎惜名器自任群小積不能平造作飛語構成大獄鍛鍊田以下伏首惡者八人以敢為朋黨誣昧上下擅行爵賞之權皆置極刑自餘除名為民杖決徙遠方者又二十八人明昌初始蒙昭雪洪洞預贈興復朝散大夫生

子徽以廢補官監惠民司君即惠民之元子也諱德懋字君範實稟醇雅有受學之質弱冠就舉屢為鄉府所薦惠民蚤世事繼母無間言泰和南征以良家子被推擇署軍中千夫長積官忠武校尉已而羅歸閒居鄉里愈更樂易雖在愚切皆知其為善人君子嘗為人言先大夫以直道立朝橫破羅織自明昌昭雪之後右丞蘇公而下凡二十有六家往往將絕而復續稍微而更盛吾知吾子孫必不獨為神理所遺也乃力課亨甫學其後果以正大唐寅收世科 鄉里榮之中歲之後即置家事不問惟日誦般若而已積習既久靈應昭著休咎多前知之避貞祐之亂於鄜於京兆以天與壬辰五月十有六日春秋六十有七終於鄧州之寓舍臨終遺命以所誦經內懷中續息是家人發哀良又復開目云經安在家如言奉之怡然而逝其明了如此先娶柳氏再娶劉氏子男三人長即亨甫次震亨鼎亨皆早亡女一人適士子白李昌皆柳出也亨甫以其年奉君之柩柩於郡西南洪哲里之東原嗚呼朋黨之禍何其易起而屢作也宣政之季蔡京呂惠卿革至指司馬丞相為元祐

姦黨魁列其姓名著之金石自謂彰善癉惡可為萬世臣子不忠不孝者之戒碑石庸立隨為雷火所擊惠鄉等俱大禍特及乃赦黨人死者復官流徙者復還自今觀之元祐黨禁不遇追削竄逐禁其子弟不得至京師而已曾不若皇統之禍之慘也余嘗深求讒夫之心而後知讒之所以為病者蓋心魄既喪粹為謾疾所乘掌糞為甘嗅足為香口鼻耳目皆失所守而不自知謾疾不已矯亢忌嫉合而為聖癡始於天地一我卒之古今一我敢為大言君之不疑造大謗起大獄視正人端士若有血讐骨怨期必報而後已苟可以售其術雖校身滅親亡人之國有不恤焉者余觀於成敗之變多矣自有天地以來未有食人而不為人所食者九為讒夫者其才智類出於人遠甚寧不知事有必至理有固然乃今至於殺身滅親亡人之國而莫之卹焉者獨何歟殆受病既深至於中風狂走雖和扁操萬金良劑亦無如之何耳古語有之憂心悄悄愠於群小又曰朕聖讒說殄行震驚朕師又曰惡利口之覆邦家者蓋聖人之所惡又其所甚畏者也人無所不至惟天不容偽姦人敗交亂

四國作於其心害於其事不有人禍必有天刑生為天下所咀嚼死為海內所痛快唯遺臭無窮是所得耳蔡呂諸人欲以黨議誣天下士而天下反以不預溫公黨為恥又欲以黨禍絕士大夫之世而後之名鄉才大夫賢宰相皆出於黨人之門然則為朋黨之論者其亦未之思歟銘曰

善為言先善為福元有子而賢卒歸骨於九原惟其有之是以似之吾得推其源至於人象勝天而天定亦能破人者盡當以家為知言

信武曹君阡表

已酉秋九月予以事來燕都行臺祭佐曹侯椿年持其先人信武君事狀每拜涕泗為予言性者過太原嘗以宗人益甫咫尺之書之故得見顏色時先人始就安厝欲求阡表以昭示永久而未敢也側聞從者在燕將往拜之而邂逅於此今願竊有請焉案事狀益甫所撰益甫予同舍郎其言可信不妄且曹侯之意甚賢故為次論之君諱元字長卿曹氏世為隰州隰州之以昔雄鄉里者累十數代矣曾大父秀妣張氏大父繼純賢而有文以善人獲稱妣郭氏朱氏何氏朱氏朱朝散大夫某之

女父鎮賓仁厚有士風妣靳氏張氏生子五人君其第五子也鞠託受學年十二孤初父病革獨念君未有母立殊以為憂及父沒君持喪如成人未幾母卒勺水不入口者累日廬墓側至終喪鄉黨稱焉其後兄弟析居君力學自奮不數年傳通經傳以至除陽醫藥法理之學無不精至為人謹厚舉劾不碌碌喜賓客好施予周急繼困不責報謝郡長吏而下皆推重焉兄楨既老君事之惟謹疾則躬侍湯藥存附諸孤更為調贍有問之者君不聽曰鄉人不能自存者且當救之况兄之子乎貞祐之兵隰州破群不遜之徒乘亂剽掠君具牛酒集壯士得十人約曰吾州被兵惟州倅獨存今逃匿他境吾欲與公等立州事迎倅以歸可乎眾曰諾乃安集境內還倅於州群黨破散遺民賴之以安有欲推君為官長者君義而却之明年大飢民無所於糴君出四餘以救餓者全活不勝計而初不一錢取也興定己卯秋八月二十四日將適終陽遺疾終於途春秋四十四夫人霍氏同郡檢法某之女閨門肅睦內助之力為多君歿之兩月州乃陷盡室被俘惟椿年調官京師夫人給兵士言

我主婦整財所在當盡指佗餘人何所知以故家人得少寬夫人私語之曰若等自為計吾老矣終不能苟活以重吾兒憂遂俱兵士至其家正色言曰吾家父子皆食官糧吾殺身以報可矣財豈可得耶兵士恐縛之夫人罵不絕口而死生子三人長即椿年次松年大年一女嫁郡人周惠今為真定恭謀椿年大安中出粟佐軍仕為綬德令階五品得贈君信武將軍某縣男夫人縣太君松年大年俱以兄庶祫候承奉莊諸孫皆尚幼孤子等實以己亥十一月十有九日葬君某里某原之先塋夫人祔焉銘曰

孝子之志慈且祥仁者之勇直且剛衣冠堂堂百夫之防無移官之階而有為政之方施於閭門義存義士凜凜噤噤崑崙秋霜蓋石有銘德潛而光我卜曹宗借隰川其未央

千戶喬公神道碑銘

公諱惟忠字孝先涿州定興人大父恩父順世為農家而以義俠見稱公資稟沉默見於童幼及長曉勇善騎射志膽堅央輩流中必見其比衛紹王大安初北鄙用兵良家子有以戰功取階級券示

鄉間者公慷慨奮發不甘落其後乃棄家事不問  
俠游燕趙間貞祐南渡河朔板蕩豪傑競起公從  
今萬戶張公聚族屬鄉曲保西山之東流壩別自  
為一軍及張君副經畧苗公道潤承制封拜公  
亦受定遠大將軍恒州刺史君無幾何 國兵由  
紫荆而南張公以馬跌被執而公不知其守東流  
者如故也大帥以張公至壩下諭公使降公盛為  
禦侮日戰數十合力盡乃降張公先以公為爪牙  
且嘉其忠憤不撓力為保全益以腹心倚之宋將  
彭義斌既破東平隨據大名聲勢甚張南北軍特  
為勅敵無敢試之者一日義斌提銳卒數千北向  
俸典公遇於真定之南公以騎數百直前挫其鋒  
義斌偃馬武仙劫殺主帥並山郡縣反為金張公  
會諸道兵擊之公時攝帥府事將騎五百步卒三  
千鼓而西聞敵將保郎山行列方整殆不可犯公  
謂部曲言歸師而過之兵家所禁不若設伏山下  
開其歸路彼得路則無聞志再邀擊之取歎於穴  
得志必矣已而敵兵過公出其不意大敗之如公  
所料特別將有陷陣中者公以單騎出之不旬日  
諸叛者日繼降附進逼真定仙懼南奔轉戰逐北

遂攻彰德彰德下畧地齊魯駐軍滕州之牙山紅  
衲軍夜至公獨搏戰奮戈大呼營中驚奮皆殊死  
聞衲軍敗走填壓山谷間無慮數百人益都之役  
宋援兵數萬將及城下公逆戰走之獲軍資甚衆  
城中軍突出將為犄角公隨以短兵遮擊敵退保  
不復出大帥會諸將特稱公之勇以褒異之先是  
張公開幕府滿城公為元帥都監以功遷左副元  
帥及師還兼行兩安州帥府事移軍唐縣鎮遏西  
山者累年辛卯冬南渡河戰於陽翟之三峰山明  
年圍汴梁汴梁圍解公北渡天興軍北渡平章白  
白撒攻圍衛州公力戰卻之河南平張公入覲公  
復攝府事從征淮右歲甲午 朝廷第功張公因  
陞奏臣之副裔惟忠出入百戰功最多乞加寵擢  
於是特恩以宝書金符授公行軍千戶自是愈自  
奮勵其破棗陽攻光黃率以先登被賞張公勇而  
有謀能得士死力每以方畧授公使戰公亦稟而  
後行故西至克捷幕府統城三十連離喪亂人物  
憔悴而能生聚教育使之去愁嘆而就安安出于  
翼贊者為多計公之功蓋不特攻城戰野而已也  
公生而孤事太夫人某氏孝敬純至問安視膳躬

侍湯藥士大夫以為知禮壬寅秋丁內艱適在病中比喪事哀毀骨立用是病增劇竟以丙午年五月二十有七日春秋五十有五終于正寢越某日權厝順天城東之某原娶大名毛氏廣威將軍潞州錄事之女閨門肅睦中表以為法子男五人長珪襲公職出屯河南次曰珪順天路人區總管推州新城等處長官次秀皆毛出也次璋次琳次五人長適千戶賈某早卒次女繼焉亦毛出也次適再氏餘在室男孫三人女孫一人皆尚幼公美須葬舉止詳雅有素宦之風恬於喜怒未嘗見於色每戰勝將佐共為欣快而公初不以功伐自高其攻黃州也朱兵棄皆莫卷至公率銳卒與戰主帥命舉火視之見青甲而黃馬者戰甚力而不知為公也明日懸賞求之公竟不自言其推讓又如此太夫人素慈仁事佛老惟謹教公毋妄殺重惜物命公亦視母意所在以寬厚從事所捕生口多縱遣之冠氏李君玉先在俘中問知為士人即館之門下令授諸子學古人北面拜虜者今真見之常以特俗侈靡相尚中歲以來尤尚純素出入會計見之朱墨者率無浮費之妄然人以緩急來赴者

必重為賜給負責則往往折券以貸之識者謂公孝以女親忠以立節義以扞難仁以濟物視履考祥必當敦龐耆艾五福具備今祿不酌庸壽不符德者乃如此天之量報施可易量耶孤子某等以某年月日附公於東王里之先塋以僕辱在葭葦之末以神道碑為請乃為件右之其銘曰

沈鷺其安角逐其時鬱無所施豪傑以為資成周既東日薄崦岫志橫潰之獨障勢一木之弗支義釋嚴類殆天使之大那維藩虎臣桓桓爪牙方張而傳之羽翰蛇矛突前奮力如滿堅陳枯棘名城彈丸有來創羅葦膚靡完射豺荆棘擊之妥安我思我威爾煦爾寒疾疫剛瘳孰我敢干北方之強碣石盤盤戰功曰多公與不利勒銘豐碑以求後觀重侯弓累竹屐屐手厥初之難

千戶趙庚神道碑銘

河朔用武之國自金朝南駕文事掃地後生所習見唯馳逐射獵之事莅官政者或不能執筆記名姓風俗既成恬不知依惟虞在軍旅中日以文史自隨迨致名儒考論今古窮日夕不少厭時或投壺雅詠揮毫清坐倡優雜戲不得至其前又

子弟之可教者薄其徭役使得肄業而邑文人亦隨而化之行臺所統百城比年以來將佐令長皆興學養士駸駸乎齊魯禮義之舊推究源委蓋自侯發之侯諱天錫字受之姓趙氏世為冠氏人曾祖諱存金國初日保義校尉祖諱誠明昌中嚴飢發粟振貧為鄉曲所歸考諱林貞祐之亂以鄉豪保冠氏有功大名主帥用便宜授縣令階忠顯校尉授子王事事先先營碑此不具載侯即忠顯君之次子也趙為大族大女未侯始弱冠即入粟佐軍補修武校尉監洺水縣酒罷官歸遂為縣防城授迎屬

大朝兵勢浸盛避於洺水洺州防禦使蘇政召蒞下擬克冠氏令耕稼既廢城邑無所恃乃擊縣人墜挑源天平諸山以辛巳春滯大行臺特進公子青崖固行臺聞侯之名諱帳下從征上黨以功授冠氏令俄遷元帥左都監仍兼前職甲申宋將彭義斌據大名屢以兵來侵人心頗搖侯謂業已事行臺公不可以貳兵勢雖不振始少避其鋒以圖後舉耳乃率將佐往依大將守里海軍未幾破義斌于真定授右副元帥同知大名府路兵馬都統

管事階鎮國上將軍乙酉八月復還冠氏先是故帥李泉為義斌所攻既降之英大軍至怒其反復有屠城之議侯救護百至老幼數萬竟得全活時泉已在大名不數月又結蘇梅輩納河南軍從宜鄭侗主兵柄日以取冠氏為計侯每戰每勝氣不少衰某月侗自將萬人來攻侯率死士乘城力戰三晝夜侗度不能下乘大風晦冥而遁己丑五月朝于

北庭所上便民事皆優詔從之行臺公亦以其論列且當尤加重焉壬辰正月黃龍埋失利將佐十餘人被俘侯皆以計活之又明年用行臺公薦宣授行軍千戶仍賜金符戊戌南征駐兵斬黃間被病還以庚子夏五月二十有四日春秋五十於子縣治之正獲娶杜氏封某郡夫人子男六人長復亨次泰亨貴亨承亨萬亨幼未名女二人長嫁東平路鎮撫軍民都彈壓吳荅里甲幼在室侯實重厚造次必以礼事太夫人孝意所嚮必奉之惟恐不及撫存幼孤皆使有所立孤女亦擇時貴嫁之在軍中二十年未嘗妄管一人誅殺不論也人有以急難來歸者力為調卹之脫之于奴虜活之



子屠戮者前後不勝算他日有負之者亦不以爲意也初縣經喪亂之後荆棘滿野敝衣糲食與士卒同甘苦立城市完保聚合散亡業單貧備禦盜賊勸課耕稼所以安集之者心力俱盡經畫既定上下如一四境之內獨爲樂土賓客至者燕享榻勞肅然如太平官府禮成而退皆相與稱嘆以爲俠之材蓋有大過人者矣大槩矣阿長者甚多所以自待者殊不薄又其所與游皆天下名士氣節之所感激論議之所薰習鷹揚虎視自當有萬里之望百未一出竟賁志以歿此有識之士所以深悼而屢嘆也孤子復亨等以其年十二月庚寅朔舉俠之柩塋於保義里之先塋禮也既已事以予嘗得幸于其先人辱以神道碑爲請予往客平陽者六年歲戊戌七月以叔父之命將就養于太原侯留連鄉重數月不能別單行河平予與之偕公道新鄉置酒行營中夜參半把燭相視不覺流涕之覆面也明日使人留語云欲與吾子別而情所不忍唯有母相忘而已於是疾馳而去不反顧嗚呼此意其可忘哉乃爲之碑而系之以銘

銘曰

趙侯翩翩豈有稱乘時雲風志賽騰伯府選勞  
逕進登樹之旂旌冠汝懋大縣萬家既分崩痲  
瘼之民侯所矜摩拊不給刻暴凌逾七日來月  
有增田野載關歲載登昔無粗麻今續繒賓禮  
師儒講顏曾并邑子第前伏膺絃歌洋洋通薛  
滕東州百城文治兵繁誰弘之侯所弘仁心爲  
質其我能躬不受社豈所應孰爲除之又執乘  
我矣種德既有徵趙方允宗理可馮咨爾嗣人  
其敬承

故帥關侯墓表

辛丑元日 方客東平載之盛爲具召子及大興  
張聖子祁人宋文鄉東光句龍英孺鎮人劉子新  
大原崔君卿渾源刘文李壽春田伸德董欽于家  
之養素齋載之先病于酒醫者戒勿飲然其所致  
客皆名士樂籍又京國之舊飲既洽談譚間作坐  
客無不滿引舉白者載之惟甚不自顧藉亦復大  
醉明日疾暴作一仆地遂不起載之貨樂易不近  
貨利與人交無大小能得其惟心以故來哭者皆  
爲之盡哀將葬孤子德榮請于予曰先人得幸吾  
子前日之飲亦惟子之故今大故矣忍使之隨世

唐滅耶子即為叙其平生使刻之石載之姓問氏先諱輪後有所避改名珍上世有自太原官于上黨者因而家焉考諱謹鄉人以孝直稱娶邢氏生四子載之其第三子也少穎悟知讀書及長仕州縣累至公府掾上黨公開壁馬武皆違別將李松守潞州壬午三月東平行臺嚴公借

國兵畧地上黨公選儒不能軍乘夜潰圍而遁載之醉不及從明日父老請載之主州事遂以城降行臺授宣武將軍潞州招撫使當是時州人數萬八縣又以千百計非載之知權變則其禍有不可勝言者矣尋有譖于行臺者以為載之多飲部民金而私貯之行臺按籍問之其出入皆有朱墨可尋行臺直之加懷遠大將軍元帥左監軍兼同知昭義軍節度使事先太師承制封拜載之用行臺薦授輔國上將軍左副元帥昭義軍節度使佩金虎符且命載之積糧數萬選壯士數千守潞州馬武軍頗出攻北兵大帥懼守者不能堅乃命還州人真定散處漳水之上恒山公仙既降復謀南歸乃劫載之送馬武上黨公開頗知載之參佐諸人又為之出力乃釋不誅放之河南河南破載之復

行臺公留之東平載之雖失侯故將而公以賈從處之凡雜竊賞賜無不預浮沉酒間者十年卒以樂死時年五十七娶常氏有子二人長即德榮次義榮女一人嫁為進士王得臣妻卒後三十日權差府五里之某原銘曰

不崖岸而孤不邊幅而拘不數澤而枯不木石而愚身為鳴義日與酒俱憤則以舒燥則以溼盪舟悠悠聽其所如六合蓮房八荒處除蝸左區區化而大庭之居亦何知須臾之非萬期而萬期之不須臾彼有衣而弗要有車而弗軀溘死中涂他人是娛顧雖不死殆暴骨露骸鬼藉而強行者歟

遺山先生文集卷第二十九

道山先生文集卷第三十

碑銘

隴州刺史畢侯神道碑銘

乙卯秋八月予來自鎮陽東平參佐王君璋以畢侯叔賢之子之子婿來請曰侯之墓父矣墓當有銘以吾子於侯有一日之雅敢以屬筆使不隨世磨滅為幸也按畢氏本易人其遷永清者不知其幾昭穆矣侯諱某叔賢其字也人父某父某皆以農為業貞祐之亂侯年甫十一從其親避兵至濟南之章丘俸為游騎所馳因逃難散走濟南總管成俊江得侯輩問愛其風骨不凡子養之時宰相蕭固侯公舉行尚書省事於東平成侯隸馬侯因披蕭公指使少長知讀書且習於省寺衣冠文物之盛故能自樹立如成人兵定成實宋軍出連水益都宣撫使田公瑑會兵進擊侯從成侯而東以功補昭信校尉遷授章丘尉田公知侯姓名署軍中都統張林及山東土崩宋保寧節度李全入據益都用為帳前都統換承信郎遷統制丁亥國兵圍益都城中外食盡保寧計無所出閉戶將自經侯排戶直前曰公死城即破大兵一縱城中無

蕉類矣木師日望公降公降必不死何惜屈一身而不為數十萬生聚之地乎保寧悔悟隨詣軍前太師愛其降悉以全境付之而不戮一人竟如侯所料者先相崇建以太師命召成矣成侯從之而西自是奉公周旋戮力一心不間夙夜公信倚之如家人父子佗部曲莫能比也凡畧地于澶淵于淮楚于徐毫于歸德侯無不在亦皆以功遷先相資剛嚴威望素重人有往觀者率以不測為憂侯曲為營護使得自安至於決重刑亦時得與議賈貸未減前後不勝數矣不自言亦無能知者妖人入李佛子之獄証誤萬人已會諸鎮兵守之長清三日不與食將盡誅之矣侯言之先相愚民自陷於死尚有可哀其老幼何罪垂死之命恃公如父母一言之重人獲更生之賜何忍坐視而不拯乎先相惻然感動為之別白故侯剖決生殺力所不及且以金贖贖之故被僂者不能什三四侯與有力焉事先相首尾十五年行臺得承制封拜自行軍總領遠授鄒平齊河兩縣令袁翼總領提領本路僧道累官宣武將軍琰已先相命侯復畢氏之姓時其父及妣王氏乂亂後病沒於章丘邑人以

庚故收瘞之至是始僂展省之礼立新塾於魯城之東原追贈如故事庚子嗣相莅事以總府都提領出為臨清令丙午復克左總領遷懷遠大將軍遷授濮州刺史求解軍職改營屯都總領以便之甲寅遷充本路課稅兩長官幹局既優歷練亦夫不事苛細而曹務畢舉時議稱馬是歲十二月之二十七日不幸遇暴疾卒於崇仁坊之私第得年五十有五娶納合氏鎮國上將軍鎮西軍節度使恩烈之女封河南縣君子男一人日守約業進士女二人長嫁府學生張守謙其幼在室孤子守約以今年正月二十一日舉庚之柩附於新塋之沃礼也疾性忠厚敬老慈幼出於自然家所有賦獲得於南中之生口者多故之自便一毫無所取與人交有終始終身不言短長皆人所難能然予獨取其有及民之功者為之銘銘曰

鬱鬱佳城東澗之阿畢氏有子姬姓故家維矣之初童子執戈童子執戈而大事克荷青社食殫九虎磨牙非排戶直前嚙類奈何顯公堂堂高山大河不怒而威有物禁訶庚承事之子職有加敏給赴功而秉心柔嘉從容一言陰慘化

而陽和合散扶傷痍拊瘡痍曾是殿屎載笑載歌功歸所天不以自夸若夫與哀無知之揚拔手高懸之羅計長清之所全活竝青社為尤多不龍不蛇而有賢人之嗟積厚而報不豐神理為差汶耶濟耶其未涯耶公庚之世必復其始者尚信然耶

宣武將軍孫君墓碑

君諱慶字伯善姓善氏世為濟南人曾大父某大父某考榮皆隱德不任居資稟信厚蚤有成人之量鄉父兄以起宗期之貞祐之亂先相光祿公壁青崖山君挈家徙依馬以對問當公意得隸帳下公所戰攻降下餘五十城君皆從馬指使既又為所倚信部曲諸人少與為北大名彭義斌乘濟鄆耕稼廢倉無見糧悉象守之公審度事勢與之連和義斌拜公為長強之而西公密遣騎卒告難于國兵大帥大帥聞報率數千騎來援與義斌遇於費皇之西山兵刃甫接君獻計於公曰援兵既至我當屯軍以張其勢成敗在此舉幾不可失也公即馳赴之將士氣倍皆殊死闕大名軍遂潰義斌投死無所尋即授首不數日故地盡復公時承

制封拜乃授君忠武校尉濟南府軍資庫使改行  
尚書省應辦使壬辰遷武畧將軍威捷軍都指揮  
使燕巡捕事公備以贊皇之功為未報也再加重  
武將軍己亥遷本路鎮撫軍民副彈壓兼行東平  
府錄事君莅軍嚴明有能吏稱然性剛直與時多  
忤卒見罷去今行臺公念君先相舊人不宜久在  
追閑復都指揮使及此捕事未幾以疾告公又惻  
然憫之且謂君長子天益嚮學知義理氣節不凡  
命代父仕而君之疾竟不治以某年月日春秋五  
十有七終於私第之正寢娶薛氏封富春縣君後  
君八年卒子男三人天益天瑞天龍女一人嫁金  
鄉縣丞亦珙男孫五人德安翁安壽安世安永安  
孤子箴以某年月日舉公之柩葬於長清縣黃山  
之新阡遵洎命也癸丑之冬予以行藎之召東來  
天益謂予頗知其先人持府學教授康侯顯之誌  
文見示涕泗拜拜以墓碑之銘為請按康侯所載  
君所善二人其一充人劉德潤其一潞人閻戴之  
德潤任行臺詳議官二十年家無餘財病且歿泣  
為君言遠離喪亂無歸願之望曾大父以來皆在  
白頭身後獨一老嫗在深安能辨此吾死不瞑目

矣君慨然曰吾子無庸我當任其事及德潤歿君  
為之送終并葬三世一如平生之言此予所親見  
者戴之失侯故將落魄嗜酒身沒之後家貧子幼  
無以為莖君感念疇昔營護喪事威儀繁盛祀祭  
填塞與時貴無異亦予所親見者維君事長如此  
與人交又如此又得康侯課述其不朽也必矣尚  
何俟於不腆之文因辭不敢當天益三請益堅度  
不可以終辭乃強為論次之其銘曰

驚勇兮翩翩纓纓胡兮事戎旃許公驅馳死生  
必前魏冠來攻執擣其堅君於其間知犄角之  
摧材官踞張發換其先齊五十城之復與有勞焉  
迄今贊皇之謀弦聲驪然響響佳城樂石千年  
誌以康侯之文責彼下泉願雖志節之所自致  
其亦出於有子而可傳

### 龍山趙氏新塋之碑

歲癸酉冬十月先太師以王爵統諸道兵長驅而  
南兵及永清都元帥金紫光祿大夫史公首偁大  
義建國之功太師承制封拜命公開募  
府駐軍高州又明年春正月破北京龍山降今真  
定路工匠都統趙侯振玉在籍中逆錄金紫公

幕下侯雅以幹局為公所知選署龍安府庫使改  
永安令遷軍中都提控乙酉春公遭變疾及從兄  
真定府判官真玉脫身走滿城衆推金紫公季弟  
玉路薦戶帥本軍其六月復真定八月命矣拓降  
皖城古樹等皆遂下邢趙兩州州民之在保聚者  
不啻數千百家悉復故居幕府啓 太師復趙州  
慶源軍之號以矣為節度使兼趙州管内觀察使  
已丑十月改河北西路按察使兼帥府叅謀辛卯  
秋復授慶源丁酉秋幕府以矣前後功上於

朝宣授今職癸卯冬十月疾介於同官李推川周  
才卿為予言吾趙氏世居保塞以仕遷大梁五代  
未有諱臣顓者官至靜江軍節度使兼桂州管内  
觀察使弟臣衡及八世孫襄疊仕於宋皆至通顯  
金朝兵破大梁吾宗例為兵所驅盡室北行至龍  
山遂占籍焉雖諳諳散亡而其見於祖瑩石誌者  
蓋如此振玉之曾大父仲隱田間致費鉅萬娶王  
氏生大父憲資佃儻好施予人多以息難歸之娶  
馬氏生子八人吾父琳其第四子也幼出大家頗  
以裘馬自意為人知義理排難釋紛有豪俠之風  
由大父而上皆莖鄉里振玉之考妣兵亂中權厝

縣西佛寺北避兵還而寺屋被焚遂失墓殯所在  
振玉去鄉餘二十年歸碩之理既絕感愴霜露殯  
身無及向辱我公悞知承乏大郡安習既久眷焉  
有桐鄉之戀乃用故事卜於平棘縣西北鄉蘇村里  
之南原為顯考衣冠之藏日者室人莫氏物故因  
從柩焉維遠祖自保塞遷大梁既無歲月可考自  
大梁遷龍山則僅能志之今南原卜宅亦吾趙宗  
之大舉不勒之金石以昭示永久後世其謂我何  
識得吾子辱以文賜之為幸多矣敢再拜以請自  
予北渡河時過慶源聞廟學之盛佗州郡莫與為  
比嘗往觀焉堂廡齋除像儀禮器連離喪亂初若  
未嘗毀而又加飾焉問之諸生蓋一本於矣之經  
度出費於家雇庸於民躬自督視寒暑不少懈數  
年而後乃克有成固以為賢於時之人遠矣范蕭  
兩煉師及叅佐諸人亦皆稱矣滿城之舉竭事君  
之節奮復讐之義獎厲士卒輯務同異裨益之力  
為多初蒞慶源戶不能百為之披荆棘拾瓦礫招  
散亡立庠舍勸課耕稼流通貿易西山群盜時出  
剽畧矣深入搜討州境晏然及入為叅佐豪猾無  
所顧忌有白晝殺人於市者矣受命再至郡民鼓

舞迎勞歌謠載路下車未幾即按殺人者之罪歎  
恣家婦手刃以報之閩郡稱快故言治郡之効者  
率以矣為稱晉予竊嘆焉嗚呼兵禍慘矣自五季  
以來明德雅望之後重矣索將之族糜滅所存曾  
不能十之一然且狼狽於道路汨沒於奴隸寒飢  
不能自存者不可勝數也趙氏固名族然先之以  
靖康之兵繼之以貞祐之亂將絕而復續稍微而  
更熾蕃功群從布列伯府以報施言之非先世有  
以開之耶趙侯幼仕州縣乘時奮起遂有良民吏  
之目雖其材幹足以自致推究源委益知世德之  
自矣夫忠以事上敬以蒞官孝以顯親揚名義以  
慎終追遠是可書也乃為書之且告之曰降福非  
難所以致之者為難致福非難所以養之者為尤  
難予閱人多矣長劍拄頤大冠如箕以揖讓人主  
之前可謂極矣其變也至一簪不得著身河潤九  
里澤及三族名圍甲第布滿州郡可謂盛矣其衰  
也子孫或不得聚庠而託處是天道特未定也夫  
端正者必以正其末善始者必以令其終古有之  
父作室厥子乃弗肯搆蓋有任其責者矣為山九  
仞功虧一篔亦必有任其責者矣夫江之發源也

微至於放而與洞庭彭蠡同波沛而與北溟南海  
同味持大川三百小川三千有以廣之耳候年運  
而往矣更事既多植節亦固誠能廣興學之志充  
治郡之善進進而不已新新而不既他日冢置萬  
家室祭三世當有鴻儒碩士如燕公昌黎公者演  
招蒐之辭而紀嚴牲之碑至於不腆之文所以記  
新塋者乃其濫觴耳趙侯其勉

### 冠氏趙侯先塋碑

冠氏帥趙侯錄其世次見屬曰真祐之季中原受  
兵先人忠顯君起田閒有功於鄉里鄉里推為邑  
丞太中解公以便宜行諸道升黜縣長佐謂先人  
純率有方莫有犯之者言之招撫使宗室惟宥乃  
自丞遷而令大名兩統三州十一縣義軍吾兄顯  
署軍中都提控弟顯軍民都捍壓仍佩銀符天錫  
亦以恩例補官於是吾趙宗固以雄視於齊魏之  
間矣及六龍南駕豪傑並起大名東平皆為大有  
力者所割據先人介於疆敵之間率創羅之民而  
為城守討百誘而不變百戰而不沮人事既窮與  
城俱陷槩之當世孰與倫比天錫既隸今行臺特  
進公出入行陣頗著微効及再受父任而縣民人

力又憊於往時軋於他盜困於凶荒弱而振離而合立官府於撥救之際關田疇於榛莽之域重為公所錄假之旒節歲丁亥五月乃用故事去於臺承制之命榮及祖祚梁君用之記贈官之事已儉之矣惟是數世之殞昭穆具舉松楸百年而有旌紀寂寥之嘆天錫無所似肖家類先世以武弁起身大懼前人之隱德無所發見將遂澤減宜有文碑以昭示來裔敢再拜以請按趙氏世為縣人宋靖康初侯之曾大父諱存從高宗南渡以駢射得召見數年後此歸換保義校尉鄉人至今以保義名其居大父諱誠明目中歲饑民無所於糴能出其家所有以沽旁近忠顯君諱林喜賓客好施予賈欠之家有貧不能償者率折券以貸之喪亂之後番商往往被掠乞丐道路無歸頌之望君悉資遣之風義所激州里稱嘆故有令丞之舉嗚呼兵興三十年河朔之禍慘矣盧葉大德名卿鉅公之後遭罹元元遂絕其世者多矣僅得存者亦顛沛之不暇也趙侯居則食萬家之邑出則為千夫之長年未五十孫息滿前群從自生盛而上餘七十輩侯之姊夫乘時奮興所握萬夫如臂之使旨錦衣

繡帽角遂於草昧之日東西數千里識與不識皆以女王目之蓋先之以靖康後之以貞祐再涉大變嚮絕而復續稍微而更熾不曰先世之所開則無以考天人之際矣故予樂為之書雖然此予聞而知之者然也侯之太夫人董資善長夙尚內典忠顯君之時中饋之位乃為上僧者兩奪於夫人也搗斥如廢侍凌轢如囚虜并曰之事率躬親之如是積三十年夫人推之以夙業堅之以苦行怡然委頓惡言未嘗出諸口晝哭之後僧奪者故在反以其老寡而憐之特徃慰藉且教諸子事之惟謹既沒之後莖祭過禮無降殺之貶夫妬為婦之常而怨亦人之所必報不妬不報直千萬人而一耳况乎其奪也不以怨而以恩其報也不以直而以德不出於強勉不由於沽激傳記所載如是者幾人女有捷婦之稱男有時豪之選期頤甫及福祿方來乃令野服蕭然脫屣世事躬不受社其女歸乎予見而知之趙宗之所積在此母矣因述侯之世并以夫人之事附之侯字愛之今為東平左副元帥兼分治大名府既同知兵馬都總管事宜授行軍千戶官鎮國云戊戌歲七月初吉記



西寧州同知張公之碑

公諱榮祖字孝先姓張氏世為襄康人曾王父明王父顯父丙三世在野叔父帥府監軍昇少日以良家子充南征軍士貞祐改元之明年六飛南狩真定某府得用便宜拜官取鄉曲之譽辟監軍為本縣尉及縣改西寧州遷縣令未幾改代為令經畧使史侯所倚信累功至監軍兼行西寧州事被徵招集未附為叛者所脅偃蹇不屈竟及於難某府存念勞旧以軍屬公兼領縣務時年甫二十卓然有成人之量為人有志膽善騎射時罕少有及者庚寅冬河平失利陷堅陣中卒死士五十餘人突圍而出阨向披靡莫有當其鋒者流矢中面而鐵不得出暨者破骨取之神色不少變經畧公壯其勇以為不減古人具以名聞遷總統巡山軍民千戶恒山公仙壁雙門遺別將屯抱犢山宣權萬戶親以軍守之隘隘可上者十有八所而山上皆有脩禦不便仰攻公期以三日破之乃潛軍由鳥道攀援而上出其不意山軍震蕩謂從天而下投死無所問知公名皆束手自歸黨與未盡者依太行為巢穴在所有之根結盤互時出剽掠

旁近之民陰為齋助以紓焚劫之禍嘗乘隙入吾境公測其來設伏擊之軍卒踴躍而戰戮首領一人而擒其副餘衆悉降郡邑倚公為重亦得少安甲午歲大旱百姓飢窘軍賦減於平時而終亦不辦公出粟代輸之縣當開輔汾晉驛傳之衝供億倍於他邑公時以財給之歛於民者什纔二三而已不幸遭疾以庚戌夏五月日春秋四十有七終於私第之正寢先期自刻云吾明日日中逝矣已而果然其明了如此夫人同邑戎氏子男二人長曰儀次曰某孤子儀等以某年月日奉公之柩蓋於某鄉某原禮也公幼出大家以施子為常事故其周急繼困不計有無賓客過門供給承事一出誠款推牛曝酒與相娛樂下迨屬養亦獲歷歲生平結交如某人某人契分款密終始如一赴人之急如恐不及故得其報力為多太原大帥郝侯氣岸高亢少所降屈一見公結為昆弟不敢以爵位自居公起身戎行不聞文墨裁決訟以情為斷不三數語而是非曲直立判未嘗有留滯者凡所區處吏民奔走從事無敢隨跡言政者不敢以武人廉之初監軍沒其子繼祖纔十歲公襲其任三

氣質之渾全鬱鬱佳城海山之原我銘表之尚  
以信無窮之傳

兗州同知五翼總領王公墓銘

十年於今及輩既冠婚矣公念為叔父所保養生  
死報之屢以縣章讓繼祖至於再三辭言懇切人  
為感動經畧公不之許慰遣之曰轉輸期會急於  
星火應卒之材為難况乎縣治繁劇須習慣然後  
可君雖不忘叔父之惠如公家何及病且幸復申  
前請幕府不得已許之竊嘗謂風俗之壞久矣同  
父之人往往自為讐敵血戰於雠刀之下碩肯以  
大縣萬家推之群從之間乎惟公不出於生長見  
聞之素而不階於教育講習之益為能自拔於流  
俗如此雖曰未學君子謂之學矣是可書乃為之  
銘云

重甲兩雙馳突爾翻唯勅敵是求而與相周旋  
地矛之所盪夾莫當其前破骨出鏃不廢笑言  
一死鴻毛放之所天剝服短後殆先趨之所然  
業業西山遁逃之淵刀斗嚴更通曙不眠我軍  
之所撫臨人為息有大縣萬家意氣盛年敵屢  
千金食客四筵弟昆之交金石其堅急難而赴  
之白刃空券自世道下衰人理絕馬同父子參  
商且百且千執於礼服之群從釋銅墨而自捐  
戒行區區乃有士夫之賢惟不學而至於學知

東平軍民彈壓段遷扶其友王公生平屬手為墓  
銘曰始遷與王同行伍年相若志相得故嘗約為  
兄弟王之歿今年遺女孤弱孱孱不克舉遷將  
以今年三月十六日遷其柩於憲王陵之東幸吾  
子為誌之予謂朋友之廢久矣自退之時大夫士  
以古人自期者不為不多士之相與者宜若無愧  
然子辱讀以柳易播事未嘗行退之極口稱道若  
將曠世而不復見當時且然尚何望於今之世耶  
古有之朋友死無所歸曰於我殯又曰父要不忘  
平生之言亦可以為成人矣段武人也而能學者  
所難能之事銘其可辭哉技總領請德祿北京吳  
中府人世為農家貞祐癸酉以騎兵從錦州將王  
守玉屯東平辛巳夏東平不守歸今行臺嚴公隸  
五翼軍以功轉總領凡行臺畧地所在必以之從  
積六七年遷同知兗州軍州事為人質善柔而戰  
陣勇捷人少有可敵者甲申五月十五日與宋將  
彭義斌軍戰被創年三十二以歿一女許嫁日照

張左相之孫濱壽其壘也公感念平昔贈以信武將軍云銘曰

突如其馳蕩如其麾馬革自隨非壯夫之悲魂  
名來歸汝友是依

五翼都總領豪士信公之碑并引

大行臺特進公當朔南分裂之際合散亡一同異  
擊全魏齊魯歸命有司乃得承 制封拜麾下諸  
將剖符錫壤懷黃佩紫者不可悉數今四十年矣  
凡公與之共功名者往往取奇麗福父之士然乘  
時崛起徼倖萬一舍短取長為公所錄用翕忽變  
化由鼠而虎者抑多矣公亡恙時拊罷廢之民恒  
若不及繭絲所入務以給公上周困亟業單貧奉  
賓客而已身服補紉之衣家無肉食之奉故一時  
化之上而偏裨參佐下而閭巷細民莫不畏公之  
威而効公之儉弓刀旧習為之一新蓋德風之所  
徇有不得不然者若夫覆轍知戒迷途隨復嫉貪  
冒而廉介欽雄夸而信厚揀鐵推食臨深援手心  
之所安非出於矯揉者猶以先祖為稱首云光祖  
諱亨祚姓信氏光祖其字也魏公子無忌號信陵  
君子孫因以為氏北史信氏有名都芳字玉琳者

以藝術著稱後遂無顯人光祖家上谷莖縣之榆  
河者不知其幾昭穆矣大父懷陽父慶壽以賞雄  
鄉里有萬千之目好交結樂施予知名燕雲間光  
祖幼有志膽不甘落人後貞祐兵興以良家子係  
軍籍從平章政事蕭國侯公鎮天平蕭公還朝不  
一二年國世淪敗它帥不能軍軍遂亂軍中有欲  
圖光祖者光祖借婢曲千餘人壁梁山提控鄭侗  
來攻前後三數月出入百戰未嘗挫切開光祖姓  
名者皆恐怖毛豎侗敗走自足歸光祖者益眾矣  
宋將彭義斌據大名聲勢甚張頗以官賞誘降光  
祖策其坐談終無所成不從以辛巳春歸特進公  
於青崖公知其可用署五翼都總領佩金符奉檄  
招降石城為屯田經久之計濟南軍來襲一戰敗  
之殺獲甚衆壬午守曹州不解甲踰三年事定還  
帳下公破黃山取恩州先登陷陳光祖之功為多  
東平食盡公與義斌連和光祖知事勢所在提孤  
軍涉太行及太師於大炎義斌誅死光祖復從公  
東運時劉慶福者猶為義斌城守太師進軍慶福  
敗第功遷同知曹州軍州事官宣武將軍畫疆既  
定官府粗立且無戰攻之事光祖給使左右特見

保任公以兒子畜之公治軍嚴動以軍法從事光  
祖從容教止多所全活徂徠山司仙疏戶萬餘因  
光祖自歸光祖受之秋毫無所犯五翼號為難馭  
光祖統之又能得其歡心少有被笞罰者軍之族  
屬萬家散處梁山徂徠之間光祖未嘗輒至所部  
使有供張之勞生平不治生產至婢無完囊人有  
以急難告者百方調卹不計有無生口北渡道堯  
相望作糜粥以救餓者思欲偏及之其仁心為質  
多此類也幕府暇日日與文士歌酒相燕樂談笑  
詼浪不為小廉曲謹人亦以此多之河南破家所  
購法書名畫無慮數十百種客至時出展玩欣然  
志倦如畜未名之寶聞人談閑閑趙公書法愛而  
學之落筆即有可觀兒子入小學迨漸買書經史  
完備雖儒素家少有及者時譽既盛今相君方議  
擢用不幸遽疾以庚子夏六月二十有三日春秋  
四十九終於私第之正寢以其年九月十有四日  
奉公之柩莖於須城縣盧泉鄉金谷山東原之新  
阡禮也夫人竇氏真定甲族婦道母儀中表以為  
法子男一人世昌須城令女二人長適某氏次適  
某氏男孫三人曰同寅曰協恭曰和衷皆學舉業

女孫一人幼在室世昌受學於予以墓碑為請予  
謂光祖能教其子學而世昌果以諸生肇戎務今  
十年大縣萬家調度百出他人筋疲力涸有不能  
辦者世昌常有餘暇吏曹求代者而不可得生子  
如此光祖為不忘矣黃金滿籬何足道哉銘曰  
排難解紛朱家俠聞百戰冊然鄉子冠軍收之  
衆榆遂有濁涇清渭之分燕趙固多奇士尚有  
考於斯文

遺山先生文集卷第三十

遺山先生文集卷第三十一

墓銘碑表

清涼相禪師墓銘



清涼唐廢寺大定中第一代琇公開荆棘立之在  
 兩山間初無所知名琇歿後遂虛席久之西岩德  
 來居德葦流中號為楚楚者又屏山李公為之護  
 持苟可以用力則無不至而亦竟無所成蓋又一  
 再傳而得吾西溪師西溪道行清實臨濟一枝以  
 北向上諸人至推其餘以接物則又以為大丈夫  
 之賢而文者也山中人舊熟師名及受請無賢不  
 肖皆喜曰相禪師來清涼不寂寞矣當是時諸禪  
 方以黃雄相夸齋談粥魚之聲赧然山谷間清涼  
 儉俠僻左僅庇風雨石田不能畝師一顧盼而  
 雲山為之改色向之相夸者皆自是缺然矣師諱  
 弘相出於沂水王氏幼即棄其家為佛子事沂州  
 普照僧祖照年十九以誦經通得僧服乃恣讀內外  
 書凡十年多所究觀聞虛明亭和尚住普照道價  
 重一時乃盡棄所學而學焉虛明知其不凡欣然  
 納之又十年乃佩其印出世住鄭州之大覺嵩山  
 之小林沂州之普照最後住清涼師勤於接納有

諸決之者為之徵詰開示頓困倒廓無復餘地故雖  
 退居謝事而學者益親之以某年月日示疾終於  
 寢室閱世六十有四夏坐四十有六所度十人曰  
 義曰誥一而為上首所證三人曰顯今嗣師席曰靜  
 曰雋所著文集三曰歸樂曰退休曰清涼并錄一  
 卷傳諸方顯等以某年月日奉師遺骨塔於西溪  
 之上以收來乞銘凡此皆狀所言之也初予未識師  
 有傳其詩與文來者予愛其文頗能道所欲言詩  
 則清而圓有晚唐以來風調其深入理窟七縱八  
 橫則又於近世詩僧不多見也及登其堂香火間  
 有程沂州猷名幘間之侍者云師與程遊甚款歿  
 後歲時祀之子用是與之交嘗同遊蘭若峰道中  
 談避寇時事師以為凡出身以對世者能外生死  
 然後能有所立生死雖大事視之要如翻覆手然  
 則坎止流行無不可者此須從靜功中來念念不  
 置境當自熟耳時小雪後路峻而石滑師已老力  
 不能自持足一跌翻折而墜同行者失聲而莫能  
 救直下數十尺僅礙大樹而止予驚問寧有所損  
 否師神色自若徐云學禪四十年脚跟乃為石頭  
 所勒聞者皆大笑然亦歎境熟之言果其日

用事而不妄也子嘗論師之為人款曲周密而疾惡太甚人有不合理者必大數之佛然之氣不能自掩平居教學者禪道微矣非專一而靜則決不可入世間學謾廢日力耳及自為詩則言語動作一切以寓之至食息頃不能忘此為不可狃者今年西堂成約子來習靜度此夏比京師歸而師歿矣惜子欲叩其所知而不及也乃為之銘曰

理性與融物迹與通不雷不霆有聲隆隆冥坐中林薇藿不充朝詩有瓢暮詩有筒澹其無心愈出愈工屢順而老安常而終覺海壺舟莫知所窮嘗試臨西溪揖曾峯萬景前陳而白塔屹于其中悠然而雲冷然而風頽然而石鬱然而松彼上人者且未泯其音容孰亡孰存孰異孰同招歸來而不可待耿月出兮山空

葦嚴禪大士墓銘

師諱惠寂姓王氏西河陽城里人為童子時白其父求出家父定以一子故難之及長於佛書無不讀授葦嚴法界觀於汾州天寧寶和尚父歿乃祝髮居孝義之壽聖時年已五十有一矣崇慶初以恩例得僧服俄賜紫遂主信公講席學者日盈其

門避兵南來居汝州之普照又遷南陽之鄂城師以葦嚴為業半抄全經日誦四帙為課既客居徒衆解散獨處玉室中而不廢講說人有問之者云吾為龍天說耳龕前兼竹既枯而葦隨未隨生人以為道念堅固之感正大丙戌九月五日夜說世界成就品明日以倡示衆告以寂滅之意且曰何從而來何從而去於是右脇而化壽七十有九會葬萬人所得舍利及宅靈異甚多此不具錄起塔於普照葦嚴廣陽之大聖舞陽之弘教傳法界觀四人相登法昌福弄尼了過落髮三人辛卯夏四月昌等因此丘尼淨蓮求子銘其墓蓮即道學郝葉縣之甥父尉南陽秩滿棄官翁媪及諸弟如漢上龐禪家說師平生於禪那有所得故不與他義學僧同其言不妄也乃為之銘銘曰

墳雲墓銘

大方無隅涉迹則偏攝一切法歸須漸圓究竟去何且實且權彼上人者言外之傳於葦嚴海為大法炬一龕宴居幽祇滿前曾是枯株秀穎巖然靈塔相望有光燭天鈴音演法普為大千南陽靈山僧法雲住在鄉里時已棄家為佛子遺

歲飢乃能為父母輓車就食千里母亡廬墓旁三年號哭無時父歿亦築山之人謂之墳雲旌其孝也元光二年冬十二月夜中僧給詣師求講法界觀明且出門見庵旁近雨雪皆成花大如杯盤狀居民聞之老幼畢集其在磚瓦上者皆持去文士為賦詩道其事又山之東水泉不給用講學者患之一日寺西岩石間出一泉衆謂純孝之報也世之桑門以割愛為本至視其骨肉如路人今師孝其親者乃如此然則學佛者亦何必背棄父而逃之然後為出家耶師臨汾人姓劉氏七歲不茹葷十一出家于洪洞之圓明師僧智真二十五且戒受義學於廣化僧慧學禪於韶山義公來南陽主崇勝之觀音院住靈山為之起報恩寺以正大三年冬十二月十五日壽六十四示疾而化弟子四人覺懿行思行了為上首明年起塔於山前劉鄆州光父師鄉曲也知師為詳托予銘其墓予以劉為不妄許可者乃為之銘銘曰

僧靈之來晉臨汾六年居廬哭親墳地泉靈沸  
天花紛孝聲香如世普薰何以表之今有文

孫伯英墓銘

伯英在大學時所與遊皆一時名士故相程公日新判河南伯英居門下甚愛重之貞祐初中原受兵朝廷隔絕府治中高庭玉獻臣接納奇士号为衣冠龍門大尹復與甚之會有為非語者云治中結客將據河以反遂為尹所構凡所與往來者如雷淵希顏王之奇士衛辛愿敬之俱陷大獄危有一網之禍伯英出入府寺人為出死力者多故得先事遁去依般輔之商州變姓名從外家稱道人王守素會赦乃歸貞祐丙子子自太原南渡故人劉昂霄景玄愛伯英介子與之交因得過其家登壽樂堂飲酒賦詩華組間談笑有味使人久而不厭伯英時年四十許困名場已久重為世故之所摧折稍取莊周列禦冠之書讀之視世味蓋漠然矣子意其本出將家氣甚高已折節為書生束以詩禮優柔壓斂偶以緼籍見名其鬱鬱不能平者時一發見如縛虎之急一怒故在世已亂天下事無可為思得毀裂冠冕投窟山海以高蹇自便日暮途遠倒行而逆施之古人或為抱關或仕執朝或妄從傳徒賣漿者游其畫皆出於無聊賴之至耳非本志也又明年客有來崧山者云伯英其為

黃冠師矣正大庚寅十月十九日歿于亳之太清宮春秋五十有一因即其地塋之始祖堅國初以軍功贈龍虎衛上將軍隴州刺史祖汝稱武畧將軍魯山令父鈞武義將軍昌州監使司判官室劉氏前歿子璋婿同郡王好禮伯英初名邦傑後改天和孫氏雄州容城人居雄陽四世矣銘曰

馬逸更駕橫捷破車霸畧所貪世議之拘我足天衢彼責守閭我材明堂彼求侏儒蚩蚩之與曹而昧昧之與居俱腐草木孰別以區千百載而下或有撻蓬而問者又焉知其輕世肆志自放於方之外以耗壯心而老歲月歟

紫虛大師于公墓碑

有為全真之言者衛致夷狀其師禹峯子之行請予為墓道碑曰始吾禹峯子事長生劉君年未二十便能以苦行自立丐食齊魯間雖腐敗委棄蛇蚋之餘食之不少厭不置廬舍為定居計城市道塗遇昏莫即止風雨寒暑不卹也吾全真家禁睡眠謂之煉陰魔向上諸人有脇不沾席數十年者吾禹峯子行丐至許昌寺止岳祠通夕疾走環城數周日以為常其堅忍類如此嘗立城門之側有

大車載乘結而過者彙編其真念若有所省惟喜踴躍不能自禁為一老師鎖閉空室中三日乃止初不知書自是日誦數百言示之老莊隨讀隨講如迎刃而解不數年偏通內外學作為歌詩伸紙引筆初若不經意皆切於事而合於理學者至今傳之為人偉儀觀麗量寬博世俗毀譽不以聞諸心獨於周急繼困解衣輟食恒若不及也南渡後道價重一時京師貴將聞師名奔走承事請為門弟子者不勝紀正大中被旨提點亳州太清宮賜紫虛大師禹峯子之平生大畧如此致夷將以某年月日塋師於洛陽長生觀吾子嘗許以銘幸卒成之予在三鄆時蓋嘗望見禹峯子於衆人之中及官東南禹峯子亦嘗寓書求予為錄章封事予雅知若人樂與吾屬游思欲叩其所知而未果也且致夷求予文有年矣今年復自聊城走數百里及子於濟上待之者又累月子病懶於筆墨若謂有疑於其師者然予於禹峯子何疑哉予聞之今之人全真道有取於佛老之間故其憔悴寒餓痛自黜削若枯竈頭陀然及其有得也樹林水鳥竹木瓦石之所感觸則能事頽脫律自解心光燦



然普照六合亦與頭陀得道者無異故嘗論之夫  
事與理借有是理則有是事二尺童子以為然然  
而無是理而有是事載於書據見於耳目往往有  
之是三尺童子不以為然而老師宿學有不敢不  
以為然者子誤夷堅志有平居未嘗知點畫一旦  
作偈頌肆口成文深入理窟者三教人黜奉販夫  
且然况念念在道者乎張內翰敬之寓峯子曰也  
叙其歌詩曰師自以其言為道之棄物今所以傳  
者欲知此老林下百砥塵中幾蛻耳又曰悠然而  
風鳴汎然而谷應彼區區者或以律度求我是按  
天籟以官商而責渾沌之妙丹青也吾友孫伯英  
河洛名士在太學日出高河南獸臣之門若雷希  
顏淵幸敬之愿劉景玄昂霄其人皆天下選伯英  
與之游頭角嶄然不甘落其後一見師即北面事  
之竟為黃冠以歿張子所敬而孫子所愛也二君  
子且然子於嵩峯子何疑哉乃為之銘嵩峯子諱  
道顯出於文登子氏初隱觀津女几之苑花平過  
洛陽得劉君舊廬葺居之是為長生觀佳太清宮  
三年避土辰之兵於盧氏漆水公迎致鄧下俄以  
疾終春秋六十有五嵩峯其自号云

分食鷄豚託豪麗蛇視身冠譬自干里羅樂有加  
耶年可避耶所持者狝而所獲奢耶豈無考槃在  
澗之阿木茹草衣召來天和急而張之弦絕柰何  
學道之難成使人咨嗟曰婦姑勃礮交喪則多千  
日之功或棄於毫末之差彼避險而就夷皆實而  
越華拱壁以先駟馬不免於道夢若人者不潰於  
流不磷於磨始於同氣關弓終以大方為家碩雖  
有墓於此安知其不冠青雲而佩飛霞也耶

### 天慶王尊師墓表

尊師諱志常姓王氏恒心道人其自号也世為秀  
容西山水馬里人年十六七許時牧牛羊田間一  
道人曰來相就既與之熟問汝肯隨我往天壇否  
天壇神仙洞府勝似此間師雖幼聞之頗亦愛樂  
道人者即李之而西是日薄暮至一城忽失道人  
所在問其地乃濟源也又問去天壇遠近人云百  
餘里耳師自度無所歸明日徑往入陽臺宮道衆  
問所以來師具言道衆駭其為異人李之能一日  
千里是夙有仙分留為香火童子八年乃歸父母  
謂其死已久悲喜交集因送之天慶觀事王大用  
佐材尊師資稟重厚不妄言笑剝服朴素若不以

世界為懷而內歎殊甚問讀史傳哈知古今成敗  
留意醫藥必以先所驗者告之天慶唐以來福地  
廢於貞祐之兵及官府立尊師率其屬力為崇建  
規制峻整遂為一州之冠兵間暴骨狼藉無復牧  
豕宜撫使劉公易假師緣契為哀丘而祭之州里  
尤歸重焉尊師生大定壬午又再閱二十九年顏  
渥丹須眉皓白飲食如少壯人客至與談承平故  
事歷歷可聽識者謂異人得師童牝中必謂他日  
為受道之器故置之仙聖所廬敦龐昔文今既致  
矣以庚戌冬十一月十有八日沐浴易衣召弟子  
告以後事留頌而逝某日寧神於州西北原守冲  
等為植碑于用所知者為之銘

銘曰

至人翩翩坐凌八遐惟其識初平於芻牧故不  
以長房縮地而為琴道之所存不於泰誓必有  
救靡着艾之士乃克負荷彼淳偽而滄來我悃  
幅而無筭道如自擇當孰舍耶使大方之家而  
無若人亦奚貴於大方之家

冲虛大師李君墓銘

其界也全其守也專以人合天以極乎自然若人

昔吾不知其殊滅為樂如佛子之順世緣耶抑將  
乘冷冷之風化相相之蝶與至人而仙也

通真子墓碣銘

通真子諱志安字孝容出於陵川秦氏大夫諱事  
軻通經博古工作大字為州里所推重父諱畧字  
簡夫中歲困於名場即以詩為專門之學自号西  
溪道人詩殊有古意苦於瑀斲而無迹可尋當代  
文士極稱道之生二子通真其長也自登歲趣尚  
高雅三舉進士而於得喪澹如也避亂南渡西溪  
年在喜悞親日以椽養為言不獲已復一試有司  
至御簾罷歸正大中西溪下世通真子已四十餘  
致家事不問放浪嵩少間取方外書讀之以求治  
心養性之實於二家之學有所疑質諸禪子父之  
狀其推墮澆漾中而無可徵詰也去從道士游河南  
破北歸遇披雲老師宋公於上黨畧教語即有契  
嘆曰吾得歸宿之所矣因執弟子禮事之受上清  
大洞紫虛等錄且求道藏書雜觀之披雲為言喪  
亂之後圖籍散落無幾獨官州者僅存吾欲力紹  
絕業銀木宣布有可成之資第未有任其青者耳  
獨善一身曷若與天下共之通真子再拜曰

受教乃立居二十有七後工五百有奇通

校書平陽玄都以總之其於三洞四輔萬八千餘篇補完訂正出於其手者為多仍增入金蓮正宗記烟霞錄繹仙發仙等傳附焉起丁酉盡甲辰中間奉杖

朝旨借力貴近率合補綴百萬並進卒至於能事穎脫真風遐布而通真子之道價益重於一時矣通真子記誦該洽篇什敏捷樂於提誨不立崖岸居玄都垂十稔雖日課校讐其來玄學受章句自遠方至者源源不絕他主師席者皆竊有切望洋之嘆寶藏既成之五月為徒眾言寶藏成壞事閑幽跡冥冥之間當有陰相者今人緣已竟吾其行乎越二十有五日夜參乎天無陰翳忽震電風烈大木隨飄沐浴易衣駉形于所居之樗櫟堂得年五十有七高弟李志寶等以某月日奉其衣冠靈神於天壇之麓披雲之命也所著林泉集二十卷行於代往子先君子令陵川子始成童及識通真子之大父閑居崧山與西溪翁為詩酒之友者十五年通真子以世契之故與予道相合而意相得也故志實輩百拜求為其師作銘今年春二月劉志

玄者復自濟上訪予新興冰雪亟寒跋涉千里其勤有足哀者乃為作銘使刻之松臺其銘曰

昔在窮尋發真源鑿民耳目神始全遭罹元元坤軸旋壞劫欲墮未開前道山絕業當時傳百於茲蕩了大緣若有人兮靜以專嚮也易老固初筵玄綱力挽孰我先苦節終志孰我堅網羅落簡手自編寒暑不廢朱黃研琅函瓊笈開九淵垂芒八角星日懸司功會計蓋上遷乃今出銚鳥飛翮安常慶順古所賢死而不亡豈其然華陽九障名一焉豈不委形殆質天為復延康轉靈篇為復益珠參七言為復虎書校三元為復逸度論九玄寧當七祖歸枯禪松臺有名鶴千年我相夫子非頑仙

### 圓明李先生墓表

先生諱志源姓李氏郤之二水人幼有至性宗黨以孝稱年未三十考妣俱喪因棄家入道師事玉峯周君伐薪供水執役不少倦積三數年周君憫其勞使之游歷諸方至醴泉與同業結茅以居全真家樂與過客餌道院所往至者如歸嘗載飢資用乏絕先生辟穀數旬以供給來者其先人後

已類此又十有八年乃築園堵於三水李氏家三年人莫見其面周君知其有所得也召之還幽遂主王峯觀并以法席付之号曰圓明子先生資稟醇正寡於言論行己接物始終如一時人以其仁邨周至故有慈孝之目周君亦以為無愧其名也正大未闕中受兵先生避地雒陽及河南破僑寓東河者數年初周君以重陽煉化之地号活死人墓者蓋歿已父每歆葺居之歲甲午閏輔畧定先生乃緣其師雅意率法兄弟諸人分遣徒衆力為經度之是為重陽成道觀營建未幾即名駕西還先生既老道價益重學者嚮慕過於王峯時以丙午秋八月之五日春秋七十有一反真於成道之中堂以故即其地塋之明年夏四月先生之同業潘志元周志靜門弟子陳志清來新興踵門致謁以先生墓表為請曰吾圓明老師營成道訖功行就太原謁文吾子期以秋七月即途而以事不果付遺命吾屬使必成夙志其眷眷于吾子者如是聞吾子亦以普照范君幕府正之王君之故知其名能不以文字使少見於後乎子因問三子者圓明既以名取我以文託我意其臭味必有相同者

其言句可得聞乎三子者曰圓明臨終沐浴易衣會法屬與之訣有求遺教者第告之以清淨無為不染不著而已已而復求詩頌圓明麾之曰吾平生未嘗弄筆墨設強作一語非留病人間乎且近世諸師文編達者猶將以為筌蹄况萬萬不相侔者乎言終怡然而逝圓明平實如此何言句之有哉予止之曰子休矣圓明所得吾得之矣乃為之銘其銘曰

舌吐而吞駟馬追奔執愈於目擊而道存夫惟不聞鑿而聞是謂玄玄之門終南之原若人復其元始於補剗息黥乃今拔本而塞源蓋子許之以忘言之契故以其不言者而為知言

通玄大師李君墓碑

明昌承安間文治已極天子思所以敦本抑末厚天下之俗既以經明行修舉王潤逸實張建吉甫文商伯起輩三教公官使之矣至於道家者流潔己求志有可以贊清淨之化者亦特徵焉最後得通玄李君天下翕然以得人歸之蓋君天質冲遠蟬蛻俗外出入世典而無專門獨擅之蔽從容雅道而無山林高蹇之陋一時名士如竹谿堯公世

傑黃山趙公文孺黃華王公子端皆以道義締交於君大丞相莘國胥公於人物懷許可及為君作贊至有百世清規之語則君之流品為可見矣君諱大方字廣道世為汾西人父以醫為業母管氏妊十二月夢神人捧日照其室已而君生弱不好弄言語動作率非嬰兒所當有者家人異焉七歲入道師冲佑觀道士郭師禮學有夙昔能日記千言年十二以誦經通得度即辭師往趙城讀書天寧道院積力既久遂窮藏史之秘至於六經百氏之學亦稱淹通大定初造關中道風諳然有鸞飛不群之目講師郝君道本名重一時一見君即以大器許之及郝被召君佩上清三洞秘籙主盟秦雍者餘二十年泰和七年春詔以君提點中都太極宮事賜号體玄大師俄被旨以祈嗣設大醮君嚴恭科禁方士誕幻之語未嘗一出諸口徒以精誠感通遂有萬鶴下臨之應百官表賀文士亦多贊詠召對稱旨又召入禁中訪道君儀觀秀偉占對詳雅玄談豐疊聽者忘倦章宗特敬異之衛紹王大安初召君馳驛詣獄清投金龍玉冊為民求福賜雲錦羽衣仍佩金符加号通玄大師所至靈

應昭著此不具載貞祐南渡君還居鄉邑因自号北山退翁莘公鎮平陽以歲早請君致禱車轍未旋而對雨霽足時人以神人許之壬午秋避兵靖涼山一日布卦得剝之上九嘆曰吾行矣明日游騎至擁老幼萬人下山君為門弟子元慶言吾將安歸手朝家以我為有道者根以徵書見及寧當負之耶而華第往母念我為也乃策杖入深谷以大龕下怡然而逝春秋六十有四寶元光元年九月二十二也兵退元慶等奉公衣冠葬於其所癸卯冬子自燕都還太原道出范陽君之族孫閱持蕭練師公弼所錄事跡以墓表見屬曰吾祖墓木已拱而旌紀寂寥識得吾子誤述以著金石傳求父死不恨矣敢百拜以請某謝曰自予為舉子時熟君名故造其門然以愚如未敢也幸當以不腆之文託君以傳其何敢辭乃為論次之

其銘曰

處士素隱方士誕荒天尊通玄界之玄綱相彼少微出此英方姑射之山草木有光可陽可陰以柔以剛千仞壁立屹乎堂堂雖有拱壁駟馬不失其巖巖之常巨浸稽天一養莫障所謂伊人

柴立中央自古皆有死獨有道者為不亡望君  
蓬萊海日蒼涼千年一歸裴回故鄉勒銘墓石  
維以志衣冠之藏

藏雲先生袁君墓表

先生諱從義字用之族袁氏世為虞鄉著姓母娠  
十二月而生且有神光照室之異幼沉默不好為  
童子劇及長儀觀秀偉音聲如鐘識者知其不凡  
年十九入道師事玉峯胡先生于金玉峯道風儒  
業名動京師年八十章宗特徵授禮官先生盡傳  
其學通經史百家旁及釋典亦稱該洽而於易學  
蓋終身焉初親舊以先生龍蟠鳳翥有雲漢之望  
勸之就舉選先生薄於世味不之屑也中條靈峯  
觀唐路羅通舊隱歲久頽地不庇風雨先生率同  
志麻長官平甫共葺之命高弟喬知先象之居焉  
結茅此山之王官谷近司空表聖休亭故基是  
為藏雲道院先生因以藏雲自号種竹餘三十畝  
山田二頃足充賓客之奉先生道價既重州郡長  
吏到者率詣山門致謁禮部開閑趙公周臣內翰  
屏山李公之純每見必厚相慰籍玄以詩什為贈  
中朝名勝如史季先王隆吉羅鳴道李欽止吉仲

龜馬元章王可道許德臣元禮昆季皆就傳易道  
自餘成業于先生之門者又不知幾何人矣先生  
資樂易行已接物得於吾孔孟書者為多事母孝  
故生平未嘗遠出母年九十終於隱所塋祭如禮  
州里稱焉里中孤幼不能自存者先生收養之躬  
自教督使有受學之漸既長又為之婚娶如是十  
餘輩其後俱有所成雅好醫術病者來以藥請賴  
以全濟者甚衆兵後歲飢民無所於糴盡出餘粟  
以贈貧者或時出鄉人爭延致之談經誦道言笑  
彌日凡今世道家祭醮章奏皆鄙而不為嘗獨行  
山間遇異人自稱衡岳主者蕭正之謂先生三世  
學道乃今有成吾於蓬山仙詵院見吾子名氏却  
後當為孝廉貞淨仙人代鄭雲叟為少室伯主司  
真洞天言訖失所在然先生自以為不敢當也正  
大甲申朔方兵再畧蒲解先生避亂山陽史華國  
家已而保聚被攻先生義不受辱願謂弟子言吾  
往矣乃閉息土室中怡然而逝年六十六時二月  
十有四日也猶子致中等塋之山麓之南所著易  
畧釋列子章句莊子畧解雲菴妙選方傳於世始  
予罷內鄉致中介於劉鄧州光甫丐子文以表先

生之墓及官京師見閑關公亦以為言并以挽詩  
見示朔南喪亂因循未暇而予心未姑忘也丁未  
春尚城李邦彥過吾州邦彥先生鄉曲與之游甚  
款用是重以斯文為請予問邦彥藏雲所以為天  
下所高可得聞乎邦彥言藏雲隱節可以配古人  
而器量可以奉至尊吾不知其他予捧手曰有是  
哉乃為次第之其銘曰

山澤與之曜道味與之腹翩翩獨征造物之物  
謂當風岸絕出而莫可接乃温弓其玉如以君  
為黃冠師耶合煉之刀圭襍禱之綿蕪又非句  
漏全冠謙之之徒况乞靈於綠囊進技於黃襦  
勸義人倫之先盡難救水之餘洗心有經先天  
有圖絕學我傳宿惑爾祛以君為縫掖生耶胡  
不繁文以拘而脂膏以濡嗒焉尸居奮而亨衢  
塞為鄒靈震驚八區其卷其舒其知其愚之人  
也吾無以命之殆方內之外而方外之內者歟

告山贊禪師塔銘

龍興汴禪師為予言汴落髮於告山贊公承事五  
六年始避兵而南北歸贊公去世已久師生於正  
隆初而歿於興定之末年年過六十但以喪亂之

後時輩凋喪師之行事無從攷按至於卒蓋時日  
亦不能知今所知者特某甲未南渡時事耳吾子  
嘗試聽之師諱法贊出於兗州侯氏自幼出家事  
岷陽明首座大定間以誦經通得僧服即以義理  
之學從事根性穎利同學者少所及游叅扣詰洞  
見深祕得法於告山明和尚嗣法靈岩才師即大  
名魯孫也出世住告山方世路清夷禪林執則未  
改師道風諒然為諸方所重再住兗州之普照州  
俸信都路公宣叔文翰之外兼涉內典與師為洵  
沐之交師開堂宣叔具文疏朝服施敬繼為先大  
夫薦冥福禮有加焉其為中朝名勝所推服如此  
汴老矣尚能記師沉嘿自守不以文字言語驚流俗  
為門戶計住持不務營造學者雖多迄無授記者  
行義如是而使之隨世磨滅門人弟子寔任其責  
竊不自揆度敢以謬述為請幸吾子惠顧之不肖  
交於汴公者三十餘年矣汴南遷後嗣法虛明草  
公在法兄弟最後蒙印可於臨濟一枝亭亭直上  
不為震風凌雨之所摧偃龍興焚蕩之餘破屋數  
椽日與殘僧三四輩灌園自給不肯輕傍時貴之  
門子嘗以五言贈之有大道疑高蹇禪枯耐寂寥

蓋頭茅一把繞腹幾三條之句意其孤峻自持如此必有所從來循流溯源乃今知所自矣因畧記贊公遺事故薰及之歲丁巳夏五月二十有五日河東人元某書

遺山先生文集卷第三十一

遺山先生文集卷第三十一

記

令旨重脩真定廟學記

王以丁未之五月召真定總府參佐張德輝北上德輝既進見王從容問及鎮府廟學今廢興何如德輝為言廟學廢於兵久矣徵收官奉行故事嘗議完復僅立一門而已今正位雖存日以頽圯本路工匠縱管越振玉方營葺之惟不取於官不斂於民故難為功早於是令旨以振玉德輝合力辦集所不足者具以狀聞德輝奉命而南連宰史天澤而下曉然知上意所嚮用不奔走從事以貴以力迷為伙助實以己酉春二月庀役藏事黽勉朝夕隳漏者補之邪傾者壯之腐敗者新之湯滌者飾之裁正方隅崇峻堂陛廟則為禮殿為賢廡為經籍祭器之庫為齋居之所為性薦之厨而先聖先師七十子二十四大儒像設在焉學則為師質講授之堂為諸生結課之室為藏廩庖湍者次焉高明堅整營連合制起敬起慕于是乎在乃八月落成弦誦洋洋日就問學官子漸禮讓之訓人士修舉選之業文統紹開天意為可見矣既丁酉



釋菜禮成教官李謙暨諸生合辭屬好問為記以謹歲月竊不自揆度以為仁義禮知出於天性其為德也四君臣父子兄弟夫婦朋友著於人倫其為典也五惟其不能自違必待學政振飾而開牖之使率其典之當然而充其德之所固有者耳三代皆有學而周為備其見之經者始於井天下之田井田之法立而後黨庠遂之教行若鄉射鄉飲酒若春秋合樂勞農養老尊賢使能改藝選言之政完成獻馘訊囚之事無不在又養鄉之俊造者為之士取鄉大夫之嘗見於施設而去焉者為之師德則異之以知仁聖義忠和行則同之以孝友睦婣任恤藝則盡之以禮樂御書數淫言詖行凡不足以輔世者無所容也故學成則登之王朝蔽陷畔逃不可與有言者則捷之識之甚則棄之為匪民不得齒於天下民生於其時出入有教動靜有養優柔饜飲於聖賢之化日加益而不自知所謂人人有士君子之行著非過論也或者以為井田自戰國以來掃地矣學之制不可得而見之矣天下之民既無以教之將待其自化歟竊謂不然天佑下民作之君師夫豈不敬使之正人心承王

道以平治天下 獨尊於周而薄於世乎由周而為秦秦又盡壞周制燒詩書以愚黔首而黔首亦皆從之而愚借種鋤而德色取箕箒而許語捄買殊扞熱爛之極宜莫秦民若也高帝復以馬上得天下其於變狂秦之餘習使滄周之美化亦不暇給矣然而叔孫典禮僅出綿蕪之陋陸賈詩書又皆煨燼之末孰謂新珣為璞者乃於不旋踵之頃而得之寬厚化行曠然大變典廉舉孝周暨郡國長吏勸為之駕者項背相望是則前日所以厚周者今易地而為漢矣况乎周制雖亡而出於人心者固在惟厭亂所以思治惟順流易於更始始於草創而終之以燭色本末先後還相為用為周為漢同歸於治何詳畧遲速之計耶洪惟大朝受天景命薄海內外罔不臣屬武尅剛矣且以文治為永圖方夏甫定垂恩選舉念孤生之不能自存也通經之士悉優接之慮儒業之無以善繼也老成宿德使以次傳之深計遠覽所以貽丕顯之謨而啓玉承之列者蓋如此王府忠國撫民一出聖學比年有札故老延見儒生謂六經不可不尚邪說不可不緝王教不得不立而舊染不得不除攷古

道講明政術樂育人材儲蓄治具修大樂之絕業  
舉大常之隆典其見於恒府廟學者特尊師重道  
之一耳夫風俗國家之元氣學校王政之大本不  
寒不汎雖有必至瘡老扶杖思見德化之成漢宋  
美談見之今日蓋兵興四十年俎豆之事不絕如  
縷獨吾賢王為天下倡是為天下賀也政樂  
為天下書之是年十月朔旦記

東平府新學記

鄆學舊矣宋日在州之天聖含有講授之所曰成  
德堂者唐故物也王沂公曾罷相判州買田二百  
頃以贍生徒富鄭公獨新學記及陳公堯佐府學  
題榜在焉劉公摯領郡請于朝得國子監書起稽  
古閣貯之學門之左有沂公祠祭之位春秋二仲  
祭以望日魯兩生泰山孫明復徂來石守道配焉  
齊都大名徙學于府署之西南賜書碑石隨之而  
遷獨大觀八行碑蔡京題為聖作者不預焉齊已  
廢而鄉國大家如梁公子美賈公昌朝劉公長言  
之子孫故在生長見聞不替問學尊師重道習以  
成俗恭和以來五章政事壽國張公方公藹國侯  
公華來知政事高公霖同出於東阿故鄆學視他

郡國為最盛如是將百年貞祐之兵始廢焉先相  
崇建開府之日首以設學為事行視故基有興復  
之漸今嗣侯蒞政以為國家守成尚文有司當振  
飭文事以贊久安長治之盛敢不罷勉朝夕以效  
萬一方經度之始或言阜昌所遷乃在左獄故地  
且逼近闕闈湫隘殊甚非絃誦所宜乃卜府東北  
隅爽塏之地而增築之既以事聞之 朝佖徒

歲事上力偕作首淑禮致堅整高朗視大邦君之  
居夫子正南面垂旒被袞鄆克兩公及十哲列坐  
而侍章施足徵像設如在次為賢廊七十子及二  
十四大儒繪像具焉至于棲書之閣豆籩之庫墀  
齋館庖福庭庶故事畢舉而崇飾倍之子弟秀民  
偕舉遷而食康餼者餘六十人在東序隸教官梁  
棟孔氏族姓之授章句者十有五人在西序隸教  
官王磐署鄉先生康暉儒林祭酒以主之蓋經始  
于壬子之六月而落成于乙卯六月初五十一代  
孫衍聖公元措嘗任為太常卿癸巳之變失爵北  
歸再被詔搜索禮器之散逸者仍訪太常所隸禮  
直官歌工之屬備鍾磬之縣歲時閱習以宿儒府  
參議宋子貞領之故鄆學視他郡國為獨異乃八

月丁卯侯率寮屬諸生含菜于新宮玄弁朱衣佩玉舒徐降階之禮成而饗獻之儀具八音洋洋復盈于東人之耳四方來觀者皆失喜稱嘆以為叔冠禮樂盡在是矣越翌日學之師生合辭謂僕言嚴侯父子崇飾儒館以布宣聖化承平文物頽邈舊觀學必有記以謹歲月幸吾子文之石垂示求夕僕謝曰先生常談何足以陳之齊魯諸君之前顧以客東諸侯者久擬當投簡之末俎豆之事固喜聞而樂道之何敢以不敏辭興造之蹟已厚件右之矣竊不自度量輒以有所感焉者著于篇嗚呼治國治天下者有二教典刑而已刑所以禁民教所以作新民二者相為用廢一不可然而有國則有刑教則有廢有興不能與刑並理有不可曉者故刑之屬不勝數而賢愚皆知其不可犯教則學政而已矣去古既遠人不經見知所以為教者亦鮮矣况能從政之所導以率于教乎何謂政古者井天下之田黨庠遂序國學之法立乎其中射鄉飲酒春秋合樂養老勞農尊賢使能致藝選賢之政皆在聚士于其中以卿大夫嘗見于設施而去焉為之師教以德以行而盡之以藝淫言誠行

詭恠之術不足以輔世者無所容也士生于斯時揖讓醅酢升降出入于札文之間學成則為卿為大夫以佐王經邦國雖未成而不害其能至焉者猶為士猶作室者之養吾棟也所以承之庸之者如此庶頑諛說若不在時侯以明之據以記之記之而不從是蔽陷畔逃終不可與有言然後棄之為匪民不得齒于天下所以威之者又如此學政之壞又英人情苦于羈檢而樂于縱恣中道而廢縱惡若崩時則為揣摩為押闖為鈞距為牙角為城府為弄機為鎔鑿為龍斷為捷徑為會墨為蓋藏為較固為乾沒為面謾為力詆為駭駁為譏彈為嫺笑為凌轢為癡癡為賤耻為構作為擗擊為麾斥為劫制為把持為絞訐為妻婦妬為形声吠為厓岸為階級為高亢為湛靜為張互為結納為勢交為死黨為豪彙為淵藪為湯鞞為陰害為竊發為公行為毒螫為蠱惑為狐媚為祖詐為鬼幽為怙鬼為心失位心失位不已合謾疾而為聖願政為大言居之不疑始則天地一我既而古今一我小疵在人縮頸為危悲讚薰天泰山四維吾術可售惡惡不可寧我負人無人負我從則斯朋

遠則斯攻我必汝異汝必我同自我作古孰為周  
孔人以伏膺我以發冢凡此皆殺身之學而未若  
自附于異端雜家者為尤甚也吾山林木食澗飲  
以德言之則雖為人天師可也之以治世則亂九  
方阜之相馬得天機于滅没存亡之間可以為有  
道之士而不可以為天子之有司今夫緩步淵視  
以儒自名至于徐行後長者亦易為耳乃羞之而  
不為竊無根源之言為不近人情之事索隱行怪  
欺世盜名曰此魯顏子思子之學也不識曾類子  
思子之學固如是乎夫動靜交相養是為弛張之  
道一張一弛洵息存焉而乃強自矯揉以靜自囚  
未嘗學而曰絕學不知所以言而曰忘言靜生忍  
忍生致敢生狂縛虎之急一怒故在宜其流入于  
申韓而不自知也古有之桀紂之惡止于一時洩  
虛之禍烈于洪水夫以小人之中庸欲為觀晉之  
易與崇觀之周禮又何止殺其軀而已乎道統開  
與文治興矣若人者必當戒覆車之轍以道改新  
之路特私憂過計有不能自己者耳故倭迹之既  
以自省且為無忌憚者之勸俟名七歲入小學師  
名士龍江張某澄自讀論至剖析義理者餘拾年

衍聖必其為特遠之器以其子妻之迄今為名諸  
侯二君子有力焉是年九月朔旦河東元某記

博州重修學記

博之廟學當泰和中州倅遼東王遵古元仲之所  
建元仲有文行道陵謂之昔人君子者也甲申之  
兵民居彼焚州將闕侯義以廟學州宅罷興寺廢  
土木之嚴申于一州特以兵守之其後廟學獨廢  
不存今什臺特進公以五十城長東諸侯凡四境  
之內仙佛之所及祠廟之無文者率完復之故  
學舍亦興焉防禦使在平石侯青彭德總管蕪州  
事趙侯德用乃以行臺之命葺舊基之餘而新之  
大其正位又為從祀之室于其旁至于講誦之堂  
休宿之庖齋厨庫廡無不備具經始于某年之某  
月落成于某年之某月文石既具趙侯請子記之  
子竊有所感焉博自唐以來為雄鎮風化則譽嘗  
禮義之舊人物則曾連于華歆駱賓王之所從出  
在承平時登版籍者餘三十萬家其民号为良善  
而易教特喪亂之後不能自還耳雖然豈獨此州  
然哉先王之時治國治天下以風俗為元氣庠序  
黨術無非教天子至于庶人無不學天下之人勿

而壯壯而老耳目之所接見思慮之所安習優柔于弦誦之域而饜餮于禮文之地一語之過差一跬步之失容即赧然自以為小人之歸若犯上若作亂雖驅逼之從史之誘引之有不可得者矣故以之為俗則美以之為政則治以之為國則安且父理之固然而事之必至者蓋如此嗚呼王政掃地之日久矣戰國吾不得而見之得見兩漢斯可矣兩漢吾不得而見之得見唐以還斯可矣唐以還且不可望況于為血為肉之後半衰亂既多生聚者無幾蚩蚩之與居偃偃之為徒亦有教焉不過破梁碎金胡書記詠史而已前世所謂急就章必國冊者或篇題句讀之不知矣後生所習見者非白晝攬金則禦人于國門之外取其黨而諛語借援鉏而德色秦人之抵冒殊扞賈子之所為太息而派涕者蓋無足訝由是觀之父子夫婦人倫之大節亦由寇屐上下之定分冠而履之履而冠之非正名百物則倒置之敝無所正父不父子不子夫不夫婦不婦必靡修人紀者出則而後有攸叙之望矣况草昧之後道統方闡明經者例有優身之賜而此州將佐首以興起學官為事士之有

志于此道者其喜聞而樂道之宜如何哉故為記其興造之始末且以學校之本告之曰有天地有中國其人則先舜禹湯文武周公其書則詩書易春秋論語孟子其民則士農工賈其教則君令臣行父慈子孝兄弟友恭夫婦睦朋友信其治則禮樂刑政紀綱法度生聚教育冠婚喪祭養生送死而無憾庠序黨塾者道之所自出也士者推庠序黨塾所自出之道而致之天下四方者也由是而之焉正名百物肇修人紀者尚庶幾焉如曰不然則爾愛其羊我愛其禮以是學為告朔之餼可也

### 趙州學記

趙州廟學初廢于靖康之兵天會以來即中趙公某姑立廟殿而任公某增築學舍慕和名臣陵川路公元為門為廊廡為講堂土木之功乃備自貞祐南渡河朔喪亂者餘二十年趙為兵衝焚毀尤甚民居官寺百不存一學生三數輩逃難狼狽不轉徙山谷則流離于道路廟學之存亡亦付之無可奈何而已戶牖既壞瓦木隨撤當路者多武弁漫不加省上雨旁風日就頽墜識者惜之歎嗟叩真定路工正總管趙任慨然以修復為事發費于

家顧工于民躬自督視不廢寒暑截正方隅崇峻堂陛斜傾者起之腐敗者易之破缺者完之浸瀆者飾之曾不期年截然一新若初未嘗毀而又有加焉者乃八月上丁諸生釋菜如礼衣冠俎豆駢駢乎承平之舊予過慶源嘗往觀焉問所以經度者郡人高德茂等合辭道其然且請予記之子以為學官之廢久矣儒學之士雖有任其責者亦以為不急之務矣比歲郡縣稍有以興學為事者率有由而然力致勢劫劇甚調度僅能有成怨讟盈路所謂可為羨觀而不可以夷攻也趙侯不出于強率不入于承望崇儒嚮道自拔于流俗者如此在于學古之士其喜聞而樂道之宜何如哉故為記之且告之曰吾道之在天下未嘗古今亦未嘗廢興君臣父子夫婦兄弟朋友之際百姓日用而不知大業廣明五季之亂綿蕪不施而道固自若也雖然庠序黨塾先王之所以教後世雖有作者既不能復有所加亦豈容少有所損羊存礼存此吉朔之饋所以不可廢也夫興學儒者事也用武之世而責人以儒者之事不可也異時時可為力可致而使學官有鞠為園蔬之嘆不必以前世

趙仕路三使君為言視今趙侯能不少媿乎侯名振王龍山人先節慶慶源有良民吏之風其興文士游蓋其素尚云

壽陽縣學記

近代皇統正隆以來學校之制京師有太學國子學縣官錄稟生徒常不下數百人而以祭酒博士助教之等教督之外及陪京總管太尹府節度使鎮防禦州亦置教官生徒多寡則視州鎮大小為限員幕屬之由左選者率以提舉繫銜刺史州則係籍生附于京府各有定在外縣則令長司學之成壞與公廡相授受故往往以增築為功若仕進之路則以詞賦明經取士預此選者多至公卿達官捷徑所在人爭走之文治既洽鄉校家塾弦誦之音相聞上黨高平之間士或帶經而鋤有不待風厲而樂為之者化民成俗槩見于此自大安失馭中夏版蕩民居官寺燬為焦土天造草昧方以弘矢威天下俎豆之事宜有所待也甲辰之春子歸自燕雲道壽陽知有新學生徒觀焉見其堂廟齋廡若初未嘗毀而又加飾焉者問所以然諸生合辭曰吾邑舊有廟學于元祐中知縣事張不渝實更

新之既乃廢于貞祐甲戌之兵大變之後民無百家之聚縣從事李通李天民者竊有修學之議而病未能也會臺縣下于士賓之冬課所在舉上丁釋菜之典乃得借令佐暨縣豪傑諸人經度之蓋

三年而後有成又欲謂文吾子以紀歲月顧以十食之役之故而無以自達也予謂二三召言公輩寧不知學校為大政乎夫風俗國家之元氣而禮

義由賢者出學校所在風俗之所在也吾欲塗民耳目尚何事于學如曰如之何使吾民君臣有義而父子有親也夫婦有別而長幼有序也則天下

豈有不學而能之者乎古有之有教無類雖在小人尤不可不學也使小人果可以不學則武城之絃歌當不以割鷄為戲言矣予行天下多矣吏莠

而漁吏酷而屠假尺寸之權賤民膏血以自腴者多矣崇祠宇佞佛老指所甚愛以求非道之福嘖呻願盼化瓦礫之場為金碧者又不知幾何人也

能自拔于流俗崇儒重道如若人者半且子所言無以自達者亦過矣與學之事賢相當任之良民吏當為之賢相不任良民吏不為曾謂斗食吏不得

執鞭于其後乎使吾不為記茲學之廢興則已知

款記焉吾知張不渝之後唯此兩從事而已奚以斗會之薄萬鍾之厚為計哉通字孝達縣人天民字仲先上世秀容人其先世皆儒素云

### 代冠氏學生修廟學壁記

冠氏廟學真祐初知縣事魯仔所增建泰和中主簿折元禮畫七十二子像喪亂以來民居皆被焚毀而廟學獨存歲乙未右副元帥趙侯憫其頽圯復為完補之學之制初亦儉狹侯就為料理而作新之意蓋未已也侯崇儒重道出于天性在軍旅中亦常以文史自隨一府之人若偏裨若府吏皆隨而化之興學之事特其盪觴耳嗚呼吾邑為大縣矣兵在承平時登版籍者餘三萬家僑寓之民又倍而三之學校大事也前後歷數十政非無賢今佐而乃曰卑習陋漫不加省百年以來能崇起之者唯吾侯與魯折三人而已可勝嘆哉某月日縣學生黃逸民記

### 葉縣中嶽廟記

河南中嶽所在在兩率有祠廟以奉嶽祇葉距崧三百里而近獨無有也邑門之南百舉武少折而西有地焉直居民之衝顧望崇顛父老規為嶽祠

樞美泰和未太原初人樊道真始以邑人之意而  
 經度焉地本故堤廢圯已久荆棘瓦礫蛇鼯所舍  
 樊身執畚鍤剡治蕪穢實以板築百日而廟基成  
 邑之人知其堅固可任也乃群起而助之費卿豪  
 張祐孫寧秦商人兗珪為之倡廟既成相人有以  
 白石為中天像敬肇而北者道直請而事焉予嘗  
 謂小人之情畏之而有不義取之而有不仁威之  
 而有不懲獨於事神若有所微焉何耶微福于方  
 來逃罪于已然百來而百不可得然終不以百不  
 可得而廢其所以求也當貴光榮壽考繁昌人既  
 有以求諸神忠信孝弟廉讓篤實神亦有以望于  
 人吾嘗見夫世俗之所事神者矣崇祠宇嚴像設  
 到羊豕具儀衛巫現倡優雖然而前拜跪甚勞迎  
 送甚勤求神之所以望于人者無有也陰害賊詐  
 刮利次骨利之所在無復天理公嗟潛持難得是  
 期內人于溝不恤也血人于牙不饜也志得而意  
 滿則曰我求于神神報我者如是也故持噬愈獲  
 報謝愈豐禱求愈奢香火未收而陰害賊詐之心  
 已拂然于胸中矣此直蛇神牛鬼之陋不忍臨而  
 謂岳祇之聰明正直者而臨之乎記有之雖有惡

人齋戒沐浴可以事上帝謂小人之不可以事神  
 不可也豈弟君子求福不回好是正直介以景福  
 謂神之可欺尤不可也嗚呼神有固然三尺童子  
 所能知而人有不能知者特溺于貪而不能自還  
 耳惜乎莫有以三尺童子之所知者而告之也於  
 未之夏予過昆陽進士常仲安道樊之意欲得吾  
 文以記其經營之始故為書之且告以福不可欺  
 禍不可逃也如是庶幾未者有所儆焉

扁鵲廟記

扁鵲隨俗為變過咸陽為無辜醫邯鄲為帶下醫  
 洛陽為耳目痺醫蓋嘗至固其有廟于此則不可  
 考也朝再以元豐八年成里之人事之惟謹病者  
 必求以藥請杯按問有得否炮埃煤若丸劑然者  
 吞之病良愈閭里間相傳以為神斗酒羶肩禱謝  
 曰豈積習既久莫有能正之者鄉豪張乙居其旁  
 算而新之土木有加焉正大元年之八月也自扁  
 鵲飲上池水三十日而知物其事固以秘怪而不  
 常故靈荒誕幻被子未流千百年後而未止也雖  
 然耳目之所不接故常理之所不拘神膏傳創靈  
 丸起廢見于傳記者多矣又安可以其果無有哉



嘗謂扁鵲至人也自言其方可以解肌裂皮决脉  
結筋滌腸胃漱滌五臟練精而易形矣至於世  
之陰忌賊詐貪饕攫捨心魂斷夜若醉若狂憑然  
而不能<sup>自</sup>死者百千為群日相過半前為扁鵲者獨  
不能<sup>自</sup>隨俗為變練精而易形使之為平直安舒庶  
讓潔清之人乎若夫疾病則倚聖人所不廢誠以  
感神祭則受福冥冥之間當有陰相者蓋亦無以  
靈丸神膏為也此之不為區區之香地埃煤自夸  
于閭巷細民之間以為神鳴呼其亦兒童劇而已  
矣豈世之所望于扁鵲而扁鵲之所以為扁鵲者  
哉

### 長慶泉新廟記

鄧之西百里而遠是為內鄉之東鄙有山焉岡巖  
起伏輿浙鄜諸山絡脉相屬而為之殿其麓二泉  
灌田千畝有奇泉之上有龍祠者舊以為禱之有  
雨暘之應旁近之民有以飲羊牛浣裙裾者泉輒  
匯而迂焉考之辨方無所知名俚俗所稱訛繆失  
實且不雅馴今以其地名之長慶泉正大丁亥予  
承乏是邑夏五月亦旱近百日凡縣境之名湫無  
慮數十所奔走禱祠卒無感通道路嗷嗷無望末

秋有此泉為言者予率父老詣焉幣祝甫登雲氣  
四合車轍未旋而澍雨決明年里之民作新廟于  
泉之西南且以紀其事為請天龍之靈固也然古  
人之于禱祠不幸而不見咎自咎而已幸而應焉  
則亦不敢以為功今也不德其何以致然將適與  
雨會歟影響之報蓋不如是之捷也天之恩與威  
令龍實尸之油然而雲殷然而雷不崇朝而  
雨天下利于物者豐則享諸已者厚道家所  
言恍惚之外神龍之所居璿宮瑤室萬舞在  
庭金支翠旒紛蔽輝映雖首出萬物奉以四海九  
州有不足進焉者山夫谷民乃以一畝之宮牲不  
揄豈而祠之豈度德審功報稱之道哉聞之天即  
神神即人人即天名三而誠則一東鄰之牛不如  
西鄰之鑰祭實受其福凡以恃吾誠而已不然所  
持者彼所求者奢彼乘雲氣而游天地之間是區  
區者寧足以留其一眵耶正大己丑九月日

### 三皇堂記

老子職柱下史閱人代之久其述伏羲神農黃帝  
氏以來有太上下知有之其次親之譽之之論邵  
康節固之亦謂皇與帝為千萬世之人其次第蓋如

此自三墳為吾夫子所斷三聖人者與天同功乃無德業可攷見醫家者汎謂神農一日嘗七十毒與岐黃至真大要三墳書特止于此今其論故在本干大道之說而究乎生死之際然於三聖人所以仁後世者纔土豈耳太原醫師趙國器謂吾業當有所本也即其家起大屋立三聖人像事之以歷代名醫岐伯而下九十人侑其坐棟宇既像設既嚴介於太谷李進之請予為記始予甚難之以謂天地不仁芻狗萬物聖人濟民仁壽之域民物安逸若道自然雖莫知所謝可也或曰有萬世之利享萬世之報允倉楚所君年穀豐穰物無疵癘其鄉之人且相與尸而祝之社而稷之況與天地同功者乎辨本反始非閭巷所得專而泝流窮源或旦暮如有過祖而祀之其誰曰不然天趙子世於方伎餘百有五十年矣守之以恒業用之以戒心謂一毒妄攻五兵莫慘敢取自信臨之以神明吾知是家於人之命為甚重矣是可記也於是乎書之國器名天用今為惠民局直長瑤工張天秀國器之子履道知讀書異時當以儒素自技于汎俗云己酉初吉新興元某記

崔府君廟記

唐崔子玉府君祠在所有之或謂之亞岳或謂之顯應王者皆莫知其所從來府君定平太宗時為長子全有惠愛之風本道採訪使與長子尉劉內行弗倫且有賊欺之鄙特縣有名虎府君謂二者宜當之已而果然及一孝子為所食乃以牒攝虎至使服罪一縣以為神而廟事之世所傳蓋如此廟之在陽平者有年矣貞祐之兵燒毀幾盡業事副元帥趙侯以其父之志為完復之其成也侯命子以歲月記故書之傳曰有功於民則祀之以勞定國則祀之此不為小德小善者言漢丞相忠武侯之歿蜀人求為立廟朝議以禮秩不聽百姓遂回時節祭之道陌上言事者或謂可聽于成都立之安樂公不從習隆向充拜章言巷祭野祀非所以存德念功若盡順人心則瀆而無典建之京師又偏宗廟止可令其近墓為之所親以時設祭故吏欲奉祀者皆限至廟斷其私祀以從正禮於是始從之為廟於沔陽從是觀之漢人於忠武侯其難之也如是況其下者乎且夫郡縣之良吏血食一方見于今者多矣然卓茂則止於密魯仲康則止

於中牟朱邑則止於桐鄉召父杜母則止於南陽  
蓋未有由百里之邑達之天下四方如府君之祠  
之侈者也高門之蕩然廣殿之渠然袞冕之巍然  
侍衛之肅然雖五帝之尊且稚無以進使其止於  
為土木偶焉斯可矣或有物焉則將疾走遠引逃  
避之不暇矧敢馮几負宸以當天下四方臣僕之  
敬乎嗚呼祀典之壞久矣惟祀典壞而後撤淫祠  
之政舉喪亂以來天綱弛而地維絕人心所存唯  
有逃禍徼福者在耳惟逃禍徼福者在故克悍毒  
詐有時而熄若曰淫祀無福非其鬼而祭之為詬  
爾所敬非吾之所謂敬爾所惧非吾之所當惧彼  
將蕩然無所畏忌血囊仰射又何難焉使泓公而  
在吾知前日江淮之舉有不暇施于今日者矣故  
併及之使人知侯之意有在

遺山先生文集卷第三十二

遺山先生文集卷第三十三

記

鄧州新倉記

觀察判官曹君德甫以書抵某云武勝一軍裨殿  
南服重兵所宿兼倍諸道故康庾之積尤為吾州  
之大政今漆水公之鎮是邦也至之日即以新倉為  
事度村于山賦庸于兵心計手授百堵皆作益經  
始于正大六年之八月而斷手于八年之四月文  
石既具子為我記之某以為天下之為食者莫勞  
于農而莫不害于農農之力至于今極矣蠶牛而  
耕曝背而耘十人之勞不能給一人之食水旱霜  
雹螟蝗蟲蠶凡害于稼者不論也用兵以來調度  
百出常賦所輸皆剝喪之民終歲動動不得以養  
其父母妻子而以之位軍興者兵則恃農而戰農  
則恃戰而耕朝廷旰食宵衣惟穀之恤勸農冠蓋  
相望于道康人之制非不具備而有可或不能奉  
承精粗之不齊陳腐之不知度量之不同薄領之不  
一收貯之不謹替閤之不時訶禁之不嚴檢察之不  
恒冒濫之不究請託之不絕一隙所開百姦乘之不  
百家之所啟不足以給雀鼠之所耗一邑之所入不

足以補風雨之所敗四方承平粒米狼戾時然且不可况道殣相望之後乎然則有能為國家重民食而謹軍賦者業文之士宜喜聞而樂道之也唯公為徐為陝為鳳翔為京兆為洛陽盡力民事二十年于茲知民之所難知戰之所資知廢政之不可不舉知積弊之不可不去是役也易腐敗為堅整廣狹陋為宏敞增卑濕為奘壇漢壘蔽為開廓環以復垣鍵以重扃主撮有經新陳有次曠曝有所檢視有具出入有籍巡衛有卒條畫周密截若畫一萬箱踵來千倉日盈陳陳相因如岡如陵望之巍然有以增金城湯池之重京師仰給于是乎張本某屬吏也知公為詳故并著其設施如此四月二十三日儒林郎南陽縣令武騎尉賜緋魚袋元某記

南陽縣令題名記

為縣難為南陽尤難由漢以來千百年若是邦者不知其幾何人獨召杜有父母之稱其餘則有問姓名而不知者可謂尤難矣自功利之說行王伯之辨興墮窳者得以容其姦而振厲者無以盡其力蓋嘗疑為仁人君子正其諛不謀其利明其道

不計其功與夫安靜之吏悃悃無華日計不足月計有餘者理誠有之然唐虞之際司空則平水土右稷教民稼穡司徒則敬敷五教在寬士明于五刑虞則若予上下草木為獸伯典禮夔典樂龍納言三載考績三考黜陟幽明君臣相教率作興事必予成而後已謂之不計其功也而可乎漢宣帝之治樞機密而品式具上下相安莫敢苟且政平訟理困出于良二十石德讓之風至于摘奸伏擊豪右敢悍精敏若春簡快如刃之發于刃者亦多矣三代之民治漢之民亦治孰王孰伯必有能辨之者嗚呼道喪久矣召杜之政豈人人能之准稍自振厲不入于墮窳斯可矣若夫碌碌自保寂寂而無所聞去之日使人問姓名而不能知雖若是邦謂之未嘗若是邦可也年月日某記

吏部掾屬題名記

吏部為六曹之冠自前世號為前行官屬府史由中後行而進者皆以為榮焉國朝故事掾屬之分有左右選右選之在吏曹者往往至公卿達官然不能終更者亦時有之古人以為吏猶賈然賈有賢有愚賈之取廉日計不足月計有餘愚賈之

承無紀極舉身以狗貨反為所累者多矣此最善  
喻者自風俗之壞上之人以徒隸遇佐史甚者先  
以機詐待之庶恥之節廢苟且之心生頑鈍之習  
成實坐于此夫以天下銓錄之係與夫公卿達官  
之所自出乃今以徒隸自居身辱而不辭名敗而  
不悔甚矣人之不自重也乃錄南幸以來名姓凡  
若干人刻之石執善執惡執止此而違執由此而  
敗觀者當自知之得以監焉正大二年五月日儒  
林即權國史院編修官元某記

警巡院解署記

汴京官府寺舍百年以來無復其舊車駕南渡百  
司之治往往以民君為之如兩警院之整刷緊要  
者亦無定所馬夏津宋侯之頌右院也以為吾之  
職有前世長安洛陽令之重其權則又右內史之所  
分乃今僑寓于編戶細民之間余也不敏就得以  
倥傯為辭後之君子莫類焉陸級之不崇何以示  
民寢廢之不帥何以待賢貴賤無章上下混濁則  
又非所以謹官常而侈上命也乃以故事請于縣  
官久之得故教授位于樂善坊之東教官廢久屋  
為民者鱗滿邪傾風雨弗在矣以暇時易而新之

治有廳事寔有堂與厨庫并廡以次成列外周以  
垣內鍵以門不粘困不公滯蓋百日而後成即以  
其事屬余記之竊嘗謂治人者食于人勞其心者逸  
其身于此有人焉朝夕從事使斯民也皆得其所  
欲安民安矣至于吾身之所以安則謂之私而不  
敢為夫豈人情也哉履屐之間可以用極鼓鐘之  
未可以觀政若曰此猶傳舍耳不足用心于其間  
君子以為不智可也故予樂為書之侯名九嘉字  
飛卿擢進士甲科文采風流照映一時歷高陵三  
水藍田扶風四縣令皆有能聲云正大二年五月  
日儒林即權國史院編修官元某記

劃開濟水渠堰記

州倅定襄李侯介于教官劉浚明之深以濟水新  
渠記為請曰濟水之源出于雁門東山之三泉通  
繁時遠為大川放而出忻口並北山而東去僕所  
居橫山為不遠上世以來知水利可興故嘗與之  
由宋尔朱氏而下凡三人焉尔朱丘村人家有賜  
田百頃因以雜吾鄉役家之僮奴欲從忻口分支  
流為渠鄉之人以是家公為較園之計莫有助之  
者且姍艾之因自沮而罷大定戊子無畏莊信武

喬公既辦十萬喬氏者度其財力易于興造復以渠為事開及日陽里農民以盜水致訟有避罪而就死者事出于賤昧甲乙鈎連無從開釋役夫散歸至以水田為諱承安中吾里齊企羨率鄉曲大家按喬公故迹欲終成之而竟亦不成僕不自度量以先廣威嘗與齊共事思辛前業類縣豪悍鄉父兄子弟仗助之歷二年之久僅有所立蓋經始於壬寅之八月起湯頭嶺西之白村上下逾六十里經建安口乃合流又明年之三月既望合鄉人預議泊執役者置酒張樂以落之老幼欣快騶呼動地出乎昔所望之外宜有文辭以垂示永久幸吾子留意焉余以謂立功立事必天時人事合而後可然繫于人事者為尤多累余官西南鄧之屬邑多水田業戶餘三萬家長溝大堰率因故蹟而增築之而其用力有不可勝言者試一二考之夫水在天壤間為至平且善利萬物而不爭有餘者損之不足者補之時乃天之道兼井之家力足以制單貧而賄足以侮文法身私九里之潤人無一溉之益者多矣以至平為不平不爭為必爭補有餘損不足傷水之性逆天之道覆車之轍前後相接田

野細民有敢復與大豪共公者乎矧夫非大變之後無不爭之田非婁豐之年無供役之食事艱於慮始人習於惡勞賢否異情理難脗合彼已分利執為網維故雖有萬折必東之心而終屈於七過皆北之勢使臨之以公上之命且無望于必成况劇始于鄉社二三之議乎有其時而乏其人有其人而無其志力不前勝事必後艱大哉志乎唯強也故能立天下之懦唯堅也故能易天下之難由是而克之關輔之三白襄樊之黔蘆皆此物也故嘗謂江鄉澤國巧於用水凡可以取利者無不盡舉飾技杖隨為豐年今河朔州郡非無川澤而人不知有川澤捐可居之貨失當乘之機如愚賈操金昧于貿遷之術早曠為雪乃無以瘳之求象龍候高羊坐為焚厓暴至攘櫓家之所候搏手困窮欲將誰執方新渠之成也余往觀焉派波法云淨澈盈溝若大有力者擁之而前農事奮興坐享豐潤禾麻蔽麥蕪蕪彌望計所收拾如有以相之夫孤倡而合衆力一善而兼萬夫斃勞而有七窮之利若孝戾者其可謂有志之士矣雖然水利之在吾州者非特潯河而已也出東門一舍少折而南

由三霍而東盡南邢之西其間無井邑無聚落無  
丘壑特沮洳之爛而已誠能引牧馬之水以合三  
會于蒙山之麓隄障有所出內有限經費數千人  
之功平湖渺然當倍晉漢之十惜無大農又之一  
版使扁舟落吾手中耳因記侯興建始未慨然有  
感于中故兼及之侯名子成先廣成用承直郎蔭  
當補官州牒已上吏曹矣而新令限至朝請大夫  
者乃係班廣成詣登聞鼓院自陳道陵從之預供  
奉者四百二十人仕至蠡州酒務使李侯所謂是  
以似之者歟年月日記

### 市隱齋記

吾友李生為予言予游長安舍于婁公所婁隱者  
也居長安市三十年矣家有小齋號曰市隱往來  
大夫士多為之賦詩渠欲得君作記君其以我故  
為之乎曰若知隱乎夫隱自閉之義也古之人隱  
于農于工于商于醫卜于屠釣至于博徒賣漿抱  
關吏酒家保無乎不在非特深山之中蓬蒿之下  
然後為隱前人所以有大小隱之辨者謂初機之  
士信道未篤不見可欲使心不亂故以山林為小  
隱能定能應不為物誘出處一致喧寂兩忘故以

朝市為大隱耳以予觀之小隱于山林則客或有  
之而在朝市者未必皆大隱也自山人索高價之  
後欺松桂而誘雲壑者多矣况朝市乎今夫乾沒  
氏之屬脅肩以入市疊足以登壘斷利鬻長距爭  
捷求售以與傭兒販夫血戰于犂刀之下懸羊頭  
賣狗脯盜跖行伯夷語曰我隱者也而可乎敢問  
婁之所以隱柰何曰鬻書以為食取足而已不害  
其為廉以詩酒遊諸公間取和而已不害其為高  
夫庶與高固古人所以隱也子何疑焉予曰予得  
之矣予為子記之雖然予於此猶有未滿焉者請  
以韓伯休之事終其說伯休賣藥都市藥不二價  
一女子買藥伯休執價不移女子怒曰子韓伯休  
邪何乃不二價乃嘆曰我本逃名乃今為兒女子  
所知棄藥徑去終身不返夫妻公固隱者也而自  
閉之義無乃與伯休異乎言身之文也身將隱焉  
用文之是求顯也奚以此為哉子意大夫士之變  
公者強為之名耳非公意也君歸試以吾言問之  
貞祐丙子十二月日河東元某記

### 惠遠廟新違外門記

晉溪神曰昭濟祠曰惠遠自宋以來云然然晉祠

本以祠唐侯乃今以昭濟主之名實之蒼文矣不  
必置論蓋魏齊而下晉陽有北門之重山川盤結  
士馬強盛天下名藩巨鎮無有出其右者此水去  
城纔跬步間耳山之麓出兩大泉噴薄湍駛流不  
數步遂可以載舟楫匪為巨陂派為通渠稻黍連  
蕩延袤百餘里望之令人渴馬有吳兒洲渚之想  
若濟源之清曠蘇門之古澗濟南之秀潤以知水  
者言之皆吾餘波之所及也太平興國初漢入於  
春析秋報惟神之為歸割牲醴酒日月不絕宮庭  
靖深丹碧紛耀遺臺老樹朱樓畫舫承平游覽之  
盛予兒時尚及見之廟舊有殿有別殿有廊廡有  
門貞祐之兵迄今三十年雖不盡廢而腐敗故暗  
極矣創罷之人迫於調度故未暇補葺父老過之  
有潏然出涕者南北路驛使寶城高候天輔憫外  
門之頽毀也力為新之起于辛丑之正月而成于  
其年之七月請予記之予謂昭濟廟之在吾晉有  
決不能廢者然其廢而興之則存乎人焉爾夫一  
門之役固不可謂之全功異時有以全功自任者  
安知其不自高侯發之是可紀也故樂為之書明

年五月吉日新興元某記

順天府營建記

清苑置于隋開皇末歷唐五代為鄭州屬縣宋境  
典遷接故改為保塞重兵所宿常倍高陽諸戍金  
朝既都燕陞縣為州州仍以保名縣則復清苑之  
號且置順天節度一軍太行諸山東走遼碣盤礴  
偃蹇挾大川以入于海而州居襟抱之下壁壘崇  
峻民物繁夥輦輳而南最為雄鎮貞祐初中夏受  
兵遂例有覆隍之變今萬戶張候德剛之起定興  
也初保西山之東流塌礪經畧苗公景功至永定  
軍節度使推元帥右都監及苗公為其副賈瑀所  
害侯慷慨憤發期必報瑀會麾下何伯祥獻苗公  
符節即推侯為長事聞興定戊寅五月以侯留守  
中都行元帥府事國兵由紫荆而下侯率所部陳  
于狼牙嶺馬跌為所執大帥以侯翫辭無所屈義  
而釋之且復舊職侯招降旁郡威信並著遂下權  
易安保諸州皆成滿城西山豪傑皆投印號為部  
曲兵勢大振滿城隘狹自不能容者歲丁亥乃移  
軍順天以遏信安行剽之黨時順天為冀城者十  
五年矣侯起堂使宅之故基將留居之隨為水軍



所焚炭曰盜所以來揣我無固志耳堂復成吾且不歸矣于是立前鋒左右中翼四營以安戰士置行幕荒穢中拔荆棘拾瓦礫力以營建為事適未寇北渡得大名毛君節正卿知其材幹強敏足任倚辦署為幕府計議官兼領衆役炭心計手授俱有成算正卿悅于見知勞不言倦底蘊既展百廢具興承平時州民以井泉鹹鹵不可飲食為病滿城之東有南北泉南曰雞距以形似言北曰一畝以輪廣言宋十八塘濼發源于此二泉合流由城外濤出為城水口侯願而嘆曰水限吾州跬步間耳奇貨可居乃棄之空廬無用之地吾能指使之則井泉有甘冽之變溝澮流惡又餘波之所及也乃度地之勢作為新渠鑿西城以入水水循市東行由古清苑費百舉武而此別為東流壘及東城又折而西双流交貫由北水門而出水之占城中者什之四淵綿舒徐青綠彌望為柳塘為西溪為南湖為北潭為雲錦夏秋之交荷芰如繡水禽容與飛鳴下上若與人共樂而不能去舟行其中投網可以得魚風雨鞍馬間令人渺焉有兵兒洲渚之想由是營備以甲乙次第之則為北衙為

南宅宅矣所居工材皆不資于官役夫則以南征生口為之至別第悉然為南樓因係塞故堞而為之位置高敞可以盡一州之勝西望卽山如見吳菽于沂水之上青壁千仞頽行而前肩駢指比歷歷可數濃淡覆露變態百出信為燕趙之奇觀也為驛舍為將佐諸第為經歷司為倉庫為芻蕘場為商稅務為祇供所為藥局為傳舍煖室為馬院市陌紆曲者侯所甚思必裁正之為坊十增於舊者七曰雜泉吳澤懋遷蹄厚脩理遷善由義富民歸義興文為橋十而起接者四面曰來青北曰浮空南曰薰風東曰分潮為水門二西曰通津北曰朝宗為樞樓四北曰拱極南曰蠡吾西曰常山東曰碣石為廟學一增葉堂廡三倍其初為佛宇十五曰插隱瀉福天寧興國志法洪濟報恩普濟大雲崇巖天王興福清安淨土末寧大悲閣一由插隱而下刷者四而十一復其舊規制宏麗初若不經毀者獨大悲出疾新意尤為殊勝金碧爛然高出生際唯燕中仁王佛壇成于國力可等而上之耳為道院十一曰神霄天慶清寧洞元玄武全真朝元玄真清為朝真得一創者九而復其舊者二

為神祠四曰三皇岱宗武安城隍為酒館二曰淳  
香金臺亭榭皆水中為樂棚二為園囿者四西曰  
種香北曰芳潤南曰雪香東曰壽春城內外為水  
磴者四水既出朝宗門又將引滄水為稻田于西  
南波乃合九龍之末流惠其咸漫而不能載舟也  
為之十里一起開以便往來每閘所在亦皆有灌  
溉之利焉城居既有定屬即聽民築屋四關以復州  
制迤而四郊周泊千里完保聚植桑棗樹藝之事  
人有定數歲有成課屬吏實任其責攬轡問塗駸  
駸乎齊魏之富矣庚戌秋七月予過順天左副元  
帥賈輔良佐授侯經度之事請記之于石曰始吾  
城無寸甃尺楹之舊而吾族決意立之民則新造  
而未集冠則斲潰而復合以戰以守日不暇給自  
常情度之不辜于道旁築舍之惑則必安于聚廬  
託庵之陋矣侯仁以繼絕義以立懦信以一異智  
以乘時技合力并故能事之穎脫如此夫立城市  
營居室前人良政見於經於史於歌詠於金石者  
多今屬筆於子其有意乎予因為言自予來河朔  
雅聞侯名人謂其文武志膽可為當代侯伯之冠  
起行陣間不十五年取萬戶侯金虎符如探囊中

物統城三十制詔以州為府別自為一道并控  
關陝汴洛淮泗之重將佐喬惟忠孝先而下賜金  
銀符者十數人光大震耀當世莫及夫佩金紫秉  
節歛書旂常著鐘鼎古人之所重奔馳角逐筋疲  
力涸有不敢望者侯則碩貯頓呻而得之况乎土  
木之計力有可成者豈不游刃恢恢有餘地哉古  
有之強可以作氣堅可以立志唯檢也故能舉大  
下之已廢唯堅也故能成天下之至難非侯何以  
當之是可書也已雖然端本者必以正其末謹始  
者必以善其後侯人豪也顧豈以城恒山地潯沈  
空大茂之林以為搃盡抱陽之石以為礎然後為  
快歟吾竊其必以行水之智移之于利物作室之  
志克之以立政寬庸調以資懇關薄征歛以業單  
貧黜功利以厚基本尊文儒以變風俗率輕典以  
致忠愛崇儉素以養後福蓋公清淨之化寇君愛  
利之實于是乎張本予雖老矣如獲見其成尚能  
為侯屢書之

邢州新石橋記

州北郭有三水焉其一滌水其一曰達活泉父老傳  
為佛圖澄卓錫而出達活不知何義非訛傳則武

鄉鄰人之遺語也其可曰野狐泉亦傳有妖狐穴于此潦水由枯港行並城二三里所稍折而東去為蔡水喪亂以來水散流得村墟往來取疾之道漬隄口而出突入北郭泥淖弥望冬且不涸二泉與港水舊由三橋而行中橋古石梁也淤墊既久無跡可尋數年以來常架木以過二泉規制儉狹隨作隨壞行者病涉久矣兩安撫張君耘夫劉君才卿思缺為經久計詢訪耆舊行視地畧久乃得之經度既定言于宣使宣使亦以為然乃命里人郭生立準計工鎮撫李質董其事分畫溝渠三水各有歸宿果得故石梁于埋沒之下砥石堅整與始構無異堤口既完潦水不得駢附南橋而行石梁引二泉分流東注合于柳公泉之右達路平直往來憧憧無褻裳濡足之患九役工四百有奇綿四旬而成擇可勞而勞因所利而利是可紀也嘗謂古人以慮始為難改作為重重以惡勞而好逸安早而習陋此天下之能事無所望于後世也歟且以二君之專言之有一國之政有一邑之政大綱小紀無非政也夏官之屬曰司險山林之阻則開鑿之川澤之阻則橋梁之僖公春新作南門傳

謂啓塞有時門戶道橋謂之啓城郭橋壑謂之塞開閉不可一日而闕特隨其壞而治之修飾南門非閉塞之急故以土功之制議之是則道橋之為政不亦甚重矣乎子路治蒲溝洫深治孔子以恭敬而信許之子產以所乘與濟人溱洧之上孟軻氏至以為惠而不知為政若二君者謂不知啓閉之急與不知為政可乎雖然此邦之無政有年矣禁民政也作新民亦政也禁民所以使之遷善而遠罪作新民所以使之移風而易俗賢王付畀者如此二君之奉承者亦如此猶之陋巷有敗屋焉得善居室者若之必將正方隅謹位置修治杞梓崇峻堂構以為子孫無窮之傳豈止補苴罅漏支柱斜傾而已乎僕知石梁之役特此邦百廢之一耳異時過高明之壤當舉酒落之二君勉哉

臨歸堂記

蕪城自唐季及逮為名都金朝貞元迄大安又以天下之力培植之風土為人氣所移物產豐潤與趙魏無異六飛既南禁餉隨廢比焦上之變其物華天寶所以濟宮掖之勝者固以散落于人間矣御苑之西有地焉深寂古澹有人外之趣稍增築之

則可以坐得西山之起伏幕府從事劉公子栽其西北隅為小圃引金溝之水渠而沼之竹樹菴楮行布棊列嘉花珍菓靈峯湖玉往往而在焉堂于其中名之曰臨錦癸卯八月公子觴于此堂坐客皆天下之選酒半公子請予為堂作記并志雅集予亦聞去秋堂之南來會并華駟人詞客多為作樂府歌詩以記其異名章雋語傳播海內夫營建之盛游觀之美以今日較之十倍于臨錦者抑多矣而臨錦獨以名天下何耶蓋劉公子出貴家春秋鼎盛志得意滿時輩莫敢與抗乃能折節下士敦布衣之好以相期于文字間境用人勝累不虛語河朔版蕩以來公宮戾第曲室便房止以貯管絃列姬侍深閉固拒敷外內不得通其不為風俗所移者纔一二見耳異時有嚮儒術通賓客置卿莊之驛按相如之簡以復承平故事者予知其自臨錦主人發之故樂為之書

馬戾孝思堂記

天地立人聖人立名教天大地大而孝亦大孔子作經師弟子之問答必以因心為言謂孝與生俱生則嬰兒慕社則五十慕五十而慕者則終終

身而慕不幸而至大故若萬懷愴蒙我所述始于翰育碩後卒至于昊天罔極吾知頃步而忘其親者直無父之人耳天山馬戾作孝思堂請予為記予以為孝子之念其親無乎不在君獨以名其堂者其必有說歟馬戾涕泗言曰吾先人恒州府君以習諸部譯語且通其字書仕為都省掾屬九使者聘報麗夏吾先人舉在行中忠信為實人所保任積十數年之久乃為朝廷所知自常調中特恩授關封纂職內城之役被命經度復以勞遷鳳翔路都總管判官平日教語諸子以為吾家始于狄道被俘則有全活之賜遼東占籍則有拊存之賜象胥之任益選有常又不次遷擢之主恩天大無從報稱唯有盡此身以答萬分耳精誠激烈有知白日造次顛沛無念不在果能以千載事自任持忠入地與古烈丈夫並游諸孤無所似肖其以孝思名所居者欲吾子孫不忘先人之故為無窮之傳耳子太息曰有是哉古人有言不孝則事君不忠莅官不敬朋友不信戰陣無勇是故為百行之本先恒州忠義奮發無媿千古贈典之追崇褒忠

之預享其必有以得之聞諸朝著舊人公之教子也豈以法其撫育孤甥也思以備今諸子布列府寺悉有事功之望其甥則材量宏博庶幾能成外家之宅相者蓋恒州純孝天至以父事君就諸子及其甥觀其身教之實既有成效矣諸孫雖不追事王父母其生長見聞寧不以忠臣孝子之門高自表見乎經有之孝子不匱永錫爾類登斯堂也雖在於塗之人聞恒州之風亦必有興起者又豈特馬氏孫息而已哉于是乎書年月日河東人元某記

### 致樂堂記

癸丑之夏余以事來故都進士新城王博甫溫陽張無咎謂余言武可賈仲德仲溫貪慕高誼久欲奉杖發致師賓之敬日者以守義輩為介吾子既惠顧之矣仲德故家世淳厚兄弟力供子職所以事其母者滄瀆脂膏醴乳菜無不給昏定晨省寒溫燥濕無不戒故賈氏以謹厚稱燕中比年以來仲溫者又能歲授一經孝經語孟以次卒業駸駸乎行己之學非但涉獵之而已事母既孝而事其父惟謹友愛弟者甚篤閨門雍睦中表以為法母

氏春秋高而神明未衰弄孫之外尚能眎諸婦補綴歲時顯壽言笑晏晏諸福備其方來而未艾也與之共學者因以致樂名其堂取養則致其樂者堂未有記幸吾子終教之余謝曰僕也衰謬願何以吾盛意雖然嘗聞之師致樂云者所以卜孝者之淺深俱其乍出乍入若存若亡使之時自省察焉耳蓋親之於其子子之於其親一體而分也遠相通也憂患相感也猶草之有實木之有根心也天地間大順至和之氣自然之理與生俱生于櫛櫛于膝下于成童至于終身而雖僻君四無人聲之鄉疾痛苦困必呼親而訴之不謂之根于心成於性而可乎故有深愛者斯有和氣氣和矣斯有愉色色愉矣斯有婉容恬恃之下託二天以為庇日為無聲之樂之所感發鼓舞動蕩喜不自任老萊子衣爛編之衣弄鳥雀于親側非矯飾也惟聖人有困心之教然亦不能教人以性之所無有者要必就其材而封殖之使有日新之功省祭之說其憂天下後世不既懇切至到矣乎余行天下四方惟燕折木之分風土完厚有唐三百年雅俗之舊而不為遼雷之所變遷是以敦龐耆艾之士眎他

郡國為尤多至於子弟秀民往往以橫經問道為事若之子者皆是也是家不階于儒素之業不漸于教育之化乃能自樹立如此所謂行有餘力則以學文者尚庶幾焉然則名堂之意殆俾爾無咎愛人以德而然耳故予樂為記之嗚呼昊天罔極父母之德也白駒過隙父母之年也人子之情曷維其已言不稱老禮別自尊之嫌我獨何害詩存終養之慕故牲牢不加于菽水三釜無羨乎萬鍾古人所以顧為兄之日長而惜報劉之日短也子曾子有言曰君子有三樂有天下不與存焉其一曰有親可事是則有親可事者何其幸歟樂哉斯堂吾於是乎有感五月望日河東人元棊記

李參軍交山亭記

由龍門而東其北為鞞鞞南為頽谷鞞鞞高在馬頽谷頽水在焉南北道合為告成告成維天地之中測景臺在焉又東為陽翟連延二百里間以空大箕大陘大熊大茂具茨在焉為山者九而崑高以峻極為嶽嶽有鎮有輔輔與鎮大率皆崑高絡脉之所分去也近代以陽翟為鈞之州治九山環列頽水中貫景氣清澄淑覽高曠豫州諸郡莫與為

此自昔号为東望唐人陳寬記頽亭所見以為雲烟草樹濃淡霽露望之使人意逸超超然如萬里之鶴唯此地可以當之市南之西有宅一區竹木瀟洒迥若臺外鎮人李參軍麟屈之築亭其中以攬九山之勝心之所存目之所見唯山之為歸故以交山名之庚戌之夏自汴梁來請記於予疑而問焉參軍者復於予曰麟故大家由王父以來以好事名鄉里家鎮之閑闌中而庭宇高敞如素封之族居有竹里有堂曰清闕恍若昔世杰張都漕仲淹李都司之純李治中彥明禮部開闕趙公翰墨致在一時名勝若公鄉達官每車騎過門吾先人必盛為具館之或荷留至旬浹管絃絲竹雜以蒸粿之職窮日竟夕而後已客亦愛主人之賢而不能去也貞祐初麟避兵南渡河僑寓此州樂其風土遂有終焉之志未幾州廢二十年之間雖城郭粗立材有殘民數百家而已麟老矣遭離喪亂轉徙半天下僅得復來時移物換資深華表之感其特用自慰者頽吾九山在耳古有之厥於動者趨靜困於智者歸仁夫仁與智固聖人示愚者以養福之域也吾九山之志一水一石皆崑閭閻物

顧揖所不暇稱瑜所不能盡愚獨以為岩岩青峙  
壁立千仞如端人神士朗出天外雲與霞蔚光彩  
溢目施文章雖公金玉淵海濔焉而無情默焉而  
意已傳又似夫水石澗欽隱几而坐忘者極古今取  
文豈復加於此媿珠玉在側無以稱副之耳麟無  
所以崇無可致賔客清闕之業掃地而盡惟人將  
拒我是俱其敢以三楨速矣王交賈譽自附于王  
丹朱穆劉孝標之後寥寥最足遠引高蹈以與麋  
鹿同群而游乎干笑之日有是哉予向所疑釋然  
矣子歸幸多問草堂之靈參軍固佳士而封彫丘  
方移文以謝逋客君乃與之進初不以欺松桂誘  
雲整而為嫌紫雲仙李能無失望乎何金衣招隱之  
書之來之暮也年月日記

遺山先生文集卷第三十三



遺山先生文集卷第三十四

記

王無競題名記

安陽王尚書無競天眷中以文章顧于具蔡諸公  
間九燕逸汴梁宮殿題榜如大安大慶應天承天  
之等皆其筆也典定中開閣趙公為禮部下蔡州  
取顏魯公逍遙樓額入京師于因問公無競大字  
何如道遙開閣言字有真行大小之不一人鮮能  
兼之無競他書未必便過前人至于再丈大字盤  
之筆勢如作小楷自當為古今第一殆天機所到  
非學能也乙巳秋予與梁辨疑李輔之武伯佐游  
崢山祠因得無競崢山神三字間之伯佐南申王  
氏國初以好客名河東朱少章姚仲純滕秀穎趙  
先道宇文叔通皆游其門叔通後歷臺閣高氏子  
姪名行中者不遠數千里走書幣求為其父齋叔  
晦叔墓碣銘殆無競以叔通故為書之耶不然遠  
鄙荒陬時無貴仕者何以致此哉自明昌已後縣  
多名進士如劉洗馬子安舉少尹仲容胥羊公和  
之張大與信之楊大叅叔玉王監使正之皆嘗于  
祠下何獨無一言及無競此書使州里知之為希



代之實存吾河東祠廟為第一手耶子恐多故之際神筆實墨有意外不測之變雖百悔不可及乃託好事者使刻之石以傳不朽八月十有一日新與元某題記

東平賈氏千秋錄後記

東平賈氏自真定三祖始見譜謀始祖曰鎮州都督法曹諒再世為大理少卿瑾次為司封員外郎贈尚書右丞初次為給事中史館修撰中書舍人歸累贈尚書令太師魯國公恭獲鹿西北三十里之牛山翰林學士陶穀碑銘在馬次為左正諫議大夫樞密直學士贈尚書左丞瑛即給事中之第五子也次為殿中丞贈工部侍郎汾汾之昆第六歲神童十六擢進士第然知政事致仕黃中次為太常少卿直昭文館知廣州昌齡弟魏國文元公判都省昌朝即工部汾之兄而著作即贈太師注之子也次為宣奉大夫知饒州蕃蕃即太常昌齡之第三子而朝散大夫常之兄也常行第四左丞益謙出以房次為光祿大夫知鄆州公直知饒州蕃之子范丞相希文之外孫致仕于鄆回而家焉次為知滄州君文大觀中武舉第一人策問選將以

仁智勇對其說累二千言次為顯謨閣直學士尚書戶部侍郎備節嘗著勸第姪脩進書與滄州君文皆鄆州公直之子也次為都水內監使者洵滄州之長子宋末奏補金朝初出官次為廢補贈明威將軍棟次為山東東路按察司知事昭明昌五年經義進士嘗古學尚友嚴子陵陶淵明白樂天邵堯夫號四友居士故詩有高風希四友古學守三玄之句即今東平河倉提領起之父也自法曹而下有言行文筆見于紀畧者魏國文元公戒子孫文二首仁宗朝議裁減浮費文元建言將相戚里之家多占六軍耗縣官衣糧而為私門奴隸在京不啻數十人浮費可減孰此為急朝議是之仁宗朝戚里之家兄弟補邊多不聽許仁宗以語文元文元對曰母后之家自昔固多蒙恩今陛下重惜爵賞不肯輕授非惟示天下以公抑亦保全外家之福也太平興國寺災文元以易春秋建戒曰言近誠屢災寺觀天意蓋有所在可勿繕治以稱陛下畏天威重民力之意上從之康定間劉平為元昊所得遣更告以降敵議收其族文元時為御史建言漢殺孝陵母妻陵不能歸而漢有後悔真宗



撫王繼忠家而其後竟賴其力事固未可知今收其族恐貽後日之悔上從其言而止慶曆四年元昊歸石元孫議賜死元言自古將帥被執而歸多賞其死上從之都水君知邠州州新去湯大殺僇之餘盡為俘虜故州有戶普而無籍民君建白都統府頒出金帛贖生口由臧獲而良者凡七百三十餘人州有籍民始于興皇統中改陝西轉運使適歲饑民無所於糴君拜章乞賑貸未報而民益急君輒開倉採餼者坐專擅奪四官降刺石州既而改內監督燕都十三門之役郡衆聚居病疫所起君出已俸市醫藥有物故者又為買棺以葬之某不敏常被首檄登左丞公之門公嘗由諫議大夫出刺寧化不半歲政成州人為立生祠祠喪亂後故在也大安初知河中有旨宣諭河東南比百姓艱食而絳解尤甚朕以卿朝廷舊臣夙著德望可兼南北路安撫勾當仍以便宜許之公至鎮移化州餘粟以活飢民汾晉受兵游騎已及晉安公命老幼婦女棄城悉兵東下鉦鼓之聲聞數十里游騎為之宵遁晉安獻牛酒犒師而還官吏請曰吾州兵力單寡自揀不暇公乃往援晉安設

吾州有警何以備之公笑曰君未之思耳吾揀晉安所以守河中正大初公致政聞君薨下哀宗即位史官乞曰宣宗實錄遂及衛紹王初虎賊弒逆乃立宣宗宣宗之人至衛謂王失道天命絕之虎實無罪且于主上有推戴之功獨張左相信庸言虎賊大逆不道當用宋文帝誅傅亮謝晦故事章奏不報爾後舉朝以大安崇慶為諱及是朝議謂公大安中叅知政事宜知衛王事乃違編修官一人就訪之公知其旨謂某言我聞海陵被弒大定三十年禁近能暴海陵警惡者得美仕史臣曰誣其淫毒驚狼遺笑無窮自今觀之百可一信耶衛王勤儉重惜名器較其行事中材不能及者多矣吾知此而已設欲飾吾言以實其罪吾亦何惜餘年朝論佛之某初及公門三往而後見及見頓賜顏色問及時事輒一二言之若有當于公之心者公移坐枕之以至接膝留連二十許日某獻詩云黃閣歸來履馬輕天將五福昇康寧四朝人物推耆舊萬古清風在典刑鄭圃亦能知有道漢庭久歎訪遺經帝城百里瞻依近長傍張商候極星公答云見說才名自妙年多慙政府舊妨賢物華天

實無今古風閣薦蓋孰後先鄭圃道尊何敢望漢  
 廷書在子當傳莫言老眼昏花滿及見風鵬上九  
 天公又教諸子賢御臺掾翔御閣門九某京師用  
 物月為供給之其曲相獎借如此某北渡後獲從  
 公從孫河倉提領起游起字顯之少日為名進士  
 資稟信厚生長見聞藹然有名門之舊仕東平行  
 臺歷平陰簿提領堂邑歲課提點河倉惠養疲民  
 歎謹載路某嘗以三口號紀之云今年堂邑有清官  
 三尺兒童也喜歡縣帖追來不驚擾了絲納去得  
 餘殘休言清慎少人知三十年來更教誰今代取  
 魚須密網東州新有放生池三歲終更舊有期吏  
 民安習枉迂移平陰奪得來堂邑却是行臺未盡  
 知壬子冬十月自真定來東原顯之以此本見示  
 且徵後記某以賈宗名德相望奕葉公輔宋以來  
 文士極口稱道如蔡內翰君謨王臨川學易劉先  
 生之哀挽屏山李君之純故人外傳過賈侯故居  
 及上賈明府求易說等二詩具在尚何待不腆之  
 文雖然某以晚進小生辱大賢特達之遇且於顯  
 之有過家之舊使公家名德懿範不白于後世繁  
 之門生故吏之義不亦甚關乎謹述家傳所未載

者三教條如右冬至日河東人元某飲社書

校笠澤齋書後記

右藪書予家舊有二本一本是唐人竹紙者覆寫  
 元光間應解科特買於相國寺販肆中宋人曾校  
 定塗抹稠疊殆不可讀以本得于閭內翰子秀家  
 此唐本有春寒賦拾遺詩天隨子傳而無顏荊後  
 引其間脫遺有至數十字者二本相訂正了為完  
 書向在內鄉信之仲經嘗紉予合二本為一因循  
 至今蓋八年而後卒業然所費日力總一旦暮耳  
 嗚呼學之不自力如此哉惜一日之功為積年之  
 負不獨此一事也此學之所以不至歟按龜蒙詩  
 文如藪書典松陵集子俱曾熟讀龜蒙高士也學  
 既博瞻而才亦峻潔故其成就卓然為一家然識  
 者尚恨其多憤激之辭而少敦厚之義若自憐賦  
 江湖散人歌之類不可一二數標置太高分別太  
 甚鏗刺太苦譏罵太過唯其無所遇合至窮悴無  
 聊賴以死故鬱鬱之氣不能自掩推是道也使之  
 有君有民有政有位不面折庭中理輪叩馬則奮  
 辭抵几以柱後惠文從事矣何中和之治之望哉  
 宋儒為唐人工于文章而昧于聞道其大較然非

獨一龜蒙也至其自述云少攻歌詩欲與造物者  
爭柄遇事輒變化不一其體裁始則陵際波濤穿  
穴險固四鎖怪異破碎陣敵卒之造平淡而後已  
者信亦無媿云甲午四月二十有一日書于聊城  
寓居之西牕

畫記二

朱繇三官

天官冠服具大人相神恩淵默憑几而坐二天女  
侍双鳳扶輦輦有輪月輪在上獨畫桂樹而已左  
右官抱文書而立武衛負劍夾侍貌比從官有威  
武之狀二天女持杖侍双鳳之前

地官王者服頽而威重乘白馬隊仗在山林間大  
怪樹之下兩力士捉馬銜施絳繖兩團扇障之扇  
前一衛士輕行一皂衣使者前導右一武士執鉞  
左一功曹挾書從官騎虎從後一介胄跨弓刀一  
功曹抱案牘拱揖於重崖之下一鬼卒橫刀而拜  
三人皆不見其面獨鬼卒肘間露一目耳一樹魅  
赤躄倒拔一樹根見而未出也

水官亦王者服面目嚴毅須髯長磔又非地官之  
比葉班龍在海濤雲氣中一力士以鉄繩挽龍怒

目迴視如捉一馬然龍不能神矣一女童前導一  
使者恭揖白事鬼卒彈惡珠甚肉袒髮上指颺大  
錦旗洵一力士負劍者掖龍而行一掾史挾簿書  
騎犀牛從水府大門出一力士於大樹下吊面現  
水官不見其額珊瑚大珠浮行水面旋轉如活犀  
牛角出水府雲氣隨之真天下之絕藝也

張萱四景宮女

一轉角亭楠欄楹檻渥丹為飾綠琉璃埽為地女學  
士三皆素錦帕首南向者綠衣紅裳隱几而坐一  
手柱頰凝然有所思其一東坐素衣紅裳按筆作  
字面坐者紅衣素裳袖手凭几昂面諸想如作文  
而未就者亭後來禽盛開一內人不果頭倚欄叩  
看几棠者皆有双帶下垂戲典棠等但色別於棠  
耳亭左湖石右木芍藥一素衣紅裳人剪花一人  
捧盃承之一人得花綬吹回首按錦帕袖之髻髮  
之後此下一人錦帕首淡黃錦衣紅裙袖手而坐  
並坐者吹笙左二人彈箏合曲右一人黃帽如重  
戴而無灑水不知何物背面吹笙乃知錦帕有二  
帶繫之髻髮之後一小鬟前立按拍一女童舞一  
七八歲白錦衣女戲指於舞童之後吹笙者紅衣

素裳箏色笛色板色素衣紅裙已上為一幅

一湖石芭蕉竹樹紫薇花繁盛花下二女憑欄仰

看團花藍紗映生衣紅縵為裙並立者白花籠紅

縵中單三人環水盤坐一紅木者顧憑檻看花者

二白木相對女侍二一挈秘壺一捧茗器四人臨

池觀笑渠鷄鷓一坐砌上一女童欲掬水弄操便

面者十一人便面皆以青綠為之琵琶一笙一簫

笛三板一聚之按上二藤杌在旁為一幅

一大桐樹下有井井有銀衣樹下落葉四五一內

人冠髻着淡黃半臂金紅木青花綾裙坐方林林

加褥而無裙一擣練杵倚林下一女使植杵立林

前二女使對立擣練練有花今之文綾也畫譜謂

萱取金并梧桐秋葉黃之句為圖名長門怨者殆

謂此耶芭蕉葉微變不為無意樹下一內人花錦

冠綠背搭紅縵為裙坐方林繒平錦滿箱一女使

展紅縵托量之此下秋芙蓉滿聚湖石旁一女童

持扇熾炭恰熨帛之用二內人坐大方林一戴花

冠正而九分紅縵窄木蓋半臂挑花裙雙紅帶下  
垂尤顯然一膝跋床角以就縫衣之便一挑花錦  
窄衣綠繡檐栽綉段二女使擣素綺女使及一內

人平髮之一女童白錦衣低首熨帛之下以為戲

中二人雙綾帶胸腹間繫之亦有不與裙齊者此

上為一幅

一大堂界畫細整春殿擗惡與今時特異積雪盈

瓦溝山茶威開高出簷際堂錦亦渥丹而楹桶間

有青綠錯雜之堂下湖石一樹立湖石旁其枝柯

蓋紫葳也堂上垂簾二內人坐中楹花帽幕首衣

袖寬博鈎簾而坐如有所待然女使五人二在簾

楹間一抱孩子孩子花帽綠錦衣女使抱之蹇蹇

入堂中真態宛然二捧湯液器一導四內人外階

衣著青紅各異三人所戴如今人壺笠而有瑤瑁

班不知何物為之一內人擁花帽與前所畫同一

女使從後砌下池水凍結枯蒲匝其中凍鴨並卧

有意外荒寒之趣已上為一幅人物每幅十四共

濟南行記

予兒時從先隴城府君官掖縣嘗過濟南然但能

憶其大城府而已長大來聞人談此州風物之美

遊觀之富每以不得一遊為恨歲乙未秋七月予

來河朔者三年矣始以故人李君輔之之故而得

一至焉回次第二十日間所遊歷為行記一篇傳  
之好事者初至齊河約杜仲梁俱東並道諸山南  
與太山接是日以陰晦不克見至濟南輔之與同  
官權國器置酒應下亭故基此亭在府宅之後自  
周齊以來有之旁近有亭曰環波鵲山北渚嵐漪  
水香水西凝波狎鷗臺異橋同曰百花芙蓉堂曰  
靜化軒曰名士水西亭之下湖曰大明其源出於  
奔泉其大占城府三之一秋荷方盛紅綠如繡令  
人凜然有吳兒州渚之想大槩承平時濟南樓觀  
天下莫與為比喪亂二十年惟有荆棘瓦礫而已  
正如南都隆德故宮頽圯百年澗谿草樹有荒寒  
古澹之趣雖高臺盡棟無復其舊而天巧具在不  
待外飾而後奇也凡北渚亭所見西北孤峯五曰  
匡山齊河路出其下世傳李白嘗讀書於此曰粟  
山曰藥山以陽起石得名曰鵲山山之民有云每歲  
七八月烏鵲群集其上亦有一山皆曰鵲時此山  
之所以得名歟曰華不注太白詩云昔歲游歷下  
登華不注峯茲山何峻秀青翠如芙蓉此真華峰  
馮照詩也大明湖由北水門出與濟水合瀰漫無  
際遙望此山如在水中蓋歷下城絕勝處也華峰

之東有卧牛山正東百五十里鄒平之南有長白  
山范文正公學舍在焉故又謂之齋堂嶺東十里  
有南北兩妙山兩山之間有閔子騫墓西南大佛  
頭嶺下有寺千佛山之西有函山長二十里所山  
有九十峇太山之北麓也太山去城百里而近特  
為函山所碍天晴登北渚則隱隱見之歷山去城  
四五里許山有碑云其山脩廣出材不匱今但兀  
然一丘耳西南少斷有蠟山由南山而東則連亘  
十里與海山通矣瀑泉在城之西南泉濺水源  
也山水匯於渴馬崖湫而不流近城出而為此泉  
好事者曾以穀糠驗之信然性時漫流絕沒脛故  
泉上湧高三尺許令漫流為草木所壅深及尋丈  
故泉出水面纔二三寸而已近世有太守改泉名  
榼泉又立榼泉坊取詩義而言然土人呼瀑泉如  
故瀑流字又作鈞突曾南豐云然金線泉有紋若  
金線夷猶池面泉今為靈泉庵道士高生妙琴事  
人目為琴高留子宿者再進士解飛卿好賢樂善  
款曲周密從子游者凡十許日說少日曾見所謂  
金線者尚書安文國寶亦云以竹竿約水使不流  
尚或見之于興解裴回泉上者三四日然竟不見

也杜康泉今湮沒土人能技其屨泉在舜祠西廡  
下云杜康曾以此泉釀酒有取江中冷水與之較  
者中今每升重二十四銖此泉減中冷一銖以之  
淪茗不減陸羽所第諸水云舜井二有歐公詩大  
字石刻井露圍紀歷下泉云夫濟遠矣初出河東  
王屋曰沆水注秦澤潛行地中復出共山始曰濟  
故禹書曰道沉水東之逾温逾墳城入於河蓋於  
滎淤於曹濮之間乃出于陶丘此會於汶過歷下  
灤水之北遂東沉且濟之為瀆與江淮河等大而  
均尊獨濟水所行道障於太行限於太河終能獨  
達於海不然則無以謂之瀆矣江淮河行地上水  
性之常者也濟或淤於地中水性之變者也于愛  
其論水之變與常有當於予心者故并錄之珍珠  
泉今為張舍人園亭二十年前吾希顏兄嘗有詩  
至泉上則知詩為工矣凡濟南名泉七十有二爆  
沉為上金線次之珍珠又次之若玉環金虎黑虎  
柳絮皇華無憂洗鉢及水晶筆非不佳然亦不能  
與三泉侔矣此將至爆沉者六七宿靈泉庵者三  
汎大明湖者再遂東入水柵柵之水名縵江發源  
長白山下周圍三四十里府參佐張子鈞張飛卿

觴子縵江亭漾舟荷花中十餘里樂府皆京國之  
舊劇談豪飲抵暮乃罷留五日而還道出王舍人  
莊道旁一石刻云隋開皇丙午十二月鈔珎墓誌  
珎巴郡武昌人學通三家優游田里以壽卒誌文  
鄙陋字以巴為己蓋周隋以來俗書傳習之弊其  
云堊岫山之西者知西南小丘為岫山也以歲計  
之隋開皇六年丙午至今甲午碑石出壙中蓋十  
周天餘一大衍數也道南有仁宗時侍從龍圖張  
待即按讀書堂讀書堂三字東坡所書并范純粹  
律詩俱有石刻按字叔文自題仕宦之後每以王  
事至某家則必會鄉鄰甥姪盡醉極歡而罷各以  
歲月為識叔文有文譽仕亦達然以榮利之故終  
身至其家三而已名宦之役人如此可為一嘆也  
至濟南又留二日汎大明待杜予不至明日行齊  
河道中小雨後太山峯巖歷歷可數兩旁小山間  
見層出雲烟出沒顧揖不暇恨無佳句為摹寫之  
耳前後所得詩凡十五首并諸公唱酬附於左

東游畧記

丙申三月二十有一日冠氏趙侯將會行臺公于  
泰安侯以予宿尚遊觀拉之偕行凡三十日往復

千里而在畫馬者八日故所歷不能從容然亦愈於未嘗至焉者曰畧記之以備遺忘郭巨廟在長清西南四十里所路傍小山之上齊武平中齊州胡僕射所造石室在馬所刻人物舟車馬象三壁皆湍衣冠之制絕與今世不同有如沈存中所記幙頭但不展脚耳西壁外胡僕射刻頌規制如磨崖狀字作隸書文齊梁躡而不苦佳後題云居士慧朗侍從至朗能草隸書世謂朗公書者是也予意此頌必朗公所書故題字云然又有開元二十一年題字并長清尉李阜祭文隔馬祠在長清馬山之南距縣八十九里所大觀三年東平陳彥元廟記云盧城圯澗中得唐中和二年義昌軍節度押衙國子祭酒兼御史大夫李公瞻作廟縣中時石刻載齊師為晉所敗殺馬隘道晉師不得過謂以是得名字當為格而今為隔馬疑與左氏不合又謂里俗相傳景德中契丹寇兗鄆山之神陰障戎馬使不得南以是得名以予觀之古今祠廟不能考其所從來而妄為立名號者多矣殺馬隘道神何預焉而祠之至於陰障戎馬則又齊東野人語也記又云知縣事晁端肅禱雨而應將以封爵請

於朝今勝云豐施疾廟者豈端肅遂得所請耶靈岩寺亦長清東南百里所寺旁近有山曰鷄鳴曰明孔寺後有方山泉曰雙鶴曰錫杖寺先有宋日御書今亡矣絕景亭在方山之下絕類嵩山法王党承旨世傑寺記云寺本希有如來出世道場後魏正光初梵僧法定撥土立之定之來青蛇毒煎双虎負經景德中賜今名子按大觀中石橋記云寺是正光初重建然則党承旨亦未嘗備考耶承縣香山寺記說寺初建時一胡僧自西域來云此地山川甚似彼方香山今人遂謂梁縣香山真是大悲化現之所予意前所云希有道場者豈亦此類者抑党有所據而言也寺壁石刻甚多有張按叔文蘇轍子由吳拭頌道詩餘人不能悉記太山舊說高四十三里今云四十五里又有言二十五里者出州北門經水簾馬棚迴馬嶺御帳護駕泉而上遂登天門岳頂四峰曰秦觀曰觀越觀周觀秦觀有封禪壇壇之下有秦李斯唐朱唐崖太史公謂太山鷄一鳴日出三丈而子登日觀平明見日出疑是太史公奪辭問之州人云嘗有抱鷄宿山上者鷄鳴而日始出蓋岱宗高出天半昏曉與平地

異故山上平明而四十里之下絕殊麥間耳此語似亦有理故錄之岳祠在城中大定十九年被焚二十一年新廟成又三十年毀於貞祐之兵今惟客省及誠享殿在耳此殿是財御香及御署祝版之所城四周有岱岳青帝乾元升元四觀青帝觀有唐大中歲金龍石刻大聖祖無上大道金闕玄元天皇大帝之號見於此岱岳觀有漢栢柯葉甚茂東有崑崙亭山水自溪澗而下就兩崖為壁如香山石樓上以亭壁之北望天門屹然如立屏而濁泥出几席之下真太山絕勝處也州門南道左有宋封祀壇合祀五方帝及九宮貴人壇壇南有碑碑陰載獻官姓名駙馬都尉二人攝司徒司空克黑帝青帝赦官九宮貴神合祀官右諫議大夫种放其餘知名如魏庠輩又三四人近城有真宗御製御書并篆登太山謝天書述二聖功德銘碑石堅整若三山幘風然道右有宋封禪朝觀壇壇亦有頌壇西南四五里所有蒿里山山坡陀地中如大冢墓石壇在其上宋禪社首碑在山下祠中宋以大中祥符元年十月二十七日封太山碑刻皆王欽若陳充叟錢惟演楊億譔述然字畫多剥落

不能究讀矣太山上書院元是周朴所居宋太山孫先生明復居之州學有魯兩先生祠堂先承旨作記兩先生者明復與徂徠先生石守道也龍泉寺在平陰東南四十里齊天統中建下寺有石刻劉豫阜昌三年皇子皇弟符政甲乙院亦有碑又阜昌中題名最多佛像古雅皆數百年物上方大佛與龍泉觀音非晚唐人不能造也此行游太山者丑日靈岩龍泉皆一宿而去得詩几十首云

兩山行記

甲辰夏五月八日子以事當至嶧縣初約定襄李之和借往適蕃府從事宣德劉忠之平陽李幹臣暹軍官山過吾州遂與同行是日行八十里野宿天涯山前明旦入縣劉李別去予獨游神清觀舊闕行臺負外廣率王純甫弃官學道築環堵而居甚欽見之乃爲其徒潞人和志冲道姓名純甫問予來欣然出迎予謂先生方晏坐不肖之來將無幼靜業乎曰習靜固道人事然亦有不應靜時因相與大笑已而之和至同郡莊煉師通玄時住此縣之天慶觀携酒見過乃聚話於西齋純甫先隱前高子問前高景趣比鴈門鳳凰山爲何如純甫



言前高去岷五十里而近君能一游到則當自知  
之子竊自念言先東岩君生平愛鳳山然危不一  
到故詩有鳳凰聞說似天壇北去南來馬上看想  
得松聲滿巖谷秋風無際海波寒之句予二十許  
時自燕都試乃與客登南樓亡友蘇莘老闍德潤  
張九成王仲容輩說山中道人所居有松風軒層  
簷高棟半出空際長松滿澗谷如雲幢烟蓋植立  
闌插之下山空夜竄石上聞墜露聲使人耿耿不  
寐曩時聞岷固嘗以不一游為恨矣北渡又十年  
每過鴈門壽寧武尊師子和圓果處上人鍾秀李  
文必以此山為言是則夙志為不可負而前高之  
游當次第及之也即日與純甫之和並山而東出  
鴈門之南夜宿王仲章道正瑞雲菴菴在鳳山之  
麓山中來儀觀仲章主之道士孫守真年八十童  
髻入道其家為此觀黃冠者至湊十五世矣亂後  
無圖志可考山之故事多從此翁得之十一日仲  
章步送入山由真人谷行夾道雜花盛開水聲激  
激自澗壑而下且行且止不知登頓之為勞也半  
山一峯為釣魚臺其上為十八盤為青龍嶺為風  
門由風門而下繞佩劍峰之右為來儀觀觀在山

腹峯迴路轉臺殿突起雲林悄然別有天地信靈  
境之絕異也觀有天寶四載石記是道學士董思  
珙所造思珙殆學究之粗能秉筆者耳文節而義  
隱讀之或不能句故雖鄉人少有知來儀之始末  
者予為之反復數過始見崖畧蓋後魏太武嘗都  
於此師事冠謙之授秘籙自崧高迎謙之來居此  
山時有鳳凰見太武為立觀且以鳳凰名之觀歷  
周隋至唐而廢真人谷本以謙之為言而訛為箕兒  
鳳游池以鳳凰來游為言亦轉而為伏牛開元初北  
岳先生諫議胡山隱案圖誌求故實嘗為辨之天  
寶元載敕天下玄元廟有頽毀者在所長官量事  
伯建又古今得道昇仙之地代遠跡存者皆度加  
禮熙此山應馬北京居士高談幽辟穀練師高敬  
臣乃共補葺之碑文刻云天寶五載改鳳風山為  
嘉瑞山八載置天長觀蓋唐以玄元為祖天長者  
以徠林而言之也觀度道士七人高悟真董象玄  
馮通玄朱自然孫冷然餘二人石闕供養童子尉  
遲如玉朱自然姓字下別刻云自然以天寶十三  
年七月十五日昇天其日未時至京陳謝唐天子  
天子異焉敕中使覆勘如玉以後十日亦上上昇

孫守真言朱仙翁上昇事觀曾有教書碑唐以後  
 苻經表亂焚毀畧盡獨董記僅存耳來儀觀額政  
 和七年九月兵馬鈐轄知代州王機建權發遣河  
 東沿邊按撫司公事王誨書觀之東有養虎峰飲  
 虎及五斗二泉南有天柱峯峯之南有神山與五  
 臺境接西南有玉紫峯西北有煉丹峯洗藥池次  
 有玉女峰峰南有會仙峯傍有五蓮樹北有王母  
 池佩劍峯有白虎池谷中有水簾朱砂白雲三洞  
 青龍巖旁有桃花洞觀北山西洗蓮池變典  
 又名青龍池門之下有鳳游池中殿曰太霄太霄  
 前石壇上有大松名昇仙樹門右有松高與壇樹  
 等名望仙佩劍之下有燒藥爐疊石故在白虎池  
 之下有鳳栖樹立石為識凡洗蓮望仙昇仙藥竈  
 悉來自然遺跡也自餘著洪煉丹爐孫真人養虎  
 峰四子峰有莊列允倉文子祠土人便謂向上諸  
 人皆嘗隱於此殆齊東語也予恐識者或并其可  
 信者而疑之故不錄守真又言神仙劉海蟾以天  
 聖九年游歷名山所至並有留跡代州壽寧古詩  
 十韻去醉走白駒來倒提銅尾秉引箇碧眼奴擔  
 着獨壺癯自言秦世事家住著洪井不讀黃庭經

豈燒龍虎鼎獨立都市中不受俗人請欲搏靈  
 巖琴去上芙蓉頂吳牛買十角溪田耕半頃種秫  
 釀白醪便是仙家景醉臥古松陰閑立白雲巖要  
 去即便去直入秋霞影仍自駕真其秀操襟書龜  
 鶴齊壽四字題云廣宇開民劇操書此詩宋白皞  
 子西曾次韻于西於詩號為專門極力追之曾不  
 能彷彿仙材九筆固自不同世俗所傳劉翁入道  
 詩所謂予因太歲生燕地十六早登科甲第者吾  
 知翁碧眼奴亦當羞道之矣今全真家推翁為祖  
 翁之姓名鄉里且不能知况其道乎是又可為一  
 嘆也來儀亦自駕真飛白清安福壽四字所畫五  
 星惟土宿獨存已上皆在太霄殿外壁土宿閉目  
 倚一幡坐下一半四字清安在東福壽在西說者  
 以為心清而安則福壽從之翁此書不為無意也  
 駕真在西南一幅巾黃衣右肩批酒瓢左肩投布  
 囊破屐梳補之氣韻古瞻望之知為有道者年歲  
 既久將就湮滅惜無名手為臨摹之耳守真住山  
 五十年不省有為猛獸毒螫所傷害者山中靈異  
 甚多佩劍峰劍聲靜然陰晦中特有光怪照山谷  
 皆明靜夜或聞音樂雜作琴筑等皆歷歷可辨仙

犬時吠今年上元村落來燒燈者及聞之之和持  
狂練師所餉酒來約月中飲之是晚雷雨大作遂  
不果山氣蒸鬱可喜可愕雨從林際來謾護有聲  
雲烟草樹濃澆覆露不兩時頃而極陰晴晦明之  
變夜象半星月清潤中庭散步森然魄動惜清景  
之不可久留也之和賦詩予亦漫作樂府一首欲  
為純甫醉後歌之明日期城中諸公不至留題殿  
壁而去下山宿孫張道院又明日為前高之游

毛氏宗支石記

毛氏上世出于汝州遷耀州之三原三原迄今有  
毛氏村其後又遷徐州房從中有留之大名者今  
大名機察房是已本房既來彭城遂為彭城人祖  
諱珙自宋日雄于財有十萬毛氏之號生一子諱  
允金朝初允以戶計推擇為吏一郡以吏能稱之  
生子曰矩曰矰矩字仲方承安元年由州掾屬保  
隨朝吏員試秋場中甲首二年補吏部覃科令史  
轉貼黃科房長太和二年考滿授忠勇校尉博州  
防禦判官四年改求豐庫使六年轉遼陽縣丞吏  
民畏愛有廉能之譽大安二年用宰相薦特授桓  
州軍事判官三年北兵攻桓州刺史以力不支議

降公不從城陷自縊于軍資庫壽五十八崇慶元  
年以殒身王事贈宣武將軍同知桓州軍州事詔  
敕有篤堅忠節之語先娶靳氏生子一人曰端卿  
女一人嫁閔中夔君玉名宦甚顯再娶鄭氏同歿  
于桓州矰不仕生二子曰傑曰翼兵亂不知所終  
端卿字飛卿少日有志節宣武欲蔭以官不就去  
學進士自父祖以廉介自持家甚貧年二十餘負  
書來濟南從名士劉蟠于章丘備歷艱苦蟠知其  
有成傾意教之初試東平中經義解魁再試益都  
第五遂登泰和三年進士第調崞縣簿摧折豪右  
姦民歛手官委排比戶計貧富適當甚有遺愛貞  
祐三年入為尚書省令史雒陽多流亡當官者不善  
撫治君以風力選注河南府錄事判官果以政跡  
聞召為戶部勾當官復用薦書授同提舉南京路  
摧貨兼戶部員外郎馳驛襄葉值監察御史以私忿  
被誣時宣宗用法急凡臺察被推例皆誣伏下降  
外路七品借鄭州司候再調孟津縣丞竟以冤憤  
感疾終于官下壽六十官至少中大夫娶同郡秦  
氏生一子曰思通再娶遼陽高氏西京路轉運使  
曼卿之女生女三人思通以蔭再仕酒官娶孟氏

主二子一女曰從曰復女尚幼維毛氏祖考積累  
如此躬不受社稷當有與者子孫其未念之

尚藥吳辨夫壽家記

丁祀秋七月于將西歸尚藥吳辨夫有請曰思問  
不佞侍先生湯液有年矣日者不自揆度輒預作  
冢墓以寄終焉之志而州里不經見頗有言敢質  
之先生以祛二三之感余謂辨夫言古有之裸葬  
何必惡人當解其表死之際非我敢知亦自  
毋庸知試以常理為之說夫形器之域古今同盡至  
于太上立德其次立功其次立言三者於人道為  
極致無以加矣然亦有能出形器之外壯而不老  
老而不死者乎生死之在人萬世更相送猶夜之  
必且寒之必暑雖甚愚無知亦知其必至世乃有  
烹金煉石合駐景之劑銜刀被髮為厭勝之術  
嫖殘喘恍倖萬一甚者至聞凶禍滅亡之語必向  
之而唾可不大哀耶唐高士司空未聖自作冢棺  
時或引客坐壙中飲酒賦詩裴回終日客或難之  
長聖笑曰君何不廣死生一致吾寧暫將此中裁此  
語載之史冊作範來商其視漢魯相孔耽之神祠  
趙岐之墓石晉陶微士之自祭唐王無功杜牧之

之墓銘宋米元章坐棺木黃堂上表聖之言尤為  
殷重吾意于顯業方伎頗值喪亂閱世變也熟超  
然遠覽聞與古今悠悠者何足恤哉辨夫再拜曰  
願終教之乃為作壽家記吳氏世為東平人祖璋  
字文寶金朝初用良家子推擇為吏仕為郡功曹  
以廉平見稱考子昭字進林讀書知義理資稟靜  
默容服脩潔間里或旬月不見其面與光承旨世  
傑同研席試本道常取解魁今賈文顯之及見之  
道其性行如此辨夫童壯失怙恃年十七尚醫王  
繼先以子妻之憫其憊獨并小弱篤思義養于家  
而教之貞祐初南渡河以婦翁醫術精博之故被  
令旨充侍藥局藥童東宮即大位用隨龍恩澤  
掌藥太醫院尋被旨充宣木右醫正局掌藥累官  
懷遠大將軍沐梁下北歸復以婦翁舊業行總府  
署醫工都管勾婦翁無子年八十以壽終辨夫篤  
于外翼之報喪祭推紀皆無悔焉中年後欲置家  
事不問乃為其弟姪殖產罕兒女婚 娶最後營  
此家以某年月成而余以某年月日記辨夫時年  
六十八云

樊侯壽家記

知那定襄侯天勝以武公積官服民政者垂二  
十年思所以昭積厚於祖考修寵榮於鄉國今年  
冬十月修治先塋列松檟樹碑表以吉日壬辰合祭  
三世牲幣來助者傾動州里諸侯之禮備而孝子  
之情盡且欲作壽冢以為他日寧神之地謀於莖  
家師鄉之父兄皆以為往在丙戌之春吾侯方從征  
淮海常山軍取太原及吾州行省大帥怒其二三  
聚境中之民而守之將盡戮而後已吾侯奉郡王  
命至自益都以吾民被脅之故不當妄有屠滅者  
懇於帥辭旨哀切有足感動且自與山軍聞轉戰  
逐比不旬日而東山平帥知侯之忠即日并所守  
者縱遣之又三年常山復取平定孟五葦阜平軍  
東山先鋒大帥已廢州民三十餘聚落且命侯入  
滹沱原侯設方畧聞山軍擄其巢穴殺獲甚衆主  
帥知侯無它則引兵去州之民再被更生之賜皆從  
吾侯得之侯之福祿如川之方增何遽以身後為  
計乎又謀於州之士僕僭為侯言生而養死而莖  
中國之大政而聖人之中道自佛老家之說勝詭  
者遂以形骸為外物天地為棺槨日月為含襪甚  
者至有狐狸亦可螻蟻亦可之說雖舛鉅後隨以

曠達自名者猶見笑於大方之家雖然彼自有方  
內外之辨矣吾處方之內聖人之中道舍而不由  
尚何從乎漢以來太宗措走霸陵道武帝治茂陵  
五十年至尊且不以陵寢為諱况其下者乎漢相  
孔耽高士趙岐吳人范曄皆作壽冢唐司空表聖  
預作冢墓圖先賢其中時往醉飲人有難之者表  
聖曰吾寧暫游以中耶米元章知淮陽自剋死期  
作棺櫬置黃堂上飲食坐卧對之彼皆名世大賢  
顧豈為驚世詭俗之行以取崖異耶吾侯雖未之  
學而識趣自遠悟代謝之必至要歸藏之有所終  
焉之志有不期合而合者雖不謀於人可也侯喜  
而飲子酒再拜謝曰有是哉請刻予之文於石以  
曉來者於是乎書

遺山先生文集卷第三十四

遺山先生文集卷第三十五

記

威德院功德記

并州唐以來圖經所載佛塔廟廢跡他郡爲尤多  
宣政之季廢于兵者凡十之七曾不百年瓦礫之  
場金碧相望初若未嘗毀者浮屠氏之力爲可見  
矣威德院在晉陽白馬川之清寧社治平二年賜  
名國朝皇統初聖者老殷元命梵嚴寺僧善信及  
其徒真果主之寺之廢久矣柱礎之外無復餘物  
真稍葺堂屋以居大定中真之徒明玘嗣院事頗  
以寺基迫隘爲憊行視寺後平崖其上可剝治乃  
乞地于韓順家而得之凡役工五千有奇而寺加  
廣實倡于韓厚而僧因爲之勤也玘初刻華嚴經  
本數年迨是而成曰大作水陸以新經千部施且  
燒二指爲供誠意堅苦爲人感動韓厚者與其屬  
更爲起東西堂繪像備馬寺外直泐流爲木石橋  
以便往來然後寺事成玘爲子言如此且彊予記  
之玘今老矣予嘗見其持律嚴入理深護念所業  
如捍頭目蓋人有不可及者每竊嘆焉浮屠氏之  
入中國千百年其間總廢而旋興稍微而更熾者

豈無由而然天下凡幾寺寺凡幾僧以鄉觀鄉未  
必皆趨然可以爲人天師也唯其生死一節彊不  
可奪小大一志牢不可破故無幽而不窮無高而  
不登無堅而不攻雖時有齟齬要其終則莫不沛  
然如滿流之破隄防一放而莫之禦也道則異術  
也教則異習也梯空接虛入神出天與吾姬孔氏  
至列爲三家儒衣冠之子孫有奔走而從之者况  
乎誘庸俗而役之以爲區區之塔廟豈不警咳噴  
呻之頃而得之噫使吾聖人之門有若信若果若  
因若玘者且且如是世世又如是就不能推明大  
道卓如日月之明至于一畝之宮亦何遽有鞠爲  
園蔬之嘆乎吾于是乎有感

竹林禪院記

竹林寺在永寧之白馬原其初爲佛屋居人以修  
香火之供既廢矣鄉豪麻昌及其族弟昂稍完葺  
之以龍門僧廣居焉廣辭梁人自言白雲杲之徒  
居而安之即以興造自任興定中請于縣官得今  
名乃爲殿爲堂爲門爲齋厨爲庫廡凡三年而寺  
事備南原當大川之陰壤地衍沃分流支貫嘉木  
高蔭良穀美稷號稱河南常杜而寺居其上游東

望女几地位尊大居然有岳鎮之舊假度劫立莫可梯接僊人諸峰顏行而前如進而待如退而聽如敬而慕如畏而服重岡復嶺絡脉下屬至白馬則千仞突起朗出天外儼然一敵國之不可犯金門鳥啄奔走來會小山纍纍如祖龍之石隨鞭而東雲烟杳靄濃淡覆露朝暉夕暉萬景岔入廣一攬而洛西之勝盡蓋嘗嘆焉佛法之入中國至梁而後大至唐而后固寺無定區僧無限負四方萬里根結磐玄地窮天下之選寺當民居之半而其俾特未空也予行天下多矣自承平時通都大州若民居若官寺初未有閑麗偉絕之觀至于公宮侯第世俗所謂動心而駭目者校之傳記所謂傳曾不能前世十分之一南渡以來尤以營建爲重百司之治或僑寓於編戶細民之間佛之徒則不然以爲佛功德海大矣非盡大地爲塔廟則不足以報稱故誕幻之所駭堅苦之所動冥報之所饜後福之所徵意有所嚮群起而赴之富者以費工者以巧壯者以力咄嗟顧盼化草萊爲金碧撞鐘擊鼓列坐而食見于百家之聚者乃如此其說曰以力言者佛爲大國次之吁可諒哉正大庚辰子間

居空上廣因進士康國仲寧以記請仲寧爲予言廣業而專心通且喜從吾屬游其進也有足與之者因爲記其事并著予之所以感四月望日前內鄉縣令元某記

### 少林藥局記

少林英禪師爲余言昔青州辨公初開堂仰山自山下十五里負米以給大衆其後得知醫者新公度爲僧伴主藥局仍不許出子錢致羸餘恐以利心而妨道業新歿繼以其子能二十年間齋厨仰給而病者亦安之故百年以來諸禪刹之有藥局自青州始興定末東林隆佳少林檀施有以白金爲百年齋者自寇彥溫而下百家圖爲悠久計乃復用青州故事取世所必用療疾之功博者百餘方以爲藥使病者自擇焉僧徒僧次靖深而周密又廉于財衆請主之故少林之有藥局自東林隆始局事之恪迨子三年矣子幸以文記之子以爲醫難事也自岐黃盧扁之書而下其說累數十萬言皆典雅淵奧本于大道之說究乎死生之際儒者不暇讀庸人不解讀世之學者非不藝專而業恒至終其身有不免爲粗工者其可爲難矣佛之

徒方以禪定爲習于世間法皆以爲害道而不敢爲間有言醫者特儒者之談禪爾有能了知味因斷除病本如予之書所爲大醫王者乎謂之專則不可也勞則辭久則厭不合則離泛然而來悠然而往其視粥魚齋鼓如傳舍中物而不留顧其肯老歲月于參朮間乎謂之恒則亦不可也不恒不專取未必甚辭而付之司命之事病者何賴焉故蘆者取之付一而有餘治藥不得不良十愈一人十愈百人蓋猶有所望也貪者爲之乾沒而不定治藥不必皆良疋床而當靡蕪蕪而亂人參昌陽而進稀苓飛蘆而用馬薊佐使之異用畏惡之相攻其禍可勝言哉古語有之良醫之不能以無藥愈疾猶良將之不能以無兵而制敵也兵有形有刑則易見善用之者能以殺人者生人藥之性難窮難窮則不善用之者反以生人者殺人不可不懼哉今子則不然若德若俠之實與蘆皆選之十百輩有不可得者子固得所任矣時節州土無不適其當炮炙生熟無不極其性德與俠固亦盡其伎矣雖然吾恐他日有不善其後者出人將曰藥局之壞自某人始未必不以予爲知言也故備述

之使來者監觀焉

壽聖禪寺功德記

萬壽長老僧洪倪暨子皆河東人今年夏子來燕城知師主壽聖也將往過之師遣侍者致參承云三四年以來常欲走書幣太原有請于吾子幸今至矣稅駕于我可乎子欣然從之他日問所求師曰無他惟丐文以記寺事耳請具道所以然蓋此寺即崇孝道場之佛位崇孝在大定明昌間堂宇百楹食指以千記義學諸師迭主講席神州天府非無聞剎擬量人境或自視缺然自遭離兵變城邑廢毀僊佛所廬僅有存者崇孝佛位掃地而盡獨曹王所建舍利塔踴然而已荆棘瓦礫地廳來舍如是十數年無留盼者有大檀越劉師彰之夫人鄭氏篤于奉佛憫福地之久廢也願爲興起之且其伯男子有廢孩幼喪明誓徒佛陀以爲歸宿乃捐奩中物直百千金者合報心寺提點僧潤共爲營度潤資性堅忍有立事之望初起大殿築室其旁以爲釋子棲息之地此寺之初基也歲丙午禪律諸人猥以第一代見請倪不敏洒掃于此者十寒暑矣今廊蕪齋廚下迨塵廡粗有處所而其



大較出於鄭之善捨潤之力贊者爲多初慶事竣  
休大士聰聰爲搜記有根塵有礙僧寶可依挽迴  
佛日暗室生輝之語以倪觀之豈寥休以鄭哀其  
子之廢不暇他及願力維堅法施未溥故就其聲  
聞狹劣而言之耶所以者何我以大堅固力起妙  
莊嚴聚化朽壤而金碧奮蟄戶而蹇飛煥若神明  
頓還舊觀于我法中塔廟所在卽爲有佛望之而  
塵勞破卽之而智慧生耳目見聞方有是理夫劫  
濁諸生積爲黑闇叢林之所障蔽如今以百千日  
熾盛光而照臨之碩豈以一室生白而爲究竟哉  
况乎天雲借潤晨庭三請昔而崇孝今別爲壽聖  
兵鳳諾錫之美稱龍光廓其徧照上資神壇之護  
中萬華封之祝金輪四照與天無極豈惟佛子之  
所贊嘆乃至齋鼓粥魚亦皆以一音演說固可以  
著金石垂永久時節因緣繫吾子是待幸有以贊  
就之子捧手曰有是哉與建本末當如師所請若  
佛法則師當爲子說而予不當爲師說異時有大  
居士文章翰墨如竹谿党公者出必能以華嚴偈  
重宣此義云師道行清實臨事詳雅初受具玉山  
參枝足清和尚聞萬松道價裹粮千里以巾侍自

誓松一見卽以座元慶之承事十五年備極勞苦  
他人無與此者出世住萬壽荒廢以父無幾何爲  
之一新之戒大會雖出于國力所以成勝緣者師  
有力焉年月日元某記

### 興福禪院功德記

興福禪院在登封醴泉鄉之西保其初檀越鄂智  
進買地于蔣整家築佛屋其上請少室清涼僧淨  
文居之正大中以恩例得今名自是土木有加焉  
予居於前往來清涼如吾家別業自第一代琇公  
而下若草堂德山主通西溪相與相之徒顯靖僑  
諸人皆有道行可紀故嘗稱述之子赴召京師通  
典願借智進來謂文以記此寺經度之始子諾之  
然以趨裝未暇也是後得官東南迄開興之兵不  
三四年諸師皆已下世至于興福之事則未嘗不  
往來于心也丁酉之秋見淨文于山陽蓋自河南  
歷大名東平訪予而及之謂予言夜亂後兩寺幸  
存千里之來尚欲成諸師之志以無忘却耳予  
欣焉爲記之且告之曰清涼在兩山間初無所知名特以  
名德所在故齋鼓粥魚之聲駭然山谷聞至今爲前  
名利境用人勝真不虛語今興福與子俱脫兵劫

子文雖不足傳乃得之十五年之後而二千里之遠以子之書言之似不偶然者子勉之又安知他日子之所成就不及向上諸人而興福之壯且麗不為清涼之敵然乎子勉之九月晦日河東元某記

龍門川大清安禪寺碑

皇帝新即大位大行蓋龍門公首膺分陝之命思所以修光寵廣睿澤以祈天永命者乃詣闕拜章請以鄉郡武川之清安寺為僧眾祝嚴之所事聞制書賜可且命蠲復以優之先是公之嫗媚宣差提領郭侯秀從軍而南得釋氏繪像余二十幅於宛丘相好備具有碩陸之妙郭侯晨夕香火奉於家庭公亦嘗瞻禮焉頌謂郭言 國恩天大物無

以稱惟有歸命佛乘仰求慈蔭異時當特達精舍承事此像以致臣子區區之情亦以伸昊天罔極之報歲丙申秋偕大覺長老僧志與歷武川之安都郭侯時在行中申理前說安都寔公別墅旁近二三里所有寺曰正覺頽弊已久無從補葺且岡阜散走將非安集之地西北數百舉武三松在焉陽嶺回合面勢平遠泉流交貫林木蔽映層巒接嶺奔走來赴萬象森然與意匠俱會一碩暘之頃

而天趣頓新公欣然樂之營建之意遂定以郭侯之發其端也就命董其役基構四擬詳步之地中命漆

水公具疏請大覺住持共為經度乃以丁酉秋兀

徒歲事土木皆作公首捐萬金以供凡百之費起

佛祖大殿即松為寺庭法堂丈室丹碧相望乃至

安禪有寮會食有延齋厨庫廡以次而具蓋規撫

仰山而差減絃焉漆水公慕說勝緣復以為題榜

龍跳虎卧雲烟動色後五年大覺退席復以禪師

德善繼之提點相秀曰有什一之助鄉縣借力竭

屢從事故眾務益辦道場峻潔四眾安隱粥魚齋

鼓殷殷然川谷閒清安遠為燕北名刹 恩綸褒

異實權輿于此竊唯達人大觀通天地人為一體

人於天地間又同之同者也元首股肱古有成說

若民吾同胞則至道學家乃發之是故君有輔相

裁成之道臣有幹蠱用譽之責而民亦有職焉特

張願待哺而求飽爾古之在天下之重者匹夫匹

婦有不被堯舜之澤者若已推而內之溝中譬之

辭飲一人向隅而泣滿堂為之不樂此特為名教

言至於瞿曇氏之說又有甚焉者一人之身以三

世之身為身一心所念以萬生所念為念至於沙

河法界雖仇敵怨惡品彙殊絕悉以大悲智而饒  
益之道量宏闊願力堅固力雖不足而心則百之  
有為煩惱賊所燒者我願為法城塹有為嶮惡道  
所梗者我願為究竟伴者為長夜暗所闇者我願  
為光明炬有為生死海所溺者我願為大法船若  
大導師大醫王微利可施無念不在在世諦中容  
有同異其惻隱之實亦不可誣也惟公歷事三朝  
再秉鈞軸本諸仁以內養發於誠而外見吾儒之  
兼善內教之利它皆得之性分自然廟而充之有  
不期合而合者參事業之既效極材量之所至必  
有深畧遠圖尊主庇民躋之仁壽之域又何直莊  
嚴佛土一端而已哉行臺叅佐諸公以寺記見屬  
故樂為之書若夫有關必先千載而一臣能歸美  
以報其上君能下下以成其志炳耀乎典冊掄揚  
乎雅頌當有鴻儒碩生秉筆以誌豈草茅賤士所  
得而議之故今所述直以謹歲月云耳

忻州天慶觀重建功德記

吾州跨西岡而城而岡占城之半是為九龍之原  
檀弓志普大夫之葬直謂之九原水經說潯沱經  
九原城北派此其地也岡勢突起下瞰井邑民居

官府率無以稱故作州者以廟學道院佛寺鎮之  
道院舊傳為唐七聖觀蓋天寶八年玄宗親謁大  
清宮上聖祖玄元皇帝尊號為聖祖大道玄元皇  
帝高祖太宗高宗中宗睿宗五帝皆加大聖皇帝  
之號州郡立紫微宮畫玄元像事之五帝則列侍  
左右杜工部冬日洛城北謁玄元廟詩有畫手看  
前輩吳生遠揮場五聖聯龍衣千官列鴈行之句  
為可考也七聖云者必增入玄宗肅宗父子乃得  
為七是則此觀其起于代宗朝乎玄元大殿規制  
宏敞而古意猶在知其為數百年物至以魯靈光  
比之玄元像則博土刻木所成巍然尊大極天人  
之相者舊謂出于神人之手宜不妄也按玄宗起  
紫微宮天下所同而此州不得獨有七聖觀果嘗  
以七聖為額是片名矣是以七聖為斷矣有國者  
率用萬世自期尚肯以七為斷乎意其本名紫微  
流俗以七聖尊像所在輒改名之耳舊門題曰紫  
微為可見矣其後觀有白鶴之異復改白鶴觀圖  
經無所見惟石晉天福二年木土慕容增葺之書  
于版記者如此大中祥符二年詔郡國立天慶觀  
故白鶴又改焉天水氏以軒轅為祖起祠殿于玄

元之左撤太倉而立之號曰明慶堂宇亭榭齋廚廊廡無遺唐舊之半見于都官員外郎知州事丹宗閔明慶殿記及著作郎知平遙縣事權通判杜岐公行列仙亭題詠者如此宣和末金兵入郡境並東城而南觀以不廢承平之乂道化大行土木之後歲月不絕迨貞祐之亂遂掃地矣宣撫使劉公易起殿于明慶之故基而州將樊侯天勝力復立元之舊此興復之大九也歲庚戌春二月予還自鎮州管内道士王守冲謂予言兵荒之後吾所居無尺木寸甍之餘先師撤土立之計所成不能前世百分之一而吾師弟子之心力盡矣先師留語以觀地屬吾子幸吾子不讓予私竊慨嘆子年運而往矣其所經見亦已多矣曩子嬰年先大夫挈之四子人乃一婦始聞鄉里談天慶異事每歲二月望道家以爲元節亦是玄元誕彌之日及其期有鶴降此殿多至十數少不下三二州人習以爲常皆先期延望刺史約先見者有朋摶之賜鶴旣至翔舞階庭了不驚異黃冠千里來會者項輩相望如是三日乃罷從是子兩見之特亂後鶴乃不至耳此觀既經累朝崇飾他道院莫與爲比位置爽塏曠若人表高齋坐牖可以盡山川

之勝古木蔽映窓戶幽邃屏障几席翦爲無埃塵岐公白子西之詩高司戶子文之筆扎孫內翰國鎮之文往往在人口傳知雄水壁極風濤起伏之變有蜀兩孫之風張永淳天蓬四聖毛髮生動威重可怖號爲河東名筆皆游入過客之願見者食指既衆以高業見稱者行輩相及而王姓爲多宋中葉有王尊師洞諫王道判洞真百年以來老師王治淳度王大用大用度王志常志常度守冲老師年八十衣冠杖貌無蔬食誦經山林枯悴之態每杖屨出游路人爲之歛容加敬大用器量不凡乃與游皆州里名勝志常出農家十六七許時牧牛田間遇異人挈之而行一日至天壇之陽臺宮後八年來歸父母驚喜疑其死而得活遂度爲道士氣質渾厚真受道之器年近九十以去冬留頌而遊皆予所接見者也因爲守冲言子之居人境俱勝異事又多垂示求父宜無不可令紫微劉君歷六百甲子道行淳篤神觀開朗于方質以所聞誤新興方志子之師不以屬筆且當志之况于平生之言乃爲記其事且爲長誼以招鶴命篇使并刻之以爲真元故事其辭曰

胎仙之來兮馭者誰金支翠鬔光陸離來幾時兮  
脩上馳渺翩翩兮烟景微藐姑射兮玉靈肌物不  
症癘兮年不鑿幡然棄我兮我疇依去家千年兮  
丁令威去何速兮來何遲子鄒里兮今是非玄元  
之祠兮松十圍蒿蓬金碧兮更換移南枝越鳥兮  
安故棲子獨無情兮淡忘歸趨雲篆兮真子遠明  
年真元兮與子期

太古觀記

全真師郝君初自寧海來趙州坐州南石梁下六  
年姪婿郭長倩為真史少尹遇州問知師慶率家  
人致謁師瞑目不為荅長倩夫婦流涕而去州人  
始知敬之請師住真定之太古觀不之許及長倩  
赴名乃往居之師燕坐既久心光內映大易之學  
恍惚有神受之其教督嚴揮斥公人以為玄門之  
臨濟間一二言休欲如期而驗道價重聞達京師  
衛紹王崇慶初賜號廣寧全道太古真人自是四  
方皆以郝太古目之師東歸不五六年而觀廢于  
貞祐之兵歲丁酉師之高弟范鍊師自東原來裝  
回遺址有復修之意而未暇也幕府叅佐趙侯國  
寶之夫人真氏出奩中物直百金起中殿堂廡齋

厨下及用器無匹不備堂象歲費亦時給之癸卯  
冬予自燕都南歸鍊師館于子慶源道院為予言奉  
歿兵致力於吾門者且不可忘子幸以文記之徃子小  
功凡寂然亦為全真道子嘗問子之道奈何寂然  
舉女凡野人辛怒敬之之言曰全真家其謙遜似  
儒其堅苦似墨其脩習似禪其塊然無營又似夫  
為渾沌氏之術者予北渡後從鍊師游既久蓋以敬之之  
言為然是家自皇統以來起子丘劉譚馬諸師而郝  
君子諸師為方外眷屬今太古集四載言詞徃徃  
深入理窟其以古道自任有不可誣者世人知君之道  
蓋寡異特女士乃能知之至捐所甚愛為起庭宇治  
場圃若營其居室然者豈以名取之乎真氏龍山  
大族名士京甫之伯姨鍊師說其誠實知義理中  
歲授道書即有所得其尊師重道蓋有所本云

紫微觀記

東平左副元帥趙侯之太夫人既老矣即棄家為  
全真師師鄆人普惠大師張志剛居冠氏之洞清  
庵庵之制初亦甚陋乞名于丘尊師改號紫微觀  
趙侯為之起殿閣立堂宇至于齋厨庫廡所以奉  
其親于家者無不備歲乙巳九月落城請子記其

嚶子為之說云古之隱君子學道之士為多居山林木食澗飲鳩項黃醜自放于方之外若涪翁河上丈人之流後世或附之黃老家教以為列僊陶隱居寇謙之以來此風故在也杜光庭在蜀以周靈王太子晉為王建鼻祖乃踵開元故事追崇玉晨君以配混元上德之號置階品立範儀號稱神僊官府虛荒誕幻莫可致詰二百年之間至宣政之季而其敝極黃冠之流官給命書以散即與大夫之目循歷資級無別省寺凡冥報之所警後福之所開則視桑門所前有者而例舉之始欲為高而終為高所卑始欲為怪而卒為怪所溺其徒有高舉遠引者亦厭而去之故自放于方之外者猶一二見焉貞元正隆以來又有全真家之教咸陽人王中孚倡之譚馬丘劉諸人和之本于淵靜之說而無黃冠襖袿之矣參以禪定之習而無頭陀縛律之苦畊田鑿井從身以自養推有餘以及之人視世間擾擾者差若省便然故墮窳之人翕然從之南際淮北至朔漠西向秦隴海山林城市廬舍相望什百為偶甲乙授受率不可破上之人亦嘗懼其有張角斗米之變著令以止絕之當時將

相大臣有為主張者故已絕而復存稍微而更熾五七十年以來蓋不可復動矣貞祐喪亂之後蕩然無紀綱文章虫豸之民靡所趣向為之教者獨是家而已今河朔之人什二為所陷汝無淵靜之習無禪定之業所謂舉桑門以自例者則兼有之望宣政之季厭而去之之事且不可見况附于黃老家教以為列僊者其可得乎嗚呼先哲王之道中邦之正掃地之日久矣是家何為者乃人敬而家事之殆攻劫爭奪之際天以神道設教以弭勇鬪嗜殺者之心耶抑三綱五常將遂湮滅顛倒錯亂人與物胥而為一也不然則盛衰消長有數存焉于其間亦難于為言也已侯名天錫字受之崇儒重道出于天性雖在軍旅而文史未嘗去手嘗與奉天楊煥然讀徂徠石君唐鑑至論釋老家慨然以為知言矣非漫為風俗所移者是觀之作特以養志云年月日河東人元某記

朝元觀記

歲丁未春二月梁鍊師辨疑過新興踵門為予言初國兵以庚辰冬攻破絳陽及解梁屬邑思問僑寓雲朔間當是時崑山軍節度閻侯德剛經畫略

定境內休息頗與方外士周旋所居衛邨里白水出焉侯愛其景氣古澹有終焉之志因以清溪自號幅巾便服香火晨夕有薦思問于侯若謂有所取焉者侯即走書幣猥以賓禮見拈握手而驩如平生為之闢旁近西園規作廬舍以為談經講道之所顧謂所親云他日道院成與吾松檟相直遠不能一里所沒而有知得神游於此足致樂也然未幾侯下世終畢垣墉而已今師歸自朔庭悼先志未究而尚真福之可徵也庀徒釐事土木皆作蓋經始于庚寅之七月而斷手于明年之六月像設有殿禳禱有壇講授有堂賓御有次下迨門廡庖廡截然一新又叅佐部曲諸人請為侯立祠以致其崇之思眾議思問先住安邑之朝元乃以此觀仍朝元之舊文石既具幸吾子以先友溪南辛敬之劉鄧州光甫之故而為之記予諾之曰侯之事固樂為道之矣予聞黃老家黠聰明去健羨之說前賢以為大槩與易道何思何慮者合自年以者觀之往往以墮窳不振為嫌及其更事既多閱得喪休戚者益熟乃稍以淡泊之言為有味迴視世好若芻豢之悅其口者或厭而垂之矣况乎親

兵凶器行戰危道奮迅于風塵之隙而角迷于功名之會伏尸流血僅乃得之大方之家方以拱壁駟馬不如坐進此道彼功定天下之半聲馳四海之表且不能滿渠一笑其下者當置之何地哉故雖文成君之豪傑一旦自視缺然頽棄人問事絕粒輕舉以從赤松子游非自苦也惟侯知物之不可太盛知名之不可久處知權之不可不畏而退之不可不勇故慨然自拔于流俗思欲高舉遠引也知此其所乏者呼吸煉化俛仰詭信以適神而養壽耳雖然上方飛鳥之鳧葛破技杖之龍世徒以神僊為疑而物化亦自有不可窮者矣異時羽衣翻蹶過朝元之上俯華表而語留望五雲而翻翔者汝庸安知其不為清溪翁耶今師名鎮宇國安始以父任作州既而領兵千人隸征西幕府累以戰多為大將軍所知凡萬夫長出師則命留攝軍務于太原禹都孫仲陽道風孤峻時人有玄門臨濟之目與吾幸劉交甚歎辨疑其高弟云望日

遺山真隱元某記

清真觀記

脩武清真觀在縣北馬坊全真諸人為其尊師之

所建者大定初丘自東萊西入關隱于磻溪十數年不出天下以爲有道者興陵名赴聞取道山陽愛其風土之美裴回久之且謂其徒言在所道院武官爲之冠濱都次之聖水又次之若輩得居于此則與濱都聖水相甲乙矣諸人乃乞地于鄉豪馬子安家而得之積以歲月廬舍乃具舍旁近出大泉溉千畝稻塍蓮蕩東與蘇門接茂林脩竹往往而在太行諸峯登立千仞雲烟朝暮使人顧揖不暇考之地志蓋魏晉諸賢之所樂而忘返處也大安初以恩例賜今名貞祐丙子丘命劉志敏來居劉縣人丘高弟也故聚徒至百人興定庚辰之兵觀廢正大辛卯志敏之徒冷德明者復葺屋全所食又千指矣歲甲午予自大梁羈管聊城德明之法兄弟房志起自覃懷來介子幕府諸君請子爲記房外朴而內敏質直而尚義有似夫墨名而儒實者因爲次第之并著予所感焉嗚呼自神州陸沉之禍之後生聚已久而未復其半蚩蚩之與居泯泯之與徒爲之教者獨全真道而已嘗試言之聖人之憂天下後世深矣百姓不可以逸居而無教故爲之立四民建三綱五常士農工賈各有

業父慈子孝凡友弟敬君臣嚴夫婦順各有守九官而有司徒仁義禮智典章法度與爲士者共守之天下之人耕而食蠶而衣養生送死而無憾然而有文驩然而有思于聖人之教也若飢者之必食寒者之必衣由身而家由家而達之天下而方由不可斯頃離至百世千世萬世而不可變其是之謂教而道存焉于其間傳有之天祐下民作之君作之師道之行與否皆歸之天今師徒之官與士之業廢者將三十年寒者不必衣而飢者不必食蓋理有不可曉者豈非天耶如經世書所言皇極之數王伯而降至於爲兵火爲血肉陽九百六適當斯時符堅石勒大業廣明五季之亂不知是之極也人情甚不美重爲風俗所移幸亂樂禍勇鬪嗜殺其勢不自相魚肉舉六合而堙之不止也丘往赴龍庭之名億兆之命懸于好生惡死之一言誠有之則雖馮濂王之對遼主不是過從是而後黃冠之人十分天下之二聲煇隆隆鼓動海岳雖兇暴鷙悍甚愚無聞知之徒皆與之俱化銜鋒如毒蜂迴顧眴若有物掣之而不得遲父不能召其子凡不能克其弟禮義無以制其本刑罰無



以懲其末所謂全真家者乃能拔之蕩然大壞不收之後殺心熾然如火聚力爲撲滅之嗚呼豈非天耶六月十六日前進士河東元某記

通仙觀記

直王屋縣治之北八里所其地名八仙岡丘身連屬於華蓋峰爲近而紫谿之水所溢出仙人燕君舊井在焉關元中敕置陽臺宮以居司馬鍊師近世乃於宮之左別爲通仙觀通仙觀者初爲泰和道院郝志朴實居之崇慶癸酉以恩例得令名始大爲崇建堂宇廊廡齋廚庫廡以次而具登兵亂得不廢今其徒袁守素主之郝平陽人淳素有守披荆棘拾瓦礫不階一簣之助積數十寒暑而後有所就承平時朝上方者率取道於此賓客之所食息幾與陽臺等皆躡喜承事無虛過者而未嘗丐貸於富人之門人用是重之郝之後有李存道義之義之曲沃人童幼入道通莊周列禦冠之學五經諸子亦所涉獵妙於琴事以自娛而已或謂其於異書有所得而不以傳也戊戌之秋子客濟上守素爲予言通仙之所度勤亦至矣不有以記之則他日莫知所從來吾二師者亦將湮滅而無

聞敢再拜以請袁在年從予小功兀竅然授老子章句且以吾宗奉仙老師明道爲介故爲記之予嘗究於神仙之說蓋人稟天地之氣氣之清者爲賢至於仙則又人之賢而清者也黃老莊列而上不必置論如抱朴子陶貞白司馬鍊師之屬其事可考其書故在其人可想而見不謂之踳宇宙而遺俗渺翩翩而獨征者其可乎使仙果不可成彼稱材智絕出事物變故皆了然於胸中寧若世之昧者蔽於一曲之論徼倖萬一徒以耗壯心而老歲月乎士辰之變人有得鍊師所藏丹訣於此山石穴中者曰真元君周覽八極天老相風后侍方明力牧常界先昌宇從六宮官主悉以天衆會於天壇雲臺論三洞秘文普明法要問答已竟太一現深明輪閣雲軒羽蓋滿空界山川雲日黜無晶光元真拜跪於齋壇之上晡曉之際太一與無央仙悠隱於玄中其始末大畧如此其後記云余留於王屋清虛洞側獲真篆仙經二品一曰元精二曰丹華玩其真跡味其經旨乃知龍章鳳篆與世筆殊絕聖法仙經暨凡文異軫徒懷悵望深恨不睹其人然精習彌久探願淵微希髮鬢而已又睹

真皇寶籙及知上古帝王丹寶並傳莫不遐年遠  
及夏禹以丹寶授益事禹日淺民不歸益而歸啓  
自是帝王丹道遂止劉君而下又忘繼之者可勝  
悼痛維玉匣秘文流運道氣而有昇沉之期故遺  
遇之者誠萬世之一耳余今不敢泄慢天寶復藏  
之名山以俟其人此記以歲月考之知其往中巖  
時所藏也夫玄學之廢久矣惟玄學廢故人以學  
仙為疑今夫居山林棄妻子而以黃冠自名者宜  
若可望也然叩其中則世間事人所共知者且不  
能知况出世間乎悵悵之與游憤憤之為嘗未嘗  
學而曰絕學不知所以言而曰忘言囚者喪而敗  
絮自暴而曰君子盛德容貌若愚前所謂以俟其  
人者果何所俟耶抑有之而予不之見耶嗚呼靈  
都直境自昔闕衍博大人之既往來乃今求自  
拔於流俗者而不可得於此可以觀世變矣因併  
及之以為素隱行怪欺世盜名者之勸十二月初  
吉太原人元某記

遺山先生文集卷第三十五



遺山先生文集卷第三十六

序引

陸氏通鑑詳節序

中州文明百年有經學有史漢之學通典之學而  
通鑑則不能如江左之盛唯蔡內翰伯正甫珪蕭  
戶部真卿貢宗室密國公子瑜璣之等十數公號  
稱專門而已近歲此學頗行河朔武臣宿將講說  
記誦有為日課者故時人稍稍效之卷帙既多艱  
於傳寫通都大邑好事家所藏不過三五本而止  
其餘頽見而不可得者多矣溫公脩此書十五餘  
年雖相業未究而能成百代不刊之典以與左丘  
明氏並傳立功立言皆聖哲之能事在公為無憾  
特其傳與否繫學者幸不幸耳歷亭州將張侯晉  
亨知好此書取陸氏詳節且以外記及諸儒精義  
附益之公所載大政事大善惡備見於此蓋有不  
可勝學者矣以為得之易則學者眾因錄木以傳  
從是而往一邑之令一州之守千人君之長若見  
而有所得愛而知所慕舉而措之施為之間免於  
面墻之蔽張侯與有力焉侯官偏將軍佩金符會  
大縣萬家千頭木奴足供指使何至就楮墨工營

什一耶予惜其私淑之意不白故爲道其所以然  
乙卯秋九月望日太原元某裕之書

### 杜詩學引

杜詩注六七十家發明隱奧不可謂無功至於鑿  
空架屋旁引曲證鱗雜米鹽反爲蕪累者亦多矣  
要之蜀人趙次公作證誤罔得頗多託名於東坡  
者爲最妄非託名者之過傳之者過也切嘗謂子  
美之妙釋氏所謂學至於無學者耳今觀其詩如  
元氣淋漓隨物賦形如三江五湖合而爲海浩浩  
瀚瀚無有涯涘如祥光慶雲千變萬化不可名狀  
固學者之所以動心而駭目及讀之熟求之深含  
咀之久則九經百氏古人之精華所以膏潤其筆  
端者猶可髣髴其餘韻也夫金屑丹砂芝朮桂  
識者例能指名之至於合而爲劑其君臣佐使之  
玄用甘苦酸醎之相入有不可復以金屑丹砂芝  
朮朮桂而名之者矣故謂杜詩爲無一字無來處  
亦可也謂不從古人中來亦可也前人論子美用  
故事有著蓋水中之喻固善矣但未知九方臯之  
相馬得天機於臧沒存亡之間物色牝牡人所共  
知者爲可畧耳先東巖君有言近世唯山谷最知

子美以爲今人讀杜詩至謂草木蟲魚皆有比興  
如試世間高度隱語然者此最學者之病山谷之  
不注杜詩試取大雅堂記讀之則知此公注杜詩  
已意可爲知者道難爲俗人言也乙酉之夏自京  
師還間居崧山因錄先君子所教與聞之師友之  
間者爲一書名曰杜詩學子美之傳誌年譜及唐  
以來論子美者在焉侯兕子輩可與言當以告之  
而不敢以示人也六月十一日河南元某引

### 東坡詩雅引

五言以來六朝之唐謝陶之陳子昂常應物極子  
厚最爲近風雅自餘多以雜體爲之詩之亡久矣  
雜體愈備則去風雅愈遠其理然也近世蘇子瞻  
絕愛陶柳二家極其詩之所至誠亦陶柳之亞然  
評者尚以其能似陶柳而不能不爲風俗所移爲  
可恨耳夫詩至於子瞻而且不能近古之恨後  
人無所望矣乃作東坡詩雅目錄一篇正大已丑  
河南元某書於內鄉劉鄧州光父之東齋

### 東坡樂府集選引

絳人孫安嘗注坡詞叅以汝南文伯起小雪堂詩  
話刪去作人所作無愁可解之類五十六首其所

是正亦無慮數十百處坡詞遂為完本不可謂無  
 功然尚有可論者如古岸開青對南柯子以末後  
 二句倒入前篇此等猶為未盡然特其小小者耳  
 就中野店鷄號一篇揭害義理不知誰所作世人  
 誤為東坡而小說家又以神宗之言實之云神宗  
 聞此詞不能平乃貶坡黃州且言教蘇某閑褻袖  
 手看朕與王安石治天下安常不能辨復收之集  
 中如當時共客長安似二陸初來俱妙年有曾中  
 萬卷筆頭千字致君堯舜此書何難用舍由時行  
 藏在我袖手何妨閑處看之句其鄙俚淺近叫呼  
 街鬻殆市駟之雄醉飽而後發之雖魯直家婢媼  
 且羞道而謂東坡作者悞矣又前人詩文有一句  
 或一二字異同者蓋傳寫之久不無訛謬或是落  
 筆之後隨有改定而安常一切以別本為是是亦  
 好奇尚異之蔽也就孫集錄取七十五首遇語句  
 兩出者擇而從之自餘玉龜山一篇子謂非東坡  
 不能作孫以為古詞刪去之當自別有所據姑存  
 卷末以俟更考丙申九月朔書于陽平寓居之東  
 齋元某引

錦機引

文章天下之難事其法度雜見於百家之書學者  
 不備考之則無以知古人之淵源子初學屬文敏  
 之兄為子言如此興定丁丑閑居汜南始集前人  
 議論為一編以便觀覽蓋就李嗣榮衛昌叔家前  
 有書而錄之故未備也山谷與黃直方書云欲作  
 楚辭須熟讀楚辭觀古人用意曲折處然後下筆  
 喻如世之巧女文繡妙一世誤欲織錦必得錦機  
 乃能成錦因以錦機名之十一月日河東元某自  
 題

集諸家通鑑節要序

汝下弋唐佐集諸家通鑑成一書以東萊呂氏節  
 要為斷增入外紀甲子譜年目錄考意舉要曆法  
 及輿道原史事問答古輿地圖帝王世系釋音温  
 公以後諸儒論辨若事類若史傳終始括要又皆  
 科舉家附益之者為卷百有二十凡二百餘萬言  
 唐佐學有源委讀書論文精玩旨意隨疑訂正必  
 理順而後已故其所編次部居條流截然不亂時  
 授館平陽張存惠魏卿家張精于星曆之學州里  
 以好事見稱請為唐佐錄木以傳唐佐過某于太  
 原以定本見示且言温公識治之良相時君用之

不盡屏處開局餘二十年其所得者通鑑一書而已。碩雖功業未究較其成一家之言而爲百代不刊之典不謂之不負所學可乎。承平時明經詞賦取士主文衡者尚以科目爲末。廣謂杜氏通典司馬氏通鑑皆可增置學官爲士子專門之業。宰相以爲然而未暇也。此書編帙浩繁傳寫不易。辨寒鄉之士有願見而不可得者。張氏此本減完書紙墨之半見得之易。則流布必廣。戶牖既開他日當有由堂而及魚者。幸爲我道所以然。雖然某切有所感焉。公與二劉氏范氏紀千三百年治亂廢興成敗之跡。盖用春秋左氏傳荀悅袁宏漢紀例爲之。以便觀覽。故于中祕外郎之書芟夷剪截舉宏綱而採機要。其所取總十一耳。而公旣爲成書上之。復自爲通鑑詳節傳于世者。獨何歟。其後呂陳王陸諸人亦皆以公例爲之。豈數公者于編年本末故使之不相綴屬。開學者涉獵之漸乎。唐佐其積之力。必能得其微旨。幸爲講明之。以曉我曹之未知者。年月日河東人元某謹序。

十七史蒙求序

安平李瀚撰蒙求二千餘言。李華作序。李良薦於

朝蓋在當時已甚重之。迄今數百年之間。孩幼入學人挾此冊。少長則遂講授之。宋王達原復有十七史蒙求與瀚並傳。及詩家以次韻相夸尚。以蒙求韻語也。故姑汾王琢又有次韻蒙求出焉。評者謂次韻是近世人之敝。以志之所之而求合他人律度。遷就傳會。何所不有。唯施之賦物詠史。舉古人微之事。例遷就傳會。或當瞻其然。是則韻語次韻。爲有據矣。始予年二十餘。住太原。學舍支城吳君庭秀洵其弟。庭俊與予結夏課。於由義西齋。嘗以所撰蒙求見示。且言達原旣以十七史命篇。吳而間用呂氏春秋三輔決錄華陽國志江南野錄。謂之史可乎。今所撰止於史書中取之。諸所偶儻必事類相附。其次強韻亦力爲搜討。自意可以廣異聞。予爲我序之。可乎。予欣然諾之。而未暇也。後三十七年。予過鎮陽。見張叅議耀卿。耀卿受學於吳君之門者也。問以此書之存亡。乃云版蕩之後。得於田家故箱中。因得而序之。按李瀚自嫌文碑此特自抑之辭。華謂可以不出卷而知天下。是亦許與。大過唯李良薦章謂其錯綜經史。隨便訓釋。童子固多弘益。而老成頗覺起予。此爲切當耳。載

籍之在天下有揀字所不能容而牛馬所不能舉者精力有限記誦無窮果使漫而無絃廣心浩大將不有遺忘之謬乎如日記事者必提其要吾知蒙求之外不復有加矣古有之積絲成寸積寸成尺尺寸不已遂成丈疋信斯言也雖推廣三千言爲十萬其孰曰不可哉吳君博覽強記九經傳註率首自抄寫且諷誦不去口史書又其專門之學文賦筆瞻有聲場屋間教授生徒必使知己之所知能已之所能時議以此歸之真祐矣亂負母入山道中遇害年甫四十四云庚戌五月晦日新興元某叙

拙軒銘引

左轄公以拙軒自號徵文于某謹述而銘之去古既遠天質日僞日勝機械之士以拙爲諱天下萬事一以巧爲之矜長出奇爭捷求售其泊心日焉如弄丸如運斤如刻猴之工如貫虱之射唯恐巧之不極至於汲黯之懲絳侯之訥石建之醇謹卓茂之迂緩班超平平之策陽城下下之巧咸共唾黜以爲不智事業之鄙陋風俗之薄惡實坐于此惟公以清白傳世德以忠信結人主出入四

朝每秉鈞軸危言高論聳動天下發凶豎未形之謀則先識者以爲明犯強臣不測之怒則疾惡者以爲高視千載無所於讓其以拙爲號者非欲賢于斯世而已也瀟溪先生論拙之極致有天下拙刑政徹上安下順風清弊絕之語夫能至於上安下順風清弊絕則天下之能事畢矣然則公之所以自名者乃所以自任耶

如庵詩文叙

密國公韓琦字子瑜越王長子而興陵之諸孫也明昌初已受封公以例授金紫光祿大夫衛紹王時除開府儀同三司宣宗南渡後封昨國公哀宗正大初進封密自明昌初鎬厲等二王得罪後諸王皆置傳典司馬府尉文學名爲王府官屬而實監守之府門啓閉有時王子若孫及外人不得輒出入出入皆有籍詞問嚴甚金紫若國公雖大官無所事事止於奉朝請而已密公班朝著者如是四十年初燕都遷而南危急存亡之際凡車輅宮殿寶玉秘器所以資丕天之奉者舟車輦運國力不贍至沐者千之一耳而諸王公貴主至有脫身而去者公家法書名畫連箱累篋寶惜固護與身

存亡故他貨一錢不得著身方遷華舍卒朝廷止以之軍興爲憂百官俸給減削幾盡歲日所入大官不能贍百指而密公又宗室之貧無以爲資者其落薄失次爲可見矣元光以後王薨門禁峻文士稍逆款謁然亦不過三數人而止矣公資稟簡重而至誠接物不知名爵爲何物少日師三川朱巨觀學詩龍嵒任君謀學書直積之又遂擅出蓋之譽於書無所不讀而以資治通鑑爲專門馳騁上下千有三百餘年之事其善惡是非得失成敗道之如目前穿貫他書考證同異雖老於史學者不加詳也名勝過門明窓棊几展玩圖籍商略品第顧陸朱吳筆厯筆實之論極幽眇及論二王筆墨推明草書學究之說窮高妙而一言半辭皆可紀銀典衣置酒或終日不聽客去壺薰茗椀或橙蜜一杯有承平時王家故態使人愛之而不能忘也字畫得於蘇黃之間參禪於善西堂名曰祖敬自題寫真有枯木寒灰亦自神應錄來現昨公身只緣苦愛東坡老人道前身趙德麟之句舊制國公祭山陵則佩虎符乘傳號曰嚴祭若上清儲祥宮若太乙宮五岳觀設醮上方相蓋大道場則國

公代行香公多預焉又有詩自戲云借來羸馬鈍於牆馬上官人病且能無用老臣還有用一年三五度燒香蓋實錄云公詩五卷號如庵小篆者汴梁密書家有之樂府云夢到鳳凰臺上山園故國週遭又云咫尺又還秋也不成長似雲間識者聞而悲之予竊謂古今愛作詩者特晉入之自放於酒耳吟詠情性留連光景自當爲緩憂之一物在公則又以之遊世無悶獨立而不懼者也使公得時行所學以文武之材當顯面正朝之任長轡遠馭何必減古人頌典槁項黃馘之士爭一日之長於筆硯間哉朝家疎近族而倚疏屬其敝乃至於此可爲浩嘆也天興壬辰曹王出質公求見於隆德殿上問叔父欲何言公奏聞李德雖議和字德不苦諳練恐不能辦大事者臣請副之或代其行上慰之曰南渡後國家比承平時有何奉養然叔父亦未嘗佔丐無事則置之冷地無所顧籍緩急則置於不測叔父盡忠固可天下其謂我何叔父休矣於是君臣相顧泣下未幾公感疾以其夏五月十有二日薨春秋六十一後二十有六年此集再刻於大名門下士河東人元某爲之引

琴辨引

彥實苗君平陽人童外中爲鄉先生喬孟州原君章所器命其子河東按察轉運使宇德容與同研席君章文學深博兼通音律教彥實與德容琴事初授指法累錢手皆以輕肆爲禁至一聲不敢妄增損彥實後以雅重見稱有自來矣弱冠應明經舉選三赴廷試至論知琴亦與德容相後先當熙宗守成之際惟弄琴爲樂而已琴工衛宗儒者一日鼓琴不成聲問之故曰山後苦寒手拮据耳即賜之貂鼠帳熾炭其前使鼓之世宗好此藝殊有父風寢殿外設琴工幕次鼓至夜分乃罷嘗言吾非好琴人主心無所住則營建征伐田獵寵嬖何所不有吾以琴繫著吾心耳一侍從鼓琴東宮衣著華麗上以輕浮勅不得入宮至顯宗又妙于琴事者也三四年之間此道大行而彥實出于其時近臣有薦於章廟者因得待朝翰林居京師未久而聲譽籍甚至廢舉業不就南渡後日從楊趙游閑間嘗有詩推故詩人止以高士目之公藝既專又漸於敦朴之化習與性成其少別古今操弄孰雅孰鄭猶數一二而辨黑白也常選古人所

傳操弄百餘篇有古意者纂集之將傳於世爲急存亡之秋良未暇也長子名其子君瑞嘗仕爲省郎閤居燕中悼雅道之將廢而先意之不究將錄木以傳請于題端旦以下當傳與否也子謂君瑞言子第傳之山谷有云枯木斲空微暗淺古器雖在無古弦袖中正有南風手誰爲聽之誰爲傳東坡有云琴裏若能知賀若詩中定合愛陶潛漢大司空宋弘薦桓譚文學可比前世揚雄劉向父子光武拜爲議郎帝每譙輒令鼓琴好其繁聲弘聞之不悅悔於薦琴伺譚內出正朝服坐府上遣吏召之譚至不與席而讓之曰吾所以薦子者願令輔國家以道德也而今數進鄭聲以亂雅頌非忠正者也能自改耶會相舉以法乎譚頓首謝良久乃遣之後大會群臣帝使譚鼓琴譚見弘失其常度帝怪而問之弘乃離席免冠謝曰臣所以薦桓譚者謂能以忠正導主而今朝廷耽悅鄭聲臣之罪也帝改容謝之譚遂不得給事中予切謂南風手不可得而今世愛陶詩者幾人果如坡谷所言唯當破此琴爲烹鶴之具耳光武好繁聲舉朝亦好之乃有宋司空謂宋弘之後遂無宋弘則亦實



此書何從出哉夫八音與政通為難審音以知政  
居今而行古又為難合是二難始有此書乃欲藏  
之名山以待其人乎司空表聖最為通論云四海  
之廣豈無賞音固應不待五百年耳請以此為之  
引歲丁巳挽八月初吉遺山詩老引

雙溪集序

燕中文士張顯卿趙昌齡為予言者寺賓客集今  
中令詩傳於時欲吾子為作序引其有意乎予復  
之曰詩與文同源而別派文固難詩為尤難李長  
吉母以賀苦於詩謂嘔出肝肺乃已耳又有論詩  
者云乾坤有清氣散入詩人脾十人萬人中一人  
兩人知其可謂尤難矣前世詩人凡有所作遇事  
輒變化例不一其体裁乃欲與造物者爭柄囚鎖  
性異破碎陣敵交鋒決清穿穴險固者充未盡也  
槁項黃馘一節寒餓之士以是物為額門有白首  
不能道劉長卿一字者青雲貴公子乃咳唾嗚呻  
而得之是可貴也學道者有神遇有懸解如以無  
礙辨才游戲翰墨能拿虎擲動心駭目不可致詰  
彼區區者方纓冠被髮泥汗而追之九萬里風斯  
在下矣中令天資高於詩風夙習故落筆有過人

者不足訝也近時熱中兩詩人擅名一時當其得  
意時視北征南山反有德色然每見中令一詩出  
必懽喜讚嘆失喜噎嘔曰此長吉語也義山語也  
樊川集所無有也而中令憮然自以為不足長譽  
遠馭進進而不已如欲踔宇宙而遺俗渺翩翩而  
獨征者尚矣以序引為哉顯卿昌齡為我謝中令  
君朝議以四世五公待閣下天下大丈夫士以太平  
宰輔望閣下李文饒一品集鄭亞有序陸宣公奏  
議蘇東坡有劄子大書特書而屢書之翰筆有例  
子欲我叙雙溪小集而遂已乎年月日門下士河  
東元某題

鳩水集引

德安鄭夢開以所編宋君周臣鳩水集見示云宋  
君以文章名海內久矣世以不見全集為恨今欲  
鈔木泥布子厚於宋者請為題端某不敏不足以  
知詩文正脉嘗試妄論之文章雖出於真精之力  
然非父兄淵源師友講習國家教養能卓然自立  
者鮮矣自隋唐以來以科舉取士學校養賢俊逸  
所聚名卿才大夫為之宗匠琢磨淬礪日就作新  
之功以德言之則士君子之所為也以文言之則

鴻儒碩生之所出也。以人物言之，則公卿大臣之所由選也，不必皆鴻儒碩生。公卿大臣而其材具，故在是矣。宋君起太行，其經明行脩，蓋故家遺俗。然且得鄉先生李承旨致美按察使簡之宗盟內翰濟川潞倅祐之父子王孟州大用之所沾丐。性太學十年讀書績文，動為有用之學，使之得時行道，其所成就，碩豈出名卿材大夫之下哉？易代以來，佐東平幕二十年，當賢侯擁篲之敬，不動聲氣，酌酢臺務，皆迎刃而解。有用之學，僕既言之矣。嗚呼！文章聖心之正傳，達則為經綸之業，窮則為載道之器。顧所遭何如耳！它日人讀鳩水集，或以文人之文求之，渠特樞襪子耳，非吾心相料中人也。

癸丑清明日河東元某引

揚叔能小亨集引

貞祐南渡後，詩學大行，初亦未知適從。漢南辛敬之、淄川楊叔能，以唐人為指，曠敬之舊有聲河南。叔能則未有知之者，與定末叔能與予會于京師，遂見禮部閣閣公及揚吏部之美二公，見其幽懷，久不罵及甘羅廟詩，嘖嘖稱嘆，以為今世少見其比。及將往，聞中張左相信甫、李右司之純、馮內翰

子駿皆以長詩贈別，閑閑作引，謂其詩學退之，此日足可惜，頗能似之。至比之金膏水碧物外自然奇寶，景星丹鳳，承平不時見之，嘉瑞叔能用是名重天下，今三十年，然其客于楚于漢，汙于燕趙魏齊魯之間，行天下四方多矣，而其窮亦極矣。叔能天資澹泊，寡于言笑，儉素自守，詩文似其為人，其窮雖極，其以詩為業者不變也。其以唐人為指，婦者亦不變也。今年其所譏小亨集，成其子復見予鎮州，以集引為請，予亦愛唐詩者，唯愛之篤而求之深，故似有所得，嘗試妄論之。詩與文特言語之別稱耳，有所記述之謂文，吟咏情性之謂詩，其為言語則一也。唐詩所以絕出于三百篇之後者，知本焉爾矣。何謂本誠是也。占聖賢道德言語布在方冊者多矣，且以弗慮，胡獲弗為胡成，無有作好，無有作惡，撰雖小天下莫敢臣較之，與析年孔夙方社不莫敬共明神，宜無悔怒何異，但篇題句讀不同而已。故忠而成由誠而言，由言而詩也。三者相為一情，動于中而形於言，言發乎迹而見乎遠，同聲相應，同氣相求，雖小夫賤婦孤臣孽子之感，諷皆可以厚人倫，美教化，無它道也。故曰不誠無物。

夫惟不誠故言無阿主心口別爲二物物我邀其千里漠然而往悠然而來人之聽之若春風之過馬耳其欲動天地感神鬼難矣其是之謂本唐人

之詩其知本乎何溫柔敦厚藹然仁義之言之多也幽憂憔悴寒饑困憊一寓於時而其泥窮而不

憚遺佚而不怨者故在也至於傷諛疾惡不平之氣不能自拚責之愈深其旨愈婉怨之愈深其辭

愈緩優柔饜飫使人涵泳于先生之澤情性之外不知有文字筆奕學字者之得唐人爲指歸也初子

學詩以十數條自警云無怨對無譴浪無驚狼無崖異無狡訐無矧阿無傳會無籠絡無銜嚮無嬌

飾無爲堅白辨無爲賢聖癡無爲妾婦妬無爲仇敵誇傷無爲擊俗閑傳無爲執師皮相無爲黠辛

醉橫無爲點兒白捨無爲田舍翁木強無爲法家醜試無爲牙郎轉販無爲市倡怨思無爲琵琶娘

人媿籍詞無爲村夫子免園策無爲弄沙僧困義學字無爲稠梗治禁詞無爲天地一我今古一我

無爲薄惡所移無爲正人端士所不道信斯言也予詩其庶幾乎惟其守之不固竟爲有志者之所

先今日讀所謂小序集者祇以增媿汗耳予既以

如上語爲集引又申之以種松之詩因爲復言端而語乃翁吾老矣自爲瓢壺之日久矣非夫子亦何以發予之狂言已酉秋八月初吉河東元某序

### 新軒樂府引

唐歌詞多宮體又皆極力爲之自東坡一出情性之外不知有文字矣有一洗萬古九馬空氣象雖時作宮體亦豈可以宮體禁之人有言樂府本不難作從東坡放筆後便難作此殆以工拙論非知彼者所以然者詩三百所載小夫賤婦幽憂無聊頹之語時粹爲外物感觸瀟心而發肆口而成者爾其初果欲被管絃諧金石經聖人予以典六經並傳乎小夫賤婦且然而謂東坡翰墨游戲乃求與前人角勝負誤矣自今觀之東坡聖憂非有意於文字之爲工不得不然之爲工也坡以來山谷是無咎陳去非辛幼安諸公俱以歌詞取稱吟諫情性留連光景清壯頌挫能起人妙思亦有語意拙直不自緣飾因病成妍者皆自坡發之近歲新軒張勝予亦東坡發之者與新軒三世遼卒相象從以日滑稽玩世兩坡二豪所謂入其室而啖其炙者故多喜而譁之之辭及隨計兩都作霸諸考

時命不偶十得補祿中臺時南狩已久日薄西山  
風風國勢有可為太息而流涕者故又多憤而吐  
之之辭予與新軒臭味既同而相得甚驩或別之  
久而去之遠取其歌詞讀之未嘗不灑然而笑慨  
焉以嘆況思而遠望鬱悵而行歌以爲王川子嘗  
孟諫議貢餘精茶至四益發輕汗時平生不平事  
盡向毛孔散真有此理退之臨穎師彈琴云記記  
兒女語恩怨相爾汝忽然變軒昂勇士赴敵場吾  
恐穎師不足以當之予既以此論新軒因說向屋  
梁子壘梁子不悅曰麟角蘭畹暮前花間等集傳  
檣里巷子婦母女交口教樓嬌言蝶語深入骨髓  
牢不可去久而語之俱化浮屠家謂筆墨勸淫當  
不華舌之微自知是巧不知是業陳後山追悔火  
作至以語業命題吾子不知耶離騷之悲回風惜  
往日評者且以露才揚已怨懟沉江火之若孤憤  
四愁七哀九悼絕命之辭窮愁志自憐賦使樂天  
知命者見之又當置之何地耶治亂時也遇不遇  
命也衡門之下自有成樂而長歌之哀甚於痛哭  
安知憤而吐之者非呼天稱屈耶世方以此病吾  
子子又以及新軒其何以自解子謂屋梁子言子

頗記謝東山對右軍哀樂語乎年在桑榆正類綠  
竹陶寫但恐兒輩覺損此歡樂趣耳東山似不應  
道此語果使兒輩覺老子樂趣遂少減耶君且道  
如詩仙王南雲所說大美年賣珠棧前風物彼打  
硬頭陀與長三者三禮何嘗夢見在歲甲寅十月  
望日河東元某題

逝空絲竹集引

南渡後李長源七言律詩清壯頓挫能動搖人心  
高處往往不減唐人麻知幾七言長韻天隨子所  
謂陵轅波濤穿穴儉固囚鎖怪異破碎陳敵者皆累  
有之然長源失在無獠茹知幾病在少持擇詩家  
亦以此為恨仲梁材地有餘而持擇功夫勝其餘  
或亦有不迨二子者絕長補短大槩一流人也今  
二子亡矣仲梁氣銳而筆健業專而心精極他日  
所至當於古人中求之不特如退之之於李元寶  
河東人元某書

遺山先生文集卷第三十六

道山先生文集卷第三十七

序引

張仲經詩集序

仲經出隴山貴族少日隨宦濟南從名士劉少室  
問學客居未寧求寧有趙宜之辛敬之劉景玄其  
人皆天下之選而仲經師交之故蚤以詩文見稱  
及于官西南仲經偕杜仲梁麻信之高信卿康仲  
寧挈家就子內鄉時劉內翰光甫方解鄧州倅日  
得相從文字間仲經之所成就又非洛西時比矣  
北渡後薄游東平謁先行臺嚴公一見即被賞識  
待以師賓之禮授館于長清之別墅積十餘年得  
致力文史以詩為專門之學此其出處之大畧也  
今觀其詩末罕王趙幽居云寒盡陰崖草有芽行  
稍殘雪墮米花號空老木風綽定倒影荒山日又  
斜天地悠悠常作客干戈擾擾漫思家烟村寂寞  
無人語獨倚寒藤數莫鴉其落筆不凡類如此及  
來內鄉嘗阻兩板橋張主簿草堂同賦浙江觀漲  
詩仲經云一雨天地來濤聲破濤曉光甫大加賞  
嘆以為有前人風調是年出居縣西南白鹿原名  
所居為行齋取素貧賤行貧賤之義行齋之南有

菊水滿流噴薄景氣古澹陽崖回抱綠波盈尺  
月紅梅盛開諸公藉草而坐嘉肴旨酒蕭索彌日  
仲經有詩云寒客遠峰猶帶雪煖私幽園已多花  
仲梁雖有煖散春泉百汊流之句亦自以為不及  
也其餘如次韻見及云長松偃蹇十年物病鶴摧  
頹萬里心春恩云一春常作客連日苦多風野樹  
凄迷綠簷花暗澹紅愁隨詩卷積囊與酒樽空巢  
燕如相識頻來草舍中書事云故園三年事新愁  
兩莫蓬萊從南望盡坐自北來窮破燼蠅烘日枯  
梢鶻夢風恨然搔白首遠目過端鴻贈員善卿云  
詩材雖滿腹家具少於車珠珠泉感舊云紅槿有  
情依壞砌綠莎隨意上寒廳秋興云壞壁粘蠅艱  
國步荒池漂蟻失軍容秋日云寒花矜晚色病葉  
怯秋聲憶未寧蒼游寄魏內翰云上閣寺高邈晚  
暉游象樓小簇春紅獨脚云洛岸蕭蕭兩送春老  
變青山悟靜緣問路前村犬吠人病枕偏宜夜雨  
聲林深燕近人年衰與秋宜雲出祇園雨亦香又  
如風琴一首回軍詔四首清明日陪諸公讌集東  
園一首病中一首移居學東坡八首再到方山絕  
句書陶詩後某句往往傳在人口內相文獻揚公

有言文章天地中和之氣大過為荒唐不及為戚  
裂仲經所得雍容和緩道所欲言者而止其亦得  
中和之氣者歟為人資稟樂易恬于進取進退容  
止皆有蘊藉可觀與人文重然諾敦分義終始可  
以保任使之東帶立朝當言責之重豈得輕負所  
學志禮諫之義乎憂世既切惠養是其所長趙張  
三王鈞距之吏奮髯抵几者嘉俊快保其羞而不  
為至于德讓君子之風良有望焉自丙午以後參  
幕府軍事當賢候擁篲之敬得寸行寸謂當見之  
一日未一試而病不起矣其孤夢符持橋軒詩集  
求予編次感念平昔不覺出涕因題其後嗚呼有  
言可述學者之能事有子可傳人道之大本吾仲  
經言可述矣子可傳矣願雖賡志下泉其亦可以  
少慰矣夫甲寅冬至日詩友河東元某裕之題

陶然集詩序

貞祐南渡後詩學為盛洛西辛敬之濳川揚叔能  
太原李長源龍坊雷伯威北平王子正之等不啻  
十數人稱號專門就諸人中其死生於詩者汝海  
揚飛卿一人而已李內翰欽叔工篇翰而飛卿從  
之游初得樹古葉黃早僧關頭白暹之句大為欽

叔所推激從是游道日廣而學亦大進客居東平  
將二十十年有詩述二千首號陶然集所賦青梅瑞  
蓮餅聲雪意或多至十餘首其立之之卓鑽之之  
堅得之之難積之之多乃如此此其所以為貴也  
粵歲庚戌東平好事者求此集刊布之飛卿每作  
詩必以示予相去千餘里亦以見寄其所得予亦  
頗能知之飛卿於海內詩人獨以予為知己故以  
集引見託或病吾飛卿追琢功夫太過者予釋之  
曰詩之極致可以動天地感鬼神故傳之師本之  
無良媒自伯之東首如飛蓬處而不見搔首踟躕  
既見復聞載笑載言之什觀之皆以小夫賤婦滿心  
而發肆口而成見取於來詩之官而聖人剛詩亦  
不敢盡廢後世雖傳之師本之經真積力久而不  
能止焉者何古今難易不相侔之如是耶蓋察以  
前民俗醇厚去先王之澤未遠質勝則野故肆口  
成文不害為合理使令世小夫賤婦滿心而發肆  
口而成適足以汚簡牘尚可辱采詩官之求取耶  
故文字以來詩為難魏晉以來復古為難唐以來  
合規矩準繩尤難夫因事以陳辭辭不迫切而意

獨至初不為難後世以不得不難為難耳古律歌  
行篇章操引吟詠謳謠詞調怨嘆詩之日既廣而  
詩評詩品詩說詩式亦不可勝讀大槩以脫棄凡  
近燥香塵翳驅駕聲勢破碑陣敵囚鎖性變軒豁  
幽秘籠絡今古稜奪造化為工鈍滯僻澁淺露浮  
躁狂縱滯靡詭誕瑣碎陳腐為病毫髮無遺恨老  
去漸於詩律細佳句法如何新詩改嚴自長吟語  
不驚人死不休杜少陵語也好句似仙堪換骨陳  
言如賊其經心薛許昌語也乾坤有清氣散入詩  
人脾十人萬人中一人兩人知貫休師語也看似  
尋常最奇崛成如容易却艱難半山翁語也詩律  
傷嚴近寡思唐子西語也子西又言吾於它文不  
至斐遊惟作詩極難苦悲吟累日僅自成篇初讀  
時未見可羞處姑置之後數日取讀便覺瑕疊百  
出輒復悲吟累日反復改定比之前作稍有加焉  
後數日復取讀疵病復出凡如此數四乃敢示人  
然終不能工李賀母謂賀必欲嘔出心乃已非過  
論也今就子美而下論之後世果以詩為專門之  
學求迫配古人欲不死生於詩其可已乎雖然方  
外之學有為道日損之說又有學至於無學之說

詩家亦有之子美夔州以後樂天香山以後東坡  
海南以後皆不煩繩削而自合非技進於道者能  
之乎詩家所以異於方外者渠輩談道不在文字  
不離文字詩家聖處不離文字不在文字唐賢所  
為情性之外不知有文字云耳以吾飛卿立之之車  
鑠之之聖得之之難異時霜降水落自見涯淡吾  
見其沐石樓歷雪堂問津料川之上萬慮洗然深  
入空寂盪元氣於筆端寄妙理於言外彼悠悠者  
可復以昔之隱几者見待耶陶然後編請取此序  
證之必有以予為不妄許者重九日遣山真隱序

### 木庵詩集序

東坡讀魯叟子詩愛其無筮筮氣參寥用是得名  
宣政以來無復異議予獨謂此特坡一時語非定  
論也詩僧之詩所以自別於詩人者正以筮筮氣  
在耳假使魯叟子能作柳州超師院晨起讀禪經  
五言深入理窟高出言外坡又當以筮筮氣少之  
耶木庵英上人弱冠作舉子從外家遼東與高僧  
州仲常游得其論議為多且因仲常得僧服貞祐  
初南渡河居洛西之子蓋時人因以詩僧日之矣  
三鄉有辛敬之趙宜之劉景玄予亦在焉三君子

皆詩人上人與相往還故詩道益進出世住寶應  
有山堂夜岑弈及梅花等篇傳之京師開闢趙公  
內相楊公屏山李公及雷李劉王諸公相與推激  
至以不見顏色為恨予嘗以詩寄之云曼君山堂  
句深靖如幽蘭曼君梅花詠入手如彈丸詩僧第  
一代無媿百年開曾說向開關公公亦不以予言  
為過也近年七夕感興有輕河如練月如舟花滿  
人間乞巧樓野老家風依舊抽蒲團又度一年秋  
之句子為之擊節稱嘆恨楊趙諸公不及見之乙  
酉冬十月將歸太原侍者出木庵集求予為序引  
試為商略之上人才品高真積力久住龍門崧少  
二十年仰山又五六年境用人勝思與神遇故能  
游戲翰墨道場而透脫叢林科臼於蔬芋中別為  
無味之味皎然所謂情性之外不知有文字者蓋  
有望焉正大中開關公侍祠太室會上入住少林  
久倦於應接思欲退席開關公作疏留之云書如  
東晉名流詩有晚唐風骨予謂開關雖不序木庵  
集以如上語觀之知開關作序已竟然則向所許  
百年以來為詩僧家第一代者良未盡歟

南冠錄引

子以始生之七月出繼叔氏隴城府君迨大女庚  
午府君年官扶護還鄉里時予年二十有一矣元  
氏之老人大父彫喪殆盡問之先世之事諸叔皆  
晚生止能道其梗槩予亦以家謀具存碑表相望  
他日論次之蓋未晚也因循二三年中原突兵避  
寇陽曲秀容之間歲無寧君貞祐丙子南渡河家  
所有物經亂而盡善所傳譜牒乃于河南諸房得  
之故宋以後事為詳而宋前事皆不得而考也益  
之兄嘗命予脩千秋錄雖畧具次第他所欲記者  
尚多而未暇也歲甲午羈管聊城蓋之兄魏在襄  
漢遂有彼疆此界之限姪搏傳繫之平陽存亡未  
可知伯男子叔儀姪孫伯安皆尚幼未可告語予  
年已四十有五殘息奄奄朝夕待盡使一日顛仆  
于道路則世豈復知有河南元氏哉維祖考承王  
公餘烈賢雋輩出文章行業皆可稱述不幸而興  
皂隸之室混為一區泯泯默默無所發見可不大  
哀耶乃寺寫千秋錄一篇付文嚴以備遺忘又自  
為講說之嗚呼前世功名之士人有愛慕之者必  
問其形質顏貌言語動作之狀史家亦往往徃為記  
之在他人且然吾先人形質言貌言語之動作乃



不欲知之豈人之情也哉故以先世雜事附焉予自四歲讀書八歲學作詩作詩今四十年矣十八先府君教之民政從仕十年出死以為民自少日有志于世雅以氣節自許不甘落人後四十五年之間與世合者不能一二數得名為多而諱亦不少舉天下四方知己之交唯吾益之兄一人人生一世間業已不為世所知又將不為吾子孫所知何負于天地鬼神而至然耶故以行年雜事附焉先祖銅山府君正隆二年賜出身訖正大之末吾家食先朝祿七十餘年矣京城之園予為東曹都事知舟師將有東狩之伎言于諸相請小字書國史一本隨車駕所在一馬負之時相雖以為然而不及行也崔子之變歷朝實錄皆滿城帥所取百年以來明君賢相可傳後世之事甚多不三二十年則世人不復知之矣予所不知者亡可奈何其所知者忍棄之而不記耶故以先朝雜事附焉合而一之名曰南冠錄叙儀伯安而下乃至傳數十世當家置一通有不解者就他人訓釋之遺吾此言非元氏子孫

興定庚辰太原貢士南京狀元樓宴集

題名引

晋北號稱多士太平文物繁盛時策策决科者率十分天下之二可謂富矣喪亂以來僮仆於原野流離於道路計其所存百不能一今年預秋賦者乃有百人焉從是而往所以榮吾晋者在吾百人而已為吾晋羞者亦吾百人而已然則為吾百人者其何以自處耶將僥倖一第以苟活妻子耶將靳固一命躡躡廉謹死心於未盥簿書之間以取美食大官耶抑將為奇士為名臣慨然自授於流俗以十載自任也使其欲為名臣奇士以千載自任則百人之少亦未害如曰不然雖克賦之多至十分天下之九亦何貴乎十分天下之九哉嗚呼往者已矣來者未可期所以榮辱吾晋者既有任其責者矣凡我同盟其可不勉

送秦中諸人引

關中風土完厚人質直而尚義風聲習氣歌謠慷慨且有秦漢之舊至於山川之勝遊觀之富天下莫與為比故有四方之志者多樂居焉予年二十許時侍先人官略陽以秋試留長安中八九月時純綺氣未除沉涵酒間知有遊觀之美而不暇也

長大來與秦人游益多知秦中事益熟每聞談周漢郡邑及藍田鄠杜間風物則喜色津津然動于顏間二三君多秦人與余遊道相合而意相得也常約近南山尋一牛田營五畝之宅如舉子結夏課時聚書深讀時時釀酒為具從賓客游伸眉高談脫屣世事覽山川之勝票考前世之遺蹟庶幾乎不負古人者然予以家在嵩前暑途千里不若二三君之便于婦也清秋揚鞭先我就道矯首西望長吁青雲今夫世俗愜意事如美食大官高賞華屋皆衆人所必爭而造物者之所甚靳有不可得者若夫間居之樂澹乎其無味漠乎其無所得蓋自放于方之外者之所貪人何所爭而造物者亦何靳耶行矣諸君明年春風待我于朝川之上矣

送李輔之之官濟南序

輔之李君膺刺章之招有汎舟之役東門祖道北海開樽念會合之良難欲殷勤之重接時則莫春三月人則楚囚再期魯連之一箭空飛不季之百金行盡釋射釣之悲雖當三沐而三薰動去國之兔徒有九招而九散沈云舜東南水國勝一節而九散一連西北鄉開竟九招而九散見銅駝之荆棘臺金馬之木冠感今懷昔怒馬如擣况

復中年哀樂流景須叟歌驪駒而再中橫素波而徑去瞻仰弗及我勞如何如春登臺翻失熙熙之意仰天擊缶能無嗚嗚之聲諸公從衍聖孔公賦詩贈別凡若干首而甚為之引

送高雄飛序

恒府天堦間大都會在今為長樂宮之湯沐邑且乾龍潛躍之淵也自文統紹開俊造駢集七八年之間鶴書特徵興鳳尾諾之所招致朕他郡國為尤多乃七月甲申漕司從事河東高鳴雄飛被賢王之教當乘傳北上聲光四馳權動州里僉謂高子春秋鼎盛卓然以問學為業真積力久故習中之言多六經百氏史漢陳范之言司馬氏范氏通鑑唐鑑之學六朝唐以來之篇什馳騁上下累百數萬言往往見於成誦文章翰墨宜在茂異之科古所謂立談可以致雙壁一日可以至九遷者在此行矣高晉產也僕以犬馬之齒之故謬為之一言天象包舉六合臣屬萬國立武事以兼文備由草創而為潤色迨見故老網羅豪雋必當攷古昔之理亂論治道之先後察生民之休戚觀風俗之熾惡以成長治之業以建久安之勢金城

千里大山而四維之顧豈汲汲於文章翰墨之用  
靡羔鴈而歎玄纁乎且夫人臣以納忠為難人君  
以寬聽盡下為尤難蓋義則古今之體同而情則  
天淵之路絕逢干之游未遠伊管之辨易窮諛臣  
嫉立仗之鳴說家懼嬰鱗之怒况乎最擅三月被  
髮九閭事重而言輕威尊而命賤雖復憤泉秋涕  
冤霜天零思欲片辭自明胡可得已乃今首登瀛  
之選接曳裾之遊使者章車太官捐酒主好善而  
忘世士見義而得為陸太中之詩書叔孫奉常之  
典禮賈長沙之經濟魏相國之謀謨有懷不據生  
才奚用是則為吾高子者亦豈輕屑所學棄以為  
雙璧之甘餌九遷之捷徑乎諺有之見卯而求時  
夜謂之蚤計椎牛饗客會其已食謂之後期智無  
後期亦無蚤計行矣吾子今正是時請賦南山有  
臺勸為之駕云壬子秋二十有七日新興元某引

寒食夔泉宴集序

出天平北門三十里而迹是為鳳山之東麓有寺  
曰靈泉阻以絕磴蔭以深樾重巒複嶺回合蔽映  
夏秋之交湍泥噴薄殷勤谿谷寺已廢於兵而石  
樓之典刑故在僧扉禪室間見層出南望坡陀小

山如几按間物出花錯綉群鶯下上雲光金碧林  
煙彩翠陰晴朝暮萬景含集蓋輞川之鄉社而純  
源氏之別業也昭陽薦歲維莫之春諸君以僕燕  
路言竭東藩應聘困鞍馬風沙之役渝樹林水鳥  
之盟千里相思一杯為壽揚雄獻賦自詫雕蟲之  
工許汜求田乃為元龍所譴尊前見在身外何窮  
釋塵累而玩物革厭薰湫而樂閑曠叩頌我友天  
與之時兵厨之良醞踵來京洛之名譎自獻談諠  
間作醜蟲一空倒蔗有佳境之餘食羊無此時之  
羨一之為甚覺今是而昨非四者難并苦夜長而  
晝短謫仙所謂醉盡茶椰賞窮江山者於是乎張  
本不有蘭亭絕唱留故事以傳之其在白雲老兄  
負古人者多矣五言古詩任用韻共九首以寒食  
靈泉宴集命篇而某為之序諸公可共和之

德華 周卿 德昭 英孺 文伯 元某

期而不至者 聖興 子中

不期而至者 德謙 夢符

太原昭禪師語錄引

慈明與瑯琊覺皆法兄弟其扶臨濟一枝慈明而  
下十餘世得玄冥顛禪師瑯琊而下亦十餘世得

厯明亭禪師玄冥風岸孤峻無所許可寧絕嗣而  
不傳厯明急于接納故子孫滿天下又皆稱其家  
加慈雲海清涼相羅漢沐典法王昭公皆是也屏  
山為厯明作墓誌以為二公傳與不傳雖異而其  
道並行而不相悖也正大初予在史館昭公屬予  
求書屏山所作銘于禮部開閣公公初以目疾為  
辭予請之堅公因問法王皆來有何言旬時昭公  
方為厯明作塔于法王之朝堂有偈云以塔為身  
以鈴為舌萬仞闌頭橫說聖說予為公舉似公欣  
然曰銘安在我當為書之蓋師家父子為時賢所  
稱如此歲丁酉八月予自大名還太原師之徒蔚  
某出師語錄求作序引吾家微之有言若佛法師  
當為子說而予不當為師說故畧以數語遺之太  
原元某引

嵩和尚頌序

歲甲寅秋七月余自清涼還太原會乾明志公出  
其法兄弟萬壽嵩和尚頌古百則語護余題端余  
往在南都侍閑開趙公禮部楊公屏山李先生燕  
談每及青州以來諸禪老皆為萬松老人號稱辨  
材無礙當世無有能當之者承平時已有染衣學

亡之目故凡出其門者望而知其為名父之子雖  
東林隆高出十百輩而嵩於是中猶為上首其語  
言三昧蓋不必置論余獨記屏山語云東坡山谷  
俱嘗以翰墨作佛事而山谷為祖師禪東坡為文  
字禪且道嵩和尚百則語附之東坡歟山谷歟余  
亦嘗贈嵩山篤侍者學詩云詩為裨客添花錦禪  
是詩家切玉刀嵩和尚添花錦歟切玉刀歟余皆  
不能知所可知者讀一則語未竟覺水壺先生風  
味津津然出齒頰間當是此老少年作舉子時結  
習未盡爾志公試以此語問阿師當發一笑中元  
日遺山居士元某引

傷寒會要引

往予在京師聞鎮人李杲明之有國醫之目而未  
之識也壬辰之兵明之與予同出汴梁於聊城於  
東平與之游者六年於今然後得其所以為國醫  
者為詳蓋明之世以贊輝鄉里諸父讀書喜賓客  
所居竹里名士日造其門明之幼歲好醫藥時易  
州人張元素以醫名燕趙間明之捐千金從之學  
不數年盡傳其業家既富厚無事於技操有餘以  
自重人不敢以醫名之大夫士或病其資高譽少

所降屈非危急之疾有不得已焉者則亦未始謂之也大繁其學如傷寒氣疽眼目病為尤長傷寒則著會要三十餘萬言其說曰傷寒家有經禁時禁病禁此三禁者學醫者人知之然亦顧所以用之為何如耳會要推明仲景朱奉議張元素以來條矣見證得藥見藥識證以類相從指掌皆在倉猝之際雖使粗工用之蕩然如載司南以適四方而無問津之惑其用心博矣於他病也以古方為膠柱本舟七方十劑之說所取之學特以意增損之一劑之出愈於託密交而後孝子他人蓋不能也北京入王善甫為京兆酒官病小便不利目睛凸出腹脹如鼓慄以上堅硬欲裂飲食且不下甘淡滲泄之藥皆不効明之來謂架鑿言疾深矣非精思不能處我婦而思之夜參半忽攬衣而起曰吾得之矣內經有之膀胱者津液之府必氣化乃出焉渠輩已用滲泄之藥矣而病益甚是氣不化也啟玄子云無陽者陰無以生無陰者陽無以化甘澹滲泄皆陽藥獨陽無陰欲化得乎明日以群陰之劑投不再服而愈西臺錄蕭君瑞二月中病傷寒發熱醫以白虎投之病者面黑如墨本證遂

不復見厥沉細小便不禁明之初不知用何藥也及盼之曰此立夏以前誤用白虎之過得無以投白虎耶白虎大寒非行經之藥止能寒腑臟不善用之則傷寒本病隱曲於經絡之間或更以大熱之藥投之以苦陰邪則它證必起非所以祛白虎也有溫藥之非陽行經者吾用之有難者云白虎大寒非大熱何以祛君之治奈何明之曰病隱於經絡間陽大升則經不行經行而本證見矣本證又何難焉果如其言而愈魏邦彥之夫人目醫暴生從下而上其色綠腫痛不可忍明之云醫從下而上病從陽明來也綠非五色之正殆肺與腎合而為病耶乃就畫工家以墨調膩粉合而成色諦視之曰與腎色同矣肺腎為病無疑矣乃瀉肺腎之邪而以入陽明之藥為之使既効矣而他日病復作者三其可從來之經與腎色本異乃復以意消息之曰諸腺皆屬於目腺病則目從之此必經絡不調經不調則目病未已也問之果然因如所論而治之疾遂不作馮內翰叔獻之妹擗年十五六病傷寒目赤而頓渴脈七八至鑿欲以承氣下之已黃藥而明之適從外來馮告之當用承氣明之

切脉大駭曰幾殺此兒內經有言在脉諸數為熱諸遲為寒今脉八九至是熱極也而會要大論云病有脉從而病反者何也脉至而從按之不鼓諸陽皆然此傳而為陰證矣趣持薑附來吾當以熱因寒用法屢之藥未就而病者瓜甲變頓服者八兩汗尋出而愈陝帥郭巨濟病偏枯二指著足底不能伸迎明之京師明之至以長鍼刺委中深至骨而不知痛出血二三升其色如墨又且謬刺之如是者六七服藥三月病良愈裴擇之夫人病寒熱月事不至者數年以喘嗽矣醫者率以蛤蚧桂附之等投之明之曰不然夫病陰為陽所搏溫劑太過故無益及害投以寒血之藥則經行矣已而果然宣德侯經歷之家人病崩漏豎莫能効明之切脉且以紙疏其證多至四十餘種為藥療之明日而二十四證減前後五六日良愈侯厚謝而去明之設施皆此類也戊戌之夏予將還太原其子執中持所謂會要者來求為序引迺以如上事冠諸篇使學者知明之之筆於書其已試之効蓋如此云閏月望日河東元某書於范尊師之正一宮

元氏集驗方序

予家舊所藏多醫書往往出於先世手澤喪亂以來寶惜固護與身存亡故卷帙獨存壬寅冬聞居州里因錄予所親驗者為一編目之曰集驗方付搏拊輩使傳之且告之曰吾元氏由靖康迄今父祖昆弟仕宦南北者又且百年官無一毫之寄而室乏百金之業其所得者此數十方而已可不貴哉十二月吉日書于讀書山之東龕

周氏衛生方序

定棄周侯夢鄉弱冠從其兄戶籍判官器之作舉子遭罹兵亂技迹戎行屢以戰多取千戶封佩金符然其舉子習氣故在也中年以來頗以醫藥卜筮為事孤虛壬逸風角鳥占俱號精倫軍旅問病患瘡猝為之技劑救療既廣遂為專門之業以夏課綴葺之勤而移之芝木獲桂之下好事者有祕方可責目前之効者必來告之歲月既久浸成卷帙凡若干卷若干首以周氏衛生方目之予以世契之故得傳錄焉竊謂醫藥大事也古人以為藥猶兵然兵殺人之器善用之者能以殺人者生人不善用之則反以生人者殺人世之君子留意予性命之學者良有言哉于於周侯不獨矣其已試

之功與兼愛之心又以見其角逐風塵之際雖有  
獨掃千軍之勇果非樂于戰鬥以人命為輕者故  
為道所以然者冠諸篇遠山元某引

遺山先生文集卷第三十七

遺山先生文集卷第三十八

銘

孔道輔擊地笏銘

龍圖孔公原魯擊地笏闕里傳寶舊矣汗祭既下  
入宣撫王公家公之予以傳彥遠張君彥遠屬某  
作銘敢以蕪辭贅於徂徠石先生之末以俟後之  
君子已酉十月日書

大橫庚庚色棗漆殷血一線著恠迹殷士膚敏世  
載德天以有魯配考實文措指技禿屈軼之版  
持氣不屈未冠堂堂立如植寸鐵指月月不餽指  
一作狡蛇區區辱吾擊正以痛快與此一徂徠之銘  
董狐筆神物當為吾道惜屬君金匱秘石室一日  
龍化雷破壁作一日一

良佐鏡銘

鄆城張氏蓄古鏡以百數其一識云見日之光天  
下大明予用是知古人雖作細小物而閑衍博大  
之義寓焉丙戌夏四月予過汜南良佐請銘其鏡  
因取往所見八言之義衍之以為銘良佐忠於夔  
君篤於事長嚴於治軍旅又謙謙折節下士從諸  
公授論語春秋讀新婁朱氏小學以為治心之要

故就其可致者而勉之

繁時之金金城之功刻畫之劑鍛鍊之功自其細者而觀之不過為櫛縱巾帨几杖盤盂間之一物自其大者而言之則乃有日月大明天地之至公且夫昭曠粹精自天降衷惟不能取諸身而取諸物此偏暗之所以捨其聰須眉之不燭妍媸之分別與亡鏡同善惡之不明白黑之不分與亡視同豈有衣冠堂堂百夫之雄挾昭曠粹精之固有而不得此一物巾帨盤盂之中古有之見爾前慮爾後吾願君子之擴而克

默庵銘為劉司正光甫作

時然後言真默者存理然後默至言之實子欲無言惟聖人能餘皆數窮以默自懲有喙三尺而學喑啞規以自藏物不我假智如挈錡靜如持城其中鏗鉉萬物震驚酒見於面病見於脉眼有否滅口無青白欲息子言當息子機一庵墜白天地同歸

布金銘

百世温公布衾終身服公之服嗟予何人人以貧為辱我以貧為福人以儉為詐我以儉為德惟福惟德服之無斃

無絃琴銘

厥初制琴意寓於器器如可忘聖則徒制如陶牙言莫貴於琴羊存禮存大中之心我琴無絃絃會當具尚因正聲以識真趣

最樂堂銘

工部高平越公德宇冲粹與物無競揚歷中外餘三十年朝廷自公宰士皆以為君子長者晚節末路浮湛里社乃無失侯故將幽憂憔悴之態詩呀謂風雨如晦鷄鳴不已者於公見之新居有堂取古人為善自得之義名之曰最樂以公平生攷之可謂無媿其名矣新興元某為作銘

樂外有終樂內莫窮惟樂焉有外內之別斯君子小人之不同大本在中至和與融涵浸薰醲四體以克純不表髮而天獨以享公醪醴腐腸鼓鍾闕聰誠有翼翼者存洵憂畏其誰攻相彼力田穡繁於達就七過之皆北要萬折而必東遼海管寧鹿門龐翁幽蕭深林獲如清風雖心逸日休人知作德之所自至於身康強而子孫吉者將非為善之功乎

超然堂銘



眼空四海自聖癡舌唾一時無眼禪匡床兀坐差  
獨賢恩澤小侯佳少年威儀秩秩賓初筵衆觀燕  
虞防未然小學之書聖所傳祝君持心靜而天青  
雲驂駟渺翩翩

仲寧提領年甫弱冠顯襲世爵蓋嘗從吾友輔  
之教授張君學故時譽甚著日者燕諸老於所  
居之超然堂問以超然之義且以銘為請因就  
其所可致者而勉之

### 太古堂銘

廣寧全道太古真人寧海郝君初入道習所謂以  
苦為樂者塊坐趙州南石梁之下六年羽化之後  
高第范鍊師復來趙州築環堵而居之官吏士民  
請住州之天寧觀後十年真定幕府參議趙振玉  
起堂於天寧名之曰太古左司郎中賈道成因立  
真人像於中使其徒事之真人平生篤於大易之  
學其以古道自期者蓋天性然余嘗讀太古集見  
其論起詣非今日披裘攤絮囚首喪面者之所可  
萬一癸卯冬過慶源館鍊師所居乃為作太古堂  
銘其銘曰  
宇宙一途萬物並馳至人深心砥柱不移一念萬

年後天為期虛室生白嗒焉自遺故曰存乎人不  
擊其時居今而行古豈季末之能濟玄學希夷大  
易猶微致身羲皇野鹿探枝穴居野處且暮見之  
彼儂隱行恠小智自私泯泯熙熙至老死而不自  
復者殆昨暮兒耶

### 皇極道院銘

虛白處士趙君已入全真道而能以服膺儒教為  
業發源語孟漸於伊洛之學方且探三聖書而問  
津焉計其真積之力雖占候鑿卜精詣絕出猶為  
餘刃耳道風旣扇雄直時激兜裾 王門大蒙寵  
過三年以母老得請歸在鎮陽行臺奉被  
恩旨發泉公帑葺館迎祥觀之故基是為皇極道  
院年月日某實叙而銘之處士名素字才卿河中  
人虛白其賜號云

聖學心傳惟精惟一作新斯民下土是式爾乘  
輿有物有則厥惟暫馳固有而夫有差有明有比  
其德匪伊司南儀其撻埴于帝其訓王道正直福  
自爾求如欽而錫咨爾虛白慮然後得言以道敷  
中由權執賢王好善而康而色相叶厥居方毅之  
實善頌善禱香火晨夕恭惟君師求達皇極

長真庵銘

淮安張澤之為予言福昌之東韓城長真譚公舊  
 隱之跡在焉其徒王志明者葺居之土木之功略  
 具矣用譚公之故名之曰長真庵志明初隸唐州  
 營卒在諸縣中獨以性行見稱其主獄囚有矜憫  
 之實飢飽寒暑每為調護之既久轉將領貨產亦  
 厚一旦與道人語慨然有高舉遠引之意即棄家  
 入道其子追及于襄城泣拜請還志明確然不移  
 遂入崧山師事紫虛于大師及即僊翁積年避去  
 辰之兵東之海濱亂皮還洛陽築遷堵于韓城而  
 居之道俗歸向以為堅坐六年非世人所能堪乃  
 卽譚所居而奉之今年過八十神觀殊未衰目光  
 炯然人望之知為有所養者長真為得人矣幸吾  
 子為之銘澤之予舊交其言可信不妄乃恭用溪  
 南詩老辛敬之之語為作銘銘曰

其兼愛也揚其苦節也墨有許行之樹藝有頭陀  
 之縛律其澹然無營又似夫修混元氏之術者也  
 若夫腐朽之可神糟粕之可醇卽色而實相卽空  
 而法身孰妄而孰真吾知有存乎其人而已

天砚銘

揚子得片石於馬山之前方廣一尺厚減寸之半  
 從長衡短狀若展掌底平而不頽坎可以貯水而  
 面可以受墨杜仲梁曰此天砚也煥然乃請余為  
 之銘

義則方智則圓動也人靜也天在物強名在我自  
 然爾目惟鸚鵡爾味惟鳳簪火絙縷求中產之售漆  
 室緹衣致賔遊之奉彼金樞而石奏泉生而雲滌  
 者亦惟硯之用割烹是謂食費琢刻不加玉重吾  
 知一日而沒百畦惠於漢陰之抱壑

小紫玉池硯銘

蒼龍太一玉版之次維寶硯三并此而四出中秘  
 端元氏得非巧且殆天賜子孫保之他日知野史  
 之所自

贊

手植檜聖像贊

乙巳冬十二月拜林廟遷得手植檜把握許純刻  
 之為 宣聖顏孟十哲像且以文檜為龕像出于  
 手檜為難其得於煨燼之餘又為難合是二難宜  
 為儒家世寶迺百拜而為之贊云

體則微理則全望之儼然卽之溫然見其參於前  
手所植焉形所寓焉欽之管窺浩浩其天是將以  
為甘棠之賢耶抑與夏鼎殷桀而傳也

老人星贊

維南有星與弧直其名老人天一極或見或隱代  
不一光精何年貴此石非丹非青非琢刻玄龜導  
前鶴後翼飄然而來莫從詰祝翁少留觀世德尚  
為斯民開壽域

宣政間忻州天慶觀道士能知性命其宗人堅  
畫老人星像紫府竹環為之贊石刻有二一在  
吾州一在濟源貞祐甲戌之兵天慶廢石刻之  
存亡未可必在濟源者畫像雖存而贊文漫滅  
不可讀已亥正月予見之濟瀆祠歎州里舊物  
兒時所常見者將遂湮滅而不傳因為贊以補  
之且使三人者姓名復見於此紫府今五臺二  
十七日謹記

范文正公真贊

文正范公在布衣為名士在州縣為能吏在遠境  
為名將在朝廷則又孔子之所謂大臣者求之千  
百年之間蓋不一二見非但為一代宗臣而已丁

酉四月復拜公像於其七世孫道士園曦乃為之  
贊云

以將則視管樂為不忝以相則方韓富為有餘其  
忠可以支傾朝而寄末命其量可以際圓蓋而蟠  
方輿朱衣玄冠珮玉舒徐見于丹青英風凜如古  
之所謂垂紳正笏不動聲氣而措天下於泰山之  
安者其表固如是歟

趙閑閑真贊二首

周旋於正廣道宗平叔之間而獨能紹聖學之絕  
業欽避於禁無可党竹溪之後而竟推為斯文之  
主盟不立崖岸之謂和不置町畦之謂誠不變燥  
濕之謂定不汙泥滓之謂清藹然粹溫見于丹青  
雖無老成人尚有典刑風衰無用龍移啓魏殄瘁  
做屬古為悲歎人知為五朝之老臣不知其為中  
國百年之元氣

興定初某始以詩文見故禮部閣閣公公若以為  
可教為延譽諸公閒又五年乃得以科第出公之  
門公又謂當有呀成就也力為挽之贊借過稱旁  
有不平者宰相師仲安班列中倡言謂公與楊禮  
部之美雷御史希顏李內翰欽叔為元氏黨人公

不之卹也正大甲申諸公貢某詞科公為監試官以例不赴院宿一日坐禮曹欽叔從外至誦某秦王破竇建德降王世克露布公頗為聳動願座客陳司諫正叔言人言我黨元子誠黨之耶八之篤予自信蓋如此壬辰冬某以東曹掾知雜權都司取行止卷觀之見公獨銜及楊雷猥相薦引者十七章竊自念言公起布衣仕五朝官六卿自奉養如寒士不知富貴為何物其自待如此顧雖愛我寧欲為利祿計欲使之函進得以斗升活妻子耶惟是愚陋不足以當大賢特達之遇兀兀近五十而迄無所成用是為媿負耳北渡後求汴人趙濟甫為公寫真因題贊其上嗚呼公道德文章師表一世如我乃得而事之公初不以利祿期我然則今所以事公者雖出于門弟子之私亦豈獨以門弟子之私也哉

公無恙時辱公陶甄携之提之且稅且前萬馬之所馳不足以比公之轄萬折之所礙不足以迴公之川將私其私耶抑以為文字之傳匠石斲斤子牙絕絃千載一人猶以且莫萬里一士且謂此有念公生平使我涕漣顏如渥丹雙瞳炯焉彼粹而

溫既與不可得者死矣觀乎此則猶可以髣髴其足音之宛然

范鍊師真贊

戊戌之夏予過東平留宿正一宮時范鍊師已東邁門弟子王仲徽出其寫真求予為贊鍊師初事崑崙郝公號之曰玄同子後從棲霞丘公復有玄通之日故兼及之贊曰

異欲其同介欲其通惟天典之形而道典之貌者不可變故無地以受運斤之風三山微茫目闕珠宮野服蕭然與雲俱東橫絕四海者亦何慕冥冥之鴻邪

寫真自贊 崑山中作

短小精悍大有孟浪勃率桀驁自振厲豪爽不足以為德秀之兄蕭散不足以為元卿之弟至於欽叔之雅重希顏之高氣京甫之溫藉仲澤之明銳人豈不自知蓋天稟有限不可以強而至若夫立心於毀譽夫真之後而無所卹橫身於利害相磨之場而莫之避以此而擬諸君亦庶幾有措足之地

介山馬鄉雲漢為仲晦甫寫真燕坐蕭

然六籍在旁目曰讀經圖依然有會於予心者為作贊云

聖謨洋洋善誨循循啟則新兮司南通涂及門而堂自致身兮致身維柯山立揚休叶經綸兮所學所知效之所天遂及民兮河潤九里海潤百里熱如春兮大方無隅孰墨孰儒孰繼磷兮緇衣好賢佩之飛霞冠青雲兮方內之外方外之內有若人兮

張幾道鍊師真贊

玄學為家平實中和靜焉而不詳孫龍田巴其書丑車吾知為益夸若夫自後而先絕素隱之累方外而內無多歧之差語有之人生也直然則若人之所以敦龐耆艾者其未遲也哉

頌

登封令薛侯去思頌

興定二年冬十月二日詔以王屋令薛侯益登封侯之來前政適為飛語所被羣小鳩煽如焚絲如沸糜殆若不復能措手者侯曰內之不治不可以言外於是退悻卒併冗吏夫留務釋滯獄不旬日縣中廓廓無事即召里胥鄉三老之屬凡民之貧富丁之衆寡里社之小大輸送之近遠諦問詳審

纖悉具備著為成籍按其次而用之貧通賦以寬流亡假間田以業單貧一粟之歛一夫之役均配周又權衡之必平錙銖之必分也寬以期日不復強責計以追胥之費之半而公上給矣方春勸耕遭田父野叟於途慰以農里之言而勉之孝弟之訓懇切至到人為感動以為前乎此蓋未嘗有令惠吾屬之如此也大槩侯之治仁心以為質不屑屑於法禁人有犯薄示之辱教以改過而已至於若茲宿惡不可以情用者深治而痛繩之終不以為夸也故吏畏而愛民愛而畏上官不敢撓以事賓客不敢干以私教化興行頌聲流聞四外之人莫不以崧前為樂土焉明年邑之民有借冠之舉會官以辟舉令法有不便者一切罷之民即相與言曰吾侯如是而不得終惠茲邑侯往矣吾屬能久於此乎雖然侯之政不可以無述也於是刻石頌德以致其去思之心焉侯名居中字鼎臣秦和中進士乙科釋褐滄陽簿郎有聲其辭曰

更茲而漁吏酷而屠軒裳賄皆章綾盜符魚肉視人以膏自濡百騰踵來惠而不鉏饒喙既磨督之公輪嗟嗟遺熱寒餓而幼飲擎幾何日腊以枯孰

當膏之俾還數腴侃侃薛侯仁信篤誠優為趙張  
 耻以自名我靖我民而不震驚誣浸薰醜千室更  
 生侯勤于邾民爾良苦治爾未耜安而田畝輕家  
 而通孰為汝所不奪汝時不急汝担無墮不勤游  
 末是趨辨爾種桂相爾舊畬區爾欲深苗爾欲疏  
 穰莠既芟惡賊既除穰穰滿家貢以羨餘民拜侯  
 教我敬我事迨其有秋維侯之賜有來督郵責賦  
 失期侯惠我民吏不叩扉丁男有言趣輸無遲及  
 此暇時從侯于嬉有嘉者未將獻而夫民謂我侯  
 豈當移被蕭蕭馬鳴我侯于征侯無愠容民有嘆  
 聲吏昔屏氣今當誰畏盜昔知義今當誰媿子渴  
 未濡蔽其泉沉子竭未蘇徹其庶麻侯去不留云  
 如何憂中天之雲是陰下邑出而為兩崇朝萬國  
 我思我侯與雲偕來引領南東願瞻裴回萬丘盤  
 盤頰水潛潛我侯之思其有既哉

遺山先生文集卷第三十八



遺山先生文集卷第三十九

書

癸巳歲寄中書耶律公書

四月二十有二日門下士太原元某謹齋沐獻書  
 中書相公閣下易有之天造草昧君子以經綸伏  
 惟閣下輔佐王室奄有四方當天造草昧之時極  
 君子經綸之道凡所以經造功業考定制度者本  
 未次第宜有成策非門下賤士所敢與聞獨有事  
 系斯文為甚重故不得不為閣下言之自漢唐以  
 來言良相者在漢則有蕭曹丙魏在唐則有房杜  
 姚宋數公者固有致太平之功而當時百執事之  
 人毗助贊益者亦不為不多傳記具在蓋可考也  
 夫天下大器非一人之力可舉而國家所以成就  
 人材者亦非一日之事也從古以來士之有立於  
 世必藉學校教育父兄淵源師友之講習三者備  
 而後可喻如修明堂總章必得椽桷豫章節目礪  
 礪萬牛挽致之材預為儲畜數十年之間乃能備  
 一旦之用非若起尋丈之屋構椽榑椳棧斲斲  
 離出於榆柳槐柏可以朝求而暮足也竊見南中  
 大夫士歸河朔者在所有之聖者之後如衍聖孔

公耆舊如馮內翰叔獻梁都運斗南高戶部唐鄉  
王延州從之時輩如平陽王狀元綱東明王狀元  
鵝濱人王賁臨淄人李浩秦人張徽楊煥然李庭  
訓河中李獻卿武安樂夔固安李大翼沛縣劉汝  
翼齊人謝良弼鄭人呂大鵬山西魏瑤澤人李恒  
簡李禹翼無人張聖俞太原張緯李謙美致君張  
耀卿高鳴孟津李蔚真定李冶相人胡德珪易州  
敬竑雲中李徽中山楊果東平李彥西華徐世隆  
濟陽張輔之燕人曹君一王鑄潭源劉祁及其第  
郁李全平定賈庭揚揚怒濟南杜仁傑洺水張仲  
經虞鄉麻革東明商挺漁陽趙著平陽趙維道汝  
南揚鴻河中張肅河朔勾龍瀛東勝程思溫及其  
從弟思忠凡此諸人雖其學業操行參差不齊要  
之皆夫民之秀有用於世者也百年以來教育講  
習非不至而其所成就者無幾夜亂以來三四十  
人而止矣夫生之難成之又難乃今不死於兵不  
死於寒飢造物者挈而授之

維新之朝其亦有意乎無意乎誠以閣下之力使  
脫指使之辱息奔走之役聚養之分蒙之學館之  
奉不必盡具體期足以糊口布絮足以蔽體無甚

大費然施之諸家固以骨而肉之矣他日閣下求  
百執事之人隨左右而取之衣冠禮樂紀綱文章  
盡在於是將不能少助閣下蕭曹丙魏房杜姚宋  
之功乎假而不為世用此諸人者可以立言可以  
立節不能泯泯默默以與草木同腐其所以報閣  
下終始生成之賜者宜如何哉閣下主盟吾道且  
樂得賢才而教育之一言之利一引手之勞宜不  
為諸生惜也冒瀆台嚴不勝惶恐之至某再拜

與樞判白兄書

某頃首自乙巳歲往河南舉先夫人旅殯首尾閱  
十月之久幾落賊手者屢矣狼狽北來復以葬事  
往東平連三年不寧居坐是不得奉起居之問吾  
兄亦便一字不相及何也如聞曾定襄人處寄書  
然至今不曾見但近得仲庸書報鐵山已娶婦吾  
兄飲啖如平時差用為慰耳去秋七月二十三日  
忽得足殘證賴鑿者急掾之僅免偏廢今臂痛全  
減但左右指麻木仍在也此來數屢傳某下世已  
有作祭文挽辭者此雖出於切者之口亦恐是殘  
喘無幾神先告之耳向前八月大葬之後惟有實  
錄一件只消親去順天府一遭破三數月功披節

每朝終始及大政事大善惡係廢興存亡者為一書大安及正大事則略補之此書成雖溘死道邊無恨矣更看向去時事稍得放鬆否也王先生碑今送去中間有過當處吾兄細為商略之碑石想亦未便立得他日政定亦無害也所欲言者甚多聊疏三二事欲吾兄知之有便望一書為報也時暑自愛不宣

荅中書令成仲書

張子敬處備悉盛意未幾張伯寧來招致敬重甚非衰謬之所堪任其選也不得不以書通祭卯之冬蓋嘗從來使一到燕中承命作先相公碑初不敢少有所望又不敢假借聲勢悠悠者若謂鳳池被奪百謫百罵嬉笑姻梅上累祖禰下辱子孫與渠輩無血讎無骨恨而乃樹之黨與撰造事端欲使之即日灰滅固知有神理在然亦何苦以不賢之軀蹈覆車之轍而試不測之淵乎君侯材量闊博藹有時望士大夫出於門下者有何限量朝夕接納足以廣見聞益智慮而就事業願僕何人敢當特達之遇乎復有來命斷不敢往孤奉恩禮死罪死罪某再拜

荅聽上人書

某頓首啓四月末自太原來鎮州得春後手書副以寶刀新什及復熟讀且喜且嘆又媿衰謬無以稱副好賢樂善之心耳僕自貞佑甲戌南渡河時犬馬之齒二十有五遂登楊趙之門所與交如辛敬之雷希顏王仲澤李欽叔麻知幾諸人其材量文雅皆天下之選僕自以起寒鄉小邑未嘗接先生長者餘論內省缺然故痛自鞭策以攀遠駕後學時文五七年之後頗有所省進而學古詩一言半辭傳在人口遂以為專門之業今四十年矣見之多積之乂揮毫落筆自鑄儻詞以驚動海內則未能至于量體裁密音節權利病證真贗攷古今詩人之變有慙直而無姑息雖古人後生未敢多讓常記平生知己如辛敬之李欽用李長源輩數人每示之一篇便能得人致力處自諸賢彫喪將謂無復真賞乃今得方外三四友如上人者其自幸宜如何哉上人天資高內學富其筆勢縱橫固已出時人畦畛之外唯前輩諸公論議或未飽聞而廢道之耳古人有言不見異人必得異書可為萬世學者指南可終身守之此僕平生所得者敢



以相告錦機已成第無人寫潔本年間得斷手郎當相付亦倚公等成此志耳人行遺書不盡言時暑萬萬以道自護不宣

荅大用萬戶書二

某頓首啓東原宿留幾半歲之久辱公家賢弟昆慰藉之厚內省素謬媿無以當之耳即日伏惟起居萬福孫德謙張夢符津送至魏京今東歸矣雷氏霜鍾亦名器也胥門舊物果有所歸到日公自知之臨行聊此為候向暄千萬自愛不悉某再拜啓某頓首辱書知賢昆季雅意媿衰謬無以當之即日伏惟侍奉萬福自西歸鹿泉值仲女病劇奔詣太原留百許日僅得勿藥即欲東行繼聞相君北上且留待他日諸餘張婿能言之所需橫笛侍女圖今奉去樹萱堂記相見下筆未晚敬器賦全文并跋語千萬錄寄欲入見聞錄中時暑彊學為親加愛不一某再拜

疏

忻州修學疏代郝侯作

始定終緩守文之期式遵有教無類作人之効可徵言念吾州文崇廟學傳俟完復於天德小康之

際傳守名煥微字機先要公增築於大定承平之時要守系極地位之高明副師儒之嚴重華表俯窺於雙鶴廟平有雙連岡雄鎮於九龍學在九龍弦歌絕井邑之譁章觀最上甫易弓刀之舊孫內翰之科名相踵孫名九鼎字國最上元郡學記辭軒先生所作名姚隱君之文石具存存楊字仲純徐州人不圖劫火之餘遽有園疏之嘆碩慙小已猥守大藩方舉廢之是圖亦少文之當變昔魯僖以泮宮發頌齊宣由稷下垂聲不能廣廈以庇賢良媿萬夫之觀政况乃玄壇竝峙佛屋載新開檀施於奔馳戰效之場化金碧於顧盼頻呻之頃何私有百神之秩而公無二仲之祠既責任之有歸豈經營之敢後下車修庠序之教猶竊恨其運扶杖思德化之成夫何遠之有孰相茲役我懷其人

清真道院營建疏

奉為本庵欲創聖位以為焚誦祝延之所其於工費有賴弘持謹投諸方上善共締清緣者竊以像設嚴真儀之奉齋厨維淨侶所安祝贊有歸功緣為大方經營之伊始宜助籍之相先凡我同仁幸垂一諾謹疏戊申六月日遺山老人疏

請太一宮提點李大師住天封疏

太室兼衛霍之秀天封維僊聖所廬劔飛而古栢  
仍存石潤而仙蒲未老孰為真隱再暢玄風揚潘  
馬之微音續軍劉之正脉李公大師源分濁水名  
動漢處靜一得精微之傳冲退為衰薄之鎮惟皇  
拜之祠既舉而司真之治方虛政因黃鶴之書敬  
促青牛之駕璧門金闕瞻星漢以非遙玄都石壇  
佇嵩呼之復振善哉行矣今正是時

興國院改律為禪請住持跋二首

軌轍交馳塵勞先起皮毛盡落真寶具存星河同  
是一天淮濟更無別水談空說有何妨換轉話頭  
指東盡西究竟不離當處蒼茲興國初議安禪誰  
堪選佛道場來舉開山公案集公清風匝地滿月  
當秋不甘北觀之鈴鐘自得壽寧之衣鉢僧壽  
光明既露雞擬蓋藏賓主相請共為推挽雲山改  
色鐘鼓同聲甗從華表之游盡華青種之舊法遊  
龍象同歸佛祖之權大地山河永祝南山之壽善  
哉行矣今正是時

福慧兼全萬為希有人境相值一變從新載惟父  
祖之田園遠歷隋唐之歲月透龕仍在靈塔相望  
齋鼓粥魚粗供朝夕而樹林水鳥未極幽閑幸哉

賢侯特紆深眷謂打地之清風未遠而開門之勝  
樂空孤變遷既異於古今授受寧論於甲乙誰其  
作古自有當仁固知不出當家終亦難逃公議月  
輪挂樹新新列出一枝佛國旃檀何暇更求他木  
某公清操孤峻道照虛明袖裏團繩穿透向上諸  
人鼻孔林閒凡席坐斷天下衲僧舌頭既為大事因  
緣化身合與末法衆生援手自教自禪之已竟誰  
實誰主以何言勿云鶴戀舊巢自是龍行故道高  
提正令行十三八栢之權永為皇家延百億萬年  
之壽無勞擬議便可承當

曹子歸葬跋

松栢歲寒莫重死生之託金蘭天屬亦有急難之  
求父要不忘交情乃見通甫曹君牧之風調張祐  
才名誰謂雍容閑暇之平生而有零落棲遲之暮  
景風霜十月身去國而不歸蓬蘞一丘事蓋指而  
未了且行路有相副之故豈徒哀無贈賻之文凡  
我同盟忍忘斯義城旁冢地何如温序之鄉閭汴  
上麥社會有范家之父子

雜體

麻杜振諸人詩評

麻信之杜仲梁張仲經正大中同隱內鄉山中以作詩為業人謂東南之美盡在是矣子嘗竊評之仲梁詩如偏將軍突騎利在速戰屈於遲久故不大勝則大敗仲經守有餘而攻戰不足故勝負略相當信之如六國合從利在同盟而敵於不相統一有連鷄不俱棲之勢雖人自為戰而號令無適從故勝負未可知光弼代子儀軍舊營壘也舊旗幟也光弼一號令而精彩皆變第恐三子者不為光弼耳

### 射說

晉侯觴客於柳溪命其子婿馳射婿佳少年也跨躡柳行中勝氣軒然舞於顏閒萬首聚觀若果能命中而又搏取之者已而樂作一射而矢墜再而貫馬耳之左馬負痛而駭人與弓矢俱墜左右奔救雖支躡不廢而內若有損焉晉侯不樂謝客客有自下座進者曰射技也而有道焉不得於心而至焉者無有也何謂得之於心馬也弓矢也身也的也四者相為一的雖風之微將若車輪焉求為不中不可得也不得於心則不然身一馬一弓矢一而的又為一身不暇騎不暇發不暇的州

是求中於奔駛之下其不碎首折交也幸矣何中之望哉走非有得於射也顧嘗學焉敢請外廐之下駟以卒賢主人之歡何如晉侯不許願謂所私曰一馬百金一放足百里衡策在汝手吾安所追汝矣竟罷酒元子闌之曰天下事可見矣為之者無所知知之者無以為一以之敗一以之廢是可嘆也作射說

### 酒裏五言說

去古日已遠百偽無一真獨惟醉鄉地中有羲黃醇聖教難為功乃見酒力神誰能醲滄海盡醉區中民此余二十六七時詩也壬辰北渡順天毛正卿揚德秀與一傳生祈仙山寺中蘇晉降筆寫詩數十首一詩有百偽無一真中有羲黃醇之句餘詩除酒裏神仙我五言外多不成語正卿德秀初不知蘇晉為何代人不論此詩何人作也而晉所批乃有此十字晉豈余前身歟抑嘗見余詩竊以為已有者歟將近時鬼物之不昧者記余詩以託名於晉以自神也是皆不可知晉既以余詩為渠所作故余亦就酒裏神仙我五言取償於晉作樂府一篇繡佛長齋半生枉伴蒲團過酒壚橫卧一

蹴塵空破頗笑張顛自謂無人和還知麼醉鄉天  
大少箇神仙哉

靖德昭兒于高戶字說

古今俗忌以五月為惡月端午為惡日赴官者頗  
不敢發生子者棄不敢舉不幸而與禍會故一切  
以俗忌為當然赴官後期蓋不足計生子而不一  
舉其禍可勝言哉原武靖德昭以此月舉兒子靖  
氏蓋靖郭君之裔乃取田文故事名之曰高戶而  
乞字於余余以為五月生子往往富貴而壽如漢  
大將軍王鳳相國胡廣晉王鎮惡之等其事見於  
史漢魏晉之書為甚詳秉筆者亦欲明已定之分  
祛雷同之惑故諄復言之德昭之先人南湖翁蚤  
歲以文武材傑出時輩得湛里社四五十一年之閒  
抱利器而莫之試其所得者君子長者好賢樂善  
之名耳德昭問學甚篤行義甚修遭離世故又值  
不能舉宜為造物者之所棄除以起家之子遺之  
也高戶今六歲青衿繡襦温然如含玉之璞琢而  
文之將為萬葉之器吾知惡月之說殆田家媪火  
爐頭語耳因字之伯起書以貽之

曹南商氏千秋錄

曹南商氏族姓所起見於遠孫正奉大夫贈昌武  
軍節度使衡所著千秋錄備矣蓋自少典而降得  
姓者十四契始封商以子命氏十三世而至湯十  
七世而微子代殷後為偃王又二十六世於秦於  
兩漢於曹魏六朝隋唐詳見於家譜者以節度君  
推世次系出陳之長平長平段高宗冢在焉遠祖  
司空侑唐史有傳太和中再領天平節鉞子羽舉  
進士藩府辟召不至通顯子盈孫僖宗聞其有禮  
學擢為太常博士終於大理卿贈吏部尚書子暄  
暄之子虞讓虞讓之子徽已上失其官號俱為唐  
人徽之子諱懷欽入五代十年生周顯德三年劉  
燦榜擢第終於宋建隆四年朝奉郎試大理評事  
知曹州南華縣事致仕因家於曹享年九十四詳  
見譜謀蓋自司空而後為鄆人南華而後為曹人  
避宋宣祖諱改姓商氏建節度君九世矣南華之  
子捷淳化三年孫何榜擢第累官至比部郎中生  
七子宗聖宗傳宗回宗弼宗旦宗奭宗昱宗傳宗  
弼宗旦三子登科宗傳咸平三年陳堯咨榜擢第  
初任蜀川後乃隔絕不知所終宗弼大中祥符五  
年徐奭榜擢第累遷至中書舍人仁宗朝時嘗詣

然有鄉輔之望其後不樂仕進年未五十乃挂冠築堂曹南之西園名曰晦道時賢高其勇退盛為稱道之享年七十娶冀氏封金華縣君生八子侍備儼傳佑佖偕倚備傳佖四子登科即節度君六世祖也宗旦字繼周天聖五年王堯臣榜擢第官至朝奉郎知桂陽監平陽令享年五十二娶卞氏生四子伊灝佖佖詳見墓誌長子伊伊子謙倚元豐五年黃裳榜第一甲第三人擢第初任太原教授大學博士後元祐黨事與碑其名於餘官之列一子中立備皇祐三年馮京榜擢第三子穆之伯之適之傳字夢臣皇祐五年鄭獬榜擢第繼登說書科授國子直講終於光祿寺丞出知魏州朱陽縣事亦足以知當時重守令之選也享年六十一累贈大中大夫娶李氏封恭人詳見墓誌即節度君五世祖也生七子千之元之立之延之坦之成之貫之元之貫之登科佖嘉祐四年劉輝榜擢第終於通直郎致仕享年七十四娶張氏生五子先之才之孝之說之直之先之說之登科元之熙寧九年徐鐸榜擢第終於丞議郎濟州鉅野令縣界金山寺碑在焉娶蕭氏四子因國冉丙因登科

先之元豐五年黃裳榜擢第終於衛州茶陵令貫之字以道後改名元祐六年馬洵榜擢第張君向辟為計司屬官終於朝散郎知懷州武德鎮致仕享年六十七娶張氏封安人節節度君之高粗也生六子周同罔冊丹甬皆業進士說之建炎五年李易榜擢第授鄧州文學後攝濟陰主簿阜昌二年通判興仁軍府事張君徽文商文學素勤學古可使人官今保舉堪赴吏部注擬差遣竟不就享年六十娶傅氏即龍圖公之女孫也四子黠黠黠黠然後改名休復字子泰風儀秀整襟量夷曠博學有文老居汴梁娶江氏即金紫公鄰幾女孫也有陶丘先生文集行於世諶九舉終場建中靖國元年恩賜進士第終於虔州大庾令因紹聖四年何昌言榜擢第終於通仕郎開德府臨河縣令三子大有大聲大臨周宣和元年以父守朝散郎致仕奏補累官至通直郎開德府濮陽縣丞一子曠罔字元壽建炎二年從劉錫太尉解老滄州奏補拱輔從事入金朝換忠勇校尉享年七十二節節度君之曾祖也初娶周氏再娶鄭氏二子駒馳冊字元功丹字大忠後改名愈字師心為施內翰

朋望詩酒之交生二子驥騏皆早世甬字子華俱以儒業顯于鄉里學者宗之祖駒字士龍兩赴庭試天資和雅博學強記教授鄉里泰和元年五月十五日以壽終享年七十一祖母郝氏封宜人三子長永錫字難老次敷錫字福老次廉錫字吉老難老用公貴及封朝請大夫致仕妣王氏濮陽郡太夫人三子仲曰衡字正叔滑稽豪俠有古人風季曰衍字信叔穎悟早世公朝請君之長子也字平叔勿從祖學長師鄉先生李若訥若訥愛其才每器重之年二十五擢崇慶二年黃裳榜詞賦進士第釋褐主鄜州洛交簿以廉能換郿縣尋辟廢戎令時興定已卯歲饑民無所於糴公乃開倉賑濟然後白之行臺類以全活者甚衆夏六月地震城鄆摧圮夏人衆屢入寇公率領蕃部土豪守禦應敵保以無虞秩滿縣人為之立祠再辟原武令以例罷入為尚書省掾歷糧草邊關知管差除三考考再滿授戶部主事兩月擢拜監察御史姨母鄜國夫人不時入禁中干預政事聲勢甚張公拜章極言自是鄜國被召乃敢進見宗室帥慶山奴軍淮南歸州失利朝廷置而不問公建言自古敗

軍之將必正典刑不爾則無以謝天下詔為決杖八十因而退罷戶部侍郎權尚書曹溫時一女在掖庭從史親舊于預權利其家人填插諸司貪墨張露而臺官無敢言者公歷數其罪詔罷溫戶部改太后府衛尉公再上章若臣言溫果可罪當貶逐溫無罪則臣為妄言豈有是非不別而兩可之哀宗為之動容乃出溫為汝州防禦使未幾改右司都事朝廷知公蓋將大用矣改同知河平軍節度使事不赴奏克樞密院經歷官遙領同知昌武軍節度使事丞相完顏革公領陝西行臺奏公權行充左右司員外郎仍佩以金符密院表留有旨行臺地重急於用人可從丞相奏自是臺務一決於公矣明年召還行臺再奏留之又明年丁內艱乃得還平章政事蕭國佖公塞京東河決奏公以左右司郎中從行正大八年十月起服中充泰監總帥府經歷官正月河潼失守召主帥入授二月九日軍至陝將由閒道之長水界與北軍遇相拒大雪中士卒饑凍不能戰主帥兀典棄衆降敵公為北軍所得令去巾公瞑目大呼曰汝欲虜從我耶哉終不能降迴望闕瞻拜曰主將無狀亡兵失

利臣之罪責亦無所逃但一死報國耳遂授佩刀  
自頸時年四十有六褒贈正奉大夫昌武軍節度  
使初娶鄧氏繼娶鄭氏並封濮陽郡夫人于男二  
人長曰挺字孟卿業進士次日曰授字仲經女一人  
適進士劉改孫男七人珉璘璿璿皆業進士璿璿  
珩及女孫二人尚幼初河間許古道真以直言極  
諫稱於德陵朝正大初詣闕拜章言八座皆非其  
材省寺小臣有可任宰相者不大升黜之則無以  
致中興章奏召道真赴都堂問孰為可相道真以  
尚書省掾商衡對當是時上新郎大位經略四方  
思所以弘濟艱難者為甚力道真已得請君伊川  
卽命驛召致之復右司諫天下相望風采道真亦  
慷慨願以人所不敢言者為天子言之及論天下  
事首以公為可相則公之材為可知矣公事長上  
以禮接下以誠與人交敦終始家居怡然毋愠容  
性嗜學藏書數千卷古今金石遺文人所不能致  
者往往有之南渡以來士大夫以拯世之學自名  
高者闕略而無所統紀下者或屑屑於米鹽簿書  
之間公天資雅重遇事不碌碌人所不能措手者  
率優為之苟可以利物則死生禍福不復計平居

以大事自任而人亦以大任期之評者至今以公  
用違其長使之卒然就一死為斯世惜也故好問  
銘其墓云云按公所藏及記錄者有唐武德三年  
遠祖司空勳國公開山誥有體質平允才器敏洽  
宣力義旗功參造珠可吏部尚書宣和內府物也  
已下皆明道堂  
題諱備在家錄自餘玉牒授之楚尾毛觀復給事中  
知曹州興仁軍府事三衛盧襄贊元濟北李那商  
老任庭玉鄧忠臣山東路提刑使濟陰賀公叟楊  
庭東平路轉運使鄉先生李上達及子省元防方  
平濮州軍事判官林棟姚達榮興祖尚書左丞壽  
國公金城高汝礪巖甫同知臨洮府事兼積石州  
刺史平陽孔天監偉明尚書右丞汶水賈守謙益  
之諫議大夫淳南許古道真戶部尚書權叅知政  
事堇山揚造叔玉尚書左丞日熙張行忠信甫平  
章政事蕭國公東阿侯摯羊卿大司農戶部尚書  
相人張正倫公理等書札詩篇錄在家翰林應奉東  
明王鴉百一嘗作詰詞云出知外縣涼子其德讓  
之遺入棹中堇魁然有羊輔之望禮部閑闕趙公  
許與公有鵬飛九萬里風斯在下之語其為時賢  
所推重如此尚何待僕言正叔以通家之故請為

千秋錄作後記因得仲右之或疑商氏名德相望而報施未豐者竊以水喻之今夫流泉出石罅開從濫觴之微涓涓而不絕及其合支流會衆川儲蓄淵滄盡洄洑舒徐之態鼓之以長風驅之以迅雷泄雲雨而涵鬼物雖有千石之舟十丈之牆運迴顛盼而不敢發蓋從微至著而有本者必如是耳今孟鄉館嚴侯之門者十餘年候溫然執擁篲之敬海內名勝率以清廟之器許之諸卽王立秀發生長見聞宜有不資於人而自熾者正叔年甫六十安閑樂易福祿方來他日羔鴈成群極人門盛事當信僕言之不妄云癸丑二月吉日河東元好問裕之謹書

故物譜

予家所藏書宋元祐以前物也法書則唐人筆迹及五代寫本為多畫有李范許郭諸人高品就中薛稷六鶴最為超絕先大父銅山府君官汲縣時官賣宣和內府物也銅碌兩小山以酒沃之青翠可摘府君部役賸物也風字大硯先東巖君教授鄉里賸物也銅雀研背有大戲一天祿一壓重緞密典石無異先隴城府君官冀州賸物也貞祐丙

子之兵藏書壁間得存兵退子將奉先夫人南渡河舉而付之太原親舊家自餘雜書及先人手寫春秋三史莊子文選之等尚千餘冊并畫百軸載二鹿車自隨三研則盡之鄉村別墅是歲寓居三鄉其十月北兵破潼關避於女几之三潭比下山則焚蕩之餘蓋無幾矣今此數物多予南州所得或向時之遺也住在鄉里常侍諸父及兩兄燕談每及家所有書則必枚舉而問之如曰某書買於某處所傳之何人藏之者幾何年則欣然志之今雖散亡其綴緝裝楷籤題印識猶夢寐見之詩有之雜桑與梓必恭敬止以予心忖度之知吾子孫却後當以不知吾今日之為恨也或曰物之閱人多矣世之人玩於物而反為物所玩貪多務取巧偷豪奪遺簪敗履惻然興懷者皆是也李文饒志平泉草木有後世幾一樹一石非吾子孫之語歐陽公至以庸愚處之至於法書名畫若桓玄之愛玩王涯之固護非不為數百年計然不旋踵已為犬有力者負之而趨我躬之不可必奚我後之郵哉予以為不然三代鼎鍾其初出於聖人之制今其款識故在不曰未用享則曰子子孫孫永寶用豈



爲聖人者超然遠覽而不能忘情於一物耶抑知其不能必爲我有而固欲必之也蓋自莊周列禦寇之說盛世之誕者遂以天地爲逆旅形骸爲外物雖聖哲之能事有不滿一笑者况外物之外者乎雖然彼固有方內外之辯矣道不同不相爲謀使渠果能寒而忘衣飢而忘食以游於方之外雖眇萬物而空之猶有託焉爾如曰不然則備物以致用守器以爲智惟得之有道傳之無媿斯可矣亦何必耶空以遺累矯情以趨達以取異於世耶乃作故物語丙申八月二十有二日洛州元氏太原房某引

遺山先生文集卷第三十九

遺山先生文集卷第四十

上梁文

南宮廟學大成殿上梁文

兒郎偉竊以窮則變變則通聖人之道所以亘萬世而無敝庶而富富而教司徒之官所以敬五典之克從方屬靈臺偃伯之秋宜有庠序盈門之盛眷紫微之舊治肇清廟之新基肇改作之良難知樂成之有在中國有詩書之教風以勤之瘞老思德化之成今其時矣敢竊闕宮之義以佐武城之歌兒如偉拋梁東井邑弓刀變舊風孝悌力田從此始衣冠禮樂有儒宮

南極目農郊露氣酣五畝樹桑明府教馬鳴無用說亘茲

西木鐸新聲換鼓擊學館大亨知有日富兒未用笑朝蓋

北草創古來須潤色妙年今佐嚮儒風子弟於今有矜式

上漢日鄉賢多將相儒林繁藻廣川君奎壁光芒三萬丈

下絃誦洋洋新美化朝家頗賜鶴頭書長吏今年

應勸駕

伏願上梁之後生徒石室常師蜀郡之文翁保障  
繭絲不媿晉陽之尹鐸旁沾鄰郡共洽文明

南陽廨署上梁文

拙以力巧以勞野人養君子之義政有居訟有所  
國家謹官府之常繁政作之果難宜樂成之有在  
爰從舊邑改隸新州一朝公廨之遷遷三政民居  
之雜處吏卒靡瞻依之地簿書失高鑄之嚴加之  
獻直稍愆公移卽至度財計役有司誠憚於紛更  
習陋安卑職者亦為之竊笑眷惟吾土今號名藩  
田則九州上腴人則四方和會山連峴首如瞻大  
掎之鼓旗樹入春陵猶有故鄉之城郭豈有官為  
十萬戶之長地方二千里而遙陞級不為之少崇  
繩墨自拘之如此 後逸

外家別業上梁文

窮於途者返於家乃人情之必至勞以主而佚以  
老亦天道之自然方屬風霜匪薄之餘而有里社  
浮湛之漸故焉卜築今也落成遺山道人蟬蠹書  
癡鷄虫裸薄根以勃窣解網之迹仕於危急存亡  
之秋左曹之斗食未遷東道之戈船已御父矣公

私之俱罄困於春夏之長園窮甚析骸死唯束手  
人望荆兄之通好義均紀季之附庸出涕而女於  
吳莫迫於既往下車而封之杞有覲於方來謀則  
僉同議當孰抗爰自上書宰相所謂試微軀於萬  
仞不測之淵至於喋血京師亦常保百族於群盜  
垂涎之口皇天后土實聞存趙之謀枯木死灰無  
復哭素之淚初一軍構亂群小歸功劫太學之名  
流文鄭人之逆節命由威制佞豈顧為就磨甘露  
御書之碑細刻錦溪書史之筆蜀家降欵具存李  
吳之世修越王禪文何預陸機之手迹 文選謝平伊  
原內史表  
誰受賞於我嫁名悼同聲同氣之間有無罪無辜  
之誘取孤懷之自信聽羸口之合攻果吮痂舐痔  
之自甘雖竄海投山其何恨惟彼證龜而作蠶始  
於養也成蛇追歸之騎南還射羿之弓隨鼓 北  
子  
渡之初獻書中令君語以一寺觀所費養以流言之自  
天下名士造訪者三亦書中故事之類也  
止知神理之可憑復齒平民僅延殘喘澤畔而湘費  
已老樓中而楚望奚窮懷先人之故廬可憐焦土  
眷外家之宅相更愧前途豈謂事有幸成計充私  
便東諸侯助竹木之養王錄事寄草堂之贊占松  
聲之一丘 東車于北山賦菊  
花兩華松聲一丘近  
白子此別業與  
西所居 桃花之三洞

近東牆西壁無補圻之勞上兩旁風有閉藏之固  
已與編戶細民而雜處敢用失侯故將而自名因  
之挫銳以解紛且以安常而慶順老益濁酒便當  
接田父之歡春並晚菘尚塊奪園夫之利彼扶搖  
直上擊水三千亭杜城南去天尺五坐廟堂佐天  
子蓋有命焉使鄉里稱善人斯亦足矣輒取合歡  
之意演為助役之謠

兒郎備拋梁東人笑家山蕙帳空老大讀書無用  
處且將耕穫教兒童

南羊谷山中好石翁杖屨一遊無脚力會稽禹穴  
更須探

西未要坊名改碧雞種下五株桃樹子本無心學  
浣花溪

北老怯寒冬思窳室嶺頭騎馬是官人萬里風來  
沙土黑

上何人落日心猶壯雲間道有少微星兩眼眇昏  
無復望

下百尺長松逸茅舍他年拈出次山詩七十腰鑣  
行時稼長松萬株逸茅舍又云老公七十自腰鑣  
析引兒孫行時稼此吾家次山公詩也

伏願上梁之後里仁為美鄰德不孤子期永作知

音晉子期季膺早思命駕張熾文留起居飲食身為  
無事之人伏臘歲時家有長生之醪旁沾親舊共  
樂安閑

青詞

太夫人五七青詞

恩重託身生成之義等禮名猶子嗣續之道存痛  
芻翼之未終忽栝捲之未棄敢伸悃悃仰訴吳蒼  
中謝伏念臣母張婦德成家母儀範世儉必求於  
中禮嚴不至於失慈所以命臣者其道公所以拊臣  
者其勤盡三釜得甄榮之祿百身無可贖之年消  
埃之願莫施風樹之悲曷已惟幽誠之有假或冥  
福之可徵敬叩玄科竊依真瘞土灰有望儻沾再  
造之仁草木何知未戴曲全之賜

劉宣撫設醮青詞

嗚然復憊恒情之必至救而不棄大道之曲成惟  
洪纖同萬化之歸故幽顯靡一誠之間敢殫悃悃  
仰叩希夷中謝伏念臣某塵劫賦形夙衛奚步偶會  
崩離之遇妄從角逐之餘出入兩州因循十稔豈  
微勞之可錄徒多罪之與俱果令暮景之桑榆尋  
陷畏塗之荆棘憂虞甫集喪病踵來暴貴非祥固

退藏之已晚孤根易橈在摧折以何堪悔莫自追  
孽將安運眷深衷之有假尚後福之可徵載舉玄  
科竊依真啓恭惟至公立德弘濟為仁聞其翺飛  
蠕動之愚重以氣化形生之賜土灰有並儻露蒼  
貸之私溝壑未填舉是自新之日

張喜千戶青詞

暴貴無漸一歸自召之苗大德曰生萬有必從之  
欲敢殫悃俯仰叩希夷臣某藹朽餘生編齊庶品  
匪時緣之幸際撫氣質以真堪戶封已迫於逼候  
子婿繼聯於鼎族滿盈之極負乘是夏果懼瘞天  
之殊危失保家之長尚賴至仁之弘濟庶幾大道  
之曲成恭按玄科竊依真啓自同草土固所謝之  
莫知未即及釘惟改新之水誓

樊守謝土詞

營建非時事關於舍卒陰陽干禁理藉於祈禳恭  
扣玄科切依真啓有相之道何知陰陽之私永建  
爾家尚覬曲成之賜

郡守天池祈雨狀

維太歲甲辰四月辛未朔二十四日甲午忻州某  
官等惶恐百拜獻狀天池龍君殿下惟神血食一

方膏潤千里靈應之迹著見有年某等資品凡陋  
德薄任重不能撫安閭里召迎和氣自開歲以來  
雖嘗被一溉之賜既雨而旱今已十旬夏苗欲枯  
秋稼無望民庶嗷嗷將遂連播匪我神明則將曷  
訴乃消吉亘謹遣管內僧某道士某躬詣靈湫奉  
迎甘澤某卑職所限止於道左願俟雲興風馬尚  
辱臨之不勝懇禱之至謹狀

祭文

祭飛蝗文

粵惟此州百道從出調度之急膏血既枯懸望此  
秋以紓日夕沴氣所召百騰踵來種類之繁蔽映  
天日如雲之稼一飽莫供道路嗷嗷無望卒歲考  
之傳記事有前聞魯公中牟今為異政貪墨汝罰  
詎曰弗靈言念茲時瀕於陸沉吏實不德民則何  
辜歲或凶荒轉死誰拯敢彈志願神其憫之

為第四女配婚祭家廟文

維太歲辛亥十二月丙辰朔十有四日巳巳孝曾  
孫元某謹以家莫敢昭告于顯曾祖忠顯府君曾  
祖妣王氏顯祖朝列大夫銅山府君顯祖妣河南  
縣太君趙氏顯伯考贈中順大夫東嶽府君顯伯

妣河南郡太君王氏顯考廣威隴城府君顯妣河南縣太君張氏先以庚戌八月為第四女擇配得世官張氏之長子興祖作婚家居龜蓋叶吉今正是時廟授有儀式仲度告尚饗

中令耶律公祭先妣國夫人文

維大朝癸卯歲八月乙巳朔五日己酉哀子某謹以家奠敢昭告于先妣國夫人蘇氏之靈負簪釵累貽福庭闈龜筮告期迫於衰事尚假殘息勉瀝血誠惟先夫人系繇鼎族天作之配孀於我家婦德有光母儀克備彤管所擬於古無慙維我嚴君蚤逢昌運仕非為己義不及私家政所由倚之中饋悉力一志以濟時康寅亮天功實資內助謂當陽報俾壽而康如何盛年奄棄榮養相彼庶品資於坤元得一靡常倣焉傾圮孰是榮獨託體何從創鉅痛深百賈奚贖人皆有母今我獨無哀哀吳穹忍此荼毒終天一恸五內崩離嗚呼哀哉伏惟尚饗

題跋

跋國朝名公書

任南麓書如老法家斷獄綱密文峻不免嚴而少

恩使之治京兆亦當不在趙張三王之下黃山書如深山道人草衣木食不可以衣冠禮樂束縛遠而望之知其為風塵表物黃華書如東晉名流往往以風流自命如封胡羯末猶有蘊藉可觀閑閑公書如本色頭陀學至無學橫說豎說無非般若百年以來以書名者多不媿古人宇文大學叔通王禮部無競蔡玉相伯堅父子吳深州彦高高待制子文耳目所接見行輩相後先為一時任南麓趙黃山趙禮部龐都運才卿史集賢季宏王都勾清卿許司諫道真為一時麗許且置若兇承音正書八分開闕以為百年以來無與比者篆字則李陽冰以後一人郭忠恕徐常侍不論今卷中諸公書皆備而竹溪獨見遺正如鄴中賓客應劉徐阮皆天下之選使坐無陳思王則亦不得不為西園清夜惜也歲甲午三月二十有三日書

題樗軒九歌遺音大字後

胙國公詩筆圓美字畫清健南渡以後揚趙諸公無不歎賞有不待言者公家所藏名畫當中秘十分之二客至相與展玩品第高下至於筆虛筆實前人不言之秘皆纖悉道之故時人推畫中有鑒

裁者唯公與龐都運才卿李治中平甫三二人而已子意公畫亦必入品而世未嘗見蓋詩與畫同源豈有工於彼而不工於此者如前所書九歌遺者謂非李思訓著色趙大年小景可耳九歌遺音易西山前東山蒼露千章竹萬竿頭雲自開香在珠欒春蘭立玉峰前水一鴻鵠飛深淵開正大三年季春二十三日為松庵書

跋閑閑自書樂善堂詩

人皆有兩足不踐荆棘地人皆有兩手不刺虎兇齒如何身與心擇善不如是從善如登天從惡如棄隄而於趨舍乖知之不審耳盜跖膾人肝顏子一瓢水均為一窖塵誰光百世祀較其得失間奚翅十萬里所以賢達人夫彼而取此道腴時雋求世味不染指作詩銘吾堂兼以勗諸已閑閑公此詩為他人作而皆公日用之寶古人謂有德者必有言又曰立言踐行公無媿焉今日見公心畫玩其辭旨不覺歛杜生說公嘗為襄城廟學作首齋銘云言有非耶行有遠耶君子之棄而小人之歸耶銘不滿二十言而於三省之義委曲備盡可以一倡而三歎惜今世不傳因附於此癸丑六月吉日門生河東元某謹書

跋二張相帖

二張皆人豪不應以黃文士者責之書粗記姓名已為過望况工妙如此耶

跋蘇黃帖

蘇黃翰墨片言隻字皆未名之寶百不為多一不為少尚計少作耶

跋松庵馮犬書

士大夫有天下重名然其詩筆字畫大有不能稱副者閑閑公有言以人品取字畫其失自歐公始如吾松庵文詩筆字畫皆不減古人以人品取之歐公之言亦不為過必有能辯之者

跋蘇叔黨帖

叔黨文筆雄贍殊有鳳毛坡嘗云海外無以自娛過子每作文一篇輒喜數日蘇氏父子昆弟文派若不相遠俗子乃疑黃樓賦坡亦嘗辯之颶風賦亦謂非坡不能作不然亦當增入筆蹟竄之也風俗薄惡如此文賦且不論至如叔黨此帖其得意處豈亦坡代書耶可以發一笑也閏月十八日書

跋東坡和淵明飲酒詩後

東坡和陶氣象抵是坡詩如云三杯洗戰國一年消灑秦淵明決不能辨此獨恨空杯亦嘗持之句

輿論無絃琴者自相矛盾別一詩云二子真我客  
不醉亦陶然此為佳丙辰秋八月十二日題

題蘇氏父子墨帖

次公字畫端慤而靖深類其為人小坡筆意稍縱  
放然終不能改家法把國節士八大字某不能識  
其妙處故不敢妄論甲寅閏月十有七日同覺師  
大中清涼僧舍敬覽

題許汾陽詩後

眼醫許太丞彥清示其從祖汾陽君山水圖詩語  
意高妙而其字畫與明昌辭人龍鼎黃華黃山諸  
公各自名家世尤寶惜之其子右司諫道真亦以  
能書稱今以汾陽筆法較之父子如出一手生平  
亦嘗見蔡大學安世大丞相伯堅濰州使君伯正  
甫三世傳字學雖明眼人亦不能辨前輩守家法  
蓋如此汾陽守澤州日戒子云夔相任譚面周廟  
貴緘口寸陰大禹惜三命考甫走吾河東人至今  
傳誦之司諫在貞祐興定間直言極諫與陳公正  
叔齊名時號陳許父子名流在中朝百餘年少有  
似者而彥清承其後何其幸耶彥清隱於技者三  
十年技既高又所至以善良稱謂之稱其家蓋無

媿也此詩渠家青甍其實秘之當令後人知世德  
之所自云丙辰夏六月二十一日曉進河東元某  
謹書

毛氏家訓後跋語

渭南君避地中方正卿方從事洛陽之西樞君手  
書戒教以公清廉正不昧神理為言內翰王君伯  
翼述之備矣某向在汴梁婦翁提舉以宗盟之故  
與君通譜謀相好善已數十年矣兩君資稟高亮  
略相彷彿言行之間有不期合而合者提舉馳驛  
方城御史以私憤橫造飛語遂陷詔獄一僕而不  
後振無所告語書與渭南叙述始末終之以許國  
之誠嗟天地神祇可知朝廷雖復知誣染亦無為  
昭雪之者此書正卿亦嘗見示因得并渭南手筆  
細釋之私竊慨嘆東坡有言人無所不至嗟天不  
容偽壬辰之亂侯王家世之舊忠賢名士之裔不  
顏仆於草野則流離於道路者多矣大名毛氏將  
絕而復續稍微而更熾河澗九里澤及中表執謂  
不有以替之吾知中方執筆之際渭南之子孫第  
姬固已安居於雖水之上矣已酉冬某自燕還幕  
府館容勤甚公夫人子媿也獲觀世德名氏敢以

蕭辭繼於王內翰之後十一月二十六日姪婿河東元某欽枉書

跋張仲可東阿鄉賢記

東阿進士張仲可以鄉先生平章政事壽國張公參知政事翰林學士承旨高公平章政事蕭國侯公而下由文階而進者凡二十有三人既列其姓名刻之石又騰雋別本以示同志僕意以為壽公初諫立元妃李氏再諫山東軍撥地以為得軍心而失民心其禍有不可勝言者言既不聽即致相印而歸風節凜凜當代名臣無出其右者蕭公行臺東平威憲並舉山東父老焚香迎拜有太平宰相之目承旨公之死節雖古人無以加雖不見於金石執不敬而仰之自餘二十人不見行事徒記爵里僕竊以為未盡何則迨述前賢鄉里後主定任其責柳子厚先交紀近世名臣言行錄有例也至於大縣萬家歷承平百年之久風化之所涵養名節之所勸激一介之士時命不偶齋志下泉以與草木同腐者亦何可勝數誠使見之紀錄如汝南先賢襄陽耆舊以垂示永久此例獨不可援乎仲可名家子有志於學故敢以相告見貴文顯之

嘗試問之以為如何歲丁巳夏五月二十六日河東人元某謹書

跋紫微劉尊師山水

山水家李成范寬之後郭熙為高品熙筆老而不衰山谷詩有郭熙雖老眼猶明之句記熙年八十餘時畫也近世太原張公佐山間風雨有入神之妙年八十六乃終平生遺蹟河東往往有之公佐之後得紫微劉尊師尊師畫山水晚得郭熙平遠四幅愛而學之自是畫筆大進今年九十有七為門弟子郭抱質作春雲出谷湖天清畫千崖秋氣雪滿群山殊有典刑抱質請子題記因為書之此翁定襲人童非人道道行高潔而邃於玄學吾夫子謂人之生也直者於茲見之子恐後人閱翁此筆但與郭熙公佐論優劣而不知其道行如此玄學如此故表出之歲癸丑冬十月且郡人元某記

題學易先生劉斯立詩帖後

學易先生詩絕似東坡和陶不應入江西派閑閑之論定矣此詩余初到崧山時曾見之能得其意而不能記其辭搜訪一十年北渡後將還太原過東郡乃復見之鄉人王清卿家愛之深而不見之



久煥若神明頌還舊觀故喜為之書余家唐劉長卿詩學易堂舊物是先生手所校本題云壬午六月就夏英公孫儀公家本校之字畫楚楚如唐人書盤谷序又儀真令諱蹟者皇統宰相宣叔之父是先生弟昆行有詩文二冊號南榮集宣叔錄之以備遺忘亂後唯余家有之然則余於學易劉氏豈世之所謂緣熟者耶戊戌八月六日謹書

跋龍崑書柳子厚獨覺一詩

龍崑此卷大字學東坡而稍有欵束故步仍在未後四行三十二字如行雲流水自有奇趣唯其在有意無意之間故如出兩手耳

題閑閑書赤壁賦後

夏口之戰古今喜稱道之東坡赤壁詞殆賦以周即自况也詞繞百許字而江山人物無復餘蘊宜其為樂府絕唱閑閑公乃以仙語追和之非特詞氣放逸絕去翰墨畦逕其字畫亦無媿也辛亥夏五月以事來太原借宿大悲僧舍田侯秀實出此軸見示閑閑七十有四以壬辰歲下世今此十二日其諱日也感念疇昔悵然久之因題其後赤壁武元真所畫門生元某謹書

遺山先生文集卷第四十

遺山先生文集後引

正大中詔翰林院官各舉所知時閑閑先生方握文柄於人材慎許可首以元子裕之應詔朝議是之而天下無異辭蓋子之幼也已得其先大夫東巖君之指授稍長博極群書且多與名士游故於窮歲嶄然見頭角肆筆成章往往膾炙人口貞祐南遷文譽日崇作詩自名一家其於古調樂府為尤長不惟可巨追配古人而一時學罕見其匹士林英彥不謀而同目之曰元子尊之也後雖出知劇縣入主都司簿書倥偬之際不廢吟詠北渡以來放懷詩酒游戲翰墨片言隻字得者猶以為榮間作中州一集旁搜遠引發揚前輩遺美其叙事之工槩可見矣

國朝符新一代實錄附修遼金二史而吾子柔膺是選無何

恩命未下哀訃遽聞使雄文鉅筆不得馳騁於數十年之間吁可悲夫東平嚴侯第忠傑富貴而好禮者也即其家購求遺

藻指金鳩匠刻梓以壽其傳屬余為引余與子同庚甲又同在史館者三歷春秋義深契厚固不當辭然仁卿大手已序於前顧余荒謬安敢贅長語於其旁感念疇昔姑以平日親所聞見與夫同志之所常談者書諸卷末云歲昭陽大淵猷秋七月己丑慎獨老人曹南王鶚識

遺山先生文集附錄

全史文藝傳

遺山先生墓銘

祭遺山先生文

元遺山真贊

原古上元學士

壽元內翰

辨磨甘露碑

游華山寄元裕之

寄裕之

繫舟山圖裕之先大夫嘗居此山之東岩

李平甫為裕之畫繫舟山圖閑閑公有詩繼作

子端山水同裕之賦

馮圖同裕之賦 精筆足襄霍益之家物

書懷繼元裕之韻

次韻答裕之

寄裕之二首

次韻裕之見寄二首

題裕之家山圖

同裕之再過會善有懷希顏

贈裕之

元裕之以山遊見招兼以詩四首為寄因以山中之意仍其韻

同裕之欽叔分韻得莫論一字

玉華山中同裕之分韻送欽叔得歸字

九日登少室絕頂同裕之分韻得蘿字

次裕之韻兼及景玄弟

玉華谷同希顏裕之分韻得秋字

樂陽古城登覽寄裕之

送裕之還嵩山

遊丹霞下院同裕之鼎玉分得留字

送裕之官鄆下兼簡仲澤

和裕之二首

題裕之家山圖

贈荅史院從事

送裕之往許州酒間有請予歌渭城煙雨首至

寄裕之

古月一篇為裕之賦

讀裕之弟詩兼有鶯聲柳巷深之句漫題三詩其後

跋遺山墨跡

遺山先生挽詩  
題中州詩集後

金史文藝傳

元德明系出拓拔魏太原秀容人自幼嗜讀書口不言世俗鄙事樂易無畦畛布衣蔬食處之自若家人不敢以生理累之累舉不第放浪山水間飲酒賦詩以自適年四十八卒有東崑集三卷子好問最知名好問字裕之七歲能詩年十有四從陵川郝晉卿學不事舉業淹貫經傳百家六年而業

成下太行渡太河為箕山琴臺等詩禮部趙東文見之以為近代無此作也於是名震京師中興定五年第歷內鄉令正大中為南陽令天興初擢尚書省掾項之除左司都事轉行尚書省左司員外郎金亡不仕為文有繩尺備衆體其詩奇崛而絕雕剗巧縛而謝綺麗五言高古沈鬱七言樂府不用古題特出新意歌謔慷慨挾幽并之氣其長短句揄揚新聲以寫恩怨者又數百篇兵後故老皆盡好問蔚為一代宗工四方碑板銘志盡趣其門其所著文章詩若干卷杜詩學一卷東坡詩雅三卷錦機一卷詩文自警十卷晚年尤以著作自任以金源氏有天下典章法度幾及漢唐國亡史作已所當任時金國實錄在順天張萬戶家乃言於

張願為撰述既而為樂變所沮而止好問曰不可令一代之跡泯而不傳乃構亭於家著述其上因名曰野史凡金源君臣遺言徃行采摭所聞有所得輒以寸紙細字為記錄至百餘萬言今所傳者有中州集及壬辰雜編若干卷年六十八卒纂脩金史多本其所著云

遺山先生墓銘

郝經見陵川集

歲丁巳秋九月四日遺山先生卒於獲鹿寓舍十日訃至經走常山三百里已馬舛歸藁葬文酌酒哭于画像之前而已先生與家君同受業于先大夫經復逮事先生者有年義當叙而銘之詩自三百篇以來極于李杜其後纖靡淫艷怪誕癖溢寢巨弛弱遂失其正二百餘年而至蘇黃振起袁路益為瑰竒復于李杜氏金源有國士務決科干祿置詩文不為其或為之則羣聚訕咲大以為異委陸廢絕百有餘年而先生出焉當德陵之末獨以詩鳴上薄風雅中規李杜粹然一出于正直配蘇黃氏天才清瞻遠婉高古沉鬱大和力出意外巧縛而不見斧鑿新麗而絕去浮靡造微而神采粲發雜弄金盃糝飾丹素奇芬異秀洞蕩心魄看花

把酒歌謠跌宕并之氣高視一世以五言雅  
爲正出奇于長句雜言至五百餘篇爲古樂  
府不用古題特出新意以寓怨思者又百餘篇用  
今題爲樂府揄揚新聲者又數十百篇皆近古所  
未有也汴梁亡故老皆盡先生遂爲一代宗匠以  
文章伯獨步幾三十年銘天下功德者盡趣其門  
有例有法有宗有趣又至百餘篇首爲杜詩學東坡  
詩雅錦機詩文自警等集指授學者方吾道壞爛  
文曜墮昧先生獨能振而鼓之揭尤于天俾學者  
歸仰識詩文之正而傳其命脉繁而不絕其有功  
于世又大也每以著作自任以金源氏有天下典  
章法度幾及漢唐國亡史興已所當爲而國史實  
錄在順天道萬戶張公府乃言于張公使之聞奏  
願爲撰述奏可方開館爲人所沮而止先生曰不  
可遂令一代之美泯而不聞乃爲中州集百餘卷  
又爲金源君臣言行錄往來四方采撫遺逸有所  
得輒以寸紙細字親爲記錄雖甚醉不忘於是雜  
錄近世事至百餘萬言捆束委積塞屋數楹名之  
曰野史亭書未就而卒嗚呼先生可謂忠矣先生  
諱好問字裕之太原定襄人係出拓拔故魏姓元

氏曾大父某大父某父某妣某氏先生七歲能詩  
太原王湯臣稱爲神童年十一從其叔父官于冀  
州學士路宣叔賞其俊爽教之爲文年十有四其  
叔父爲陵川令遂從先大父學先大父即與厲和  
或者讀其不事舉業先大父言吾正不欲渠爲舉  
子尔區區一第不足道也遂釋意經傳貫穿百  
家六年而業成下太行渡大河爲箕山琴臺等詩  
趙禮部見之以爲少陵以來無此作也以書招之  
於是名震京師目爲元才子登興定三年進士第  
不就選往來箕頴者數年而大放厥辭於是家累  
其什人爵其句洋溢于里巷吟諷于道塗巍然坡  
谷復出也正大中辟鄧州南陽令南陽大縣兵民  
十餘萬帥府令兼鎮府甚有威惠以太夫人衰疾  
辭劇致養轉內卿令丁艱憂終喪詔爲尚書都省  
掾天興初入翰林知制誥全亡不仕而卒春秋六  
十有八卒之某月日葬于定襄之先塋前配太原  
張氏再配臨清毛氏子男三人曰某某女三人長  
適進士程端甫次爲女冠次適張某銘曰

士子賈拔爭綴緝僥倖寸祿奔走息以爲詩文作  
無益糞壤擲弃明月壁先生卓犖有異識振筆便

入蘇黃室開闢文源荆棘大蔽復完全玉擊爛  
燬長醉思盈溢瑞錦秋花亂堆積餘妬護前喘肝  
臆群犬號號共說嫉塵埃野馬為鬼域遺山岩岩  
倚天壁國史興喪是吾戰義烈不負董狐筆定襄  
高寒拓拔國馬昇歸來反玄宅有書有傳俱未卒  
嗚呼先生端可惜嗚呼先生不可得

祭遺山先生文

維年月日陵川郝經謹以清酌之奠致祭于遺山  
先生之靈嗚呼氣數之窮靡物不壞或者不論胥  
乃造物者之所在造物之所在宜莫不生而奪于  
成是理其可明邪嗚呼先生萃靈茁英羈非官學  
嶽嶽稜稜碩士鴻儒莫不震驚以為開世生初見  
公文曰是渡南河而為名公入京師而為名卿張  
關世主者洞庭之天音引岐山之鳳鳴方雷厲以風飛披鴻  
章而振纓控萬象於筆端倒河漢而一傾擣塵言  
與滯思滄網濁以為清闡斯文之洪流俾灑汗而  
淵澄而乃汴蔡淪亡蜚血凌城氣數俱盡萬化崩  
騰時惟先生獨矯首而行扼唾咳之日慧欲曙之  
星收有金百年之元氣著衣冠一代之典刑辭林  
義藪文橫道程獨步于河朔者幾三十年豈非造

物者之所在而斯文殆將興邪去魯西來華峻有  
聲天臺不芒遂入青冥筆未獲麟年未中壽而奪  
去之遽彼造物者果可明耶嗚呼先生雅言之高  
古雜言之豪宕足以繼坡谷古文之有休金石之  
有例足以肩蔡党樂章之雅麗情致之幽婉足以  
追稼軒其籠罩宇宙之氣撼擢天地之筆因鎖造  
化之才穴洞古今之學則又不可勝言人得其偏  
先生得其全天不假之年嗚呼哀哉先生雖死文  
或不死是謂亡而不死先生雖可哀吾徒無所仰  
尤為可哀也嗚呼哀哉尚饗

元遺山真贊

其才清以新其氣夷以春其中和以仁其志忠以  
勤不啻蔡辛與坡谷為鄰歌謠慷慨喜氣津津唾  
玉噴珠看花飲醇而乃藝香讀易坐席凝塵假邪  
真邪嗚呼復幾千年更有茲人也邪

原古上元學士

麟死九鼎淪萬世無孔孟文字雜糅餘扶藉不絕  
聖伊昔大觀李天王始失政中聲入哇淫吾道孰  
不競金源東北來一洗河海淨斯文甚濫觴幾陸  
土梗橫吳楚割半天瘡痍僅續命伊洛遼鸞騰朱

張立朝廷弘肆六藝學俾與日月並中原有奇才  
詞賦方鉅釘天門黃金榜赫耀動萬姓君臣此爲  
得父師此爲令或者語詩文環視驚聘聯執意元  
化精不遂入昏瞶沒發自蔡党高步出盡曼墨浸  
天壤深筆掃風雷勁絲綸帝載熙訓誥王言坐諸  
公繼踵作五執造化柄黃山與黃華雙鳳高踏蹬  
清風玉樹鳴千古一輝映有若閉閉公光彩壁月  
恒雲煙恣揮灑乾坤快歌詠寶壘金聲鏗矯矯銀  
鈎硬楊馮李雷麻巖嶸峇侶應五行連麗天四海  
望而敬備哉遺山老青雲動高興文林剝荆棘翰  
府開蹊徑秋空玉琴張搏拊分雅鄭三閩一曲歌  
忽喚劉伶醒哀哀汁蔡亡六合爲懸整此老獨巍  
然聲價駭群听振袂凌孤霞珠壁飛教警入宗一  
伐代文天賦百年風紛紛夸咄子相撫爲嘗評自  
謂人勝天詎知天已定行行野史成共爲天下慶  
作噩連子月投我以照乘荀屋鷺見斗寒焰忽蟪  
亘經也生已晚弗及拜先正窮閭一束書十載成  
壁甃學問苟有歸貧窶安足病今乃得漢渤問津  
有龜鏡華我登龍門縷我出虎穿搖挫風中旌茲  
始見依凭緬思先世澤于今果無竟嗚呼世道衰

欲語寒淚迸何時倒銀漢與世開馳龍昂頭冠三  
山俯瞰旭日歲陸海關文源生民共涵沐

壽元內翰

秋風颯颯吹庭梧長庚吐焰橫太虛遺山先生曳  
長裾醉鞭黃鶴來天隅蹴開化窟肆搜取五十倒  
瀉明月珠九原呼屈原底事爲焦枯青雲問李白  
佳句今何如百年元氣一盃酒千丈光輝萬卷書  
高卧一曲歌聲價百碑礫雲微奏玉宇春鶯  
花柳鳴天衢惜哉時不與命偶西周削弱爲東都  
明堂一柱入樵採安得致主爲唐虞遺山山頭有  
舊廬歸來亦足爲歡娛既有墮地風雲之驪駒又  
有竹花弄語之鷓鴣仰天一笑萬事足倒騎箕尾  
遊蓬壺

辨磨甘露碑

國賊反域自爲功萬段不足仍推崇勒文訟德召  
學士澤南先生付一死林希更不顧名節兄爲起  
州第親刻省前便磨甘露碑書丹即用宰相血百  
年涵養一塗地父老來看聞流涕數搏黃封幾斛  
未賣却家聲都不計盜據中國責金源吠充極口  
無醜顏作詩爲告曹听翁且莫獨罪元遺山

游華山寄元裕之

趙東文見浚水集

我從秦川來遍歷終南游暮行華陰道清神明雙  
 眸快東風一夜橫作惡塵埃咫尺迷嵩幽山神戲  
 人亦薄相一盃未盡陰霾收但見兩崖巨壁持劍  
 戟流泉夾道鳴琳瓊希夷石室綠蘿合金仙鶴駕  
 空悠悠石門割斷一峰出婆娑石上為遲留上方  
 可望不可到崖傾路絕令人愁十盤九折羊角上  
 青柯平上得少休三峯壁立五千仞其下無址榜  
 無倚巨壺仙掌在霄漢銀河飛下青雲頭或云奇  
 勝在高頂脚力未易供冥搜蒼龍嶺瘦苔蘚滑嵌  
 空石磴誰雕鏤每伶風自四山而下不見衣惟聞  
 松聲萬壑寒颼颼捫參歷井到絕頂下視塵世區  
 中囚酒酣蒼茫瞰無際塊視五岳芥九州南望漢  
 中山碧玉簪亂抽况復秦官與漢闕飄然聚散風  
 中滙上有明星玉女之洞天二十八宿環且周又  
 有千歲之玉蓮花開十丈藕如舟五鬣不朽之長  
 松流膏入地盤蛟虬采根食實可羽化方瞳綠髮  
 三千秋時聞笙簫明月夜芝解羽蓋來瀛洲乾坤  
 不老青山色日月萬古無停軫君且為我挽回六  
 龍轡我亦為君倒却黃河流終期汗漫遊八極乘

風更覓元丹丘

寄裕之

久雨新晴散痺頑一軒涼思坐中間樹頭風寫無  
 窮水天末雲移不定山官味漸思生處樂人生難  
 得老來閑紫芝眉宇何時見誰與嵩山共往還

繫舟山園裕之 先大夫嘗居此山之東

岩

山頭佛屋五三間山勢相連石嶺闕名字不經從  
 我改便稱元子讀書山

李平甫為裕之畫繫舟山園闕名詩

繼作

揚雲翼俱見中州集

名利走朝市山居良獨難况復山中人讀書不求官東  
 岳有佳致書室方丈寬彼美元夫子學道如鸞瀾孔孟  
 澤有餘曾頽膏未殘向來種德深直典山根蟠之子起  
 其門孤鳳騫羽翰計借聆爾耳平步青雲端榻來遊京  
 師士子拭目觀禮部天下士文盟今歐韓一見折行輩  
 殆如平生敬舞雩諫春風期著曾點冠五言造平淡許  
 上蘇州壇我曾讀子詩一倡而三嘆世人非無才多為  
 才所謾高者足詆訶下者或辛酸吾子忠厚安不受薄  
 俗漫晴雲意自高淵水聲無滿他日傳吾道政要才行



完會使茲山名與子俱不列

子端山水同裕之賦 李純甫

蓬鶴歸來萬事空人間無地着詩翁只留海岳樓中景

長在經營慘淡中

馬園同裕之賦 韓筆定襄蓋益之家物

天馬飛來不苦難雲屯萬騎開元間太平有象韓生筆

曾見真龍如此開

書懷繼元弟裕之韻 趙元

著龜不須問我命只自知多生墮宿業世網纏綿之驛

駒受羈銜大笑跛龍遲敬亦復笑縮首甘自卑何必參

漆園物理本自齊擯柳可消毅志士常苦飢穡之萬人

堆猶不免此議我懦更多病區區欲何為鍾鼎不可伴

蒸藿分所宜安能如黃蜂為人填窠脾清白儻少污聲

後入何所貽初學悔大謬篆刻工文辭年未厭酸鹹淡

愛間潛詩變詩固自佳其如未忘機回頭四十年言動

俱成非誰能逐世利日久常規規惟當種溪田與子當

相期

窓扉有生意山間春到時長安冠蓋塵游哉不如茲西

鳴將有事老農真吾師不見元魯山夢寐役所思遺山

乃其後儂處政坐詩時復一相過那眼珊瑚枝寄書多

攜來為子卧聽之

少從白衫游氣與山崢嶸一念墮文字賜腹期拄撐多

撥天所災室暗燈不榮拈書捩頭睡鼻息春雷鳴泰山

與鴻毛何者為重輕蹄弘與瀚解誰能較虧盈如能平

其心一切當自平

嵩箕有奇姿出雲何悠然雲山足佳處留客今幾年有

子羅讀書求種山間田粟里愧淵明香山慚樂天二老

已古人相望雲泥懸得酒邀月來對影字自憐攝衣欲

起舞稚子不須牽

次韻荅裕之

薄暮敲門喜客佳水荈風絮共天涯行藏一話傾心胸

古律三詩淬齒牙朱研不妨開度日青山終得共食霞

扶持老病須君輩滿地豺狼萬里家

寄裕之二首

泪汝女塵滿鬢霜買鄰心樂古清涼悶陪老秀春行脚

悶欠懼元夜對床正欲脫身衣免窟誰能隨世轉羊腸

南陽未必嵩陽好滿眼交游即故鄉

老懶愚軒百不能飽語人意於冰清狂舊日耽詩客

灰朽而今有髮僧眼舉巾衾三犬日話迤雪屋一龕燈

新開一徑通蘭若斬盡清涼舊葛藤

次韻裕之見寄二首

魚入深淵鶴在陰飛潛何幸遠庖砧乾坤萬里雲無迹  
冰雪三冬栢有心故園鉤留清夜事戲華分付白頭吟  
華川擬作桃源隱共與青山閱古今

古屋颼颼四壁塵不堪憂獨足吟呻瓶儲有客常年慣  
家具為農近日新世味飽嘗唯可睡詩情溫苦不醫貧  
相從分我西山半欲乞驪元伴老身

題裕之家山圖

繫舟盤盤連石嶺牧馬登登削山影山光水氣相混淆  
中有元家舊廬井鴈門一開對虎場駕言投迹蒿之陽  
青山屢蹇不可將十年竟適兵塵黃東巖風物知猶在  
說與奇庵神已會一揮淡墨能似之清輝遠奇形骸外  
元家故山吾與鄰夢見不如畫圖真舊曾行處聊經眼  
未得歸時亦可人

同裕之再過會善有懷希頰 馮壁

寺元魏離宮十日來九兩前與髯婦偕齋莫少林住其  
時已薄暮諸勝不暇訪今同魏諸孫再到風煙上寺僧  
導休殿雄深肅瞻仰柱礎門限砧追琢成大壯不見塵  
琢痕瑩滑明晃朗摩挲三嘆息後世無此匠晚登西南  
亭碧玉對千丈如王官天柱如太華仙掌留宿贊公房

秀色夢餘想夜辭取不眠泉溜翠竈響悟髮今不來聯  
詩共清賞

贈裕之

麻九疇

向來三度見君詩常望西山有所思誰料并州天絕處  
相逢梁苑雪消時賢人樂古聲猶在蟹更文高世豈知  
只恐神嵩不留客春川如畫渭如絲

元裕之以山遊見招兼以詩四首為寄因以山  
中之意仍其韻

石華政可採負我孤舟蓬胡為紅塵裏撻撻槐安宮山  
間綠蘿月一照十巖空洪崖去不返清游誰與同空餘  
松根泉雜佩流無窮人心墮泥滓不如與天通拳頭視  
霄漢浩露洗心骨  
日月兩角蝸天地一粒粟老益可徑醉豈擇瓦與玉大  
笑區中人朱門弓梁肉清晚登少室月夕眺王屋紫煙  
晞我髮碧霞貯我腹溪中有白雲萬事付濯足物物懼  
幽情不獨蘭與菊  
南風入桂樹高葉碧吟嶮舉手戲攀折上與雲煙撐黃  
金間白玉遍地先晶瑩簫簫坐間發鸞鶴空中鳴浩歌  
山谷應起舞衣裳輕一尊石上酒如我浩氣盈目送飛  
鴻盡青雲萬里平

國風久已熄如火不再然流爲玉臺詠鈿粉嬌華年政  
須洗妖冶八駿踏芝田青苔明月露碧樹涼風天塵土  
一一盡象締昭昭懸寂寥抱玉辨爭竟推尾憐幸有元  
公子不爲常語牽

同裕之欽叔分韻得莫論二字 雷淵

幼安謝辟命子雲老寂寞趨嚮豈獨異時命非所度我  
久困流離一壘求負郭雖無斬敵功尚舉力田爵於少  
啓吾封四履盡伊洛有客來問津醉眼入寥廓世事久  
閉眼終日只睡昏清風何處來佳客已在門倒屣往從  
之玉色向我溫妻孥趣作具歡喜傾瓶益清夜襟被往  
共就遺山元朝譚又俳語發揮間微言懸斷漏天樞高  
嘯驚鄰垣脂合政相和意到俄孤寒恨不倒困廉矧肯  
留離樊奔騰獲珠玉披襟見蘭蓀我琳已三折醉墮偶  
全渾知無適俗韻量力仕灌園二君清廟器巾屨華豐  
尊蒼生望休息朝廷待崇尊出處既異途會合難預論  
此樂未易得此夕勿憚煩白酒舉初子黃鷄溷諸孫水  
樂喧後部山鬢秀前軒一醉萬事休商聲滿乾坤

玉華山中同裕之分韻送欽叔得歸字

洗耳頰川水療飢西山嶽山川得佳客草木生光輝未  
路風教薄此道日已微相期千載事非君誰得與歸

九日登少室絕頂同裕之分韻得蘿字

閑居愛重九佳人重相過登高酬節物少室巔峩我區  
還謝塵土爽猶出煙蘿欲如撥髻頭萬壑俯峰窩浩浩  
跨犢風雨滿冰長河日車旻紅輪天宇發蒼波指點數  
齊州如覺氛埃多我無倚天劍有浹空房遠鷺鷥時與  
渚倦翼占危柯悔不與家來結茅老巖阿歸途矚老阮  
廣武意如何

次裕之韻兼及景玄弟

名騰相煥半成尺戰退紛華旆始迴文字喜逢脩月手  
津梁愧乏濟南才等閒有酒輒共醉信口俄詩不置才  
最憶平生劉子駿紫芝可惜不借來

玉華谷同希顏裕之分韻得秋字 李獻能

玉龍落峽噴飛流空翠霏霏晚不收軟脚山堂一壺酒  
暮涼開對兩峯秋

榮陽古城登覽寄裕之

突兀高臺上古城，登臨入境兩峰巒。關河落日歲云暮，草木臨風氣未平。虎柳龍拏王伯事，天荒地老古今情。一盃欲洗興亡恨，為喚窮途阮步兵。

送裕之還嵩山

王渥

高陳不受簿書侵，清穎鷗盟欲重尋。老去宦情知我薄，閑來道念見君深。對床夜雨他年夢，滿馬西風此日心。嵩頂勝游誰得共，仙聞仙馭待知音。未句翻語

遊丹霞下院同裕之羈王分得留字

羈落豐山白水收，歲華全在竹園頭。賦詩鞍馬慚真賞，載酒林泉阻勝游。野色自隨人意遠，夕陽應為鳥聲留。仙源回首旌旗隔，一宿西風喚客愁。丹霞下寺，士夫以竹園頭名之。

送裕之官鄧下兼簡仲澤 崔遵

青燈別酒夜沉沉，力負相思自不任。閑裏更誰留我醉，與來無復伴君吟。一枝仙桂知難擬，十頃黃陂未厭深。為向荊州王粲道，安排佳境約相尋。

和裕之二首

行李西來便得君，相從回首七經春。君方備悉原思病，我亦私憐仲父貧。底事却成今日別，枯腸難著此愁新。

為肩火色真將驗，馬虎何勞更問辛。

不幸還能作幸民，十年同醉潁川春。酒船載我雖堪老，仕路有時或為貧。少室山人三日惡，夷門紙價一番新。益知衰樂終年事，未唱驢駒臯己辛。

題裕之家山圖

劉昂霄

萬里神州劫火餘，九原夷甫有餘辜。作詩為報元夫子，莫倚家山在畫圖。

贈荅史院從事

賈益謙

見說才名自妙年，多慙政府舊妨賢。物華天宝無今古，風閣鸞臺孰後先。節園道等何敢望，濟南書在子當傳。莫言老眼空花滿，及見風鵬上九天。

送裕之往許州酒間有請予歌渭城煙雨者因

及之 辛急

白酒留分袂，青燈約對床。言詩真漫許，知已重難忘。乘氣虛韓岳，文星照許昌。休歌渭城柳，衰老易悲傷。

寄裕之

青雲一別阮家郎，甚欲題詩遠寄將。好句眼前常蹉過，佳人心上不曾忘。誰家秋月茅亭底，何處春風錦瑟旁。昌谷煙霞久寂寞，歡遊還肯到三鄉。

古月一篇為裕之賦 李汾

古月天不收敵君三萬秋天孫弄明鏡光湧雲間流  
昔放逐江南州金陵女兒歌權謳草屨烏紗巾散着紫  
綺裘酒酣把玉笛直欲捫參歷井騎汗牛醉中呼兒  
擡雙舟吾欲乘流下石頭起來茫茫視八極萬里只有  
元丹丘丹丘子游人間風塵何為往復還玉華山人近  
招我九日朝帝蒼梧山

讀裕之弟詩蓋有鸞聲柳巷深之句漫題三詩

其後 兄敬之

阿翁醉語戲兒癡說着蟬詩也道奇吳下阿蒙非向日  
新篇爭遣九泉知

鴛藏深樹只聞聲不着詩家畫不成慚愧阿兄無好語  
五言城下把降旌

傳家詩學在諸郎剖腹留書死敢忘此人臨終有剖背  
贈留書之語  
上錦囊三箭在直須千古說穿楊

跋遺山墨跡 劉因 見容城集  
晚生恨不識遺山每誦歌詩必慨然遺墨數篇君惜取  
注家叅校有他年

遺山先生挽詩 閻復 見元詩

蕭寺秋風捲玉荷月明人影共婆娑誰知別後驪駒曲  
便是先生薤露歌野史夜寒虫蠹簡錦機春暖鳳停梭

秣應前日西州路常使羊曇忍淚過

題中州詩集後 家鉉翁 見文類

世之治也三光五嶽之氣鍾而為一代理人物其生乎中  
原奮乎齊魯汴洛之間者固中州人物也亦有生於四  
方奮於遐外而道學文章為世所宗功化德業被於海  
內雖謂之中州人物可也蓋天為斯世而生斯人氣化  
之全光岳之英實萃於是一方豈得而私其有哉迨夫  
宇縣中分南北異壤而論道統之所自來必曰宗於某  
言文辭之所從出必曰派於某又莫非盛時人物範圍  
憲度之所流行故壤地有南北而人物無南北道統文  
脉無南北雖在萬里外皆中州也況於在中州者乎余  
嘗有見於此自燕徙而河間稍得與儒冠縉紳遊暇日  
獲觀遺山元子所哀中州集者百年而上南北名人節  
士鉅儒達官所為詩與其平生出處大致皆采錄不遺  
而求逮矣以後御命見留與留而得歸者其所為詩與  
其人節始終亦復見紀凡十卷總而名之曰中州集盛  
矣哉元子之為此名也廣矣哉元子之用心也夫生於  
中原而視九州四海之人物猶吾同國之人生於數十  
百年後而視數十年前人物猶吾生並世之人片言  
一善殘編佚詩搜訪惟恐其不能盡余於是知元子曾

懷卓犖過人遠甚彼小智自私者同室藩籬一家爾汝  
祝元子之先度儻識演率下風矣嗚呼若元子者可謂  
天下士矣數百載之下必有謂予言為然者

遺山先生文集後序

自有書契以來以文字名世得其全者幾  
人耳六經諸子在所勿論姑以兩漢而下  
至六朝及隋唐前宋諸人論之上下數千  
載間何物不品題過何事不論量了大都  
幾許不重複字凡經幾手左搯右扯橫安  
豎置搓揉亦熟爛盡矣惟其不相蹈襲自  
成一家者為得耳噫後之秉筆者亦認乎  
其為言哉今觀遺山文集又別是一副天  
生爐鞴比古人轉身處更覺省力不使奇  
字新之又新不用晦事深之又深但見其  
巧不見其拙但見其易不見其難如梓匠  
輪輿各輪技能可謂極天下之工如肥濃  
甘脆疊為餠釘可謂併天下之味從此家  
跳出便知藉湜之汗流者多矣必欲努力  
追配當復積學數世然後再議曩在河南  
時辛敬之先生嘗為予言吾讀元子詩正  
如佛說法云吾言如密中邊皆甜此論頗  
近之矣雖倡優駟僮牛童馬走聞之莫不  
以為此皆吾心上言也若夫文之所以為

文亦安用艱辛奇溢為哉敢以東坡之後  
請元子繼其可乎不識今之作者以為如  
何或者曰五百年後當有揚子雲後出子  
何必喋喋乃爾濟南杜仁傑直序

遺山先生文集卷第二十二闕文補  
陽曲令周君墓表

君諱鼎字器之姓周氏世為定襄人曾大父萬力田為業大父慶嗣字榮甫通六經教授鄉里者六十七年鄉人尊之父丕顯字著明質直尚義好交結四方獲鹿世家有以女婢誘陝右饑民為贅壻者歲既久并所生男女皆奴之贅壻單弱無以自解著明免之示以文法及訴訟次第累為有司所直准生女從母其餘皆奪為良嘗自言吾後世當有興者君其長子也幼穎悟未十歲大父教之六經應童子舉平陽宿儒畢晉卿愛其風骨謂當有所成許之親授賦學年十六即辭家從之又二年取平陽解名三赴廷試貞祐乙亥程嘉善榜內登第釋褐徵事郎五臺主簿未幾丁母王氏艱太原行元帥府事翟德升雅知君名以便宜起復定襄承時中原受兵所在殘毀民人保聚多為脅從君時佩銀符兼義軍彈壓以為軍力不足備敵而人無所逃死豈樂為背逆凡所註誤者一切貸之縣民賴以全活者甚眾明年遷陽曲以下

遺山先生集今世行者以此本為最古惟二十二卷內中順張君碑中脫一葉末闕銘文兩行陽曲周君表佚去前半十八行蓋明時已然後刻各本仍之近見靈石楊氏本搜訪頗勤屢從金石例補得陽曲周君表闕文半首而已爰彙錄於此聊彌前隙云爾丁卯八月吳縣姜殿揚校補并記